

桂隐文集

刘诜

文硕阁

wenshuoge.com

目录

关于我们	3
提要	5
桂隐文集原序	6
桂隐文集原序	8
桂隐文集卷一	9
桂隐文集卷二	24
桂隐文集卷三	38
桂隐文集卷四	53
桂隐文集附录	61
桂隐诗集卷一	65
桂隐诗集卷二	96
桂隐诗集卷三	112
桂隐诗集卷四	138
桂隐诗集跋	175

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部五

桂隐文集 别集类四【元】

提要

【臣】等谨案桂隐文集四卷诗集四卷元刘诜撰诜字桂翁庐陵人生於宋末犹及见诸遗老得其绪论迨延佑复科举後益肆力於名物度数训诂笺注之学既十年不第乃刻意於诗古文江南行御史台屡以教官馆职遗逸荐皆不报至正十年卒年八十三王荣禄为之请於朝諡曰文敏事蹟具元史儒学传此集为其门人罗如篋所编有虞集欧阳元二序本传称其文根柢六经躡轂诸子百家融液今古而不露其蹀厉风发之状考集中有与揭曼硕书称文章期於古而不期於袭期於善而不期於同期於理之达神之超变化起伏之妙而不尽期於为收斂平缓之势若以委怯为和平迂挠为春容如学西施者仅得其曠学孙叔敖者仅得其衣冠谈笑非善学者也盖其文章宗旨主於自出机轴而不以摹拟字句为古欧阳元序亦称其文温柔敦厚似欧明辨雄隽似苏至论其妙非相师非不相师盖深得诜之用意元称其尤长於诗诗尤长於五言古体短篇所论亦允顾嗣立元诗选则称其律诗多佳句案集中近体格力颇遒实不仅以佳句见且嗣立所摘诸联如燕子楼台人影瘦海棠池馆月痕孤乃近小词君如斨刃千牛解我似车轮四角方亦江湖习调殊不足尽诜所长也诜墓志亦欧阳元作称其有古文若干卷诸体诗若干卷骈俪书割若干卷总题曰桂隐集均不着其卷数疑作志之时仅有藁本尚未厘定成编此本为明嘉靖间其族孙志孔所刊凡文四卷诗四卷而不载骈俪书割疑重刻时已有所散佚又诗末有罗如篋跋称先梓其诗十四卷而今本实止四卷殆亦编次者所合并欤乾隆四十六年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

桂隐文集原序

桂隐文集原序

昔者庐陵欧阳公秉粹美之质生熙治之朝涵淳茹龢作为文章上接孟韩发挥一代之盛英华醴郁前後千百年人与世相期未有如此者也苏子瞻以不世之才起於西蜀英迈雄伟亦前世之所未有南丰曾子固博考经传知道修己伊洛之学未显於世而道说古今反覆世变不失其正亦孰能及之哉然苏氏之於欧公也则曰我老归休付子斯文虽无以报不辱其门子固之言曰今未知公之难遇也後千百世思欲见公而不可得然後知公之难遇也然则二君子之所以心悦诚服於公者返而观其所存至於欧公则闇然而无迹渊然而有容挹之而无尽者乎三公之迹熄而宋亦南渡矣乾淳之间东南之文相望而起者何啻十数若益公之温雅近出於庐陵永嘉诸贤若季宣之奇博而有得於经正则之明丽而不失其正彼功利之说驰骋纵横其间者其锋亦未易婴也文运随时而中兴槩可见焉然余窃观之朱子继先圣之絕学成诸儒之遗言固不以一艺而成名而义精理明德盛仁熟出诸其口者无所择而无不当本治而未修领挈而裔委所谓立德立言者其此之谓乎学者出乎其後知所从事而有得焉则苏曾二子望欧公而不可见者岂不安然有拱足之地超然有造极之时乎而宋之末年说理者鄙薄文辞之丧志而经学文艺判为专门士风颓弊於科举之业岂无豪杰之出其能不浸淫汨没於其间而驰骋凌厉以自表者已为难得而宋遂亡矣中州隔絕困於戎马会声气习多有得於苏氏之遗其为文亦曼衍而浩博矣国朝广大旷古未有起而乘其雄浑之气以为文者则有姚文公其人其为言不尽同於古人而伉健雄伟何可及也继而作者岂不瞠然其後矣乎当是时南方新附江乡之间逢掖缙绅之士以其抱负之非常幽远而未见知则折其奇杰之气以为高深危险之语视彼靡靡混混则有间矣然不平之鸣能不感愤於学者乎而一二十年向之闻风而仿效亦渐休息延佑科举之兴表表应时而出者岂乏其人然亦循习成弊至於骤废骤复者则亦有以致之者然与於是执笔者肤浅则无所明於理蹇则无所昌其辞徇流俗者不知去其陈腐强自高者惟傍窃於异端斯文斯道所以可为长太息者常在於此也往年集承乏禁林陪诸公奉诏读进士之策於南士得刘性粹衷而奏之尝与论及此事後十年而遇集於云峯下又尝及之而思见乎有以相发者又後二年以书来告曰我乡先生刘桂隐氏有学有行文章追古作者而年亦七十有四矣屹然山林其书满家而远方无尽知之者因以得先生之书焉集执书而叹曰余知之旧矣而未获与之游也先生之言曰弱冠时犹及接故宋之遗老既内附犹用力於已废不用之赋论视侪辈无已及者国家以进士取人未能忘情於斯世乃益究乎名物度数之节注牋训释之辞以从当时之所为而志大言高不为有司察识又十年廼为古学而用意於欧阳子焉四方之求文者随而应之不知其沛然而无穷也此虽先生之谦辞要其大概不我欺也嗟夫以文应时者虽有古今所取以为文者古今无有异也以高才博识专业而肆志求诸昔之人者五六十年其应於今者合否不足论也吾故曰山林之日长得以极其力之所至学问之志专则有以达其智之所及知其背於涂辙之正者即有所不为知其可以传诸方来者则言之而无隐论古今成败无所蹈袭而出人意表观乎洸冈之麓青原之波不亦善於达本而溯源者乎集故极道夫欧阳子之未易知而善乎先生之有以知之而辄及於余之所欲求知於欧阳子者而着之篇也先生之文凡若干卷诗若干卷已刻杂着记序铭说等若干卷方将刻焉而先生耳聪目明心识精敏出

其所新得以为言者犹未有止也集小於先生四岁相望不远安敢以齿髮之不足而自弃於先生乎姑书此附诸篇末使观先生之文者或有取於区区之言而有所感发也夫雍虞集撰

桂隐文集原序

桂隐文集原序

庐陵刘桂隐先生以文集寄余京师余为之言曰士生数千载後言性命道德如面质古人言成败是非如目击古事其间命意修词则欲求古人之所未道而又欲不背驰古人其事可谓难矣或曰难可但已乎曰不然有一定之法而蔑一定之用者圣人之於规矩也有无穷之言而怀无穷之巧者造物之於文章也是故巧能为文章不能为规矩倘故常而为规矩者狂之於巧者也法能为规矩不能为文章守故常而为文章者狷之於法者也今余读刘先生之文温柔敦厚欧也明辨雄雋苏也至论其妙初岂相师也哉又岂不相师也哉或曰妙可闻乎曰妙可意悟耳试从先生求之有不可得傳以言者矣而况余乎虽然余所谓规矩蔑一定之用文章怀无穷之巧者庶乎近之先生文传世可必尤长於诗诗五言古体短篇尤佳因书以为之序至正七年七月日渤海欧阳元撰

桂隐文集卷一

钦定四库全书

桂隐文集卷一元 刘诜 撰赋

闻角【有序】

予久客城中朝暮闻角念岁月易徂有感而赋

孤城始秋凉月流夜悬叶鸣空疎萤入榭云鳞鳞而不风汉耿耿以西下鼓屡急而遄絶钟渐远而欲罢有声鸣噫非咽非咤节迭转而愈长哀一送而如泻於是刘子喟然叹曰兹非羌人所以愁予焉者耶鳌极四立物象两数肇帝鸿之智创忽几阅於朝暮天沄沄而如轮人扰扰以俱骛年逾年而递新日复日以犹故春花沍寒鸟栖露青山淡而无言去轨盈而成路蛾眉变而垂霜华屋郁以为墓譬栖尘之寄辙倏东西而不悟嗟此声之何情送万化以终古是以汉武欲求於飞仙秦皇行乐而无度皆无可於奈何知不可为而弗顾予欲破形息声除烦养素使斯人无昕晦之怀忘陰阳之节莽莽而行怡怡而寤可乎客有笑之曰子惟多感不求其端夫规之以龙门之桐引之以淇水之竿饰藻绘之徽异托奴隶之所刊此天地之委质曾何与於悲欢且夫王孙公子抵掌歌啸朝发五陵暮宿温圉靚粧吴娇曼舞燕妙将军胜敌行赏献庙凯歌屡扬笳鼓迭奏前营旗之太白後蹴鞠之騶褭千石一饮万金一笑岂不动於所闻忽飘吹之惊窅乃有甯生未遇单练不完翁子行歌樵路晚寒身辞家而靡适妻去室而不安东眺临淄西望秦关星月不动迢迢千山独抱志其何为乃掩扉而长叹正则去国伯奇履霜庭花寒而不吐秋风起兮吹裳天茫茫而正色雁矫矫而高翔痛所天之未遇独忍死而旁徨又若陈后初絶班姬早衰春苔緑兮生阶曙月皎兮窥帷菱监无色兰芳久摧立长门之残雪睨建章之高枝抚长夜之如年哀往日之莫追此其人闻之然後增欷填膺发恨销骨流涕而不自持也是兹声之在宇宙特羈穷不遇憔悴失意者之所独悲也彼其鸣噫朝暮者其亦安知之邪是故感不在物而在於心山阳闻笛东市泣琴闻悲笳而折骨掩琵琶而沾襟慨所听之不同亦何怨於无情吾闻太上立德其次立功其次立言苟有托於悠久又安计於岁年睠天道之有常孰能系于运迁彼视?而嗟衰凉不取於圣贤於是客主释然一笑而起庭月既半角声乃止

扇

刘子坐於山斋於时四月近晦骤暑而雨陰云伏兴风气袭宇墙颓壁溃浪浪彻曙下重箔而犹清进袂衣而复御顾视前日之扇投委四壁黯然无色若败军之士卷甲而狼藉也若已放之女掩袖而不饰也若摇落之木申严霜而於邑也於是喟然而顾客曰是何暄凉之速而疎戚之骤宠贱之殊而妍丑之异岂非其无自拔之标而轩轻俯仰皆为夫人之是制此班姬有感於絶恩而东阳长歌於憔悴也客曰夫理有乘除时有兴替睠是物之无情果何识於斯世誠於彼以未变直吾心之异视盖其为物也非有他技一主於清不以时改不以人更故其阅

宠辱傲陞黜玩世而不矜也久矣且夫凉风八月庭树始衰风惨肃而中人霜凄厉而侵帷雁横空而唳怨蛩入户而吟悲斯固见疎而遗弃矣而又闭塞成冬天地寥閴林狂号於枯梢野凄絶於行迹层冰戕而截肪崇雪缟以荐壁累裯复席丛袄叠密庭炽赭鳞履縟翠舄拥腋白之万金宴醪黄之千石燕姬温座而吹笙赵女暖歌而鼓瑟於斯时也败鸾尘掩断篴网积过目起憎推去如隙而彼亦不自以为戚及夫蕤宾届节暄老炎继山蒸火云空走赤炜炽六合之皜皜焦万状之靡靡鳞投渊而烦呀鸟栖谷而喝死肃凉台之宏敞汗流喘以竟趾恨蓬莱之难跻疑洞庭之犹沸桃笙无功蔗浆失味冰壶不足以溉吻雪貌不得以近体於斯时也提携左右听夕卧起转轻飏於怀袖扞百毒於蚊蚋手暂停而若失梦已熟而未委爱逾声色亲过父子等饮食以尤切齐璧珠以加美而彼亦不自以为喜此其为德岂不近於用之则行舍之则藏不见几微於三仕三已者邪嗟夫此世之人进退睢睢常非时而攻鑽扰秋宇之蝇飞朝乘势而炙手集权门之轻肥暮失势而热中抱戚戚而尤悲曾不悟於时命徒寤叹而神疲故夫天地之间有大寒暑殷才零落於麦墟周土废居於瓜土利有得丧之异趣功有成败之殊涂耕有丰俭艺有弃取李广数奇於侯封顔驷不遭於好武邵平晚托于市门翁子早歌於樵路慨大化之不齐难强邀而逆拒虽悠悠之奚心亦戲覩於所处苟吾初之不变固可俟於千古奈何隕获弗持顛沛失据彼小人兮何足责顾君子之是惧岂惟物之最灵曾无情之为愈言未既长飏振空朗日在树於是刘子一笑而起曰伟哉客之言也书以为赋

蜂【有序】

蜂有君臣之义朝参其一耳若徇忠死节系名教尤大则不可不之録也作蜂赋

繫顛穹之陶形兮人与物而同钧宗一本而有文兮首万国而为君惟偏全之异禀兮乃人物之絳分超羽属而独出兮异哉蜂之如人或以微而不致索或以毒而不敢亲孰知肖翹之蜚翼而能有卑尊之大伦若乃春妍景辉玄鸟来归幽岩縟绣穷林锦霏於是薨薨窺窺翁翁入洞斜紫偃月大取悬瓮将卜食以告迁亦相时而後动是则胥宇之水浒相宅之洛土也至若日吉辰良晴风燠阳其声也如钲鼓之合节其阵也如甲兵之成行出则渐密飞则载扬如罍如扇卫小子王是则就邸之支庶分藩之令主也而乃金房初建玉宇未成骈肩构度聚首经营卷然似栗是为灵台千门万户环向四开是则经始之勿亟庶民之子来也周庐既列课法爰作股负香兮成丸翼汲水兮如杓于是凝芳敌兰积润俦酪府库充溢蠹不知其几千万落专一意以上供亮竭力以诚乐命黑衣之虎贲守重门而司会惰者必杀不以小大是则交征之庶土底慎之财赋也藹藹华华一日两衙歌声雷震朝罢无譁方其旅进旅退如向如对俨降升而後揖甚趋庭而列拜比常参而宴见无更直与轮代闲日移陰王乃时巡陟高丘乎下奎印戢戢而欣欣骋非八骏扈无三军何曾蹙頞以疾首乃能省方而观民而或尾螫多辛负羸失助羣聚於穴誓无背去别瑶林兮玉树谢金谷兮琪圃无面目以偷生絶纷华而不顾於是闭口却粒垂头丧气纳一命於所天萃百万而同死盖商余孤竹之二子齐横五百之壮士也呜呼辛螫之求周诗是忧有毒维蛰春秋所戒岂知物微性至五常俱备未容仅比于蝼蚁而不识其事也可以证鬼神而质天地是故应期而朝信且礼也多思而营巧且智也效死不二志於义也割脾而施仁之惠也嗟一气之忠烈亘万古而不折事莫小於饿死尤莫大於失节胡委质而为臣兮顾背主而改辙彼瀛王事十姓兮可以人而不如物吾托蜂异以劝来世

盖不特演周公之雅而广张华之志也

咏归亭

繫青原之崔嵬维文学之奥区前忠节之驰骤後贤哲之步趋振文德於昭代深化雨於涵濡
纷洋洋而济济咸砥砺於廉隅屹宫墙之数仞接道义之通衢嗟游息其何所得遗地於榛芜
宛城南之沂泗用建亭而象诸江山穷於一览盖亦庶乎咏归於风雩也呜呼千载而上圣门
此乐千载而下我亭此作剖洙泗之藩篱溯渊源於濂洛虽兴废其何常初无问於今昨盖将
示天下之广居振士林之教铎而岂眺达之娱观美之托也哉且其风和景曛万物欣覩勃郁
萧森生机毕露则青春之将暮也亦有良朋与子偕行单袷初试微凉乍生则我服之既成也
章甫峩峩衣裳楚楚来游来歌爰笑爰语何啻冠者五六童子六七其侶也鹭渚泱泱可濯可
湘温乎沂水之净也螺峰苍苍可息可藏郁乎雩林之盛也於以濯我纓於以陶我性吟风弄
月之襟怀随柳傍花之意兴登斯亭以玄览尚彷彿於见圣悟狂点之雍容本胷次之昭莹岂
世异而事殊固合辙而同径彼醉梦之纷拏何莫践於斯境於是抚事兴怀因名致慨亭夕阳
而愈悲亭山陰而安在连昌之宫檻半欹北苑之沉香速坏华亭之唳鹤不闻湖亭之?鱼何怪
是皆逞富贵於一时擅风流於当代纵情肆欲欢虽盛以奚为极侈穷奢志虽得而愈殆曾不
若此亭翼然圣途伊迓建梁栋於仁义立磐石於忠信礼乐其檐翬诗书其封畛可以乐日用
之经常扫人欲於净尽如天理之流行等气象於尧舜倘圣贤之可归庶努力於日进乱曰咏
归之乐着於经兮世远人亡示以亭兮我造斯亭咏而归兮希圣希贤殆其庶几兮

兰亭【有序】

越州山陰县西南二十里为兰渚越王种兰处也晋王右军谢太傅兄弟数往造焉筑亭其上
名曰兰亭永和九年上巳日右军与同游者四十一人流觴曲水倡咏其间不能成诗者十六
人时方尚幻以一死生齐彭殤为高右军独有感於修短之数慨然叹老之将至岂以司马氏
之偏安不自奋者政坐沦溺於老庄之无为乎观其与谢安石殷深源书其经纶为何如哉而
蹉跎出怀祖下兹其所以峻誓松楸也而晋事不复振矣呜呼历今且千载无能为兴怀者独
知宝其遗帖可慨也作兰亭赋

道溯江而东下兮澹沙树之云堤莽监湖之芜絕兮访古县之会稽青山四列而肱分兮断云
曳空而横犀曲水婉而萦流兮急鸣湍之清漪湖柳高而翳翳兮羣莺飞而乱啼吊旧游之榜
舟兮得种兰之故基睠羣贤之伊昔兮伟一代之雄姿当春景之浸暮兮暖天宇之和熙造斯
亭之修禊兮曰畅叙乎幽怀虽其怀之不齐兮乃俱集而同嬉寄飞觴而傲八极兮托高襟於
赋诗或短长之兼就兮或数语而争奇独可疑於猷瑰之长才兮何乃竟日而无一辞岂欲托
於昏冥兮寧甘受於罚卮嗟神州之陆沉兮莽宫门之铜驼自一马之既化兮豢百年之江沱
吊誓江之无人兮落日澹而水扬波洒新亭之囚泪兮邈故陵之山河诚谈玄之误国兮千载
为之痛歌胡当时之悠悠兮玩杯酒以自多览光景之留连兮忽不知其英气之消磨彼诸贤
之沦溺兮亦孰责其不可惟右军之懿美兮迴独立乎江左曾内史之足淹兮郁酒酣之磊砢
闻广陵之管角兮拥千骑之駉駉【怀祖嫌隙亦以此】慨非才之不如兮怪大钧之谁播指

莹楸以为证兮高出处以在我痛死生之俯仰兮彼岂叹老而嗟衰诚歔歔之有寄兮谅同游之孰知诮东山而为书兮危深源之北师彼其区画之何如兮奈流落而不施嗟千载之不能一慨兮独以遗墨而见奇彼敬宗之何人兮顾以金石而况之伟虬髯之英雄兮睨六合於一笑曾用舍之不论兮付兴亡於不吊乃眷恋於末技兮死不忘於兹妙炯玉匣之深藏兮以为昭陵之祸召作兹赋以为伤兮遡长风而孤啸

栖深【为王举山作地名举子冈】

六合之内八荒之壖匪臯匪涘不甸不?有冈伏兴望之?绵盖得名於吾党而托之乎槐黄之一言於是过者喟然而语曰此非姓溪以冉而名谷以隐者之盘旋邪非科目之已远而寄想像於千年者邪爰有有道筑居其巔问其所从来则盖元佑之初元矣青山寮屋古木横天篱援翳涂藤茝入椽内环洗墨之池外遶种秫之田竹分径造之所蔬满日涉之园春林雨过花涧流泉孤莺自啼时鸟襍喧清风坠簾永日闻蝉焚香起坐茶味入禅微凉萧瑟林木自弦临清赋诗脱叶如船天寒酒熟梅花入檐峰雪成画墙瞰献暄阅大化之迭序甘穷居以为缘族四世而挾庑乃构寛於厥先折干云以为栋逝栖乌而为櫺鸣机隐於内溜藏籍蠹於西偏文公题记韵士赞篇风月不待献而弥胜江山不假饰而增妍念百年之种树终自庇於本根又歌聚之从起待千载之云闻岂飘风之昼语异茅雨之夜眠比隐橘而非幻拟种桃而非仙於是先生欣然而笑曰深矣吾之栖也可以骄元亮而傲玉川矣客有难之曰吾闻浅深表里所分山之深也在谷水之深也为渊今先生之居介毫末於一马寄圭粟於大千南匪其中北匪其边而先生何所指以为深焉左眺高闌右接广阡喝车望其林翳饥袂想其炊烟而先生何所恃以为深焉穷搜邃讨谈空说玄问字填巷受经欵门使昧者欲赴於其燧辨者欲磨於其坚而先生何所匿以为深焉先生曰夫泥於迹者常有所穷游於化者或有所全吾闻至人入水不濡入火不热会光尘於一隙混泾渭於同源故卜於肆者庸知其非隐行於市者安知其非仙嵇康好琴灵运游山伯伦酒狂张旭草顛岂所托之或浅常不离乎人间顾吾深之安在诚可指於目前彼山林之委块亦身外之附悬於是客莫能诘走若季咸望其栖而不见渺山水之苍然

铜雀台【有序】

建安十五年曹操作二台於邺高入云汉其一冶铜为凤凰置焉因名铜雀黄初元年操死台成未十年计其驰骋兵间观游之日复几何哉遗令婕妤美人朝晡上脯糒朔望作妓乐世以操留连妾妇分香卖履区画家事伤於纖悉乃平生奸伪死见真情为其心之陋也或者谓不然以为遗令藏其所大欲而徒及家事乃操之微意实为汉贼而身享汉臣之名此固足以窥奸雄之心然愚以为操之不逊显白於世久矣求九锡备仪扈諷陈羣董昭以劝进特以清议未泯迟之岁月间耳不谓不得逞於陇汉归未及洛而没盖平生心事竟不得遂故流涕不自制而寄爱於幼子少妾焉观其欲常设妓乐及使人常望西陵不能割生前富贵如此而肯为盛德事乎陆士衡以为长算屈於短日远迹顿於促路斯言得之矣使其未死彼固不能忍以待其子也又岂孔北海荀文若之清议所能刼哉作铜雀台赋

出相州以西鹄兮澹落日之榆堤青山如浪而四走兮麦田田而陵陂飞鸿去而杳杳兮寂人家其掩扉荒败砾之草生兮为铜雀之故基问兴废而下马兮故老告予以不知嗟阿瞞之鹰扬兮伟一代之雄姿以回天倒日之为力兮果何强之能支揽英豪以自翼兮才各适夫所施每磨盾而作檄兮亦横槊而赋诗由意气之溢出兮傲甲兵而笑嘻嘻搜六合之名材兮起铜雀之崔巍俯云雨之在下兮招飞仙而过之高鸟度而畏金碧兮行人睇而愁思啾丝管於天上兮天风散而浮云悲席不温而介马兮曾登览之几时哀短日之不待兮徒以施乎總帷执姬侍以荏苒兮又孰知其雄心之歔歔以爱子而托人兮彼岂愿於崦嵫盛妓乐以媚死魄兮固富贵之未忘岂不知在其子兮诚一念之未偿奄天运之至此兮销平生於哀肠嗟後來之议论兮举不究其所藏慨睨鼎之旋踵兮曾不如獅子之长西陵噉乎高原兮莽疑塚之苍苍高台落而为土兮曲池咽乎蛩蛩独遗瓦之在人间兮尚磨涅而不亡论斯人之自树兮固其功之孔隆何羣雄之蛸起兮由立己之未公譬吾身之来盗兮又以摧盗而为功矧不可以控搏兮未若秉乎厥衷耿予心之踌躇兮托余悲於林风

白雉【二篇有序】

白雉之出必为太平故见於建武永平与成周之际皆是时也五运各从所胜周汉皆尚赤为火德故周兴而白鱼荐兆汉启而白蛇献符而白雉亦在周汉为盛白金也岂非其所制伏者效顺即为瑞与然周汉之瑞本一而世称越裳重译特加显则君臣具庆使然夫雉文绣者也变为纯洁非世道休明不及此其在元始亦为白水真人发祥耳若出非其时而附会奸臣以取安汉之号则岂足为灵物也哉作白雉赋

抚万物之不齐惟莫变於其天鹄不日浴而常皜乌不日墨而常黔既各安於其素虽纯质其犹足妍矧能其天之所不能不待脰而千里以传盖有化而役之以为异彼固莫知其然而然方周鼎之既定万邦康而屡丰年海坚珉而不涛六气无盛衰之偏薰六合以一赅果何质之不迁乃有越裳万里殊国迢迢三译献雉之白林邑扶南暑涉寒蹶玉鞬失辉霜警无色天空月朗雉扬影?闾阖晓登两袂皆雪於是混瑶殿照璿闕过灵台而鸟愧其鬻历西離而鹭耻其洁倾凡羽以无羣恨征埃之犹湮梦华虫之前身洗组绣之余刼念光华之不贷岂咏歌以自蹈虽改容而废常亦反素以为德委微质於天地为至治之先哲吾闻五德相胜有顺有逆当赤精之丽空宜金质之从革故周汉之千年效祯祥於一轍惟成周之至盛弥显白於史策乌流屋而祥呈凤鸣岐而瑞列皆天意之使然擅古今之奇絶倘效顰於美新是媚奸之造物幸圣朝之在上集六合之奇祥矧羽仪之无媿庶及时而翱翔

览太极之妙化兮产灵物之何奇伊缤缤之仙雉兮孰剪瑶琨而为之姿惟南荒之极炎兮薄陰气而相持疑素模之融液兮鍾羽毛而不违故炎以为绛冠紺趾兮陰以为霜翎雪衣遡玉京而铸肤兮素戔戔而琢肌然不能以超寥廓兮托人间以为依岂无见而偶出兮兆治世之德禧惟成周之圣明兮烝至治於鳧鷖充协气之薰洽兮合宇宙以为祺海鯢伏而不波兮风不鸣条而雨时衣裳皇皇而端拱兮万国朝而宾四维彼越裳之垠絕兮渺万里之航梯献兹禽以为瑞兮羌能使其天赋之移恍前梦之窜蛮兮拔文身之陆离洗千仞於南溟兮为盛世之羽仪望同羣之采采兮立縞素之绘絺当天寒而月薄兮发孤鷺其谁知至汉中而後出兮

聊亦与世道而游嬉彼新莽之执以为乐兮固将以白头大夫而待之忽千载之不闻兮寧不老死於山巔而水湄岂风日之清明兮顾不惊猜於童儿誓重来之何日兮指西风以为期幸麟趾之再应兮凤喈喈而鸣岐舍兹时而不随兮复将何为为招雉之歌曰结金精兮构乾坤应明德兮仪九天慎尔时兮燕雀先

端溪石【有序】

石者天地陰阳之核也故蘊神毓异无所不有砚之为石又其精者以天地之大而产石之为砚不过数处而端溪又为天下第一则山川英淑之气寒暑禪代之积千百年间凝而为兹物亦甚不易矣吾闻端溪取石者常千百夫挽纆而不能使之出或雷电晦冥失石所在则知造物非无意於斯石也夫以其生之不易出之不轻则其出也足以经天地而饰皇猷亦必有相之者矣不然造物之宝是也将何为哉作端溪石赋

伊鳌极之肇判兮奠地维於四方东蘊和而清在西兮北重劲而南燥刚旷南荒之呀裂兮胡为而为石之乡盖以润而为骨兮伏陰气而补乎阳中藏太古之雨兮云为白而山为苍郁古端之最高兮出衆峰而为之纲烂柯矗於穹汉兮扶卢南走而昂昂斂灵杰以归物兮贤哲泯而石彰三岩宵而如厦兮北尤萃乎积气之藏百霆震击於上兮海飈激射於其旁夜霜寒而月横窥兮白日经天而无光厓枝怪草以晦暖兮孤猿嗥而寡鹤悲翔龙湫陰黑而袭人兮厘千岁而为璜气不逞而结兹石兮故有温栗而坚强縋羣夫而下凿兮散鬼火於陰房神蛟奋其牙兮螭吻孔张丰隆砰怒兮水浪浪羌不知人世之昼夜兮比其升如昧谷之扶桑割云紫以淋漓兮北斗隐而布行搃文武而夺其马肝兮凄冷血乎老茕抉鸕眼之??兮尚如吊夫稠父之亡或刻为太皞之规兮或琢而象夫琥璋或搢势以为穹兮或恢形以为长散奇用於天下兮举有砺乎文章锦帆毳匣之万里兮进其尤良历木天之荡荡兮置之玉堂清风永日之娱人兮净几明窗燎西掖之椽烛兮凝细氈之清香绛人陈玄以为侶兮发之以将军五色之芒草黄麻之六经兮施一尺於八荒陈太平之盛典兮軼坟谟而度黄唐笑十眉之春红兮浮远山其断肠鄙西陵之故瓦兮出委麦之凄凉龙尾失色而愈羞兮凤珠伏而不敢翔构元气於未有天地兮老空山而待明昌忽奎运之昭回兮一日出而为世祥地爱宝而克靳兮鬼神呵而周防及斯世而不自用兮将何以为造化之常乱曰五色补天精甯南兮数千万年一见於人间兮龙马奋突河图还兮

歌风台

辞有发於慷慨兮读之千载而犹壮迹有沦於幽微兮览之千载而犹悲况荒烟野草仅足以泯英雄之迹而未足以泯其志朔风枯木不足以继激烈之志而犹足以想其奇予尝溯吕梁望黄楼舣舟乎泗水之汭吊古乎义帝之域想拔山者为百夫之雄而挟义者有盖世之积方喟然而未已客有谗予曰徐北为留又北为丰又东北为沛歌风有台炎刘之兴於是乎在盍亦少游目乎予乃涉百步之洪赴六合之役至则登临故墟俯仰陈迹访父老而讯之曰兹非会还师慷慨言怀者邪酒酣击筑令儿习和者邪兹非游子故乡魂魄犹思者邪是台也肇迹何年垒土谁手岂佐酒故人创之以为汤沐之荣邪抑後世喜事者筑之以寓怀古之情邪

戴白堵立对语率诬登高舒啸莽苍烟芜嗟夫三代之下得天下以正者孰有若高帝者乎而今安在哉方其提三尺奋一呼风云为之改态虎兕为之前驱迨夫歌於斯也功臣顛沛越醢信殖豨方逸而未馘布已破而犹逋思猛士兮晨星瞻四方兮蒿目人知其情尽乎道旧之欢而不知其悲过乎失声之哭虽然桑枯海尘兮其辞犹若新也山摧石裂兮其志犹可识也启四百之绪业兮皆宽仁大度之基也脱斯民於涂炭兮又岂止荣一乡夸一时也威加海内兮安不可以忘危也以四方之为忧兮又岂儿女之所悲也彼沐猴之昼绣兮曾何足以与於斯也

闻莺

惟太初之赋物兮何万类之殊能草与木之多态兮固块然而无情鳞与介之扰扰兮或有情而无声蛙蚓浊而强聒兮蛩蛩哽而悲鸣雀喧夫朝日之暎兮猿哀夫晨霜之清夫固有厌而弃去兮亦有感而难为听咸机籟之不能自已兮孰能槩之以悦心求衆声之最和兮窃独喜夫仓庚於时夏日逾永杨陰弥堤山园暖润樵熟麦齐乐天宇之肇霁杂野雉而羣飞长廊缘户疎帘四垂方书倦而进茶乃据几而拄颐忽有声之啾啾复绵绵而若随感流转之如圜使予衷之倏怡於是思求友於周雅怀好音於卫诗顾谓童子曰汝岂识之邪其喜而扬者宴宾之鼓簧也其浏而清者升仙之吹笙也其纾徐而有余者魏工之歌累珠也其足乐夫人之情者韩娥之回曼声也凡厥有生同役於气兹岂离於羽族独其声之迴异岂中心之有嘉故语言之清粹将前身之麟凤长无憾於天地幸及时而为声资吾侪之咏戏固前修之可怜终见贷於俎味凉翱翔於山林诚焉识於沦弃作斯文以为赏庶足表於俦类

芳草

策予马於旷垠兮淡旭日之暄霁爰浮游以搴芳兮渺沙树乎云之际荒畹蔓而肱分兮兰猗猗兮此何地揽长洲之积菝兮纫峭屿之崇蕙税驰軼而怊悵兮芬霏霏兮袞袞诚乐游以忘归兮耿中情之所寄羌王孙之翠幃兮啾燕赵之丝吹陈金牺与琼爵兮理清曲於鬢髻倾良辰以行乐兮一日而尽夫百卉涉朝云於银浦兮夕弄晖於琼田捐幽谷之宝玦兮横芊绵之青钿纷擷掇以盈?兮咸竞秀而鬬妍愧兰芷之不足以为芳兮独有取乎康乐之髯萧燎焚以祀帝兮艾朝进而杂佩莽玉鈎之青合兮承朝露於輶輶蹇连昌之金铺兮翳落藓而荐黛彼胡修而自致兮此独与世而偈背同托根於天地兮终薰蕕之何在耿六合之流徙兮诚若异夫憎爱胡不变易以取好兮犹自恃而焉待缤纷以杂蹂兮旷千古而谁采岂无人而不芳兮独惕惕以自揣含幽情而不昧兮虽隄侧其孰悔嗟孔圣之援琴兮抚幽幽兮一伤惟屈子之好修兮袭之以为佩纓既圣贤之知心兮又何必求乎举世之知也虽造化之若无所别兮未必丑好之果可以欺也幸年华之未暮兮尚可充乎佩帋诚人间之不合兮吾将遡乎清都而荐之

瑞莲

遡青原而西骛踰北郭之十里横溪漫漫重阜伏起层轩危榭东縵西峙吾伊出竹行者为喜

问其间之何人知夫子之洵美万山挂颊堂有流水播播其渠濺濺其沚衆芳绕而成宫羣碧茸以为屺当炎云之散漫走峻碧之赤炜黄尘涨於门衢玄阊隔以尺咫忽芙蕖之效祥葩一本而并蒂矗万花之如云何此美之独异於是耆幼羣观宾游聚诣飞盃赏胜援笔赋瑞记同干於天泉歌合欢於西内羌蓝田之连璧胡驟获於不艺岂仙人之双盘犹抗立於千岁秦环不解丰剑同气高疑聯冠俯若骈袂相向如揖相依如醉颓阳亚影轻雨对泪烟墩增妍露墅助媚乃若嗽色在树清风被兰娟擢秀以并洁屹竞色而两难泫袖唾以相眩失增成之班纨此其态也而未离乎尘间零露试玉凉月流丸澹同心之莽莽落连佩之珊珊渺所思兮湘水望苍梧而不还此其意也而未足以穷造化之端嗟夫太和之在古今常易类而难偕睨水火之异质企参辰而无涯偶不足以胜奇迨其遇而非侪遡重华之濬美睠庠亭之可怀怨乘舟之秋风歌不容其汉淮丘与轲兮不并周与召兮犹难偕纷是卉之何情忱矫薄而愧乖同光和羲比洁夷齐秀出元朗芳压云机木连理而让瑞禾同颖而避祺鍾衆美於一千合二妙而无倪抚六合之旷垠胡君宇之若私念祥异之有兆若春蒸而云滋彼智者之未覩每托物而先知根盘盘以信厚葩采采而纷披倚庭柱而挥麈傲俗子以厥儿紆紫蓬莱泛红昆池梯太华之万仞送水天之千枝暖此和於天地麦两秀而九芝然後乘太乙之舟踞千载之龟酌大湖之酒而歌先生之诗亦宇宙之一奇也

记

吉安兴学

今天子在阡务欲以教化作新斯民诏书每下必首及择守令勉学校甚盛意也迺至正三年秋燕山高侯志自怀庆移守庐陵既下车祇承德意以学校为先务凡所以育材成化者朝夕究心焉先是庐陵後学多事章句记诵之习或经旨未明躬行未粹者有之公进而诲之曰为学之道读书明义理修身积实行以为正人君子之归若但饰文华徼利达非圣贤意也乃与职训者讲论为学之次第使八岁入小学十五入大学者皆卓然为古人之规程由是士洗濯琢磨始彬彬然知慕三代之风他日又进其老宿而谓之曰朝廷养贫寒老病之士亦谓其有道有学耳若但以其年无择於市井执技有过不为士所齿者岂上意哉由是士稍稍自引退而老宿无不知廉耻者先是庙学礼仪苟简典礼者不取於生员别设礼生礼生专引赞进退而不知学生员专讲贯习诵而不知礼公曰本末一贯奈何举体遗用举用遗体哉革礼生而生员无不嫻於礼者先是府史小吏多不务学公进而谓之曰汝曹能知学始可大用今惟事刀笔苟薄利特民之蠹也使之听讲朔望与诸生相问难选其才者以次升县州府吏由是六曹两庠弦诵相闻吏始知进为士不以吏自限先是庙学钱粮虽多府曹专役任钱粮之科州县则吏胥移易侵贷上下表里为弊岁不给用公革府曹专任者责旧逋严新徵而仓廩以实讲堂旧扁振文公复取三代立学大义增揭明伦二字其前作宫墙修杏坛新仪门立课习饮膳定规着於石使後之典教化者恪有所守由是四方闻其风深山穷谷之士多褻纓鼓篋而来若徐滕淮扬江浙广海暨色目公卿之子弟为员积百二十有奇讲诵彻旦至正四年应乡试者五十有奇学外讲切慕道成材而去者不可胜数君子谓庐陵学者道德明秀之盛自宋庆历欧阳公作学记以来殆未始过此若汉唐则必无也夫所谓兴学栋宇之高明户庭之夷敞其小者也人人以儒自飭以士君子自勉其大者也博闻强记絺章绘句下笔如春涛瑞锦

学之末也少者日勉於孝弟礼节长者日修乎仁义忠信以进乎修己治人之方则学之本也公之兴学不徒事其小末而务其大本非知道者未易与言也汉言文翁兴学而汉史所载不过载其文风之盛至於德行则一语不及如公之知本者难矣公之为政能使词讼之繁剧者简赋役之偏负者平盗贼之充斥者息逋民四归桑麻被野拯饥则讲常平请赈余尽其职救火请雨竭已力不憚劳捐已俸不吝费施於民勤矣然皆推其平日所讲者行之则公学校之政善政之本也传曰君子学道则爱人非与公事母至孝视古人可不愧居家不祀他神只惟大书中字悬一室月中每率家人子弟拜焉又非公所讲於学之本与於是教授李柱与多士谋书公之美俾述其辞焉

螺川重修马驿

成周之制凡国埜之道有庐室候館以为朝聘往来之宿食其後为置邮为亭传为驿递所由来尚矣至国朝尤以是为重盖使九州四海之广大穷边辅邑之远近文书期会络绎周流如人之血脉贯通於一身诚有国者之要务也吉安螺川驿实当江广之正途駟骑之要会而馆宇岁久摧挠圯漏其黝垩者漫漶而不鲜其齷齪者沮洳而不治监郡按达拉嘉议视篆之数月始命葺而新之内则厅事完美堂房邃严棂牖虚明轩沟靚莹使之处者可游可息无周单子客不授馆之叹焉外则廊庑洞夷重门翬翼庭道隆高马廐通敞而又前植花竹环以栏楯使之来者下马周旋无郑子产门不容车之诮焉盖能上体朝廷优崇使臣之意故非惟俾庭馆之高明虽圯圯彩绘皆焕然可观则夫使者之过此者岂不仰而思之吾之道路之所历一寓一息之次无不享有国家之美意亦将图所以报称乎诗曰我马维驹六轡如濡载驰载驱周爰咨諏此古者使臣之用心也若夫邦侯之勤於其职则後之来者尚善继之

庐陵重修水驿

庐陵在城之驿二马驿附郡治之近水驿占城南之津监郡按达拉嘉议治事之明年仁政宣布民大和悦阳张陰弛百废毕兴於是二驿先後俱葺而水驿圯倾尤多黯昧益甚乃拓隘以寬易腐以劲饰旧以新覆瓦之剥者飭之齷齪之陷者隆之圯墁绘黝粲然轶於始创彩舟画舫联布弥江使客之过者与宦游之观者咸美而叹焉则监郡之克举其职善於其政可观已是驿在先宋名苍然亭国朝屡改屡辟而不废其名者存旧也今凭栏而观之大江东下万山横陈草树 珑於洲渚之间风飄漂渺於烟霭之外盖昔之扬舲而上下维舟而憩息者多矣而能如羊叔子不与登岷山者俱湮灭无闻其几何人哉余闻古人所过之地必思其地文献名节之胜游西河者怀卜子夏之风望隆中者思诸葛孔明之德则天下之山川皆进德之助也然则使者之坐是亭而得於眺览之美其必有所思乎此圣朝之所以望於其臣子者也若特视此为一饮食一止宿之寓诸君子岂其然乎

二程先生祠堂

圣人开天地不言之秘贤人开圣人未发之蘊是皆神化之所蓄至理之所待天之所以扶持乎三极纲维乎百代也故其人或旷世而一见或接迹而相承或出於一家比境之间或合於

殊乡异域之外非天下人心之所能预拟者也自伏羲得河图画八卦旷千有余年而文王周公阐之自大禹悟洛书发九畴亦旷千有余年而箕子武王明之自夫子会河图洛书之妙集六经羣言之成又百有余年而孟子继之又旷千有余年而周子二程子起於一时凡图书之絕学孔孟之遗言遂大明而无余蘊呜呼是数圣贤之作时之或久或速地之或远或近皆天地之数与圣贤之心默相扶於冥漠之表天地能启圣贤之生圣贤能续斯道之命然天地能知数之所以启圣贤不能知数之所以生是圣贤不能知人岂能预拟哉且文章之与理学本同一源自孟子未有分也汉唐以来文章盛而理学泯至宋初文章复大盛微周程理学亦泯矣谓周程不关天地之数不可也然二程之学始於周子使二程子师周子由太中公始太中公得以使二子从周子自尉庐陵迁?摄倅南安始谓天地若无意焉亦不可也先是宋嘉熙间庐陵江万里来守吉遂推明二程从周子由吉先之乃创鹭洲书院祀二程及太中周子焉後十七年衡阳陈斗南来尉庐陵又推明吉之祠太中二程子是矣未若庐陵尉厅祠之尤为亲切乃复建祠宇尉厅然祠隘而旋弊皇元後至元丙子县尉李灝复作祠祠益隘又即毁像寄他祠垢秽滋甚至正元年古魏沈褒来为尉慨然叹之遂白监郡按达拉辟地於尉厅之右构堂三间前环广庭傍列斋舍高明疏敞祭有余地诵有余屋可谓盛矣按二程子实生黄之黄陂尉廨而黄州不知祀二程太守李说始为祠紫阳先生以为黄州诮则黄陂尉廨不祀太中可知闻其所谓思贤堂者皆委废不治而吾庐陵祠若此岂非官政之善而风俗之美与沈尉固可书也助其成者萧文孙宪孙亦可书矣

吉安重修三皇殿

自古有天下者莫不以医药济人为重然未有使医庙三皇若儒庙孔子者医庙三皇自国朝始洪惟累圣欲胥纳天下於仁寿可见已按史记所言三皇不同而帝王世纪以伏羲神农黄帝为三皇历代从之尚论三圣人功德之大与天地同流其陰阳医药开示万世特一事耳仁者见之谓之仁圣朝仁天下之心重见三圣人仁天下之心於医药故亦庙三圣人於医药而非以是槩之也就其仁天下者而论使民有寿康而无疵厉有欣愉而无呻吟靡眉皓首不见期功之戚四海九州不逢病弱之人是则三圣人之心也我朝列圣乃与三圣人此心合於万世之上民之得生於今日何其幸哉吉安曩因庐陵旧治为庙岁久圯坏日甚监郡按达拉嘉议始至既谒庙顾瞻内外喟然叹曰三圣人之大如此而庙弗称岂圣朝尊祀之意与厥明年二月首议修葺自内殿达外门自左庑达内庑自神之所栖达人之所息柱之挠者易薺之折者完桷桷瓦甍增密益新墙壁涂砌甃严圻洁丹垩素绘整翼焕明而又自三圣人而下四配十哲像塑顚叩加美旧观於是人心咸共赞颂盖圣天子寿民之美意必牧民者有以体而行之今监郡发施善政既已大苏民瘼又忧民之疾病而崇其医药之本其布朝廷之仁至矣诗曰岂弟君子民之父母侯其有焉

悠然堂

距吉安四十里有墟市且数千竈曰虎溪萧氏世居焉在宋多贡於乡升於学决科於庭者至国朝盛大未替前至元丙戌丁亥间余客溪上於是萧氏诸老曰献可如山如翰皆在弟子多读书知名宾客类四方之选其後既别不常往来仍改至元之六年庚辰余既年七十三矣复

至溪上客如山孙从先叔侄者数日则当时诸老与所尝识皆无在者独溪山衢巷池园竹树大约犹可一二记忆从先与余循所居东边之後圃攀览花木从隘达寛有堂翼然中为奥室像卦为炉外为夷亭可坐二十客面有峰曰南山故取陶诗扁之曰悠然盖江西儒学提举柳公道传所书也从先举酒相属曰先生其为我记之余复於君曰极天地间富贵之娱意气之盛其乐举不如心胷无累悠然会意之为适计渊明赋诗之曰向之仕於州县其齟齬摧折足以拂膺而短气者何限亦既旷然而释於心矣凡晋宋间之兴废成败可以感奋而惊愕者何限亦既怡然而安於天下矣岁时耕稼读书饮酒自放於得失穷通之外者已久采菊之次悠然见山此其心岂有一毫世累哉吾尝谓此虽其族祖之鎮长沙梦天门与其同时雄才壮气豪杰燕於戏马之台者举不能知之夫天下至清莫如山然心有所累则不能见今君才足酬物故不踰蹶子能应门故益优游仕宦进取不足介其念宠辱贫富不能婴其怀其悠然独得者在心而不尽在於山也殆与渊明相望千载有不约而同者矣余闻君将复新是堂虽老矣其或尚能再至而为君赋焉

虚缘

余友王君有孚种学绩文有才气志行晚未有子或负以後又不自得於心於是旷然推之遂取庄子语名虚缘衆闻而疑之曰命於两间而人者谓其有父子兄弟骨肉亲故也圣人所以尽心焉而虚之可乎余笑曰缘非圣人之所言圣人之所言者非虚若缘者其倏去倏来不可搏控殆虚之尤也且托於天地者孰非缘乎而天地一太虚也日月之往来寒暑之代禅世代之迁革其去者皆不可得而系也自有生民以来智者之所经理勇者之所驰驱其去者远矣自其存者为姓氏族系今之芸芸於宇宙者寧能知其为得姓之初者乎且今之所谓虚者岂不以其人族亲寡少九十无依七十未娶与自挤於沟壑者其人固不可知矣而亲戚之大子孙之盛若彭聃之数百郭子仪之问安颀应李迁哲之披簿阅名鸣钟列鼎第宅千里宾客童仆緦麻庆吊疎者密远者合聚会而固结者岂非一时之所谓缘邪而亦不可知矣故缘之在人存者为实去者为虚方其存也亲者实也而疎者亦实也及其去也则岂惟疎者虚而亲者亦虚矣又自其去者言之莫亲於吾父吾子而痒痾疾痛喜怒悲乐有不能尽通者莫亲於吾身头有痒也而呻肤受嚙也而惕然而刃吾爪而不知断吾发而不动发与爪未离吾身而疾痛已不及岂非以其处吾身之末有去我之渐乎是去我者虚之始也吾身与天地俱运而附於吾身者不自知其去我也推是而降为吾子吾孙其去我者愈远吾安能知之亦安能保其虚哉嗟乎人亦孰不欲有父子恩爱之乐而不能有者缘也有之而不能不虚者化也然则虚固虚矣而彼方以为实者亦虚也虽槩谓缘之为虚可也从是而论古今何往非虚独天者实耳吾父子兄弟之天以为实其离合去来莫之为而为者独奈何哉於是有孚欣然曰是足以言吾虚书以为记

吾峰

庐陵城西北可三舍有崇冈墟井所聚高氏世居焉诗书之泽益以盛大所居前後两峰对峙尤美者前峰因蒙高氏姓以称则高氏之着於兹土者久矣高氏之秀者有隐君子曰方至辟斋於两峰之间扁曰峰间既自为记复念是峰蒙其姓故又号吾峰嗟夫天地之山多矣何所

独无居人固有置之以为已有移之以为子孙私者而百年之间陵迁谷变欲问故老以姓氏邻曲而不可得而是家之姓乃与山相为无穷隐然欲与傅岩严陵谢墩相并於千载非德足以重之何能至是邪盖天下之物有心於有之者未必为我有无心於有者物常自附君何尝有心於是峰哉而是峰自托君姓以传则亦莫之为而为也佳时暇日君与凡弟宾友燕坐其中焚香啜茶举酒相属烟云之缥缈未尝招而贮也而朝光暮色自献於窻牖幽花野树 珑秀美本无与於吾事而舒奇生香当几案袭书袂而不可拒风月之变态鸟兽之好音于喁高洁啁啾上下无不足以供是斋之娱悦则何必为吾有而亦孰非吾有也且人之於物惟日与之周旋者可以为吾有达官贵人高车千骑早朝晚归计其家某丘某水某树未尝得一在目若是者又何可强名为吾有哉君无心足以有是峰隐处足以乐是峰庵之而曰吾有不得而辞者矣韩退之歌盘谷曰谁争子所而又欲膏车秣马从之於盘有美其乐也余老矣尚能为君登迢崑览寥迴以赋乎山中之乐

秋江亭

吉安之南百里有市曰白沙大族张氏世居之宋嘉熙四年有举於乡者曰舜申乐善好施秘书欧阳先生尝叙其事以告丞相江文忠公数年来过客称文先不置则其曾孙也文先嗜学工诗文喜宾客其所居面大江背小溪有山曰凤皇曰张华耸秀而环映於左右文先临溪作亭扁曰秋江盖四时之景无不可乐而独有取於秋者以其清也凉风初厉草树萧瑟天高地迴千里一碧登斯亭也心与之俱旷及夫霜降水落洲渚横陈波禽沙雁孤鸣交飞落叶在於几案寒花被乎栏楯君领客其间举觴而相属援笔同赋其乐非可以俗槩也夫天地清高温厚之气本未易以并得今君处至足之地酬酢无虚日而雅怀逸致常出事物之外推是以往虽游渚而当大变看山而措剧务何以加此岂非不同於人者必有得於天邪盖欧阳先生之言曰舜申家裕而喜恤乡人之歉岁以钱三百万易粟藏之次岁出而取元值一钱不增率以为常以是乡人无饥且曰吾泽未能遍充而广之在我後之人今君既四世而享有其福岂偶然哉嗟夫一亭之作本非所难而可以见天道观人事客之至於斯者一举目而舜申之德在焉文先之所以清者在焉余又闻文先将积义廩赧义学以广其先志则是亭之观益远矣文先名文秋江其所自号

勤成堂

天道之运行久而後成其功地道之资物久而後成其才人生之种德亦必久而後食其报盖必有不息之功而後有可必之报太史公曰百年之计种之以德岂徒待之而已必有滋培长养之者庐陵王氏居敬以硕学雅德师表一乡有德於人而不自知其孙成德积学砺行取知公卿曩贵溪县尹文公取苏长公铭三槐语名其堂曰勤成今广东元帅王公为书其扁成德请记於余余嘉其志而犹虑其勤之久而或疑其成之迟也则为之言曰天下无不报之善而亦无不积之善苏公谓魏公之业与槐俱萌意指文正之大显由晋公之不枉害无辜故种槐以待其成余谓晋公之显已在汉周魏公生於未接符氏之日则其先必有种德者矣种槐在晋公之手种德在晋公之前晋公之不害无辜封之者也非植之者其仁岂特必世乎植之劳封之又劳故成之盛余读史见元勳伟人富贵奕世未有非其先隐德弗耀者亦未有非世济

其德者若施德於微贱之时肆情於小腆之际事贪酷而不畏乎天徇权势而遑恤其後岂能大厥成哉苏公以松柏之贯四时阅千岁为天之定者人之功也传曰天之於物栽者培之天地之仁固不能外乎种植而物之在天地间种植之功同而盛衰大小之各异则亦封培之异耳故凡使硲?而为沃衍牛羊不能厄斧斤不能夭崇长爱护之功为多不然虽植何益哉今君之先世既植之故能诗书不替然而未克大着於世封之者或未继之也成德其善封之乎人情虽勤而未获则怠怠则前功俱废譬之农夫是穰是蓂必有丰年成德勉之

丽泽斋

庐陵范君朝宗少居乡慷慨有大志日与其朋游读书为文而又亲其胜己者因其所居斋扁曰丽泽盖深有取於大易朋友讲习之道也及壮游京师客於公卿之门所交皆天下士相与讲习皆唐虞三代纲常伦义礼乐诗书之大端侍书学士虞公大书丽泽斋名以勗之君博交深资朝切暮磋如是者有年於是仍改至元六年春今天子与二三大臣肇更政化击逐权奸夜召草诏殿中君仓卒条述皆能黼黻天子所欲言暨诏下自朝廷百司庶辟四海藩辅郡国荒服莫不稽首欣忭歌颂太平赞扬圣天子之英武仁惠而君之学遂攀附以大显君子谓君畴昔丽泽之所讲习者为不虚矣按兑卦之象两泽相丽交相润泽互有滋益故圣人以君子讲习言之然所谓丽泽非止两人之谓今日友一人焉互资其益明日又友一人焉互资其益推而至於友一乡友一国友天下而天下之贤皆吾友故士非患无友患取友之不博交不患不博患博交之非贤今天下车书万里四方之俊彦辐辏於京师任国政则有臯夔稷契者焉论大道则有孟荀扬韩者焉峩冠而趋於廷倾盖而谈於途往往皆非琐才曲士之所及则君之所以能博取乎丽泽之益者幸生天下混一时也使生而不际於盛世游而不至於通都则居处狭而交友局见闻寡而心胷陋安能一日成天下之经济哉吾敬君以取友之博而庆君以逢时之治而犹有望乎造道之无穷於是乎言【范君名滙字朝宗顺帝至元六年患巴延专权自恣谋逐之夜召君草诏事见元史】

山月亭

当宋南渡时庐陵宣溪王氏为诗书大族尝筑第城西南湖桥之近面永丰门广衢栋薨比属巷陌纵横後则高崖峻絶下瞰支江市区贾场延亘周遭百货交集然後大江横陈千山对峙王氏信臣於崖之高作亭扁之曰山月作台扁之曰云端名人胜士日游其上诚斋杨文节公为之记者是也自国朝前至元十三年郡既内附此屋遂累易主数十年来予故人袁本厚得而居之彻旧易新势加雄壮而所谓山月亭云端台者皆重建於其址制益於旧而扁不改余暇日固尝登之徘徊四顾渺焉无极隔江诸山如拜如跃磊磊若赴江而欲渡者想见寒夜月高万里一白乾坤之清气沁入肌骨居是亭者昼游而夜息何其乐也本厚屡属予记予念斯文之在天地间非尽无清淑之气然贫贱奔走往往汨没而失之而富贵之士又沉酣於声色势利不能自拔处华屋奥室重帘累幕之下而悠然遐思山间明月者几何人哉陆务观自言锦城歌吹之盛以为七年夜雨而不知务观未必醉生梦死若此特言其乐而不知其辞之过也於是本厚可勉矣

寿龄堂

余友王君鼎翁为乡名儒故其子孙皆明秀敏异有过常人者其曾孙子龄方在韶龀日亲近余讲论余见其读书通析强记应事开豁有方甚奇之又十数年不见去年冬来访则年几二十岁矣余观其能比旧有加益奇之今春以书来告曰不肖有奉亲庐州侯王公筠溪扁寿龄堂三字宠光之幸托斯文四世其愿赐一言以记其事余交王氏久矣见其子孙壮者日老少者日壮幼敏者日聪明特达以有为也可无一言乎吾闻人生上寿百岁中寿八十下寿六十五福以寿为第一岂非天之所与为甚不轻而人之所羨为甚难也故寿有得之於天亦有得之於人得之於天非人力所能为也得之於人人力实有助焉故八十九十自无疾病丰壮康武以至满百者天也修善不为恶孝弟忠厚以得天之佑者人也保养其天不致剥斲其英华和粹耗凋其血气精神者人也不好勇劫穷其心思竭其智力使优游自毓以全其性者亦人也故人之有寿世多以为出於天而不知出於天者特少而系於人者常多记曰古者谓年龄我百尔九十吾与尔三焉世传周文与龄之说或以为涉於怪其实能受大人之训以有益於天年者即与龄也岂必减此益彼以永其天年者谓之与龄乎今子龄富於春秋而王侯乃书寿龄堂以遗之岂非爱之期之者实有乐育之心大人君子之言自有不同於衆人者与自是以後君与大父诸父均有期颐之寿而高堂夫人享有鲁颂寿母之福跻其堂者皆永锡难老眉寿无有害之人其庆宏矣岂必真居桃花源饮菊潭水以为寿哉

玄妙观经坛买田

自有天即有帝自有人即知敬天而事帝故尧舜禹汤文武周孔之书其警戒惕畏必曰天曰帝盖临之在上昭然而日监於出王游衍之间者莫非是也而道家者流则又推言帝之所居玉京金阙巍巍非世可狎而又有羣仙五老骖翼乎凤盖鸾车以来人间又言每月二十五日周览四方八极以察善恶邪正之辨谓之胜游虽未可究其实然大抵皆言天威不违顔咫尺所以起人之敬而不敢忽诱人以为善而不敢怠也呜呼此与唐虞三代圣人之言何异吾乡玄妙观有胜游诵经坛所以祷圣寿祈太平也有田若干石道士陈逢吉铢积所置中为住持者所鬻道士刘宏大集陈九龄衆资归之然尚不给会至顺辛未郡大疫死亡相属临川李君长翁来任郡知事意惻然悯焉与宣慰周公志仁州判萧某儒学正阮某提点某暨诸府掾裒费得中统钞七千缗有奇於玄妙观建洞渊醮会十一朝请命於上帝以追衆灾暨歳事连雨忽霁朝告之初有白鹤四浮空翔舞集殿隅朝罢乃去由是四城疾骤愈民始知有生醮余尚存钞缗六百七十五适周如京宿有出质田十三石七斗为钞一千三百七十缗俾经坛返业以为益知事复倡捐己俸续所余缗返之通前为田三十九石七斗而胜游坛浸浸可广矣嗟夫一醮之成天之显於民者如此谓其不日游於人间可乎於是衆皆曰是不可以不记记田之所由剏增所以示後使知所守记醮之大感格所以警民使知所畏醮若无与於田田之增自醮始记田而後醮以重坛此记之所以不可已也余惟知事之设醮使民无疵疠买田经坛复使民恒有肃心虽若神道设教而其用心厚矣士君子为善固不计天之出游与否而天道福善则不可诬共保是田以永是坛则善之道也

佑圣观殿宇题名

五云佑圣观道士萧独清方外之秀杰也以诗闻四方所交多公卿贵人曩岁尝过余曰佑圣之为观荆基宋淳佑间为奉真堂国朝始得请今额光泽簿刘君尚友尝记之矣其後里大姓刘母仇复建正殿而山门廊庑又赖衆力以完独旧有迎客道院久未复尝谒临川吴公为题辞公曰吾性不喜骈俪吾寧捐资为子倡屋成且为子记今年二月君再过余介友人张汉英请曰往吴公赐之倡由是多乐助而屋以成正殿之後作一区高出於殿扁曰山水胜处又後为堂高明与前称扁曰风月吟所东西为客馆四扁曰霞栖云卧深省易安又旁为庵曰半山役起元统甲戌秋仲毕是年冬四方於此乎馆无不足者顾欲吴公记之不可得矣敢以为先生请余惟世间山水凡胜槩闻於天下者率为神仙所庐又必有巨贤翰墨为之发挥而後其地益胜今君之心胸既足与兹山之山水俱胜杰栋高堂曲栏华檻日增於昔余想君焚香对客燕坐其间大江横陈万山罗立烟涛之浩渺晴雨之变态与夫汀花沙树风帆水翼参差上下皆可娛悦或朗吟弄月於冠悠二潭之滨或吹笙骑鹤骖候羣仙於许卓诸峯之外其胜致固不可悉数然向使吴公遂为之记其胜致又岂特如是观哉顾余陈人猥当斯笔岂独媿其山水君复请曰夫使兹山遂为世间胜处而四方施与之姓名遂相为不朽不可以无述先生幸无多让呜呼推君之心千载犹一日也後之居兹山者尚克念之君号独清先後相其役者其徒张永年萧素也

灵岩寺重修藏殿

踰吉安而南且百里有市曰白沙又踰市不一里有寺曰灵岩四山回合巨石壁立相传寺前旧为长江一夕龙挟江去以让乎寺地势嶮峭如奋如跃往往与元气轆轤故神仙宅之多灵异古迹其寺之稍从而深自宋建隆庚申始其寺之有藏殿自宋宣和癸卯始藏殿既久且圯有里善士张君见翁倡衆力新之然所建法轮未尽其制故藏常亦不克运见翁且病呼其子文行语之曰汝必成吾志文行受命不敢忘至元後庚辰遂捐己貲彻旧更剏镂刻之繁既殫精以为巧彩绘之焕不爱力以为美盖踰年而功始毕乡闾赞叹四境聚观所以彰佛道者愈备而见翁之所未克成者成矣夫圣人之教莫大於孝而人子之孝尤重於继志故论其所施虽浮屠之宫推其用心则圣人之教也古之君子观人之道不止於一端今文行兄弟所以承先志者於浮屠之宫尚致其力则其於室家堂构之间吾儒之所谓修齐治平事之所当为志之所必继者可知已然是藏之成吾固有以见文行兄弟之善继而又以见浮屠氏之能自治其事焉盖非善劝求善营具不及是於是若特若智亦可书也

桂隐文集卷一

桂隐文集卷二

<集部,别集类,金至元,桂隐文集>

钦定四库全书

桂隐文集卷二 元 刘诜 撰序

送佥事李彦古赴南台都事

今天子初改至元之三年江西佥宪云中李公分司巡访吉潁南安揽轡未至先声肃然如范孟博既历三郡水蘖自持如杨伯起民歌颂载道时上犹邑民皆病疟疠民有梦疟鬼相戒曰李公来吾属当去矣病遂安未几被命除江南行御史台都事君子曰善可为也李公修身善其政上下幽明举知之夫莫难齐者斯人之议今数千里颂美如一公之孚於民者为何如九重简注式畀要职虽劝臣之道於上为得而亦岂非公声实着闻不可掩乎故曰善可为也则又曰台比宪所蒞弥广台都事比监察所职弥衆公前监察西台莫重矣而未总乎一台之机务也佥宪江西又重矣而不得悉问乎江南之民瘼也然而上下幽明已如此今蒞弥广职弥衆则其取应又当何如韩退之赠李君房别曰失之此足爱惜得之彼为欢忻今公之擢其庇覆吾民益大谁独无欢忻乎诜灌园郭门南北之士大夫有意於我者皆不敢妄有所誉独於公不能忘乎颂於是乎书

送萧克有偕曾从吾赴瑞州永平簿

萧君克有以世家魁杰之姿往官渠阳曾君从吾以士林环秀之彦实偕其行其志好之同议论之合真所谓鱼川泳而鸟云飞也古之君子其处也必观其所与居其出也必观其所与游不可附而附焉可以知其客不可致而致焉可以知其主故学不失其所以讲政不失其所以谋趋不失其所以归反是而曰志好同议论合吾不知其可矣若二君之相视莫逆其君子之所望与太史公经行天下遂有史记今航洞庭抚赤壁登黄鹤都邑室屋足以壮其气鱼龙涛浪足以激其怀风帆烟树足以骇其观亦奇絶矣然豪商巨贾岁岁之过览不能出一言者盖鲜若二君之登高能赋其山川之所待与子夏曰学而优则仕仕而优则学今仕者固优於学矣学而未仕者盖所以优於仕矣渠阳地僻而事简魏了翁之所以益树千载也簿君政事之暇相从览领弭节乎羣芳六艺之林振策乎道德仁义之苑其亦足乐乎余老矣间尝读书二君之警发是赖故尤惜其别而甚愿其别之有成於其行起而祝曰使簿君之政轶其父兄流高誉於朝遂入为名公卿君之光也使君亦蓄其所学充其华而大其实遂建侯万里外簿君之志也语松茂而栢悦虽予之衰懒倦游者亦将与有愿幸焉遂书以为赠

送贺元忠赴越城庙山巡检

禾川贺君元忠为曲阜学正既满选曹以新例授浙东余姚县庙山巡检当戍舡舟郡苍然亭

下士友咸追饯或曰贺君前後二除亦异矣曲阜之墟河山苍莽市邑萧条麦短禾秀黄埃千里虽强壮不能为情及入礼庙则圣贤衣冠肃穆如生鼓钟铿鍠佩履雍容诸生兴伏百拜何其文也会稽之陰溪明山碧舟航如画士女填会昼夜歌舞虽正士不能不移而又长戟劲弩旁趋前拥短衣上马鸣柝而巡亭檄何其武也二除可谓异矣贺君其变於异乎余曰不然朝廷之用人不一其职而一其才君子之仕不一其地而一其德选曹以是处贺君诚知人矣吾尝闻古之有为者处寂淡而不以为忧居纷华而不以为悦安礼律而不以为严勤师教而不以为劳贺君性美而才达气纯而质坚吾知其视会稽如曲阜视巡检檄而不异於庠序矣又充而上之其地益殊其职益不同贺君其有异乎若情与境迁器与事局岂大丈夫之有为者哉於是衆皆悦俱起而颂曰浙东西礼义之邦大夫士之仕宦与潜处者皆宗程朱而慕欧曾贺君其不以居於武而疎於见矣钱塘大省所驻宪若帅星罗而碁布其位皆处周吕而出方召贺君其不以习於文而怠於事矣他日有升大府者必贺君也则书以为赠行序

送杨生廷章往旌德

士之不相知者或同室而异趣及其相慕尚则虽越千里而不以为远是心岂可强哉同郡刘君粹衷以雄文高科为旌德县尹廷章将往从之告别於余曰愿请所以教嗟乎生亦好学也已生之家君固宿於学四方之来从者户外屨满吾闻生匠氏之圃者不求规於他地生造父之家者不学御於他人生胡旌德之之也故曰生亦好学也已非旌德之贤不能来生之学非生之好学不能慕旌德之贤虽然生之出必念夫吾辞亲而来也归必有以慰其心旌德之见生必念其离亲戚涉江涛而来也其必发枢启钥无所吝於生矣余与旌德友也久知之也深其可慕效者岂独文章哉生必勉之

送萧焕有入京

严陵萧君焕有积学有才气语当时政事如良医病证具有方治评古今人物如老吏谳牒莫有遁情弱冠游京师以救荒三策知名教授桃源克称其职为照磨临江兴国皆理冤泽物戢暴媿贪郡人为碑颂其政以是称为良材为伟器岂过论哉然十余年展转求品官以限年劳未获升用君又恬於进取日从宾游赋诗论文以为乐乃今始问道京师谒改选舟过临江郡士友咸遮饯或谓予曰子之为文辞於萧所不愧呜呼余言非教何所无愧也

送艾用济归河南就乡试

艾实元晖河南士之秀者也去年来从黄君希仲於庐陵郡学学娓娓日有所进六月望告别於其师友与常所往来者将归河南就其乡试余告之曰昔欧阳子庐陵人也学於河南以成大儒进而轶於孟荀扬韩之列庐陵山川之气有以毓之与河南士君子之行有以勗之与今生生於河南学於庐陵河南在中州其山川之气固不劣於庐陵矣庐陵士君子之学问又岂劣於河南哉生所毓所勗之地不劣於欧阳子则其学当优於欧阳子矣语曰顔何人也希之则是然今余谓生之必可希乎欧阳子人或谓余之易於言也余且谓生之不可希乎欧阳子是余之厚诬生也生勉之哉若乃今之科第则学不几於欧阳子之彷彿者或庶几矣不必为

生勉

送达子通

士大夫居官有善政能爱民轻富贵重名节审去就不为苟合天下之奇士也蒙古达哩雅齐字子通曾祖官中书丞燕南廉使子通以其祖世赏监濠州鍾离县暨监桐城县暨监南康县愿丁母忧不赴复监盐城县至正三年迁监集庆路江寧县至官理冤平讼奸吏望风斂避府檄浚陰山河道计用工二十八万六百子通建言开河道本以为民事或不时反为民害岁蝗旱民饥而死而修河何为急疑其事不行上官怒子通复力请罢上官益怒子通曰吾可不为官不可徇上以厉民即日托以迁葬拂袖去嗟夫士不能以名节自高变化其初复阿上而苟合文过而求容皆不能舍富贵耳若汉汲黯萧望之东汉党锢诸贤与宋之不肯奉青苗法者皆可谓特立不羣之士矣盖古今所鲜见也且子通例不必丁忧而愿丁忧其重天理轻人爵能为人所不能为已见於此及受檄浚河纵厉民非已罪然必不可寧弃官去是爱民重於爱身爱忠直重於爱爵位他日立大庭任大事岂肯徇时以谋身哉吾故曰天下之奇士也子通所至方且为诗歌畅怀赋景饮酒谈笑曾无芥蒂於心者其度量气节可观矣吾党既为诗以美之而予为叙云

送欧阳可玉

自宋科废而游士多自延佑科复而游士少数年科暂废而游士复起矣盖士负其才气必欲见用於世不用於科则欲用於游此人情之所同庐陵欧阳德器可玉乡俊士也告余将远游余问其所志则独不然其言曰士之修於身者为道德见於外者为文学斯四者固皆可以自求而亦当有取於人古之君子非不可闭门息交以成其善而或从师取友於天下良有以也今之王公大人居则高堂重阶狴犴守閤出则崇牙大纛武夫千羣介马填拥数十里吾固未易见也而以道德文章重海内者其人差易见也往年尝拜虞公於家温乎其相接藹乎其相亲然自虞公外未多识也余今复欲涉洪都道武昌历金陵抚关洛以造京师庶几所欲见者咸得见焉其足有以翊予之进而策予之不逮也余闻而异之盖士志於用世者类苟取富贵而已其志於道德文学者何人哉以道德文学求天下其人有不进子而见者乎吾将见子尽识天下道德文学之人而二者亦将在子矣行矣无倦

送延平杨上人归闽求师

自师道不见於圣贤之教而相师莫盛於老佛而尤莫甚於佛氏其徒至历辛苦甘寂寞絶生人天常之乐受垢衣余食之污洒埽薪水之是给驰叱棒箠之不辞近者率十数年久者或度一世噫其事师亦严矣而究其所得或谓闻一语而悟因一事而解卒堕於鸿蒙混茫非世所共知然自古迄今求是教者未有已也若圣贤之所以教则即乎人伦日用饮食之常道其事不必如是其贱其日不必如是其久而所得者其纲常为君臣父子其治化为礼乐文章其道为三皇帝王之公其书为九经史传之实本备而未举体立而用行与天地同其大与日月同其明与山川岳渎同其流峙皦然皆世之所共喻然而去古既远士之知师道者何鲜哉故唐

韩柳氏皆着书极言士之耻於相师以为斯道之大病而卒莫能正也延平杨上人自少走天下遍求其所谓师至豫章礼善言佛者絕学【僧名】留八年而後渡淮汉游南京入西川上峨眉拜古所谓普贤希其徒若干年航洞庭住君山参善言佛者空庵【僧名】历南岳七十二峯下湘潭谒善言佛者无方【僧名】各有年数今将自庐陵复蹈东吴归闽益求其可师者师焉噫其求师之勤不少於昔人矣上人生龟山之乡为龟山之裔聪明而多艺苟以是心而慕其祖濬乎程氏之流泊乎孔氏之渚不难也而溺乎彼不能反乎此既可悼其途之失矣而吾党士与游者皆为诗歌以赠之而无一入感上人之勤以自媿其求道之不敏者可见儒者之自弃而不能有所勉激也故因上人谒余言而为是说庶几或者有感焉

送张子静游武昌

张子静旧从中斋邓先生之季子元宏游【元宏名也】处乡校以隼闻一日来告曰局踣丘里间久矣誓将自西山而武昌以勗吾学焉余谓之曰古之游者志学问而进取之兼得後之游者志进取而学问之不知今子过洞庭覩其浩洋之势浮东南而浸日月风涛之汹壮鱼龙之出没则足以充其气抚赤壁之断岸黄鹤之崔嵬思曹刘孙氏之百战则足以考其得失而慕其人物之英杰寻寒溪之梅问洼尊之古迹则敬其刚介之如存酌芳洲之草指鸚鵡之戕戕则伤其词华之美而不自爱凡山川都邑之得於目何往而非学若过之而不知日夕与俱而不能赋则与舟师估客何异虽游何取子之游以学言可尚矣为我访顏氏之巷而观於孔山峨高冠须发如雪者子拜而师之则学广矣且告之曰使公留庐陵吾不及此公得无乡国之情乎

赠张汉鼎赴岭南

当赵宋南渡时北方士大夫率皆随驾以渡散处州郡若常德大守亳州张允蹈之居庐陵其一也子孙继世盛大今又二百数十年吾所与游者希武希武子汉英尤秀敏多文汉鼎颀颀竞爽疎通能达於事十年前尝以儒试吏於岭南适广寇蜂起汉鼎奋谋猷飞书檄供亿军需揣摩事会动中机宜驱驰戎马间亲俘馘剧寇七人然不自伐帅府嘉其才録其年劳保申为府奏差以省亲留家久之至正五年冬十月遂辞亲出门余赠以言曰子之祖以高科奥学仕宋为大官今子复以才能发身帅府虽未足以尽子之蘊而得其途矣余闻元戎说礼乐敦诗书好贤下士子执鞭从之犹挟美玉而游於卞和之门也传曰公侯之子孙必复其始子益勉之余虽老尚拭目焉

赠娄行所游五羊

士之游於四方所乐者在得其所从苟得其从虽道里之远舟车之劳有所不计何则乐乎此忘乎彼也故古人有千里而命驾比屋而相违诚以其乐与否耳吉文之英称於州里有娄氏兄弟曰存所行所强学积文既不远数千里从别驾僦公於金陵行所才学駸駸欲轶其兄州里之聘以淑其子弟者踵至然志所不乐不愿也往年游淮南从平章敬公威卿走杭浙从宪使邓公善之道同志合如埙唱如箴和今又偕其兄从宪僦公於五羊非归其势也诚有乐

乎其人也。委氏兄弟之於偃公也，其偶然乎哉？非偃公之德不足以致二委之来，非二委之才不足以爲偃公之客。孟子曰：孟獻子有友五人，无獻子之家者也。五人者亦有獻子之家，則獻子不与之友矣。夫獻子之欲友此五人者，友其道也。五人者若之何而不以道自重哉？宪金，偃公学博而才宏，气刚而德清，其所刺举虽公卿无所避。委君之所以友之者，宜何如？亦曰道而已。语曰：泰山不让土壤，故能成其大；宪金公今日以道治数十州，他日以道辅天下，吾知不忽乎委君之所友者矣。

贈邵以和

邵君明卿以清异俊拔之资历，府掾有年，三子皆颖出如其父。其仲子以和肄业於学校，游余门，密知其敏於学而考古之力勤也，谐於俗而应世之道善也。古人取人贵有体有用，讲之礼乐而不能通，试之洒埽应对而不能习，体何有哉？问之钱谷而不能知，资之甲兵而不能帅，用何有哉？若以和庶几兼之矣。狄山素爲儒，武帝问其能守一郡，曰：不能；问其能乘一障，强对曰：能。而卒以取穷爲儒。至於如此固矣。倪寬混混羣吏中，不见异於人；及上有所问他吏，不能对，寬独能对称，上意爲吏独不当如是乎？以和爲儒，久以府檄试吏於文江，体用兼优，其在今日矣。故於其行，称是说以贈焉。

贈林可翁談地理

旧见葬书，凡前代富贵家所葬，輒图以示人，曰：是出某相某卿。观者歆动。去年洪林可翁从空山上人来，吾州亲指某地当富贵，某地宜贫贱，尤奇。为人葬甚多，其效皆欲刻期验。余因念地理术亦奇矣。厮养童仆择葬偶得所，即温饱可致，驯至居高门，出累骑者，有之。儉凶尚霸，屈意奉葬，师设机穽，谋佳穴甚者，发他人塚，出累世枯骨而藏其亲，然莫不取富贵显荣。子孙昌奕，穷巷白屋之士，皓首谈诗书，动辄蹈规矩，恒世世苦饥乏，弱不自振，夫福善祸淫，仁者必有後天之道也。然天理常不验，而地理常显然者，是地理可信而天理不可恃也。呜呼！自地理之说胜，而天理隐邪，抑天理不可恃，而人始求之地理。邪！自圣贤言之，天理必可恃，然苟非信道笃而轻外物，谁能舍地而俟天哉？虽然，使求之地而不弃乎天，岂不犹愈乎？吾惧乎世之求夫地而弃乎天也。故因可翁求贈言而发是慨焉。亦庶几爲葬书者之初意云耳。呜呼！观吾言者亦可怅然而一叹矣。

贈医士王宇春

人之疾无大小，皆足以害身。医之道无内外，皆足以活人。然惟妙於艺者能之。同郡王宇春精通诸科，文雅识道理，敏於见而不自衒，勤於人而无几求。余尝见其所疗多奇验，比又身尝试之，益验。然皆非急於效以愚人。盖其言曰：治病必求其源，用药必鋤其根，不求其源虽治莫知其向，不鋤其根虽愈必致於复。且病之方至也，如洪水之骤合，其势不可以遽退，疏导濬涤自底於平。躁者逼其势以壅遏，则势反愈甚，而功必无成。盖天下无不可治之病，亦无皆速愈之病。谓病为不可治，医之过也；谓病为皆可速愈，责医之过也。古之为政者必期月三年而後功效始见，若朝更化而昼视成，暮立法而旦求治，议论之士纷紜於朝，宁督迫之吏旁午於郡县。

安有美治哉余闻而叹曰善哉其言治水合於禹之道其言治人合於周公孔子之用心岂徒医云乎哉书以警夫世

郭刘二君邂逅诗序

士君子游宦万里外忽遇故人知己握手岂不足以生志气壮顏色燕山刘元卿为庐陵郡贰幕抵官之初适客省副使郭公持使节弭留於此一见尽欢如子美之遇孟云卿应物【人名】之逢杨开府倾倒谈笑举杯相属极世间声色势利有不足喻其快於是秋旱方初适得甘雨天若助其喜者殆亦一时意气之所为也郭公赋诗一篇属和者盈卷盖人相遇他乡固可喜而又为故知尤深可喜也郭公中朝近臣刘君明时才士他日颀颀云霄未可量此其风云际会之一占云

夏道存诗序

诗之为体三百篇之後自李陵苏武送别河梁至无名氏十九首曹魏六朝唐韦柳为一家称为古体自汉柏梁秋风词驯至唐李杜为一家称为歌行古体非笔力遒劲高峭不能歌行非才情浩荡雄杰不能今观夏君道存所为诗琢清贮澹凝幽拔奇不肯苟简一语飘乎如轻雪之度风也冷乎如寒泉之落涧也澹乎如古罍洗之不可杂衆器也非有得於古与夏君方将膏车从其兄仲善於会稽仲善才又高觴咏磨礪之余必有如灵运惠连之天契神悟者自是当益工归当以语我

刘梅南诗序【梅南名志行】

刘君志行诗五言絶句古律如衣冠士使人起敬虽复笑谐不废其雅七言律其靓丽者如野桥夜月学按霓裳闻者莫不辨其萧散者如空山絶磬时见幽花行者回首长短古句如春风吹潮潏潏晴空莫窥其所挟此岂独天机学问所到亦用工然耳至其间独悲孤笑危睇遐思则可见其奋於志长吟思慕高歌忧患则可见其厚於伦横槊赋诗短衣射虎则可见其通於才君宰有民社而羸马敝裘若一寒士焉世之能识君心者亦岂多哉

九日登鹿角山诗序

余旧家吉水南岭有山峥嵘如鹿两角俗呼为鹿角当在宋时山下有乔木数千章连抱参空陰云蔽亏鹭鸶号集宛然深山太古意也国朝始通是乡为官逵创马驿所谓乔木斩伐殆尽莽为旷土近年来或缭以长垣限以棘沟而所谓旷土又将为果园蔬圃矣嗟夫是乡特寬闲寂寞之滨而为谷为陵者如是不一则通都大邑之改化又何怪也余每归故乡至辄喜留滯不能去昔人所谓乐其所自生非欤至正癸未遂因度九节於此於时天气连陰初可衣单袷八日意行饮杨君文川别墅又饮其兄吾可桂花树下罗君宗伯宗仲邀过其家剧饮痛醉至暮乃归衣冠骈集居人属目余因朗诵曰九节追欢亦偶然羣贤携酒路聯翩茅檐老妪扶孙语重见衣冠八十年文川和唱云有约登临兴浩然风吹襟袂举翩翩先生领袖衣冠盛更醉

黄花四十年遂约一日登鹿角峰至期余乃摄衣径造其顶同游者二十六人列茵相向坐如环丝竹稍间因用东坡大华峰头作重九天风吹艳黄花酒浩歌驰下腰带鞢醉舞崩崖一挥手分韵余得作字约明日诗集独缺鞢崩二字亦以避所难所讳也明日诗集同游徵余序遂书文江西渡埜寥廓有山削成苍鹿角驿亭古道数百家人烟四起象虚廓我亦鹿角山人久客归来似辽鹤辈行已稀少壮多白头愈觉乡土乐秋天九日云漠漠振袂凌危散腰脚大江东来忽空濶青山环走拥帘幕豁然百里指顾中南眺层城北仙阁白觴潄灩照醪酒碧盘崔嵬出穀矇羌笛高吹破落日村鼓狂鸣动虚壑谷精遁走山鬼奔乐极但愁风雨作风雨作可止之请君勿轻动浩歌且更酌向来豪雄今安在马台龙山俱寂寞不如蓝田把莢翁流芳终以文字托鹿角山山头石路何硌确应知後人慕羊公佳时踏破青芒屨

龙溪曾氏族谱

族不可以无谱族有谱然後不以疎为戚戚为疎不以尊为卑卑为尊戚疎尊卑秩然不可紊而後孝弟之心生焉若戚也而为疎疎也而为戚尊也而为卑卑也而为尊尊卑疎戚其序已紊孝弟之心何由而生然尊卑疎戚之序素紊者始於义不亲情不密义亲情密无是病矣故明吾谱者所以使吾义亲情密也今夫父子兄弟之间寧有不义亲情密也哉自再世而降至三世四世五世而後浸有不知彼为吾兄为吾叔父为吾伯父者矣又自是而愈远而後鬻吾之族於他人市他人之族以为己族者矣嗟夫使吾族谱明又安得有是病哉明吾族谱者使吾之子孙不以吾谱鬻於他人而不市他人族以为吾族也苏明允有言观吾谱者孝弟之心亦可油然而生矣今观龙溪曾氏族谱慨然上有感於唐风杕杜之诗下有感於苏氏族谱之引於是注其族自一世再世以至於十四世十五世其派分源别凡其徙其复其蕃其絶罔不存且明者其意殆欲至於百世而未已则其势安有戚疎尊卑之遽紊而不知有吾兄吾叔父吾伯父者哉是故族固贵於盛谱尤贵於明族盛者有天道焉谱明则人事之尽而已曾氏之族其可敬哉

尘外流芳集

尘外流芳集者友人萧孚有游永庵所为诗而羣贤和之者也今六年矣孤峰上人编为集而以是名之属余序嗟夫人生无事登高访远寻幽觅胜或放怀於水竹之间憩迹於禪寂之外一生复能几游游而不能赋赋而不能传者又何限古人於此事最是留情而一觴一咏能使人称颂为佳话者甚不多见上人能集是以传其胸中亦不凡矣倘刻之壁使後之来者摩拂而读之或为一快然也

李伯玉太素脉

歙人张子克言太素脉始於黄帝岐伯伊尹扁鹊黄石公华佗孙思邈皆秘不传惟陈希夷以授王朴而此术遂布於天下然余少时见攻此者甚罕故友湜溪郭公晋能传通之亦默不言近年通者颇多友人李伯玉得其法於鄱阳邵明善素其传正故其术验古今观人之法多矣惟近取诸身为尤切春秋公卿大夫察人祸福於动作威仪之际一举足一发声一形於言无

不识其终身者至秦汉间始有论若唐举许负亦能察人终身於一见盖虽不及春秋公卿大夫之神而非後世之可及惟脉则古人仅以察病未始有以言贵贱者岂亦所谓秘而不传者邪君能益精之何患不知人哉虽然吾亦有自观之道书曰作善降之百祥作不善降之百殃夫人苟善矣虽欲辞福不可也苟不善矣虽欲辞祸不可也使为不善而欲求福於脉难矣噫世之人诚能皆以是自观则有不待君之观也欤

蔬笋诗集

僧翠微诗不多见然每不苟作往余初观其藁喜其彷彿韦王蹊径尝进以一语今见其嗜慕益坚譬之饮食猩唇豹胎与刍豢之悦口者皆却而不御所御者乃庾郎之鱸韭周顒之晚菰文与可之烧笋苏长公之蔓菁虽富儿之绮罗羶荤者所不取而风致乃未易及惟知味者知之翠微诗可谓得僧家之本也然使百尺竿头更进一步岂不更可敬哉

彭翔云诗序

亡友彭君翔云诗锻炼精确而不废真意如幽林晓花真寂不赏如寒机夜织神专而心苦如深山遗老语言近质终有德人深致如山醪溪?或使富儿晒蹙而知味者独有所领盖苏老云後数十年天下无复有此文也已然诗之为言品律固不尽同要其同归於佳即葩浮而不宿於理富健而不永於味又安得如君诗之真实可爱哉忆吾与君相从庐陵印山间君年四十有三余甫弱冠君弟琦初则长余二岁笑谈觴咏继以讲切或临於水或休於树或倚户而立或促席而论率旦至夜渐中乃散未几君死又数余年与琦初皆纏人事而各散处既而复邻居於城虽时相合然求如与翔云共处时优游永日不复得矣君死既三十一年余与琦初皆苍顏皓首当时亲知零谢欲画其所与游居之地池湮台废莽为耕畴郁为高树白杨连塚望之如宰如臯下马而洒麦饭者皆非向之所执盛衰离合之迹如此可为重慨而琦初犹能宝藏君诗手抄以示余评又可喜也呜呼今谁知翔云者知者独琦初与余耳余既略为评论而复疏其游从之概至其懿行高节不为宰物所知怜则琦初述之已备世言诗能穷人观於翔云尤信

游兴善寺诗序

遡淦冶而南百里有源曰吉阳山水环合土壤肥沃源有寺曰兴善清泉由後狗寺门而出琅玕乱石间如琴磬然寺僧作亭跨其上修迳蜿蜒竹树蒙密颇有幽意相传南唐後主同母弟李长者着华严合论其中论成骑虎上升遗像固在寺之胜以此夫自拔於富贵之中而遐举於尘垢之外固亦奇矣然亦安知非见其兄沉酣声色国境日蹙既不欲为微子抱祭器而去又不欲效智果易姓以为民望故自托方外有避祸之实无去乱之名且其所为上升安知非见其国既归宋怀不自安而窜匿其迹假是以神其说邪自古孤忠志士高者托神仙下者托佣保往往然也距寺三十里又有陈桥庙桥教後主不降城且陷死之呜呼长者之去可谓见几而作桥之死可谓见危授命其事乃皆在是乡空山断垄之间好游者不可不知考也泰定丁卯余客淦南溪景翁张氏九月晦日访寺作三诗景翁弟自翁亦有诗而老友曾先生诸君

子皆赐和僧宗应作卷请书以重山门因叙以唱和之意而牵联并述长者出处云

百咏梅诗

天地间奇花异卉无足当百咏者独梅可以当百咏不厌愈咏而愈不穷雪後园林水边篱落疎影横斜暗香浮动工矣而竹外一枝又工近世刘後村侍郎积百篇又工余族五山宫讲积百篇又工须溪刘先生短调亦至百篇又工今见王君朝卿以二韵叠和为百诗则又愈难愈工梅之精神标格何其能受人之赋咏不穷如是也朝卿曰子独不见诚斋翁称陈洮湖爱梅造次必於梅顛沛必於梅賡赋不千篇不止将不工邪余骇而起曰若是天地之生诗人无穷则赋梅者愈无穷後五百年余当骑白鹤夜踏罗浮山雪中与君更共赋之

张子静诗词

张子静乐府柔情妩态芳趣婉词纤徐而为妍凄婉而余怨如听昭君马上琵琶蔡琰塞外十八拍不自知其能使人断肠也五言古体贮幽寄淡而不失散朗崇朴反古而自是敷腴如入宗庙而抚壘洗七言长篇浩荡不羁悲壮自悼如公孙大娘之舞劒器也虽时有未适中亦可谓有奇气他日学益充神益完宜有大过人者子静少负才志尝航胥涛棹洞庭窥庐山衡岳以自激发然迄今未有遇其尚俛首塲屋亦以经术干时用哉

志铭

建昌经历彭进士琦初【琦初宋瑞臣彭齐後】

余友彭君琦初以至顺二年九月二十一日没於五羊官舍其子鏞後二日亦死讞闻阖门二百指哭振闾巷郡中士友咸失色相吊其季子鎡跣足迎丧踰年十一月庚午奉柩葬於庐陵化仁乡印山新塘之原请铭余惟知琦初久莫如余不得辞也初至元丁亥余客印山琦初在焉於是时科废十年印山知名之士尚不少日夜相与谈说诗书谐笑饮酒而琦初与余尤欲自励制行为文务欲絶出世俗而追古人磨礪相高出处不能相舍当时不知其乐其後皆迁城虽巷陌相望然各纏家患世故浮沉困耗而少年英銳之气俱少衰矣延佑初元仁宗皇帝诏天下以科举取士士气复振咸奋淬以明经为先而琦初以四年魁乡贡至治癸亥又贡遂擢第授南昌县丞秩满调建昌路经历未两月有诉吏役不均者仇家共构陷坐解职参政耿公叹曰玉石俱焚若此何以劝善会广选行荐为广东盐官居官数月以病终享年六十有六琦初少有通才直气外率内敏遇事见独奇姻族之贫者扶树使自给受侮者扞其患失教者勗以学事之病於民力不能救则为书以言於上又言文丞相当祠陈古今大义激切不讳故未仕而人信其能有为居南昌摧折横吏民多复业天历初急造兵器飞符夜下连郡骚动琦初请贷官帑徐规以偿事办而民不知平反盗狱增复学廩率为省宪赏识僦居一室图史萧然独四方求文者满座读书夜分无毫末官宦意故已仕而人信其能有守平生教人倾竭不吝校文江广见黜卷有可取者必为抄録曰吾恨不能尽收又建言欲於贡额外取士故事不必尽达而人信其用心之广其於学破猎万卷诗文随意引笔不为棘艰余尝评其文如春江

晴澜滔滔顺流若可?玩疾风过之奔怒千尺或者徒见其敏实未覩其变也遗藁可数十卷有理学意録有闻见録杜注参同初名庭琦字士奇自号冲所既以士奇入仕改字琦初世居庐陵白珏自宋大博齐後分徙化仁乡福塘曾祖文益祖子深学者称坦轩先生父季庆宋两与乡贡国朝赠吉水州判官曾祖妣胡氏祖妣郭氏妣刘氏赠宜人娶罗氏赠宜人三子长鏞次铉先卒次鎡孙汉沂洪余与琦初少壮俱艰苦无成琦初晚令若可少慰然一第官衆人可致在琦初无足论者当今天子圣明海内清晏宜得奇才奥学以论礼乐而轶三代若琦初虽获登用又如是而止且死南州非命也邪而余白首相失追欢思少年相期尤有可感者安得不反覆旧事言之琦初尝喜以诗文属余评曰惟子知吾文未病前数日犹寄示巨帙且曰吾将归老与子论文如曩时盖书至之日死矣呜呼悲哉铭曰

积之深施之浅匪施之浅惟用之晚奋於乡死於远胡死於远维忌之挽瓦完兮璧毁牂驱兮骥蹇嗟哉志士百世一慨【鎡公之壻】

张处士性善

至正二年秋余友曾泰复以书为其甥张治请曰治先君子以去年辛巳十一月十四日弃诸孤将以今年某月某日葬於某地之原敢以吾友顔成子之状请铭於先生先生幸赐之铭死且不朽余时留豫章不及见书则又致再四请乃发状而叹曰治余所知治之父性善尤余所知不可不铭张氏自五代时由贝徙吉竟居吉水文昌乡西团世以儒显曾祖崧尤博学有名声既不用於时则放浪山水间方笠骑犊饮酒赋诗以终祖同老登宋淳佑甲戌第历頼宝庆信州三府推官弃官养亲时相交荐徵太常博士国子监丞不就父希文克世其学性善生至元十八年辛巳初颖敏侍信州公侧名士满座咸惊异其早慧就学克勤夜灯彻旦母鞠氏念其苦常勉其少休君勤益甚弱冠以八韵赋鸣往往凌厉先辈试补校官就中选复薄而不出及仁宗皇帝肇复科举君慨然曰此吾时也累试不合有司然磨礪相善兄道益贡讲画速化友顔成子贡淑训克肖子再龙次榜则君文非不可贡可第也於是知有命矣君素孝於亲笃於伦谊从兄丧久勿克举不计贫能恤兄子长失教不憚劳能训君子谓此或常人可勉至於生死在前而不惧祸福切已而不变则非常人所能君常过友人值其大疫死病肩踵属亲戚散莫顾君叹曰见病走非义也疴有神必不加祸有义留旬日瘞死治病病咸获安又尝任里役有剧贼匿其里官责捕急吏教嫁祸乡富人可脱已祸君曰吾寧自祸义不祸人破产购获贼儒者类辟妖怪及见一鬼遂自惊动辄噤不敢向口常说仁义见一事适已自便或重祸人置渊壑且相笑语自以为智其视君所为何如也君通究经史子集山经地志天文地理为文操笔立书教其子皆有文呜呼世岂能皆累世仕宦即累世诗书相追袭贤於骤贵而落远矣吾志君墓以死生祸福不动为难历述祖考子孙箕裘不替为可贵必有知道者知吾言之有可感也娶曾氏贤而宜家先二年卒子三曰治曰再龙曰源女二长适曾某幼适罗某孙四宗桧宗集宗杞绳武有遗文朱门问辨纪事珠玉射策提要若干卷禹贡沿革图指南象冈集五卷卒録十卷今雨集三卷程文藁四卷君旧寓永丰明德乡死於寓呜呼君美文行而不见於时可铭已铭曰

文不騫逢之畸行不驰交之漓义也而疴走仁也而已夷吁不见古之遗

高处士师周

呜呼余铭高君师周之墓其离合盛衰死生可感甚矣高氏自吉州吉水归仙迁雅庄为世科望族至君和兄弟益昌国朝至元混一以来君和履任徼巡隐然有偏裨方略保障州邑洊摧剧寇四境依以为安衣冠名胜日集其门弟君器乡贡旧名君宝当时文士故言文武兼备称焉又数十年君以幼龄嗜学日有闻君又师事艾文学幼玉磨琢词赋学校试率在魁列俊声一日动乡郡方册姓名遂流布江广湖浙之间方是时君在家庭为佳少在朋友为英游赋诗饮酒往往自放间尝来城郭与余遇辄纵意论文於词赋友三山林允元潼川唐化龙江东熊瑞每平视无言虽合处恒不久而君和以气为文如鹰隼之方得旷汉而騫长风也又数十年仁宗皇帝以明经修行取天下士君忻然曰庶几可以展吾志矣然竟不合於有司又困於门役不复屑屑以科举为事由是避器居城所居适与余为邻携其子植过余日循废堞荒塚往还共谈其於经史诸子百氏之书涉猎根柢能使余敬盖与君会合之密未有如此时者知君之文浸入於道雍容持重如老将之行师制敌虽有成败利钝而其锋终不可挫也又数年君复归乡近故家余十里而止虽山林深密而宾客时至吾闻其与客共坐常至竟日几席或经数日不彻无起去者可谓僻矣然儉人机巧里役桎羈祸患巧中犹不能免薄俗日滋恶肆善消理每如此天历己巳闻君抚事感物慨然有不获於怀用陶渊明天运苟如此语为诗见诒往往皆感叹自伤余复之曰天运苟如此相期在圣贤盖期君以古人之事而不芥蒂於世俗也盖君与余疎濶未有甚於此时者而知君之文与气俱擎斂久矣如瞿塘三峡之水霜降波平不见汹涌奔放之势而人愈莫测其津源也呜呼始终三十年之间而君之可喜可感具是矣吾尝谓君英杰刚銳之气自少至壮厄於科举之未复自壮而老困於祸患之相仍君不以自惜而君子之论则为人材惜之然於家无孝友之阙於人无伎求之过矩矱雅道涵茹斯文乡称善人斯亦可已君生宋咸淳甲戌死元统三年乙亥正月曾祖汝齐祖鸿飞父礼翁娶李氏子男三崧崧植孙二同孙还珠有诗若干卷藏於家以某年某月某日葬於某山之原崧泣请铭余於君相知深宜铭铭曰

玉也不必其珞玕梗也不必其亲桢用而不施不若行成不知其人视吾铭

兄子古臣

始余哭兄长翁兄子古臣年十五六哀若不可生尤奋欲扬其亲今三十有七年余与古臣俱瓠落无成而独以後死又哭古臣其忍铭之哉古臣髫髻为余兄後轩轩有大志不肯为庸琐刻意就学授简辄成诵为律赋有俊声既而学益昌恨不见科举及科复已踰壮一见所颁取士文体曰可无学而能然连试俱黜盖其文浩博高古而有司乐平易也既复自叹曰士生天地间当俯仰无愧外物不足深计筑宅一区繚以松竹梨枣之属村径深窈野兴萧然书倦则灌畦倚树与邻叟往还阡陌间或循诚斋杨公故庐废圃微吟久坐徘徊而归人亦莫有知其心者余尝观其平居议论与其治家规划使用世必有甚可观然竟不试以死可慨也古臣於事亲从兄取友皆尽道见事有不平者必抗公论见困苦者銳欲济忘其贫乡曲子弟不率教者必勉其归读书善研究有诗文凡十卷至顺二年五月一日以气疾终得年五十有三古臣字希古初与余同居吉水南岭余後徙郡城古臣迁南溪不时相见见则必夜话连旦余晚岁

多忧患古臣独尚义欲取以自任嗟乎孰使古臣死无以慰余之老衰乎娶庐陵彭氏子介女胜娘将以至顺三十年壬申十一月乙酉葬於所居之近中鹄乡尚坑原余哀其有才行而不得禄又不得年故为之铭铭曰

学而不仕也如璞不玉美而不章也如兰隐馥才也为讐志也非福呜呼古臣犹在吾目

仲子尚文

延佑七年正月二十二日余仲子尚文以疾死四月二十九日其妻王氏暴疾死六月二日其子开孙昉踰期继死短生不嗣哀莫置力其年十二月二十七日辛酉合葬其夫妇於吉水州同水乡南岭之西隐原归故乡从先莹也余伤其不淑买石以志之刘氏自南唐保大间由临江徙吉水南岭科贡相望尚文生而颖拔八岁阅族谱知攸敞为宗系又闻曾大父大父皆以文学知名当世即刻志家学经史畅析诗章清丽出语间近韩柳年十三四为律赋辄先庠序科复益研究羣书猎富探元夜讽昼读文蔚以达不肯俗常有四书疑纂若干卷诸史纂若干卷杂纂若干卷丁巳试贡闈不利作励志赋其言以励志为先利达为末明年八月柳生於左腹既溃而元气已劣百体俱病羣谒医不治危坐一室意良苦然见父母忧勤辄茹楚不呻矫为怡愉家人或用巫史曰有命母惑常执卷不置约之止曰儿无以忘疾岂以为学邪没之前一日观唐史至魏徵献陵之对曰太宗聪明可诚感何至为战国机术哉病中为古律诗数十篇用意弥高远幼在诸子弟中苍然有秋肃之色事二亲甚谨疾革营市甘旨节序悲喜若以不得久娛奉为痛忧家念亲时有远虑而不属其私闻亲党休戚病若为进减身之不惜而爱气类如此居常尚气谊重知故未尝有德於人徒以賈志早没宗族兄弟亲戚朋友踵门痛哭悼吊弥数月犹依依焉尚文字文仲生丁酉十月王氏生丙申八月世居吉水东门夫死哭之过哀曾大父铨学者称麓隐先生大父仁荣宋咸淳进士茶陵簿改从政郎平阳县尉学者称习静先生嗟乎人孰不病而病不可名人孰不死而死独可伤妻子相从地下父母白首祖送天乎忍哉使其寿宜兴吾门吾不德至此奈何邢敦夫王逢原显族多贵交故夭而名闻天下尚文地寒誉不出乡亦其人不求人知虽尝往来者或不能深悉也呜呼古今之可悲如此容有之矣而吾独以尚文之可悲又旷古之所无也死而有知其亦能悲此铭也夫铭曰

孰为而赋也孰为而附也孰为而裂之决也为懿为丑其安据也为石为玉美不固邪为鶚为鷖祥而寓也邪归来故乡高峩峩者墓邪

萧生以吾

皇庆二年癸丑某月某日萧以吾死年三十五余哭之哀明年改元延佑之五月其父熙绩以书来徵铭余受而哀之如初呜呼如以吾之不克其寿果可哀矣以吾少明敏事父母必达於顺处家庭未尝疾言遽色与之接而挹其和者或充然也始余客萧氏见其遇事谨用心厚意其必有为於世读书为文讲析道理论世代升降得失常夜分相对童仆倦强意弥厉尤嗜诗自选以下诸大家皆手写联篇帙寤寐体制间以所未见者试评焉辄曰似某某无不然被服淡薄如寒素其风致笃厚有可媿流俗者初熙绩连孕子不育故以吾特鍾爱以吾生时家固

未羸又多病熙绩夫妇劬瘁良至晚赖其力以佚而以吾死矣其於人世父子之情为何如也以吾病且死无他言独教其弟以娱亲应门戚然曰吾不得以事吾亲矣及死诸父昆弟亲友乡党皆悼伤不能去於心古今以德人君子为难如以吾者世孰知之哉以吾讳贵孙曾祖某祖某文行为世师表宋末以诗经魁天下授衡州推官学者称草庐先生父讳某熙绩其字也宋乡贡进士母郭氏先十六年卒继文氏宣慰同知公长女配袁氏子男三人某某某女一人许适袁氏以十一月某日葬某乡之原以吾初有志功名恨不在科举时死数月而科举兴穷达虽有命亦可哀已铭曰

其履之醇醇其意之恂恂而不寿於其身呜呼奈何乎白发之亲

墓表

萧德翁

君讳屋字德翁姓萧氏曾祖讳商老祖讳棟父讳焕宋贛县主簿宋亡以国难死时君始八岁避难应变卓如成人公私应酬抢攘会三兄俱逝与弟贵翁表里树立公上之供给不能使之困乡里之机穽不能使之伤由是勅黠者避其锋高捷者避其善於是官暴吏奸政如虎蛇东家西里南隣北屋鲜不披靡莫支独君兄弟所为多出人意表老成者相逊曰是二子斐然剽出如秋风俊鹘所向无前未可量也久之齿益繁居益隘遂益充拓其室构池园寢为乡里甲须溪刘先生以其能以德兴其门书德斋二字以为之表其子永复求余为德斋记君名日闻於四方好施尚义修桥梁治道路捐医药给衾棺杀谷值嫁孤女奉宾客如是者类数十年不倦过者咸称曰是足以名德斋矣然君未尝以为德为之益勤吾尝观於世未少有德於人輒自赞不已公之不自赞非矫以为之者岂非其慈厚本於性其谦让得於天有不自知其然而然者欤君长身丰颐声如洪钟直而有容质而不夸尚大体而不拘小节敦实理而不尚虚文然君尤以孝弟称母夫人年八十有奇公养志无违率其子弟各为新第凿池以鱼辟园以花映带左右戏彩争迎轻輿环侍亲扶持其间真若潘安仁故事其能使乡里朋友称誉者不徒以其事亲之力有余而尤以其意之有余不徒以其身之能孝而尤以其子孙之能孝也孟子以为世称曾元之不如曾参徒以其意之不能充广耳若君之事亲再世而有余意有余孝岂不甚难得哉君又友其弟弟死而哀不止岂不甚难得哉君生淳佑己巳享年七十有八子五人永宪某某某女三人孙男五人孙女八人曾孙男二人曾孙女二人君没以丙戌十二月二日後十日奉柩葬其居之近易家山附先君主簿李夫人之兆左既葬其子宪等既求其姻友奉议大夫刘参状其行又踵门而请余曰先人幸早辱相知且辱为记其斋宇今先君不幸弃其诸孤先生尚赐一言以重其阡以为千载不朽余既念与君交久又贤其有令子故为表其墓呜呼数千百年之後丘落谷湮有登高而望临穴而叹曰此宋仁宗端臣之子孙尚其封树之哉

故宋张伯仪

呜呼伯仪死且九十年矣而耆老谈其风乡人诵其德子孙务诗礼阖门数百人指日可以盛

大则君之所以树善垂後者岂偶然哉君先世自贝州徙吉水曾祖文德祖绂皆隐德勿耀父谟不仕然以行取高贤公卿间平棗四十年秘书欧阳守道常贻书江丞相万里亟扬其善君名淑少自克立外重内敏谢俗嗜学受业大理寺丞曾公镐弱冠凌厉庠序有声名试贡闈屡捷乙榜事父母以孝闻从兄弟以友着居乡里以善称好善责已酬物谐俗视其父无不及辟园凿池增置斋馆图史环贮花竹秀野日与宾客往还赋咏其间於世利盖泊如也生宋庆元壬戌七月十七日卒咸淳庚戌三月五日娶吴氏继胡氏萧氏子榘字天陞枢字天极天陞以芳年登漕贡孙文孙定孙喜孙明孙俱天陞子也克大其家曾孙观老吉惠德行文词竝驾古人建义学立奉先祠蔚然日进於礼乐元孙维申南复皆慕学尤奇既以卒之明年辛亥十月壬申窆於龙潭吴家记之原至是文之姻友曰萧某佳士也致文之意以其曾祖宋进士南城縣丞萧静轩状来请表其墓且言乡老思君未置呜呼当君卒时海内名笔相望不以此时谒志以发潜德顾待今而以属余非文之克彰其先欤余观世之大姓一再传之後替灭者何限甚至丘陇荒湮草生狐嗥不知其何人其或子孙荣华而饱食暖衣又不知彰其先美今君之墓百年异代而子孙方欲表以垂不朽其家之盛而後之益贤可知矣乃表於其墓曰

古称为善必有後天下惟孝友惟有德於人者天必佑之鄉之君子必喜稱之以流於无穷太史公曰余登箕山其上盖有许由塚云谓其风流不泯也於戏後又千載有过是者必式曰是宋善人张君伯仪之墓

胡

自黔娄以贫死几二千年庐陵胡 继之贫可知矣 之贤亦可知矣 生名家上距忠简公七世曾祖某祖某父某 字尊生早以颖悟受知乡先生博士刘公会孟礼部邓公中文既踰弱冠从余学以赋律论率魁乡校皇庆元年科复 自期其战艺当首捷而累不利诗词天出而词尤工清切窈眇近世殆鲜俚性嗜酒稽古所得止以资醉愤世嫉邪不可奈何则托之酒与词畅怀忘情少年貌固娟秀继而贫病每见辄棱棱兀坐稠衆中然文益腴呜呼天之生才艰矣若 之成者又艰而竟以贫死命也夫 死以至顺二年某月某日得年若干初娶临江教授刘岂蟠女再娶郭氏子某今抚鞠於周汉臣未死时为书与宣慰周公志仁及汉臣与常所亲厚者以葬复为书乞铭於余细字如平生余读之堕泪复之曰吾忍生铭吾友乎子疾固未死死而不铭吾乃负子既死踰一年余为铭友人萧升周贺买石刻焉相率酹其墓而表其上曰

肮脏而穷者命邪疾弱而短者天邪白璧泥涂俯仰一嗟呜呼奈何

桂隐文集卷二

桂隐文集卷三

<集部,别集类,金至元,桂隐文集>

钦定四库全书

桂隐文集卷三元 刘诩 撰祭文

祭王梅边【名炎午】

呜呼孰不事亲而公能甘旨尽欢如曾子闵子之以孝传孰不居丧而公能苦块飭粥如王裒徐积之庠阡其笃兄弟也如连璧奇木千载而不可分其从气类也如长风健翮得意而纵高騫其用武则力足以任乎乡里之保障艺足以守乎平原之?韞其为文则精者出宝劒於千链沛者纵春涛於百川赖以排难者以之为柱於中流待以举火者以之为谷於凶年闻其辩者疑其为战国之处士见其粹者疑其为山泽之癯仙人方纵侈公胡为淡服而疏食人皆行乐公胡为昼忘食而夜忘眠盖其可知者已见於斯世之公论而不可知者虽吾亦不能以尽言呜呼公年不踰於上寿而凶傲或至於耆耄公名仅发於六馆而贪狡常一日而貂蝉生材杰而不见用於天下吾不知彼苍曷为其然诩少而闻名晚始相识虽十五年之未多贵情好於一日每暂离而即书常久会而恐失谈何微而不穷辩何异而不一非悠悠之论交观势利以疎密公昔初病吾往候公公喜我至剪烛夜中後闻向安每报每喜於公何益心则如此三月欲尽报公在门雨车淋漓握手忘言盖入城未就乎贤子之养而先急乎朋友之共论慨此意之迂濶岂流俗之所能既相从於累日复别公而有行公云此行定隔千古孰知斯言之?曾不旬浹而公貌不可再覩矣公有令子虽死不亡独风流之永絶增乡国之?伤公魂何之公柩返乡倘斯文之足慰尚彷彿於一觞

祭彭冲所【即琦初也婿彭鉉父】

呜呼冲所四十五年之交游今遽已矣世间有不可失之友今遂死矣忆岁丁亥吾来印山吾始二十君过其二以意气而定交甚金兰之相契风窗雪案雨笠晴簪何游不同何理不议春园新花秋墅高桂我棋而喧君笋而醉大篇短章奇文奥义或一辩而千言或一笔而万字君如大海奔放不收我以溪涧亦逐其流君如骐驎蹴踏九霄我以驽骀竝驰其轡或同异而角立卒至善之是求取言笑之莫逆终琢磨而若仇咸默契於古人遂顛倒於俗俦乃若世故轆轤游气酢醑常利钝之共济每亨困之相谋所与谈者至亲有所不知所与俱者同气有所不侔君晚决科遂满夙心簪花曲江联骑上林貳邑佐藩四驰厥声我方灌园抱瓮郭门君有书来心必相论虽蜚伏之各异而情好之弥敦昨岁二月君赴番禺舫舟苍亭旗旆舒舒建帆把酒叙别斯须谓重会之非久乃望瘁於驰驱挟冢子以俱游惨双驾於灵车初得报而犹疑今抚柩而长吁何彼苍之异好叩大钧而无途朔风吹波春雪裂肤峩峩石滩脩脩穹鱼君归良苦魂魄何如我多患难失君愈孤君亦知否当歆歆歆魂兮来归为饮此壶

祭夏深道【即婿夏昶之父】

呜呼深道於是往矣环百里之风流於是丧矣三十年之情义不复曩矣尚忆相从君我方壮顏如烟玉谈经春浪气倾公卿车辙填巷交游南北文帙盈囊锦輿扶亲顿足高唱吴鱼入饌燕酪流觴兄弟竹屋联吟共赏傲东月之晴轩宴荷亭之夜帐凌絕岫以吹笛泳大江而纵舫解纷排难振弱拔枉一时气槩见称倜傥固流俗之辟易亦气类之所仰何二竖之无情乘六气之乖爽坚车中之高卧阅寒暑之消长坐不離於重轡行不舍於寿杖似啣齿之半人老一窻之天壤呜呼驰骋之姿局以拘挛谈笑之怀杂以痛怆虽神情之未減亦姻友之共怅何凤皇之在薮而鵬鷖之凌空天驥之跛足而豺豕之走圯也嗟维久要申以婚党既欣同而戚合愧情密而迹旷每怀问安以慰慕向每怀剧语以见叙暢曾中心之未酌忽长逝而缺望思周旋之平生增凄悼之万状偶膝痠之为梗觉拜跪之犹强遣愚儿以往奠寄老泪之横放

祭杨西有

呜呼世未尝无公孙侨管夷吾之材常患位不显於时世未尝无王彦方陈太丘之行常患名不登於史嗟惟西轩振拔自己遂继乔木郁为杞梓乡有霖雨君为之幪乡有螭虎君制其锋君所排难如翳而风君所煦抚如饥而充其遇事如太阿龙泉之淬秋水其急义如高鸿俊鹖之騫长空其气愈谦而王公贵人忘其势之峻其语若讷而游士侠客丧其辩之雄崇门盘回大第高矗冠佩从容诗礼磨礪兄弟急难如手於足肃我阶庭睦我姻族岁时拜起家法桐木伏腊咏觴清风杜曲弱冠羣英气撼場屋追故家之遗意愧四境之流俗忱倡勇之在君纷袭芳而继躅而况名驹长鸣蓊门青云纵靶鲁後周前或华发之怀绶或青年而乘轩谓从此而奋举遡螭坳而凌木天何天道之无凭乃贺庠而吊庭易袍笏以苦块变彩衣於素纓昔之笑谈今为??哀此痛之良酷谅行道之抚膺嗟君材之盘盘竟大器之未施譬骐驎之伏枥纵駉骀而争驰幸继志之有人终兴门於他时顾惟君我相望英槩曾托姻之几何遂永别於千载怀绸缪而不语持盃酒以远酌春云弥空春雨连晦思君平生一恸如对

祭萧从吾

呜呼吾哭萧氏素心翁父子二人矣今最少如从吾亦复哭焉其哀为何如也君少颖悟卓有立志谓当乘青云而纵八极何所不至奈大化之生材常进退之倒置卷经纶于一堂傲多变於睥睨园林清宴花竹春意盖善察脉者先疗疾病於未然善操舟者不以波涛之可畏而识者以一家一乡而推之固知其可用世也方将建大厦以成肯堂之志遗一经以为燕翼之计胡中道之相违溘朝露之忽逝崇霜叠雪忧集祸萃山空兮木落凤亡兮皇迷遂使慈闈哀哀白发悲泪犹子??子立麻總襁褓呱呱朝暮谁视而阿大中郎为之寡懽而鲜惊端居而永歆虽然事有不必修理有不必修覆乃培之基祸乃福之隧试遐观於古今可含笑於下地追维平生所契者义晚失良朋相望谁慰薄奠一觴有陨其泪

祭仲子尚文

呜呼尚文汝何辜於天而至此极邪忆汝之幼素多病苦吾客於外怜汝者何暨年七八从吾四方志气嶷嶷书声琅琅援笔而写辄已成章吾常期汝可兴吾门但疑灾疾或不可以久长也已而年学俱长粗有俊誉磨砺简编适际科举推汝之心盖自以功名之不足取也戊午三月汝感腰疾五月稍安汝自治药吾犹不甚以为意其年八月吾归南山汝亦继来路逢疾风至则感冒吾与汝连牀共语汝云右腹之偏若有疮块隐显可疑吾令归城速治吾亦旋归则汝疮浸长徧谒诸医或云宜消或云宜溃历试诸医而疮势骤进矣汝书抵吾斋云比连服内消丸不见内消但觉内长此十月间也遂用外科贴至十一月初三日疮溃出脓数升汝口呼痛汝手沾湿吾不忍见闻次日精神如常人朋友皆贺吾复得壮子虽吾亦自谓是当愈矣夫何证状变为弱虚连用刚剂幸而复振其年岁晚次年新春又谓当愈矣汝於此时有感必咏闻唱即和其心忻忻恨不一日从朋侪以快纾郁也吾三月十一日迁居城西汝以是月末病复进自是元气益羸东支西败朝剧暮差迁延以至秋冬如春空之既霁而旋雨余灯之欲灭而复明也汝痛而呻吾与汝母汝兄必在汝旁母以为心汝痛暂息意畅而怡吾与汝母汝兄必在汝旁共为之喜虽心知其不起而犹冀其万一苟延也今年正旦汝犹强称觴观贺客题名至元夕意愈不乐然危坐相对何所不言经史环枕随意辄读孰知其仅越五日而旋死邪呜呼吾祖父之德非宜夭其後者而至此何邪汝之顔貌与汝所为非宜短折者而竟至此何邪疾病人所不免而汝病独异於人医药以济夭死而医药至汝而无益人死则有妻子可以嗣守而汝之妻子相继而俱尽父母兄弟非不用情骨肉亲友非不効力智穷神弊无所归咎不知造物者意竟何为也天地有穷汝父母之恨无穷也汝父益老汝母多病一饷之适意思汝辄痛不知汝九原之下意又何也今将葬汝夫妇於故乡南岭西隐原山之右汝曾祖麓隐先生之墓也山之左汝祖县尉习静先生之墓也汝生不逮事死而相从其可乐或尚能如人间否也吾为汝墓铭铭汝良痛汝其知也邪吾读韩魏公侄墓铭悲其早年羸疾以夭一妻一子一女相继以逝汝之可痛大略类此韩氏非不德也汝之闻此其尚可少慰也明日庚申先以汝柩入圻後日辛酉汝妻丧继至而後入圻汝母汝兄当临穴永诀汝父以今夕先奠一觴汝其知之

哀戴用斋

皇庆二年癸丑十月二十有二日用斋戴先生死以十二月五日葬友人刘某悲其有文章而穷以死也作哀辞嗟斯人之生兮患不为贤胡绚美之如君兮祇以为穷之愆学如武库之森备兮文浩浩乎如山川谋可以弥世故之轲轲兮辨可以折坚白同异之元然而蔽风雨仅有环堵之室畜妻子则竟无一顷之田仕不拔於儒选之调算不及於下寿之年病霖雨而无裹饭兮黔娄之衾萧然瓦灯寒而无辉兮孤儿咽而不眠緦麻不足於数人兮孰负土而庐阡诚以才而至此兮愿以斯文而回彼之天呜呼万古一理兮徒有泪之潺湲

哀杨秋山

往予幼时闻公名籍甚意其遡风云取卿相直不一日岂复可进而友哉时改公为民吾乡予始以诸生见公稍察其纯折辈行与交特相好於是予之悉公者深矣公少尉庐陵入郡宪幙以斯文自任不喜作聪明常为道人服行田里间察陰事佑弱击强谔谔以台谏用郡邑至出

岭归隐而尽洗前念浮沉俗间若无所能人先士大夫死义固多而废处者往往或以才不谐世老不堪用才与年如公而确然不动心者殆鲜闲居无营故人故吏鹰扬满眼列钟鼎荡闾巷慢慢若不闻覩性喜客倾倒谈笑无复底蕴故知细论坐久隙语或嗒然长吁则世亦莫能测也与人交谨往复谏谏行市井间若不玩然心所不合或竟坐不接一语近年以来诸公贵利自薄以文高相誉不吝至褒以周召不为意公亦不肯泛应亦不一字过情故纷纷者若不相乐而心实严忌之郡俗习为小有挟即侈然躡处躡蹠前辈漫不省独敬公挽与竝公於年长一日者必逊下或因以少化广坐崇势谈笑方张公间以舌戟健者辄愧屈此其平生聪明无所为用而入於议论间犹如善庖之芒刃老吏之案牘妙中肯綮而隐慝不得遯伏耳愤世嫉邪自托晦嘿古冠敝衣动必矩法施於事为乃不为修饰古所谓通介者其在斯人与予尝评公平生发奸摘伏如赵广汉剗繁治剧如刘穆之活死命不自伐如钱若水杜门教授如管幼安诗酒遯世如陶靖节老为诸侯客如杜子美守穷不妄干人如陈无已此皆其迹也若其自得虽予亦不能知也呜呼余初识公时犹妙风致萧萧如仙人愈会愈老自号蜀皤数年埃黑生面然犹意其未死而竟以死亦可哀也人生读书抱才入官用世曾不少究而穷处以死天命竟何如也予少不可於时从公周旋迂濶今已白发过半矣前不能为公用世之经济後不能为公立身之名誉徒混混为衆人以老而公所为取者竟何如哉感公生死视他人哀特甚叙圻志之所不及作哀词曰士有出而为干莫兮俄折而顽仕不数年兮四十投闲结为瑞芝长虹兮何复见乎人间哀哉乎秋山

书【小東附】

与揭曼硕学士

洗昨岁闻迁直集贤遂以斯道日侍严近天下幸甚阁下宜得此久矣而天下之所望於阁下者则不止此也位日高道日尊天下之文体日益取正於阁下天下幸甚古今文章甚不一矣後之作者期於古而不期於袭期於善而不期於同期於理之达神之超变化起伏之妙而不尽期於为收敛平缓之势一二十年来天下之诗於律多法杜工部早朝大明宫夔府秋兴之作於长篇又多法李翰林长短句李杜非不佳矣学者固当以是为正途然学而至於袭袭而至於举世若同一声岂不反似可厌哉其于文则欲气平辞缓以比韩欧不知韩欧有长江大河之壮而观者特见其安流有高山乔岳之重而观者不觉其耸拔何尝以委怯为和平迂挠为春容束缩无生意短澁无议论为收敛哉故学西施者仅得其矚学孙叔敖者仅得其衣冠谈笑非善学者也故李杜王韦竝世竞美各有途辙孟荀氏韩柳氏欧苏氏千载相师卒各立门户曾出於欧门而不用欧苏氏虽父子亦各务於已出盖士非学古则不能以超於今而今亦何必不如古使吾自能为古则吾又後日之古也若同然而学为一体不能变化以自为古恐学古而不离於今也盖尝读阁下之书上不逊於古下不溺於今诗古矣而不可以指曰自某氏文古矣而不可以指曰自某氏此善学者也学古而能使人不知其学古则吾自为古矣无他学古而能为古人之实不徒为古人之文此所以能使人不知其学古也此所以能自为古也仆少颇疏劣其於斯文非有意於述作故亦多散逸然间尝取存者读之似亦有视古人无甚媿者夫知音之难故有旷千载而独得仆也幸得与阁下竝世而立亦尝辱一言之知耻而不以质正於左右则後而失其时矣谨略録所为文若干篇及朋友所梓诗一集献於下风

得辱深评而极论之甚幸古之投所业於公卿者皆以干进也如仆岂有是心哉倘有以为之不朽则旷六合千载而不可数者岂不在是乎干冒崇严无任兢悚

与欧阳圭斋学士

洗惟道之在天下不必尽在縉绅之士亦不必尽在山林之人而縉绅之士处於尊显故其道易孚山林之人伏於穷僻故其道难达然古之人固有名满天下文布遐裔而出言而人莫同其乐会意而人莫知其微徒同声附和以名相求独山林之人乃有遥悟於千里之外而不能以相语者又有吟哦闻阁读书着文自得千载顾视流辈无足为语而知崇高富贵之中有道所在而势分之隔不得以相从者斯二者不得值於天地之间久矣然縉绅之士不得山林之人以知其心之微若少缺於其乐而不害其道之传山林之人不得縉绅之士以知其道以发其心之所乐则有槁朽於木石而已故自古士之立於班行之上苟有以自见无不着称於时而其负斯道者遂为四海之河华一代之师表而山林之人则旷世不闻有以斯文斯道自树於千载若汉之扬氏唐之韩柳氏宋之欧阳氏者岂斯道偏在縉绅而不在於山林与吾固疑其有甚不可传也是故山林之人倘知道之在已亦必趋乎縉绅之有道者质焉至有自号於縉绅曰吾之为文之深愈於天下之人而縉绅之有道者亦必进之若知己必使有闻於天下後世是岂徒以为声名哉徒推有余以赆不足哉亦必其意之有乐乎此也呜呼非真有道者不能也阁下锺山川之间气当科举之兴运大廷伟对天下称诵不二十年遂跻卿辅雄文奥学凌厉当时天下之人固以阁下为天下之欧阳子也而阁下乃自谓为庐陵人庐陵亦何幸复有一天下欧阳子哉洗庐陵人也自少颇知为文而知道不在已故亦不甚经意而於阁下之文虽不多见而若有以知其心喜道之在縉绅者复出庐陵而衰老不能走京师以蕲一言之相契谨以其所为诗及録其所为文若干篇以献古之投文者或蕲於用世若洗之衰老皆非有他独庶几一言之相契耳伏惟悯山林之老朽有以慰发其心黼黻篇端使乡人子弟藉以毕粹以见信於来世谅亦阁下之所乐为也干冒崇严无任悚栗不备

答揭曼硕学士

去秋吾吉夏仲炳归得二月所惠书甚慰执事身居崇要有论思撰述之责而能念及山林遐远时赐音问非观势之时所为也所论天下德行文学之士盖自有其人若仆何得与於其间或者谓江西为可薄则实不然姑以宋三百年而论二程起河洛横渠起关中濂溪晦翁南轩起东南皆为道学宗三苏出蜀欧阳出庐陵王介甫出临川曾子固出盱江皆以文学名天下後世盖扶輿清淑之气周流於天地间互为丰啬厚薄安知後有作者不生於旷古无闻之地乎且人之习於声何常之有岂可以一时一人遂有轻重高下於其所生之地哉执事以为何如执事之文皆於日光玉洁之中而有河倾海倒之势其鸣於千载必矣又何必其不江西也兹因乡人某往京师谨此问起居末由会晤万万厚自珍爱不备

与郑鹏南宪使

某伏处山林闻明公名满海内久矣暨其来南则又闻其核污警惰夙夜勤政奸贪褫魄煌煌

如风霆之日呼震於其上而不敢以寧窃以为此古贤士大夫也安得一拜下风以观其声光
誠不自意大旆之回少留庐陵辱过敝庐遂得承顏接词者累日又不鄙薄赐教以诗以明公
之文学议论高出当代而下听於愚盲而後知大人君子之用心与流俗异也明公朝廷之所
倚注班行之所推重入为臯夔出为方召观风察俗则为张范承流宣化则为龚黄此人心之
公言非独某之私赞也如闻台省交除但不知果就何职相去差远驰慕奈何某自别明公之
後益就汨没然闭门读书确守矩矱不敢有一毫意外之希慕朝廷搜求遗逸过蒙明公推援
而心耻以闻达求於人谅当终老於书册间耳曩者一子颇肆力於学既踰弱冠病及两年以
死心甚怜之自为之铭不自揆度欲干明公大名为之篆额所以偿其短世慰其土中之幽思
伏惟仁人惻隐之心特赐允请则某与逝者俱感明公之盛德无穷也干冒崇严不寒而栗

为仲子尚文聘王氏

惟季秋为四时之清气九日为千载之佳节於此而奉启伟人则竿牋陈言祇以为渎而况婚
姻至情礼不在文请得以略诂他日行东山涉字水抚其竞秀合流之势起伏万貌坐念自有
宇宙以来其人品磊落英豪固不可尽数而百年之间飞霞颀颀戟弁相高亦复何限然声光
起伏往往不可以玩其乔木旧家苍然岁寒傲霜雪而不凋阅桑海而大耐者其有几何有如
名门忠厚以为本礼乐以为文盛时掉鞅宦途角雄場屋聿为戴景执事昆仲才可以干莫器
可以瑚璉识时应世聯芳竞爽阖门千指岁时衣冠雍容可画乡里指之为太丘之间公艺之
族橘中之棋非深扇外之尘不至岂非山川之气所特鍾者欤其甲乌衣踵三槐为世道柱石
且有日而婚嫁扳附岂冰氏子所敢企其下风哉次儿尚文年可十五尝鼎斯文或赏其可然
淡泊相遭当求其称而蹇修惠言乃欲举令嗣静学之次玉女为之配循避歎然质之秋山先
生而以为信因念诸父因依固尝有一日之雅而又从宗兄以识静学冲襟遂识当时窃有愿
交之意而今乃得为肺腑之戚誠所甚幸用是不揆其情而庙焉穆卜以不腆书币请焉百世
子孙之好将在此而宗祊实嘉赖之临笔不胜忻悚俟命之至

与杨竹礪

曩以哭子之感重累书奠虽尝奉尺书为谢终以未得造门为歉相望二百里只重瞻邇耳迹
者来城始闻令弟明斋遽尔捐馆使人惊悼不自己明斋以名家识时之才当昭代右文之日
外历藩宣内任清要朋友之间方望其大用以究设施庶几世道与有蒙赖迺今中路折轴四
方尽伤兄弟之情如手如足当何以为心邪抑古今痛事如此不少以数观变以理塞悲为国
家自重乃亲友之至愿也未能躬唁伏楮拳切

代王通赵氏

邇银潢於异代文彩犹新怀珠树之旧家声华已冷幸里閭获托於平生宜婚姻远启乎两姓
顾闺房既能綉於平原而儿稚岂并佳於逸少福徼百世事定一言有女不不与凡借重直同
於九鼎之子归宜其室相成倘副於三槐

与平坡

洗作疎两年殊切驰邈乃忽闻尊公奄逝使人惊悼不已坐念前朝宿儒零谢殆尽使後生小子犹及闻正始议论之髣髴正赖後凋一二公行为乡间之典型文为学者之领袖暮岁岿然砥柱薄俗使同里各得其分如得质於太丘使过门各得所愿如得见於司马诗书科目之效正在目前而不克少俟阶庭之奋达此吾党所同慨也时暑方炽尚惟饘粥加勉不胜至愿

答郭方春

洗不相见久矣中闻赐访又以留外不得会晤独时从令兄往还知动履安胜则虽不见犹见也递中忽披手书读之忻慰垂示高文皆有至味大抵脱去流俗务就真实古之作者正如是耳苟未能忘情於衒鬻则以寡理为雄壮浮靡为博赡但可欺诳聋愚耳石洞诗犹有韦王风致恨今世识真者少若此空山絶涧之意谁与领哉见教人有传洗若不满於科举者此告者之过科举取士尚矣汉唐以来名贤多出此途此明时之所以网罗天下之英俊者也而谁敢小之其间贤愚不齐从古已然譬之大化生凤皇麒麟之瑞豫章楸楠杞梓之材与樗栎稂莠菰蓂萧艾?鴟鵂杂然而竝兴天亦安能规规然而择之又安能使瑞与材皆无覆载生成之偏哉苏明允李方叔之流皆未尝得志於科举韩退之曾子固皆累十数试而仅一得洗虽无似亦颇知命安分何尝置忿如或者之论哉所刊程文非惟未尝开口论其是非亦志气衰惰世念日薄乃未尝一过目也足下所论四书之弊甚善然不敢附和者恐不知者指为忿耳足下相爱又谓之不得科举而重此不敢当但科举外物非人所能为若立身行己差少过失则俯仰之间自有真乐然未易能也足下停蓄其学不肯羣试於有司作文制行皆在科举外此尤可敬恨未得相从以消鄙吝也洗一向留家颇有应俗之作未能写寄仲敬远游似未为得何不姑处馆娯亲力学俟命然男子生而志四方安知不遂以此遇也儿辈今岁亦留家附道多谢何时到城当得面究不宣

答周如綱

别後独坐一室深思共语忽已在百里外殊用怅然两日抵家朋友还往度日夜归得书发缄读之推与过情而待所尊敬歉然不敢当人生无如朋友之乐然英妙可与晤语者甚难足下学勤而才富为文皆足以警发衰朽譬之宝劒虽未出匣自有斩犀兕破蛟鳄之气仆方以得讲切为幸而足下乃礼?逾甚可见怀宝而不自矜也周伯仁之牛心炙苏长公之蜜云龙皆当时大贤故举动言笑辄足以倾一时而名千载若仆之好德乐善则有之而身处穷约其言语何足以加毫末轻重於朋友哉至论仆之为文若过高深而不利於場屋者仆正恨不能高深果高深虽不利於場屋不恨也况爵禄外物自有定命卑浅者且可得高深者独不可得哉见喻欲示以高文尤所愿见会面当在旦夕得剧论也敬堂留沪东未归谈间亟称才美志行恐高尚非淡泊儒家所能淹未知其能小用心於训迪否足下度其可甚幸

与彭居所

洗於名門相好之義不待申之以婚姻而後篤密也而況托姻方隆哉君處山林我依城郭相望要不甚遠佳時暇日既不能幅巾杖履扶携阡陌以共一笑之樂而書問之往來詩簡之唱和亦且濶焉如許則徒恃此心之同耳執事有過人之俊而自處於謙約有經世之蘊而自托於晦藏青峰流水花檻藥欄超然隱君子之趣若非世俗之所能溷者而階庭子弟方且振翻仕途揚鑣道闕過長沙而思賈誼之達政窺五溪而想伏波之立功蓋常挹其議論熟其詩文江岷源委蓋有自來則吾之於君雖未見猶見也洗疇昔多幸辱君賜之主維以令弟某之長愛許適小兒某甚盛心也結言以來亦三四年惟恐其箕裘之不能襲詩禮之不能勗以為君辱而孰敢有意於早成婚哉今年及志學亦差若可進萬山諸賢過而撫之曰足以賦桃夭矣敢用歷吉以是月丁卯奉書納幣於庀下所謂不以微薄廢者惟道義歲寒將恃此為萬世子孫之福

与李方心

某欲拜書久矣而輒墮因循中承尊字此時欲寫數篇鄙作求教冗故未及即答既而擬十月間必一到印山因得求見則面語為詳而筆墨可廢也乃多雨久稽故鄉竟不果往雖情如此而欲不自媿罪不可也即辰霜氣益嚴想尊候佳適不知日食米可幾何去年聞喜食面亦果否每觀賤翰辭氣蒼然只似公健時未嘗不以喜以敬科舉興公固尊宿不復屑而某輩亦老項不作數矣幼聞旗鈴晚復見之可慨也今之時文往往夫人自以為能鑄駑驥一驅無復知媿然世間伯樂實不常有則文体固未可以復古也春間有袁氏者欲作賞試適與申齋皆不暇命题多非本意今見謂有二百卷然全未考青原賦亦未見好者或得佳作當錄呈也六月來又與申齋冲所約為課試意以激厲兒輩初行此規作者頗多今則有題而無卷矣至如學校季試所謂彌望皆黃茅白芻誠不曉其何故明經古以為難今雖但記見成注脚亦未見其人某少不力学今聰明荒耗其遺忘不待數年以後況欲求斯言於科舉之外邪先生學有淵源平昔所得還可疏示一二否某近留南嶺有數篇應酬文字謾錄求教以塞嚴命迺來斯文亦復可嘆眼中巨擘非不滂葩駿動一時意向病在夸多求捷不知古人務必傳者亦爾否也如某輩但能識其如此耳先生以為何如

与滕玉霄

自明公之歸洪也不及一書奉問起居自以為心之所向千里如對固不計乎書問之疏數也頗聞辭榮投老以詩書賓客自娛四方所共高而朝廷之倚注方切安車召還盛之白玉行且見之仆窮經山中日向皓首去秋亦嘗來洪非為科舉亦欲因以見明公乃聞有臨川之行科舉懸於一夫之去取所不足惜所惜者到洪而不一見明公耳明公名滿天下齒牙余論所到諒不靳也親友李兄廸吉肯堂殿講之諸孫談命奇中自号心天欲挂一帘於浦云山雨間非借明公大手以表章之不可故介仆納拜於庭下倘辱回盼則其長价豈特右軍八角扇哉干冒崇嚴臨楮愧悚尚期厚加珍愛以膺顯擢不具

与罗养正

自君入南不敢奉书以候起居以君方驱驰於国事则山林放逸之民固无事乎书也如蒙驿传上下亦承寄声深见不忘独媿仆失於瞻伺不及走见耳一命之士苟存心於爱物於人必有所济矧执事以英杰之才明敏之见参赞宪幕事无不统一道之民蒙惠必多此流声之所以远布也台省需贤青冥纵靶在此行矣某今岁仍城居亦时到乡数与明宗羣从令似中舍相会皆安乐无他因城西吴某以台檄补宪掾谨勒此以寄乡慕某为方崖御史之懿戚俊爽有文学草庐吴公曼硕揭公皆所盼异以乡人之情振德而辅翼之幸甚相望甚迓未由参晤惟冀保练以亨奋自爱不宣

与邓善之【代萧焕有】

往留京师辱不以其年少学劣进而教之周旋累年所以警其不及而勗其成者良至求知已於天下舍公其谁赋归以来从游殆絕岂无他人以为获交於明公则所谓於山见终南於水见黄河诚不敢以泛然他挹也明公以昭代之才久处严近议论高朝廷声名满天下班行之间殆鲜其比中间假节南来首以文行重儒风复以宪纲范俗弊其所素蓄当益以展布窃以士君子之仕也所以行道而道之所寓也惟文章足以饰皇猷惟政事足以振世运方今之官爵虽皆可行志而惟馆阁可以不负其文章惟风宪可以必达其政事明公之文章则居馆阁政事则位风宪矣他有美官复何足道外此则尚未为宰相耳苏明允有言天子之宰相可以生人可以杀人而求一言之几於道则不可得明公先有其不可得者宰相直外物非明公之所难也某曩为桃源州教不数月以归杜门读书又二三年始受临江照磨簿书匡勦苦无自得之趣然心之不可必不肯苟随虽时有平反而获罪於上下至矣以是复奉身而退其於仕进岂不甚可叹哉然皆不足为明公道独惟明公天下所同慕愿一见而不获而某幸有畴昔之好乃不能走千里以尽所欲言以此抱媿殊耿耿也偶闻有便人书此薄寄拳切钱塘素所欲往明公在焉会在旦夕惟厚加保练以国家斯文自爱不备

答王宜父

岁昨别後每怀先公从游之好内伤於心自谓文字之寄痛涕泗之示感不足言也因念友道之薄於今为甚大家贵人则必於势利之足以轩轻者倾倒焉鄙夫游士则必於势利之足以相振者奔走焉否则未有不难合而易疎者也先公之於仆仆之於先公皆在二者之外是以愈久而弥敦既没而不朽而岂流俗所能知哉颇闻执事居忧读礼动法古人四境流誉於是足以为梅翁之子矣於是仆之见执事将如见梅翁矣然不敢以书相劳苦者惧徒溷孝思也新年相望益重驰慕晨兴得书慰感兼集非独不忘其契濶而且有以宠光其荒寂谊当引却而不敢受恐或者以为不情耳於昭盛心藏之无斲宅兆之卜固不可轻然陰阳使人多畏当择见之高者谋之遗藁已録出甚善其间编摩校治昔者尊公用力勤矣亦不可不过目而後入梓至於述行昆仲亦当先自编类虽其大节昭着在人而必有隐德非外人所尽知者推先公之心虽十易藁不为厌也

答萧敷先【代长男立敬】

惟婚姻辞无不腆而浮恭长语则不敢渎且先施实命之矣故亦直叙梗槩以复於左右每念异时名门诸老寤寐诗书虚右以迎四方之宾游设醴以肃当代之耆硕而老人大父定交尚矣竝鞅文場聯鑣京国意气之盛岂特足以为一时之士契将百世子孙绸繆因依之好未必不基於此矣亲家执事礼乐闻家珪璋雅士少而嗜礼处纨绔而能有其风壮者有猷阅轮云而能傲其变以顺亲成身为先务以教子明经为彝程方今黄卷夜灯弦诵比屋文昌之光属天汉擢魁兰宫上轶乎壬戌之芳躅固可俟也门寒宗敝理之乘除消息且不敢有颉颃相先之想而况婚姻礼云乎哉乃昨岁有谈令季子明秀可妻者欲以长弱息某室焉某闻而疑之盖不敢以偶於大者今昔所同而功远乃道执事之心所厚者斯文所薄者世俗所急者道义所弃者资装是以有取不然岂其食鱼而无鲂鲤哉书币有严辞曰纳采取敢不下拜岁寒初心惠徼无穷之福复自此始

与罗志行

惟两汉专门之学迨唐犹盛至先宋衍其义为文於是辞华尚而经术疎矣国朝崇雅黜浮以实取士而後士以通经学古为高然讲理而不坏於圣贤为文而不失於规矩者盖亦良少学宗大雅四方所推尊公既以英声茂实振铎而涨其流执事又以青年美才横经而继其响光前闻而掇世科兹亦何难小孙年浸以长求师而学正吃紧用工时也岁月荏苒教者有竭尽不倦之工学者无愤发自拔之意箕裘之继甚为凜然敬以书请於左右倘不鄙夷肯为惠来则煮葵读书相与切磋究之岂惟二三子之幸亦仆衰老之愿也

与杨西有

惟异时旧家相望乔木连云弦诵之颉颃衣冠之还往何其盛也时运乘除而畴昔会合之乐殆不可数入城以来时拜忠襄於乡校以为斯人耿光至今照耀乎宇宙而其子孙近在丘里乃不得时时相与剧谈而纵论可媿也有如亲家执事识时之伟见用世之长材持论公平而名德足以重乡里高义倜傥而豪华足以交公卿一门子弟凌厉卓犖皆有傲睨斯文之想昌运所会蒲轮之召老杏园之宴少行竝见之某少不适俗惟有慕乎前修之所为以为吾家公是静春之道德文章可勉而至时志蹉跎家声益冷但浩然天地间差少媿耳儿女婚姻之责曾未能毕而吾儿之子琳复以締婚媾盖宗党过为游扬执事不以其清约而许以令玉女室焉某闻而喜曰是乡里旧衣冠之裔也会聚往还将不复盛於今日乎则敢庙焉而书请於左右徼福结言其自高曾而下实宠嘉之

答邓以道

惟师之重古人所先春秋战国圣贤之教未远在所不论下至西汉皆专门受业弟子以千数至唐河汾之後其道稍泯故韩退之抗顔为师说而柳子厚答韦中立言尤斷斷焉若宋初泰山徂徠湖学之盛则又古道之复起也退之又言爱其子择师而教之则往教之习久矣士至於往教岂古道哉虽然以其犹知所尊慕则不可不传也曩自科举之废世相率为诗章杂学固无事於道科举既复弦诵相闻而其事以记诵为长有司之决得失者又多疎劣於是文章

不必有法学者不必有师未论来学虽往教者特为章字句读之不知者设耳恭惟执事以世家乔木之胄闻先儒宿学之传明经垂後树义恤孤家庭之间不论弱冠而不废乎学又不远百里之外下采愚陋而使兄子师友焉此其追古道远俗流甚矣固不肖之所愿闻也书币之勤敢不下拜虽然愚请有以进於是师资之有功在於学者之自慕子弟之率教在於父兄之所行匠氏之成鑠妙夺乎造化之速宋人之刻楮乃徒为岁月之淹留执事以为何如冬气益寒伏惟厚加保练不宣

复答邓以道

闻执事之名久矣盖其见闻议论有故家之遗风而练达之材可以备明时之实用恨不及一识不谓今者过听辱赐书进之以为塾客此如柳子厚所谓起病颡之驹蹇足之浮图所以承乏心切自庆畴昔向慕之好遂得为知己也奉以周旋其敢自後又念君子之交贵於始进之不苟仆平生於朋友苟受其托必尽其责故成材卒业者亦不少至如穷年坚坐则以家累或未能颇闻执事处斋者必以月计虽有明效大验不足以易岁月之积龙溪初书及希见教皆谓不复事此及见其再书与执事之副墨则又不然此所以迟疑而不敢奉命也与其少旷於他时而取譴不若自揣於今日而先审於进退乃所以答执事下采之盛心也执事以专坐为益而仆以开发为长未信而言君子所诫敢奉聘币以返左右伏惟亮之幸甚人生会合之期诚有不偶後此相逢尚图面谢不宣

答王志文

岁里辱书深佩不忘新年相望无从嗣音想履候安稳得帖尤慰见喻叙述先公行实此扬亲之大节洗辱知最厚谊不敢辞然恐笔墨枯朽不足以发潜光耳至於铭文今世常欲得显宦为之而不顾其文之足以传否志文卓识固当有以异於流俗也未会切冀珍重不宣

与彭宗富

尚忆东湖谈笑之乐且两年矣自後虽常邂逅而聚散怱怱只重思慕岁事肇新缅想彩服高堂称觴介寿福与春新伯仲以明朗俊杰之才加磨礪讲切之功如出匣之劒所向无前而且淬之越砥益銳其锋其遡霄汉而取青紫也必矣独恨疎濶不得时和新意以发愤人乃者辱访又以留山中遂失迎候甚为怅然醯壶分饷非笃吾味之同不及此君非掠美我获饮醇为惠侈矣怀佩何如何时重有入府之便倾竭欲言临墨拳切

与解辰叟

洗於君有平生之好而会晤差池动一二岁然心所向往往不以是隔也横经邻郡教思益布修涂隳武日引而升於是不负所学矣友人曾君存我旧与同客方崖许继又与名父子後先客古步文字蔚为时秀乡校小试往往多前列今年馆授教雨之下自贺知音有人然吾不独为存我贺君以斯文师倡一邑使和应者得存我非特足以见吾乡之多才而古今雅调发於

衆乐之中亦文字之至乐也因其行辄寄此讯问起居未会切冀厚加保毓不宣

与王顔庭

比承赐访示以高文实有古意浮梁二篇发越尽而不为美美梅边情词慷慨记顔乐能寻顔子乐处记停云能言陶公所未言甚善甚善自世尚怪诡而指大雅为腐自俗眩葩藻而斥理致为常求其意足以宿道文足以宣心者槩不多见老苏常读鳧绎集谓今世无复能为此文者矣仆於君亦云知多有佳作恨未全见天气尚热想燕处清适便中勒此奉起居

与王聲吾

洗去冬於大旆之出侦伺不谨不及走送自後闻自杭浙而京师山川都邑之胜丽古今世代之兴废领览殆尽人生兹游固已奇絶而又取麾持节易若拾芥想锦归之初宾游乡党排前称庆草木亦与有矜色相如之弩矢前驱买臣之车马填道不是过也且闻阶庭兰玉皆将颀颀青云一门袍笏昌运亨嘉诚口多难美正欲进贺拘掇未能辄奉尺书以道万一令似秋闱之行已当趋装又有周旋之便不敢拜字别附致拳切

与袁巽堂

伏自去春得奉色笑虽共疎濶而动履之吉无不备悉比审司征满秩解篆还乡而令子路敦复领新除一堂之间袍笏相映可以见山窗先生之泽可以见巽堂体用之材可以见乔木故家之地山川气运之回复既盛於昔必当复验於今也洗为门墙老宾客助喜特甚适留山中两日方抵城又未能造见姑先奉尺书虽无能赞一辞亦可观其心耳尚存惓惓倚俟面庆

与欧阳石泉

洗比者再领尊字备悉亦已别具报矣审知留洪有暇娱亲甚乐而令子有索女之喜长幼共康一堂四世此真福也人生仕宦抚字百里上有遐龄之母下有慰情之孙诚可多美独惜阻修不得与庆为歉微礼远奉聊寄情耳丈人以何日戒行天气浸热若得五月到任所为佳盖一则此时道途或者尚未隆暑且既择荣上之日到彼稍早凡事当从容也

答秋江

洗闻君家忠厚之称久矣百年之计种之以德夫自高祖以至今日岂百年哉名父令子所以培植者有光无替作亭览胜饮酒赋诗亭中之长者优游几杖将与园绮而齐寿壮者磨砺翰墨将与晁董而俱升岂非世德之验乎辱命之记媿笔力衰朽无以发挥耳令亲就道来访袖出手书尤见崇笃斯文之意至於饗之以礼本不敢受恐来不知者之疑也顿首只拜何媿如之

复答秋江

洗於翰墨间相知极久未得一会晤为歉孟秋知将入府继闻兴尽深为怅然君家积累世衣冠之盛而名父令子又炳炳愈伟足以振後而光前乃复思所以发先曾大父之潜德而以表墓之笔见属深惧衰朽不能称塞雅怀过廛谢言宠以佳贶其何媿如之传曰先祖有美而弗知不智也知而弗以传不仁也足下之为人孙可谓仁智者倘入石有拓本望示及幸甚

慰李履善

洗昨闻君之有父丧也以客外不获走唁夙拟开岁一致此恻及抵仙境辱令兄赐访之後旋感风失声继复驰归竟以书行愧当何如常忆往年陪冲所一登君子之堂三父皆精神未艾羣从兄弟玉立环侍剪烛夜分留连剧论使客忘去何其蔼如也曾未几何方心先生乘云而去本从相继酷没嘉植欲尽乡国尽伤令尊公复奄弃色养当时乡曲往还之乐逝者丘山如之何不涕泗交颐也执事居丧读礼忧痛奈何洗既不能面唁相望黯然襄事当在何时尚或可与执紼之役以追其愧耳雪伯霜仲棘冠栾栾敢并致下意

慰杨天鹏

闻君之有母夫人之丧久矣而一书亦堕因循何其可媿也然纯孝之痛久而弥新则宽譬亦不可以缓废惟古人事亲乐莫乐於家方隆而无虞年方盛而及禄执事高堂华庭轻輿丰饌以优游暇适之日尽婉愉娱养之欢顾四境所同美而又芝检之除且下花诰之渥非遥少须数年叠观盛事岂非人间母子之至愿何居造物为此缺然姻友为之惋伤矧身处其痛将何以为心然倚伏之不齐在天扬立之可必在我执事之所自树既足以重慰斯母少抑忧毁以副爱慕者之所期幸甚兹乘便翔辄往瓣香少寄拳切临墨黯然

慰罗师尹

洗於先公之丧闻讣既後而奉慰尤迟故援笔而先媿也惟先公以忠厚为一门之福以老成为一乡之望高堂四时彩服後先桑麻话邠酒之春灯火课韩檠之夜人间至乐何以踰此尚忆去秋道便奉谒瞻其衣冠之高古议论之英发谓当期颐未艾而俯仰之间遽隔今古虽在先公为无憾而人子至情百年犹以为短荼毒疼割固当何如洗正欲躬造總紼竟不能遂辄往瓣香聊寓一哀相望惟重黯然

慰萧国阳

畴昔旷野相遇悲不能言然不敢即宫而吊坐念人生祸福礼所不免而二母之丧萃於一日则仁人孝子之心诚无以堪此也仆周旋名门日久切知孝养纯笃岁时彩侍东西相映人间母子之乐奚以过此丛哀叠衅斩焉继之何造物者能厚其昔而不能少贷於今遂为是过酷也茹毒衔苦当尤不可以常情论相望百里亦何以为先生解哉岁新即欲致瓣香而因循不

飭惧其弥久辄以书先旦夕过门专图面唁不既

慰王庭望

奉书之初乃以唁语临笔黯然日者高堂祸变属留滞於外归而闻讣悼怛不能自己靖惟人生事亲苟不获遂具庆之愿则尤以偏侍为重古人冰鱼冬笋必极人子之所难良以此也且闻执事出尽应门之劳入尽养志之道家事纖悉一不以累其心盖亦自有足以为娱乐者何居恶剧不待百年孝纯天赋荼毒奈何诔之次儿得倩门墙升堂称寿以效半子之情方且有俟而今遽已矣何天道之好乖而人事之不可知如此也初欲令其躬致一哀适体中小疾不果行一书写情既堕迟缓亦不复以宽譬语进尚惟节抑以膺倚祸之福相望无任拳拳

慰艾公善

诔於先公道心先生有斯文眷属之谊昨岁之初闻变也悲悼盈襟然而既不能躬唁复不能致尺书正坐时故纏绵之累而亦孰知其心哉念惟先公雄文雅制鏗錡一时譬如脍炙无不同嗜至於粹宇冲襟其褰於人也又如和风之被物名酒之入肌无贤不肖皆为酣畅此其去柳下惠黄叔度固当不远使羽仪当时薰其德而化者宜何如而少不能使第一之偿老不能为命之待此其理之不可晓者一也七十之身九十之母省檄再三旨甘四集母子相娱之日不为不长矣然天能使是母之有名子以扬其亲有上寿以享其养而不能使先公之终养其母此其理之不可晓者二也虽然合门数百指诗礼桑麻昌炽如春而诸孙又以儒选方相继而别起造物之所以厚先公者未为不至矣送终尽礼素车麋至追念平生负愧千万辄为哀诗三章以写风致之万一庶几有知尚为一慨然也

慰李芳心令郎

诔与尊翁别久矣九月辱书徵近作此时意欲一到印山专从公倾倒既又不能儿辈复递至手书则十一月初也月望间缮写鄙文数篇及书一通因未暇寄乃一日偶过方崖家有曾兄从吾谈尊翁仙去初不谓然或曰此懿戚也宜信已而传者浸多於是与素相厚者出涕相吊几先来复得讣音且知属纊之槩棺槨衣衾之无憾盖哀心至此已十日而犹如初闻也诔於尊翁本有先後进之分斯文相收乃忘辈行其间谊气之相投出处之相与议论之脗合有不可以数者独恨相知百里外不得朝夕亲炙耳计公之拳拳於予予之拳拳於公皆他人所不谕也死生契濶遂至於此可哀也已盖取手书观之乃未病前数日所作孰以为此死者哉执事骤罹此痛荼毒奈何然一家之责方在一身朋友於是重有所望则擗踊哭泣特孝之一固当有所节也诔有怀耿耿当写为哀辞以发春首诣灵几以致掬泪兹先以书岁寒且甚相望黯然

慰毛天秀

迺者先大夫之丧与吾党叹惋相吊欲奉唁而未能手书远驰墓铭盈帖读之不自知其潜然

也先大夫以明经之学负善赋之声咳唾随风皆成珠玉故拾其余鼎者犹得以追安期子乔而为之伍时不我与高邈山林弦歌足以寓其乐泉石足以佚其老一堂四世彩服後先盖人间诗书之福未有过此者去而上仙政复何憾而异代丰芑之思岁寒硕果之感郁而不能释於怀况孝子慈孙痛当何如远日有期痛当载道所以襄奉所以显扬往往皆是属羈於俗不得效执紼之敬在来观之列谨再尺书复为挽诗三章藉此少见葑菲於存没翔凤行云矫首黯黯

慰萧远心

某於名门凶变宜朝闻而夕吊也乃怀此心至今始能托之尺书羞愧过於悲矣令侄兴吾州判家学有素盛年高科谓当骋骐驎於长途奋鹏鹗於青霄造物拟之以应世道之复铜章缙车曾未小试而遽折其轴友朋之间尤有咨惋而掩泣况在父兄何以为情然而富贵死生皆莫之为而为者向之贺门既非偶然今之吊间要亦当以前定视之也先生学宿於理諒於悲悼之中必有权度薄奠持前聊致意耳岁晏寒骄伏惟以吾道自爱临墨无任拳切

慰李存吾

今年多得会晤然被恩恩每见每不尽意自八月来稍踈濶而君亦从是居忧矣相望悲痛有不待凭棺握手而後为伤且吊也先大夫平生以一经自树立其於斯文研微析妙可谓致力深而用心苦矣阅世悠悠一笑良难晚抱省檄使由是而略展所学曾何足以慰其万一而造物之靳於我辈者若此世间少年臯比说法何必有学学与命殆真冰炭之不可兼乎昌黎有云贤者博一命则随以死而东坡於董傳尤所深慨古今一理甚未可晓也孝纯天赋荼毒当何以堪然昔之能扬立而慰其亲於土中者皆以患难而得寬譬常语不足为左右道也诜未能躬唁姑托之书而黯塞之怀非面莫究

慰罗元夫

始闻君有母之丧惊怛之余即欲走吊竟墮因循愧当何如人生二亲皆莫报之恩而母道尤可痛故筭盘之馔板輿之奉常极意而有所不足然而伯仲之竞爽其所树立皆足以慰亲之心岁时奉觴各致甘旨则亦可以一笑而永日矧其间驰驱仕路分禄助珍寿穷而养给则固无甚憾乎人间也人子至情百年犹以为短至足犹以为憾伯仲之荼毒痛苦固非吾言之所可解也隆暑弥炽伏惟孝履支持强自寬抑

桂隱文集卷三

桂隐文集卷四

<集部,别集类,金至元,桂隐文集>

钦定四库全书

桂隐文集卷四 元 刘诜 撰杂着

说

刘绍平号平嵒

扁鹊得长桑君要剂故能洞见人腠理肠胃孙思邈得龙翁三十方故能名千载疗百世盖医之神者其初必有鬼物为之授受要非臆度意揣所能到也安成良医刘此山其先尝遇异人俾以丹继俾以善诀由是医益神此山身长魁梧端视徐行治病尤奇验大家争迎至恐後而此山怡然未尝有矜色汲汲治贫者病活之此山字绍平自号平嵒夫天下之穷林乔木多矣下至一州一邑必有名区胜境可为美称者故孙复号称大山石守道号称徂徕真希元自号西山杨伯子自号东山近世前辈亦有号南山号崑仑者大抵非张大之过则期望之高今绍平乃取平嵒以自号按山有峒嵒者山之隐而不耀者也夫其隐而不耀者则何如其平也夫抱已显之技而托之於甚隐挟可高之名而处之以甚平绍平之用心可见矣今夫山在天地间隆隆奔赴斗起千丈出云霞而隔天日者非不高矣然数节之後其势一落无复能环之如儿孙者维兹势之平者则常绵绵延延亘千里而不止绍平之用心其将使百世为此平欤吾闻古之仙人无不妙於方药然往往皆隐君子为之今是家父子神於技隐於德吾疑其人之所以授其先者不独方药也刘氏之福其未艾乎

刘汉隐字

庐陵刘宾远字汉隐有才学连年馆城中还往吾门以汉隐之义谒余言余谓三代以前如耕莘筑岩钓渭之夫皆深隐而不出及其一旦而出则使世道为尧舜不可尚矣下至虞仲夷逸朱张少连之徒荷蓐耦而耕之士皆经圣人评论不可复有褒贬今君之於隐但以汉言然西汉隐士无传商山四皓其杰然者欤东汉逸民传者十八其立身尚志亦皆有可观然能使东汉二百年高人义士清风峻节耿耿相望则皆严子陵有以倡之其末也又有躬耕南阳抱膝长啸虽在十八传之外然方之伊傅尚父固无愧也然则西汉之隐固有愧於东汉多矣今君於两汉之隐宜何从乎盖高之为孔明子陵次之为四皓至若樊英辈之纯盗虚声者固无足取也君尚勉之

赞

见翁真容

其幼而无怙也委孤楫於波涛之流其长而自立也屹杰栋於风雨之秋其应世以才如纶巾羽扇之孔明其处乡以善如欸段下泽之少游声吐洪钟仪像山立笑谐足以沾四坐之磊砢忠厚足以化平昔之怨尤能容物似千顷之陂不傲物似百尺之楼盖其不可及者积学之子孙如谢氏之江左而种德之家世如富公之青州也

颂

三节六桂堂

北庭偃氏世出高昌皇元龙兴以义来内附至庄简益显庄简子都运早备宿卫克有勲劳迁为广东盐运使子正议大夫吉安监郡始留豫章居焉於所居建三节六桂堂而家愈大初都运在广东朝廷方征南交护督漕饷会海盗大集转鬪失利以骂贼死事闻上嘉其节謚忠愍赠守忠全节功臣时夫人方盛年确守贞节母子相依倚为生正议甫数岁母尝病剧刲股和药露祷获安天下谓之三节正议五子世玉世学世德世南世则其犹子世文宿嗜学如饥渴科举兴遂连登上第布列中外天下谓之六桂议者又曰非三节不足以兆六桂非六桂不足以显三节合为一堂实宜古之君子为善而得报於天者有矣然往往多曰种德于公欲高大其门自谓活人窦氏五桂竝芳世谓其好施王氏种三槐以待三公亦恃其保符彦卿夫活人与好施皆为善然安知不出於有意以揣摩之心而要於天天虽不爽其福而君子犹薄之若偃氏之获福则纯乎天理而已盖不肯辱其君不忍忘其夫其心岂有望报於天者其刲股救母此心但以答母为福岂计及其子孙哉故天理与种德异天理发於公而无所窥拟种德虽发於公而种之必望其报以是观之偃氏之福德过人远矣诜惟古之有盛德必有颂鲁僖公修泮水人犹颂之况偃氏之盛德舍颂不足以为美乃作颂曰猗欤偃氏着迹於唐武功文德有烈其光都运桓桓佐我烈祖杀身成仁遂一海宇曰维忠愍大馘蛮獠楼船斧钺曰靖海潮嗟彼狂獠将蹈愈噬遯遁授命垂耀百世帝若曰嘻维汝尽忠锡汝美謚以崇厥功铁骝金戈助击羣丑邦人异之庙祀以久高堂渥丹自誓栢舟所见者义贞烈谁俦正议在髫髻思着厥孝刲股疗母至性谁教三节之大萃於一堂上契天道下正人纲春官取士六擢其桂青云联鑣银汉竝袂懿哉正议监郡庐陵耆稚载道言观其旗黄堂深广庭有嘉木公坐於堂白日肃肃民曰我公郡之黄龚士曰匪伊为时夔龙朝有良臣家有才子名在天下功在国史

跋

题危大朴与邓子明书後

右宣文阁经筵检讨危素大朴所与邓晋子明二书子明宋礼部郎官兼学士院权直申斋邓先生孙也礼部登景定壬戌第与大朴曾祖炎震子仁同年宋且亡礼部随驾入海亲见厓山战败陆秀夫抱幼君沉海遂亦蹈海者再为北军所鈎致不死知当时兴亡事极详後文丞相囚金陵礼部实与俱日夜相与唱和诗歌以娱悲纾痛张宏范元帅以客礼谒请为其子师及归庐陵以所闻见集録为野史若干卷藏不示人今七十余年遇圣朝修辽金宋三史诏求天下故史遗文大朴实銜朝命来江西至庐陵求礼部所为书子明虽谊不敢秘值有祖母之丧

不即送上大朴先後有此二书呜呼自古亡国多矣未有百战海岛凿舟自沉其间忠臣义士贞夫节妇死者何限天下不能尽知礼部此书诚不可少壬戌科取士六百三十五人名士庐陵则礼部与须溪刘先生在焉礼部与子仁虽同榜未知其相厚与否今子孙异代数十年之後交游方深大朴扬声中朝为时名隽子明不隳世学抱其先祖所着上进史馆以成前代之书世远家存人亡言在皆非偶然有可感者有可敬者余以耄老伏处山林尚及见之且先叔祖熔子叔父士器与危邓二氏皆有壬戌年家之好因书以识感慨云

题浦阳郑氏义门家范後

余少时观司马公家范顏氏家训朱子家礼及夫桐木之韩花树之韦所着家法知中州先辈轨范未尝不同但世道趨於下此意遂希濶鲜有闻有识者每为之一慨今观浦城郑氏家规则知旧人典刑尚未泯也然合族而居原於家之有法家法之正原於诗书之渐摩见闻之讲贯以诗书为家宜其齐且穆也郑氏九世一堂同食此固难矣世岂有家法如此之正而町畦异爨者哉唐张公艺虽曰九世同居及高宗问其何以能若是则大书忍字百余以对呜呼忍而後能如此亦出於勉强矣其视郑氏岂不有所愧哉

书萧焕有临江为政碑後

余旧阅古人平反辄为反覆数过喜快若亲见又恨今世无复见此人及见其斥鬼神破妖异则又疑史氏或采摭之过今观萧君焕有临江所为政则知古今人真无不相及而史皆信史也夫知屈抑而不敢言见像偶而辄下拜皆忧於祸福也天下惟不忧於祸福者可以行其志天下惟学而有守者不忧於祸福萧君之政通幽明而无间其要不越於学耳今方闭门益究经史则其政未可量也仕而优则学学而优则仕萧君有焉

跋林常春家藏绍兴关书

古今世禄之家子孙疎傲不知厥先创业之难昧其原绪者多矣春秋传称王叔不能举其要是也高门大第崇台列榭一再传而为墟亦多矣汉史称此屋阅人如传舍是也是故庾信罗含之故宅屡易异姓温公康节之契约流落他人良可慨也友人林君常春示余其家所藏绍兴关书更历离乱今二百数十年而屋与契俱存不其难哉天之将昌林氏观此可知矣

书曾成玉所贽前御史哈喇召覲图及所贽诗後

今廉访监司哈喇公禀天地刚正之气负霜雪凜冽之操其立中朝觝排权贵多矣近岁为御史又以直言劾奏大臣坐是远贬南荒所过道路无敢亲比之者独庐陵曾成玉作诗遮见追送不憚远可谓有义气矣因念汉党锢之祸唐杨临贺宋胡新州诸贤之贬平生亲友弃去如糗乃独有一二耿介不顾死生而慕义因以得名曾成玉岂其人哉今又为诗百咏以见公志迹其前所为必非以此为取怜求媚者故赞以壮其行云

跋四君图後

古今士大夫人品之高下原於心术之正邪心术之正邪又系於师友渊源之所自战国之士所师者转丸脰箠为口吻之验全身之区其见鄙妾嬪固宜若戴崇彭宣辈师安昌侯张禹此岂复磊磊落落之名节也哉子夏之学为田子方再传为庄周君子谓其激於拘縶之过荀卿之学为李斯又得於其师见趣议论之偏嗟夫学术所关大矣甚可畏也宋承五季极弊之後而士大夫嘉言善行比隆三代其故何哉以其师道之正非前代比耳若湖学关洛紫阳之徒党扶树教化其功何可胜述比季世秘监欧阳公巽斋先生以雄文邃学为世师表一时名士多出其门而信国文公於先生为嫡孙行大傳刘公礼部邓公则高弟也信国既以名节高百代而大傳礼部亦卒为宋全人以文章重天下宋虽亡国而景光无穷先生力也先生当贾吕势焰薰灼力陈其奸万死不顾使遇事变岂肯全躯保妻子要之其教学者皆本仁义忠孝故其效如此呜呼其可仰也夫

跋文信公和东坡赤壁词後

坡公此词妙絕百代然恨鲜得其所自书者信国文公所和雄词直气不相上下而真迹流落如新尤可谓二美具矣昔朱文公少时尝学曹表刘共父学鹿脯帖文公以其字画古诮之共父谓予所学者唐之忠臣公所学者篡贼何论古今文公终身以为愧呜呼此书距今才四十年其可敬慕何必在千载之上哉

附文信公和词

乾坤许大筭蛟龙元不是池中物风雨牢愁无着处那更寒蛩四壁横槊赋诗登楼作赋万事空中雪江流如此方来还有雄杰堪叹一叶飘零重来淮水凉风初发镜里朱颜都变尽只有丹心难灭去去龙沙向江南回首青山如发故人应念杜鹃枝上残月

题李氏所藏先世交游翰墨

内侄李同立仁藏其先祖传园翁祖深斋主簿父伯英学正三世所交名公翰墨宝之如珙璧自传园至今且五十年中更离乱人事升沈伯英立仁皆早孤而能宝此难矣传园翁博学多文及交东山杨公大小山二萧公东南名士多相与今独存约山朱公一帖深斋颖悟絕人未弱冠文章川涌山拔淩厉一时约山诸公皆期以国器交游必天下士文山须溪心远尤笃密往还书问最多尝与文山心远共作论如联句各手书於篇宝佑丙辰与兄肯堂及文山同赴省中途屡联句为赋论既而肯堂省魁文山殿魁皆敷历显要先生独至咸淳甲戌方第既没族侄鹤田状其行须溪为铭志哀特甚今独文山三书心远一书鹤田行状藁存而诸公往还书翰联句赋论须溪手书墓铭皆不见伯英少游燕邵庵松雪善之伯长诸钜公特相厚翰墨尤多今邓公诗亦不复见以是知三世所交游翰墨存者特十百之一二岂不愈可宝哉余於传园公为外孙幼尝往还外氏凡前所称翰墨多亲见之今觀此卷固伤其不免於流落而尤以其能宝为喜渊明凯风寒泉之思羊昙西州丘山之痛惓然於怀故书此不敢简略云

书揭先生所书千字文

余与萧氏交旧矣元统甲戌乙亥间於孚有家见今翰林学士揭公手书千字文正直端楷如刀画玉心甚重之时坐有善书者张汉英尤手书之不置後三年孚有酷歿其所藏书画不得复见汉英一日於他人家偶见此卷曰噫此故人孚有所藏也问其所从来则孚有之竖童盗而鬻之也乃归其直丐而藏诸家又四年汉英出示此卷求尝与孚有往来者叙其故余念朋友死生离合物之变迁流落皆有可感者此卷藏於汉英犹幸为不失所也

书虞邵庵送体仁叙後

邵庵虞先生少有仙才灵气侍袞龙香案之侧数十年天下之异人方士皆得博参而徧识其於道所得超矣晚岁山中所养愈熟至正三年腊未尽三日偶过庐陵弭节玄妙观朝天阁常喜夜与道士翦烛谈道明年正月三日甲子子时曙欲动先生未睡也独与道士曾体仁相携遶虚廊遂坐云堂上论修真养虚之法存神守丹之妙语颇密明日遂书其事以遗体仁或疑先生所书者实不书所云也予不及质之邵庵问体仁笑而不言噫邵庵所谓他年相见於阆风玄圃者其亦使予骑麟翳凤而骖其间欤

表

贺圣诞【代吉安路总管】

伏以龙飞当御开寿域於九州虎拜称觴衍皇图於万岁乾坤共庆人物咸春钦惟皇帝陛下功冠百王道先太极乃圣乃神乃文武运帝德为四海之君曰寿曰富曰康寧锡天下以九畴之福景运及光华之日月春风被锦绣之山河适当五百岁笃生之祥咸致千万年无疆之祝臣等忝叨守土远效呼嵩普天之下率土之滨皆共乐汉主牧民之治如川之至如山之寿谁独无华封祝圣之心

启

谒吴太守

伏以虎符分治声名传二千石之良鹭渚回春气象增千万家之盛江山若为之改观民吏相望而革心春蔼闾阎欢腾鼓角窃惟後世之太守何异古者之诸侯为国股肱厥有屏翰藩宣之责作民父母使无叹息愁恨之声是以昔朝每重兹选苟克当乎重寄必历典於名藩故郭细侯自雍郡渔阳而复牧於并州而黄次翁由维扬颍川而入尹於京兆非惟使惠泽可遍於乡国亦欲使敷历以熟其才能大哉治天下之用心盖亦非衆人之所能识恭惟府尹中州间气当代伟人牧民有汉河南之良规【河南谓吴公】其治郡国常称为异等律身有晋广州之家法【广州谓吴隐之】虽酌贪泉而不易其心昔再牧闽溪岛洽两岐之化雨继迁守浙湖山歌五袴之春风挠之弗浊澄之弗清服胥吏而超同列刚亦不吐柔亦不茹抑豪右而惠

小民以五事为侯伯之师以四书为政治之本平反报母【此谓雋不疑】皆美彩衣趋庭之可娱抚字劳心【谓阳城】岂以画戟森兵而为乐幸甚青原之千里聿来皂盖於九天使遐陬远方始知有太守之重俾深山长谷争愿识使君之贤有国家当用真儒此其效矣自州郡入为丞相行且见之某历落无成侵寻已老书林骋朝艺苑翔夕谩如韩愈之自勤弟子攀桂先生卧云每为方平而取笑然思吾仁吾义之何歉将求老圃老农而为师岂意下车偶蒙问姓居是邦事大夫之贤者可不尽恭礼於庐拔处士之尤焉则非敢望

状

保王梅边

伏以徵求遗逸幸逢千载之明时荐举贤良少见一乡之公论庶从学校转达省堂切见前太学生王某身备美才世推名士其事亲也有温席扇枕之风其庐墓也有寝苫枕块之实文词高古足领袖於儒生武事优通屡削平於寇难论治体则不愧於贾谊怀义气则素慕於仲连虽丘园高蹈之多年而名誉自闻於四境不以应诏是为蔽贤为此保结请申上司以备擢用允为相应

文

赠武昌推官聂以道文

乘相如驷马已增乡里之宠光大于公门间又启子孙之昌运声名在黄鹤泰山之外气象重仁山智水之间恭惟某四海清标百年间气其英发人皆以为贾谊终军其廉洁世或比之范滂杨震其操可以压湖云湘雨之胜其风可以扫蛮烟瘴海之昏天子闻其名谓当在朝廷羽仪之选宰相老其器姑试之州郡繁剧之间居然以白简肃万里之海隅幸甚以花诰庆双亲於地下【天历中中书奏江华尹聂以道为武昌推官上惊曰此不要钱聂以道今才为推官宰相阿荣谓武昌非以道不可】

题疏

杨忠襄公庙

伏以忠臣义士化为菰弘之血而不归孝子慈孙可使皐陶之祀而弗永盖先忠襄死宋难凡三百载而名节在人心有千万年霜雪丘墟凄其金陵成败之一慨春秋俎豆谁非桐乡爱慕之不忘而况後人可无祠屋今欲一族共假鲁许之田庶几吾乡自有巡远之庙非真望其福我寿我亦何可不尸之祝之老栢闕宫嗟归来兮赵氏之鬼北风西日会有感於荆公之诗

城西延福路修整

伏以七里郭三里城共嗟西路之差永九达達一达道安得后土之常乾奈何泥滑滑而雨萧萧况且路漫漫而禽磔磔甃以瓴石宜矣庶几车徒便之使前馈金今馈金多助出衆力即朝运甃暮运甃坦途在人心白马铁骊汨没同无复绦老在途之辱青鞋布袜从此始便歌周道如砥之诗程起修程福同延福

城东鹭洲石桥

伏以地辟天开以大江而壮上郡北来南去常一苇而驾惊涛使待渡者如蚁立於沙汀病涉者希鹄填於河汉今欲成长桥於鞭石若将以平路而视川水分白鹭山落青天地势既自初而有待海跨金甌波开玉螭路人可彻夜而行歌非惟王政之杠梁所当为亦且城闉之襟袍有其蔽倘用工百万余夫能若雁荡即酺水四十七道不逊泉州明日过之乡里拜何公之马其福远矣子孙乘相如之车

府城西津浮桥

伏以临流不渡共观拍岸之惊涛造舟为桥便拟成梁於平陆盖空濶之极不可徒杠而涉十一月往还者衆何用野航之受两三人欲追前代之遗规大作束薪之浮舫使履之者无鹄桥之填汉使望之者如霓道之行空当路必有超郑卿济乘之功诸贤必有效坡仙捐带之助人人利涉步步安行父老来看定记巨鳌羣鲸之旧子孙共过谁非高车驷马之人

高坑竹园石桥

伏以幽谷空山地似睢园之有竹断桥流水人嗟郑国之无梁何可使盈盈一带之间若真有洋洋千里之隔今欲效海仙之鞭石便可如灵鹄之填河是在羣贤共成美事卧波龙见不待挿羽翮而过之题柱马归将必有子孙之兴者

刊忠孝史

伏以事君莫大於忠龙逢比干以义开三代奉亲莫先於孝大舜曾子以行师百年故自亘古以来惟此二者为首今有老於文学之令尹乃欲集其事类於当时已蒙徵入於经筵宜即用工於绣梓诸君能损已费一日共觀人文甚盛甚休可传可远圣朝用乎是道所以教四海九州举世家有其书何啻历千秋万岁

玄妙观法堂

伏以玄为衆妙门琼馆琳宫之几百载法本真常道羽衣黄冠之千万年以晨钟暮鼓来讲於是堂可上雨旁风不蔽於其坐必使盘盘焉可以隐相儒迎仙客必使朗朗者可以调素琴阅金经是故撤而新之厥有起而相者杏木梁桂树栋坐看天近之櫺题柳边院花里朝共听书归之珂佩人间五福圣寿万年

桂隐文集卷四

桂隐文集附录

钦定四库全书

桂隐文集附录

行状【夏以忠】

先生讳诜字桂翁号桂隐姓刘氏系出长沙定王子孙散居江西临江之翟斜宋集贤学士敞公是中书舍人敞公非兄弟叔侄以文学号江右三刘为先生之派族先生先世有讳滔字禹绩官大理评事由翟斜徙吉水之南岭传六世至彦升彦明昆弟彦升字鹏举五子竞爽第四子憫字端臣生子少齐字思贤以书经领宋绍兴癸酉乡荐是为先生之高祖少齐子黻字德卿宋太学生与陈东上书留李纲被斥归从诚斋杨文节公游子铨为国学内舍以文学气节受知文山丞相号麓隐子仁荣字云祥号习静与弟化龙及长子元同领宋景定甲子乡荐世称三刘复兴明年兄弟俱及进士第云祥擢授从政郎平阳县尉先生平阳第四子也母李氏有淑德懿行先生始生平阳公梦晋左丞郗广基桂林一枝之语故名二岁失王父母五岁能识奇字授以古人诗文辄成诵与羣儿戏设俎豆揖让进退有不式者即去之七岁而孤九岁而宋亡崎岖兵革中太夫人授以经史寝食不废先生以颖悟之资奋志不凡尊师取友刻意问学自能树立於羈孤不坠先业又克大之年十二能赋论十五为童子师有持异书诘所难知者先生得书一夕尽其义明日以语或人愧谢去舅氏鹤田肯堂深齐皆名进士咸器重之先辈赵文彭元翼晏宗镐梁节艾幼玉皆知名士优游乡校雅相敬畏虽科举已废犹以其文教学者先生学益力名益起刘氏自翟斜而下益有光焉大学博士刘公辰翁见先生诗文极称之礼部郎中邓公光荐奇其诗赋为之序引寻命其子受学复列荐名士五人於提举方崖萧公泰登先生辞不试後提举萧公禹道聘处乡校始居郡城弟子弥衆曾制干先之杨县尉如圭皆忘年交後方崖萧公为御史荐以校官郑公鹏南为尚书荐以遗逸学山文公为集贤荐以馆职状上於朝皆不报延佑甲寅科举制行先生年几五十有司举孝弟明经太守强劝之驾先生曰科举之学吾非不能但学以讲道岂以是为富贵之筌蹄邪辞不就乃隐郭门训学者以师道自立士子千里裹粮而至一时名家巨室欲其子弟规进取者咸师事之若进士顔成子罗见大如簏辈皆门弟子也先生於其质之不逮者必诱掖奨进其俊秀者必力许与故多所成名庐陵胡弱冠受学先生怜其贫而笃教之及歿先生复哀之而表其墓同门萧升周贺为刻石焉先生理家丰不踰矩俭必中礼耳目之好一不经心不为世俗好尚之所沾染母贤子孝闻於远迩至於冠婚丧祭於礼不违事诸父谨严与诸昆季尽恭敬友爱之道先世恒产悉推让之子侄及门遇以礼而教诲之必以忠信节俭为本伯氏早世其子古臣方幼抚育训导使有成立古臣死又抚其子如古臣夏氏女死子女俱角羈皆教育而婚嫁之晚即南岭翺祖祠率子侄岁时祭祀正昭穆之序贫族不自给及婚葬不备者皆赈贷之而不责其偿焉居常褻冠博带行规步矩有古君子风从容庐里数十年凡夫稚子皆知起敬公卿大夫士闻其高风莫不耸动而愿见之先生未尝出其所长以自鬻与人交接一主於敬久而不衰心怡气和不忘语笑苟义有不可即毅然正言人莫敢犯尝言於官府复司户厅诗人堂於乡校曰此唐参军祠可泯泯於僧寺乎吾非以为名也归妇氏坟庐夺於豪卒者曰彼弱不自立

吾非以为利也释诬指逋负后妃王邸钱者数十日长此安穷无厌将及我非以为德也晚年进学益励於初四方求文襁属於门先生手答如流若不用意而理致森严莫不叹服有诗文若干卷板行於世曰桂隐集翰林承旨欧阳公玄未识先生而书问频致称先生道德之重藻监之明其为文根柢六经属餍子史躡蹠百家淳湫演迤资深取宏榘矱哲匠达於宗工不鉅别心目不揜擢胄肾液古融今自执其鞣靡虑不获靡施不宜虽未尝露其隼杰廉悍踔厉风发之状韞玉在椟气如白虹不可掩抑及叙先生文集有曰余读先生之文温柔敦厚欧也明辨雄隼苏也至论其妙抑岂相师也哉有不可传以言者矣翰林待制柳公贯称先生德业之盛於古人不多让盖先觉之士也奎章侍书学士虞公翰林侍讲学士揭公尤相知重至郡从论文累日不忍去既别往复有书虞公称先生以英伟之器不肯小出以徇世好卓然如灵光之在鲁风云变迁三光不为之蔽亏潢污载道大陆不为之昏垫霜降水涸而松柏後雕沙砾汰除而黄金独耀区区早持不足之资以应世退而亦已衰老求如公以伏生之年教授齐鲁不辍何可望其万一所赐之书骤而读之如雷雨既盈千源并合大江安流不见涯涘万斛之舟宝藏充溢旌旄导前笳鼓拥後宾客竝列雅歌投壶浪波鱼龙献态呈状形胜古迹过目如电快哉快哉又曰先生之文无奇崛艰险之僻固波澜之浩荡无颓靡肤浅之陋固山岳之雄峙愚尝以为生一乡而不溺於一乡之薰习生一时而不合乎一时之流俗岂非所谓伟然间气而何待於人哉及观先生诗文而序之曰集尝承乏禁林窃意高蹈远隐之士必有过夫人者而不之见也归侨江上乃得刘桂隐先生之文於其门人学者而读之则诚昔日之所愿见而不可得者也惜乎江湖之远而不能有所荐於上焉又以先生之文为能继夫欧阳永叔曾子固而称之曰山林之日长得得以极其力之所至学问之志专有以达其知之所及知其背於涂辙之正即有所不为知其可以传诸方来则言之而无疑论古今成败而无所蹈袭出人意表观乎泷江之麓青原之波不亦善於达本而溯源者乎揭公乃曰大江之西德足以润身文足以垂後有子孙之贤无饥寒之迫如先生者真天下之至乐至荣者也又曰方今天下德行文学之士日寥寥矣若江西惟先生耳又曰先生德行日尊文章日富岂仆妮妮者比邪又曰论古今文章辞甚高义甚富病甚切而忧甚深古人所以为古人今人所以为今人往者不可追来者殊可叹如先生者几何人哉近数见制作令人不能释手益增向仰之怀取踈於大人君子日夜思念果何益邪及为先生诗文之序则曰先生非君子之行不行非圣人之学不学其养之也深其积之也隆其地不離於閭井其名不登於庙廊其发之也沛然浩然而常有余故其诗沈着幽远得天地之性情其文平实敷畅会古今之法度因其所感而为之律乘其所托而为之义或常或变而不可穷惜老而不见用於朝廷也先生以宋咸淳戊辰八月二十六日生卒於至正十年九月十三日享年八十有三葬以是年十二月二十五日墓在州之仁寿乡东槎滩之原娶印冈罗氏有妇德能致内助前先生二十年卒子男三人长立敬前先生五年卒仲尚文克世文学先生鍾爱之早世季应麟业进士女四适同郡李以逊夏昶彭鉉萧泰端皆宦族昶以下三壻今皆有官孙男七观先夭次理瑜谅琯珪珣珵今为龙溪书院山长瑜新城教谕嗟乎刘氏世泽之盛代不乏贤自平阳聯科而後陵谷变迁不获究用於季代然先生克绍先业迪光前人斯亦难矣今之士大夫称先生德行道艺如出一喙尚论其人孰有贤於柳待制欧阳承旨虞揭二学士者哉四君子德业闻望已极一时之盛不轻与可而能极其称许敬慕则先生之实学从可知矣先生卒门人进士顏成子已状其行山长病其未详以语以忠以忠自发始燥歛衽盛名世父果原先生於先生之居壤地相接为辈行交谊弥笃而以忠又与山长友善故於先生之潜德懿行尤所悉焉敢摭其梗槩以干名世之士铭其藏而表

章之使先觉之士死而不忘非斯文之幸与至正二十四年春正月甲戌状

墓碑铭【欧阳玄】

庐陵刘桂隐先生卒葬之三年子应麟遣孙瑄来京师请其墓铭於玄值世多故未暇请也又三年遵东海以归乃致前请谨摭其行状叙而铭之先生讳洗字桂翁号桂隐其先清江之翟斜族也翟斜之族自宋公是公非弟兄叔侄以文学闻天下号江右三刘先生之先世有讳滔字禹绩者由翟斜徙吉水之南岭传六世至彦升彦明两弟昆升字鹏举五子竞爽第四子曰憫字端臣生子名少齐字思贤是为先生之高祖考少子生子黻字德卿宋太学内舍从诚斋杨文节公游子铨字衡父受知文丞相号麓隐子仁荣字云祥号习静与弟化龙长子元方同领景定甲子乡荐明年俱及进士第受平阳县尉先生平阳第四子也生二岁失王父母七岁失父九岁宋亡奋以颖悟之资自树羈孤之中能不坠先业又克大之今之大夫士论先生行道艺必推本其先人於是平阳之聯科虽不获究用於季代因先生克绍咸称其有子而刘氏自翟斜而下益有光焉先生之为德不为世俗之所摇斂不为风声气习之所沦染卓然以重厚醇雅与邹鲁士埒而无忤容事诸父及诸昆弟尽恭敬友爱之道先世恒产悉推让之子侄及门必厚遇以礼伯氏早世其子古臣方幼抚育教诲使有成立古臣卒又抚其子如古臣夏氏女没所生角羈未龀教育而婚嫁之如礼晚即南岭荆始祖祠率族人岁时祭祀以正昭穆之叙居家处乡有古君子风训学者能以师道自立至其为文根柢六经属餍子史躡踪百家淳湫演迤资深取弘渠燠哲匠达於宗工液古融今自执其鞶靡虑不获靡施弗宜虽未尝露其偶杰廉悍踔厉风发之状韞玉在椟气如白虹不可掩抑四方求文襁属於门有古文若干卷诸体诗若干卷骈俪书割若干卷总题曰桂隐集蜀郡虞先生豫章揭先生及玄皆尝叙之各以所见极其形容咏叹之盛然以先生之文微吾三人言有不行世者乎先生歿吉之弟子顔成子状其行称先生年十二三时长於宋季程文若律赋论策临文沛然蔚有老气宋之遗老鉅公若李氏鹤田肯堂深斋三公於先生为母党尊行一见即以斯文之任属之中斋邓公须溪刘公於先生为乡先正见其文尤加器异邓公尝延之家使范其子若彭巽吾晏山心於先生为畏友往往推服延佑初科举复兴先生年才四十余州里有司举孝弟明经太守强劝之驾先生好古与主司瑟竽理之必然不足深论先生退自场屋一时名家欲其子弟规进取者必厚币求师事之古有善射者射牛鏃掠牛腹舍麤诣精以不中为胜贤父兄愿欲得不中之奇他日与拘拘然求中者角我欲中斯中耳方崖萧公为御史以教官荐学山文公为集贤以馆职荐尚书鹏南郑公过庐陵见之归朝以遗逸荐公卿推轂当时贤士推轂者可得美誉贤士何与焉先生生宋咸淳戊辰八月二十六日卒以大元至正十年九月十三日年八十又三葬以是年十二月二十五日墓在吉州之仁寿乡东槎滩娶印冈罗氏有妇德能致内助先二十年卒子男三长立敬先五年卒仲尚文克世文学先生鍾爱之惜早世季应麟业进士女四人适同郡李以逊夏昶彭鉉萧泰端皆宦族昶以下三壻皆有官孙男七观先夭次瑄瑜谅琿让珣瑄今除龙溪书院山长瑜新城教谕孙女八曾孙男二未名玄於先生未获一识而书问不絶相知为深虞公晚归田过从甚乐每有相见迟暮之叹虞揭二公皆先卒玄以垂老之齿独得铭公铭曰

宇宙气化消长有时斯文盛衰不系乎兹富贵傥来非悠久功名时至亦易就维兹二事衆可

勗天畀斯文曰予独近代四家庐陵眉山临川南丰颀颀其间展也桂隐实宗欧阳丰曾约苏
谨严归王天慙其衷不靳所重我其承之责若光宠在衆不随予独不訾不貶厥齎俾昌於诒

桂隐文集附錄

桂隐诗集卷一

<集部,别集类,金至元,桂隐文集—桂隐诗集>

钦定四库全书

桂隐诗集卷一元 刘诜 撰古体【五言】

感兴五首

昔在唐虞时万象昭白日圣人垂龙衣岩殿吹凤律朱草联阶生景星当户出羣贤布天下野谷尽嘉实嗟哉战国交九?沦斧鑕糟糠委仁义轩盖宠权术孟轲起驱驰白发飒垂轼空余七篇书千载资叹息

姬室逸其御天下皆兵交楚武首僭王名器从此淆仲父佐伯业仗义何嚶嚶正辞削其僭王纲可复昭奈何舍其近远问南舟胶堂堂匡周师其得仅一茅所以鲁仲尼加之器小嘲良会不得谁能遏秦嶠

秦人燔诗书圣道散若烟宫殿干斗极东游问神仙汉祖祠孔子遂为百代先大哉礼乐意所见何卓然因势导其趋勇赴如决川但憾羣臣间余习犹囊鞬良平虽善虑不在三代前安得豁达资一见贾少年

金张贵朝廷卫霍列茅社奴隶凌虹霓亲戚折五伯鬪鸡驰鄠杜射虎宿滹灞意气骄盛时咳唾有光价相如涤器夫万里乘驷马买臣最微贱怀绶出邸舍贤愚何必齐时至俱气化岂无单練士叩角五陵夜太史重成名寂寞千秋下

峩峩蓬莱山白玉为洞房仙人云雾衣侍女冰雪妆丹霞缥缈中往来皆凤凰借问羣仙人何者为秦皇羣仙顾我笑振袂凌风翔我有金鼎丹链之踰千霜相期息瑶树岁晚何渺茫吾闻仙人家美酒如琼浆长生所愿求得醉亦可偿

春寒闲居五首

贫居托幽巷久雨客来絶春寒霰时集淅沥在高叶鸟鸣日已晏寂寂茶鼎歇慙无晁氏智懒事主父谒闭门自读书庶以励高节

潇潇山城雨撼撼书馆风喔喔邻屋鸡迢迢远方钟遐思在古人展转魂梦通抱拙俗所弃岁晚将谁同赋成不轻卖金尽当忍穷

久寒卉木絶初旭陰翳谢春浅有令姿澹澹在平野山明孤烟发天迴一鸟下积忧鲜旷怀怡

咏聊此暇赋诗勿镌刻养生师叔夜

昔时如花人今见兀若株华滋散安在嗜好岂不殊河水不灌翳春风不归枯闻道须少日立功无暮途西里夜围烛东邻朝玩山相视无羨心丰约自不关芳草满幽庭日晏人未还久陰忽微暄孤禽语花间

吴宁极惠和闲居五诗复用韵为谢

嗜澹鹜坟素端居世机絕微风被崇梢撩乱书几叶山家晨烟薄日晏远春歇庭寒揜余蕙剥啄谢过谒幽怀忽浩然高咏脱音节

衰发如素雪一往随飘风怅然平生怀危坐闻远钟守身易成隘应俗或谓通不惜举世稀所慕知者同彷徨岂有求寂默非伤穷

文章在天地万古相逌谢风霆春行天鵬隼秋纵野所得虽良殊自役總无暇飞霜厉薄寒木叶日以下咫尺不共论孤灯结遥夜

以我砢砢器报君珊瑚株至宝非可酬但表心不殊石贱贵能固宝润知难枯人生在有合丑好岂一途王屋起代北荆江出岷山苞流各自立皆与元气□此理谁复知神禹去不还不知谅何伤相望天地间

古意三首

古风日以丧交道遂以圯昔时素心人忽若匪知己朝直蓬莱宫暮宿光禄邸联骑多季剧填门集金史疑嗔着天下名德为垢粃古言西施贵衆色失桃李不见秦张仪卷舌让苏子

南方有佳人天质辞红妆素手映轻雪明璫照罗裳二月千花开笑语春风香盈盈水晶帘丹云贯疏房自倚絕世姿鬢鬢不能霜秋叶鸣西楼城乌啼夜凉高节良自固谅不悲年芳

昨日苦大燠酬以今日寒天道极必反人事盛必剋刚柔有迭施消长乘两端彼美者谁子一生困辛酸日晏食未炊冬月衣不完着书垂白发门草秋漫漫天道何由诘俯仰良自叹

饮酒有何好

饮酒有何好但取愁可消古人不造酒天地皆是愁刘阮醉一石我饮三叶蕉当其忘世累略与刘阮侔人生量浅深随分无过求天地倘无愁无酒亦可休

作诗能穷人

作诗能穷人谁能忍不作但见平生愁霏霏笔端落朝骑孤凤凰暮驾两黄鹤手携王子晋吹笙上寥廓人言忌太高下笔宁浅弱穷通信有命诗道未可薄

天道勿徒恃

种稻南山边雨足多稻穗一朝疾风来腐折不可刈东家不知畊雨粟夜满地问渠安得之饱食了无愧我欲废鋤耰雨粟非可觊人事且自尽天道勿徒恃

梦事安足凭

昔梦骖重华蹑霞凌青冥麟凤罗百供从御皆琼英既觉知虚无岂足详追评封国忽销印绘功反屠烹戒食或已忘遗金或悔轻人事尚无据梦事安足凭

客去不可挽

水逝犹可回客去不可挽不惜佳客去但憾闻道远明珠买娉婷歌舞供笑莞车马填门来千金具朝饭子孙日以骄六籍不挂眼所忧非无客客多良足叹

金尽还复来

人生百年间金尽还复来惟有少日颜一去不复回不惜少日去但恐志气颓古人当少日树立何崔嵬歌声出金石可老不可摧所忧非金尽金多安在哉

山中杂赋六首【壬申】

昔出忧雨来今行恐无雨倘苏八月旱寧受一日苦潇潇凉浥稻稍稍润入土生物吸流滋如饥得膏乳田家隔短墙颇亦闻笑语幸收饘粥资筋力庶可补

岁旱千里同万物多槁枯东乡早被泽生意回禾蔬西乡遂愆期淅淅气未苏皇天岂有私欣悴自尔殊所以李将军 拜刘家奴

秋气日潜变单绋生薄凉疎雨鸣淅沥微灯翳空房少日已嗟老衰年弥独伤繁忧委寸绪起坐空彷徨便有苏君金何由返流光

道逢谁家坟嵯峨起十尺八柱耸赤铜四阶压文石幽墙发黛光碧瓦戢鸳翼生时谅何为功言岂尝立一朝弃人世永与所欢隔光辉在空山於事竟何益丑好死未忘可为愚者惜

空山有一妇二十失所天贞心比坚石血泪迸涌泉寒灯役机杼拾穗裙不完婚男与嫁女辛苦雪满颠自谓分当尔节义何足言城中髻嫫姬潜好留少年门前立旌木世人何由传

我饮本不多兴至不可无但憾无美酒旋买山中壶山中近朴味山外多浇渝饮灰令人病饮败令人愚寄言好饮人慎毋以名沽

山中五咏【丙子】

蓐食希早出出城日已辰况悯肩舆劳时亦步嶙峋嶙峋苦难步投宿荒村民启扉炽灯火延客意颇真苦辞村无酒无以浇埃尘岁歉有穉粟尚可分炊晨高门多吠犬仓卒难投身勿投高门宿勿厌村家贫

季秋乃多雨淅沥终夜鸣槁枯既已过不足苏疲眈庶以沾园蔬聊堪作冬羹井穴泉稍出始免汨泥泓王赋虽尚宽京官督私征府邑奔奉命斯民敢违程冬羹未可期何以为吾生

溪桥落白水野路覆红叶山边四五家日暮烟火白归牛认深巷行客指新月村田旱伤余老稚筋力竭方今冬序初饘粥倘未缺雪霜且已来卒岁谅何策

瞳瞳山中日兹晨已堪爱暄暄下墙阴稍稍曝轩外幸此宾会少展体聊炙背絺衣未浣污绵褐催补碎人事苦难给寒暑伤易代渐为启期老颇慕靖节醉荒村惟孤松寂寞得相对

仆隶日晏出空庭长寂然鸟雀噪禾桁牛羊散平阡人家隔林坞崇崇上孤烟樵薪颇下岭荷锄亦在田谅应愜冬煖慙若忘荒年邻翁慰我独沽酒酌我前饥俭慚此意勉强尽瓦船陶然共酣畅亦各适其天

古诗三首赠张汉臣游金陵【能诗琴】

古诗出情性声在闾巷间采之被弦歌听者醇风还大音既寥濶羣喙何间关燕?混良璞楚菉藏崇藹妙理忽有合正在不可删秋高星河空天风吹佩环

古桐蘊至理出阳或施阴和为祥凤鸣悲作离鹄吟高寄周孔思清写夷齐心子期不可铸空有千黄金天高九州旷百世无知音梦骑白麒麟振衣蓬菜岑

金陵南之镇兴废满目中青山澹无言万里江流东高楼朱雀桥野笛交秋风子行覽其余弹琴送飞鸿栢台云霄间貂豸羣公为言经济理所贵贤俊崇

石洞杂赋

【庐陵罗士奇都事葬母新淦石洞山水甚佳丙子冬其侄履贞邀同游穿幽覓胜相与徘徊者连日择其景之尤佳者赋诗五首】

石洞

蜿蜒辞夷臯迢逖陟穹巘绵绵千万峰苍秀入遥见既疲犹穿云小息仍下阪崎岖到祠庵高
桧挂日晚人家绕稻田窅然复平远园庐接烟火篱落散鸡犬虽知非仙源谅亦乐农畎卜居
兹未能抚景从缁绁

石人

石门何年启疑与开辟俱上有遗世人形躯略模糊山空明月寒来往谁与徒吾闻晋榆石能
言祓妖枢又闻谷城公颇窥陰符书叩之了不应无乃嗔我愚

石桥

石桥跨碣磳藤花被两涯筍輿此小憩悠然会心期崇梯级三百未陟神先疲野人荐美蔬稍
足滋渴颐嵯峨冈头阡封固百世基纯孝所形着触目皆参奇嗟哉世间人纷纷媿蘂裡

石溪【是日与郭德方坐溪石论文把酒忘归】

冬旱水愈涸微流行石间炯如玉璫窻屈曲相交关泠然落幽磳隐约闻佩环择石踞其高兀
兀相对闲日晏遂相酌持觞看青山疎雨作还止徘徊澹忘还

石泉

重岩括元气云窦出涌泉迸流络广石百尺高帘悬微风度午日煜煜生虹烟始知穷幽讨奇
观满垓埏我友趣奔鹿褰裳陟其巔蹇步独矜嶭矫想为欣然瓢汲试茶鼎庶足凌飞仙

陌上桑

燕雀不随风麋鹿不附麟岂不出俦类各有平生亲妾家东城陌柔桑绕畦春春风时物变无
衣念良人高台王侯家钟鼓鸣层云回头偶一盼通意何殷勤朝为采桑妇暮作深宫嫔富贵
非不佳誓不易贱贫此桑可变海不变贱妾心

山家

山中烟明明山下泉曲曲书声出疎林枫叶半茅屋檐角曝绵臬园曈纵鸡畜寄言避世人如
此亦可足

江上晚兴

南堤直而崇西岸洼以折中流千片帆水日相映白翩翩孤鸢逝迢逖高树没缅思沿洄人今
古几英杰晚泊得鲜鱼举盃望新月

征夫叹

六月征广猺涂埃千丈高渡水波沸骨登山汗流刀豺虎攫疲马棘荆破长橐贼来多如云石洞穿千磬铁甲日晒火大旗烟涨涛恶溪塞断骨乱砾纷流膏前年过流沙苦寒脱鬓毛风裂壮士胄雪积将军旄人生莫作军寒暑相战鏖人生莫作军性命如蓬蒿君王方神武狐鼠何足薶但愿四郊静微躯敢辞劳

雪後游安成王氏端远远山园

幽园闭残雪微红上危枝岂不先羣芳天运如相持积寒意澹澹初旭光离离春风来方多小忍须其时

游王氏观善兄弟双清园

入门得幽池一迳窅以邃萧萧水竹间寂寂林壑意晴寒树影静春薄柳枝细海棠如处子体弱意先丽日蒸丹砂丸露点守宫臂少年嗜看花常恐春未至只今胜情减得景聊一憩作诗记良游重来非所计

春怀

连陰如病醒耿耿乍离索钟疎山馆静花落春衣薄清心近懒率壮事成寂寞卧看古木枝幽鸟午频啄

夜坐二首

日入暑未解夜久凉始归山月升渐高照见幽人衣幽人行未已月亦转墙西

云行树陰薄风过树陰欹云风弄清夜政尔无人知惟闻墙根水泠泠下幽池

送刘一清教授入京

三月江水绿君行适京畿辞亲古所重而使亲顏怡江北多杨花江南莺乱飞去去事经济归来树旌麾

闲居燕坐望城隅李花

春晴满天地我独了一室得欣或暂时积念动弥日遥花洗宿润姝静耿独立日光照素服玉气起数尺纷纷看花人车马共朝夕幽意当谁言微风断城笛

庭芷

庭芷不受俗清意耿凉袂微澜映幽云疎雨洗道气日长饱食罢坦腹花间睡闲居谁与娱赖此聊自慰

庭竹

庭竹如高人疎处更堂堂当其得胜趣岂必客主忘月明泻垂露危坐肺已凉闭门良亦劳有酒乃未妨

桂山堂独坐

笙竽闹春晴此处乃幽閒啾啾惟鸟鸣寂寂鲜人迹青天树光动白日瓦气湿陰陰庭下影满地不可执蛛丝网虚檐悬叶如堕翼缅怀昨日心孰拟坐兹室抱迂世同薄得景意自适穷通信所遭逍遥聊永日

对酒

落落复落落所为竟无成童卯如昨日念之为心惊城东脸如丹秋风化高莹况持鬓间丝岂与流光争古人称饮酒意欲偿平生平生岂足偿但可伤其情

锦鸡行和王生

骥足为性祸翠羽供世储大化役羣动颠倒无根株兹禽亦负美自谓物不如若若汉官绶累累楚豪珠低头若自惜疾舞还复徐孰知羽毛累遂失山泽舒古人夸衣绣永笑籍与朱乃知世同戒最患心自娱君子道若凤千仞不可拘长鸣朝阳间不学鳬鴈腴

初秋感兴

秋风殊未来林叶独先见譬如老将至顔貌已潜变娟娟庭中月落落梁上燕有酒谁与同微凉发如练

和高方大初度日泛舟鹭渚

君诗瓠子河剽怒奔惊湍又如明月珠夜室生芒寒坐倾内法醞不数凉州酸手援绿绮琴付之中郎弹薰风四五月惊传满城观天开白鹭屿苍翠十顷寛书堂昔所建崔嵬集儒冠当时择俊髦十艾得一兰恭惟先正翁士林青琅玕笔花发天润济流愧中乾君诗复留壁千载当共看人胜地逾重句好天为欢伟哉故家步真足追邯郸

和杨伯允

旧交存无谁故里归似客杨君如霜木月旦所推择齐诗师辕公鲁礼重王式天命有穷通道
味无损益幽居邃门巷花竹寮外饰朝窗研经理暮馆讲今昔欣欣学子怀生意竞春碧相过
愧独老白发兀前席徘徊山涧胜俯仰钓游迹无事频往还勿使长相忆

送范主一宪郎

庸夫老丘里志士轻山川古来环辙人往往皆才贤范君绣衣家白璧生蓝田清游半朔南征
衫积涛烟崇台交辟剡思亲理归船吴州肯暂驻风檠倾四筵挥毫走秋蛟吐句纡春涟清霜
净江波水花寒更妍棹讴催客发风正帆始悬翩翩凤凰翎终当仪九天

八月十五夜怀学翁兄【癸酉】

有酒不共饮君为松下人始悔生存时不获日相亲君儿远不归君诗久恐湮万世理如此停
杯问苍旻

十六夜雨邀诸侄小饮

世事不可期今宵竟疎雨岂无樽中酒终复减欢趣子侄既满前稍稍相
笑语共言见面稀无月亦良聚烛花翦欲尽络纬语庭树云开月已高还照人归去

寄洪守郑鹏南四首

英英瑞世气今在斗牛间定知古龙剑千载乃一还雨风既顺时五谷如丘山民物不疵疠朱
草生坚顽愿从苏云卿种菜湖水湾

明公国之彦海内今谁俦使节徧南服晚乃守雄州霜露回为春意和气仍秋月寒西山峤雨
断章江洲疲甿既苏息佳趣倘可酬

梅子非仙才高见在物先区区仅一尉去就乃伟然江山澹无语事往随孤烟巨省立万马白
日大纛悬古人不可见表章赖公贤

高士去千载危亭被崇苔湖水澹秋色野鳬时下来春风百鸟鸣杨花满楼台行行事游冶安
知钦高才知公重风化枉辙能徘徊

晓发印山道中喜晴

翳翳烟散陂沉沉雨承溜桑暗麦芒齐山园雉晨雊老翁驱犊行丁壮各鋤耨我亦驻笋舆一

访农圃叟答言春事深耕蒔须及候丰凶虽天数用力非可後感彼务本言愧余尚奔走

送萧从周赴广东帅阃照磨

崇崇五羊城?藩镇南服海风吹貔貅岭月悬大纛君居青油幕美器莹如玉榕叶秋云深荔子夏雨熟寄言慎寒暑从此奋遐躅

中秋故乡南邻杨氏招饮

老来归故里百事非故情惟有山间月犹作儿时明是时秋且半夕气忽已清南邻招客饮步听危涧声月色酒中乱树影盘中横乡曲佳节意风露白发茎我怀岂在酒酒觞且徐倾

卢兜道中

客枕睡方适鸡鸣戒行路月落斜云间余光在高树远村四五家朝烟澹江浦依稀桥边人髣髴山下坞乘车与负戴扰扰各驰骛百代无穷期妍?迭新故感此行踌躇鴈声忽横度

寄题胡氏涧月堂二首

泠泠山中涧皎皎天上月以月照涧泉举世无此洁月以表我心涧以明我德秋风吹八极踞石濯华发短瓢吸寒光羽衣弄飞雪梦骑白凤凰直上碧瑶阙安知世间人咻咻乃病热

世人不识泉等之黄泥湍世人不识月视若白瓦盘断篙三板船沮洳鳅鳢蟠击筵喧里耳晓晓声不完嗟此泉与月信当何人看我尝遡其源颢白通广寒懿彼隐君子相从此盘桓

悼往用友人韵

百世来未已千载去不回毁器无完粹焚玉成恶灰嗟哉已逝人忽忽谁所催琴悬久不抚闼闭终无排沉忧鲜一适永别非暂乖崇崇园中花炯若白雪裁有酒今不共慨然心为摧

酬邵有初

邵子国之器胸有石渠阁翩如孤凤凰万里不可缚文采临风高肯顾泉鹭恶胡为守一窻寂莫犹似昨读书谅有会娱亲亦至乐上林多高株庶用得所托

晚春和萧孚有二首

朝阳发微燠夕云生层陰东池苻芽短稍觉新水深攀翻步春风孤弄闻遥禽适此得倦坐欣然谁会心俯见水边影闲披竹间襟邂逅有佳致欲赏难复寻邻酒夜来熟邀客归共斟客去

因独醉醉醒还自吟

幽抱鲜欢愴况此春多陰图史擿一室萧然门巷深煮茗昼已晏时下花间禽还往既寡俦欣戚当殊心微风动书几树影忽在襟幸为时所弃至理得探寻东阶有美井溉饔可灌斟食饱良自愧卧听山叶吟

芍药

夏早衆綠翳阶藹始独开窈窕专后德深房出徘徊翠蕤拥帝辇手擎紫霞杯夜永宫月酣余香散蓬莱

晓行

畏热中夜发出门人已多纷纭各有役如水争趋河始知昨宵梦此时方无何悠悠百年间劳逸瞬息过大星如玉斗照我双鬓皤东日如车轮三辗未上坡

暮憩南溪桥

黑云高崇崇落日在云後状如张玄袍黄金缘其首疾风吹参差微陷成杵臼万里青天遥数鳧下荒亩

苦旱【壬申】

七月暑逾炽夜凉如高秋陰阳既罕覩时雨知难求良苗委白莽遂兹空田畴疾风起地埃枯槁鸣萧飕饕粥当不具官赋何以酬卒岁无卉服谁能完纁裘怅然悲疲甿吾亦忧吾忧

八月四夜闻微雨

梦觉有奇事淅沥高瓦鸣焦枯岂云润且欣闻雨声秋稻既无及蔬麦犹可畊侧耳恐复止愿望深中情向来春夏交流潦高入城秋旱理宜有天道良难平大钧转万物旋斡势孔轻仙瓢贮海水安得尽注倾

夜闻桂香

云月通晦明微凉入幽寝推窗寂无人老桂香可饮百年无适意短发谩垂领悠悠市道交举俗无管邴

寄题高氏静山堂

太初割元气散在八极中一静閱今古默与天运通草木奋霄汉神变生霆风本性固如此孰能窥其功

晓立

清晨有良悟偶此得少立雨余溪声近雾重林气湿宿禽去初尽畊者稍已出此心凉无同汨没聊日日初度日和萧孚有见壽三首【前二诗咏其号兰雪】

崇崇畹中秀岁晚有佳色霜霰凄以来凌厉气不折美人昔滋种所贵非凡物采采怀袖间三岁香不歇尼父为援琴一弹重鲁国湘臣继为佩食芳可絶粒岂无他华英高世在贞德安得因长风贡之白瑶阙

天上多奇花大者可如手岁寒发奇色皎洁照宇宙美人玉为冠侍女练为袖簪之乘风游姝嫿掩羣丑赠我双白璧千金不轻贸我欲酌斗酒还为美人壽风标忌大洁顔色忌大秀何由返天宫藏之以为久

天女五色机织自开辟日至今弄寒梭轧轧犹未息筋力敝千秋鬢发变遥夕织成鸾凤嫌世俗犹厌质藏之不复道投杼事安歇所贵识者知尚使光价溢岁晏风雪骄万里寒铄骨谁能制为裘一展复三极

和张汉英见壽

我昔三千秋曾攀蓬菜芳右擘方平麟左持王母觴夜立通明殿帝旁司绿章三生习未尽谪墮翰墨場饥寒如泗顔齟齬困鲁臧赖有二三子相从如鴈行又持青琅玕壽我升我堂我老学蝸蟄看子争鹏翔愧我非韩才期子樊与张岂有龙泉锋不能藏尚方

玉笥山何提点建三清殿二首

笥峰云峩峩白玉作楼观飞桷堕人间彷彿天上半只今三千秋妙斲始一换丹霞贯觚棱白日隐其閤吹笙集羣帝一笑视汗漫倘逢梅子真小立共谈汉

始青何巍巍妙道不可说出虚还入无岂必待宫阙去地千尺高宝栋忽以杰下视九州九泐莽如碎雪骑麟睨北斗夜冷遗玉玦会借回仙蓑共卧山中月

庚午冬留淦州忆亡孙凤二首

古道昔同往天寒今独行汝死不自悲我老难为情死者若不悲死当胜於生霜重草尽委山空泉自鸣我发既尽白我怀何由平

快意每不至伤心来自多十五年痛哭安得鬓不皤之子入梦想长眉双颊酡?气既何之耳侧犹弦歌月上高林枫月落幽社萝怪魑攫人命陰壑森蛟鼉吾闻圣明时沴不干太和重华不可愬千古当奈何

和涂率修中秋二首

来日不可麾去日不可招老衰既易至千载知非遥明明中天月照此佳节宵欢薄怜趣减酒漓知俗浇缅怀区中友峩峩多蟬貂岂无知心人未若涂与萧持觴不能饮矫首窥崇霄安得插长翮与之鸣清朝

佳节去如客兹晨已难招又如波中舟泛泛看渐遥适此有名酒足以慰良宵旱久芷欲悴自汲频灌浇月明簪其英婀娜如垂貂极知非节物颇胜服茱萸萧鄙性偏嗜爱扶植愧高霄夜深风露多生意观明朝

送王伯振宪金

健翮隘六合逸足轻长途抱才既不羣常调安得拘王公天下士风节今所无脱身韦布中振袂升天衢遂通金闺籍早赞臯稷谟朝驾刷玄圃暮车息清都高驰飞霞佩纵挹寒露壶手持使星节水霜压番禺经纶要大用令德天所扶青原昔仕邦重游真壮图父老倾酒觴临分何踟蹰祝公秉钧轴四海跻唐虞

和张自翁荅姜广文雪篷足疾

支离妙无用鼓箠食人十王骀中分鲁形废道始入木壽不愿材齿坚以居湿倚伏本何常失马福所集奈何煎忧喜自滴槁竹汁至人蘊天和客沴当自戢骄阳脱冰饮至陰谢裘裘心同造物游身岂二竖繫株拘海自运捷者瞠不及示病学维摩要以钝为急我生困世途裹足扫梯级自安邯鄲步不效文公习君诗剧鶻羽絕艺忘决拾又如控龙驹迎候不获揖一读顔为开浩叹神物蛰 吟手不放珍过侯璧执坐怜食藿澹共啜炰凤泣请君勅仙神呵护九转粒散为六合春祲咎变嘘吸世无疵病人伛者皆起立

再用前韵简诸和者

青天行万古度三百六十东西蚁疾迟南北极出入木金互健顺水火迭燥湿万物生其间一气随散集洛花炊琼肌山菜冷 汁云高鹏路多蒿短鷁翼戢夏璜委涂泥燕石或什袞涎驹驾金根天驥困隶繫嗟哉造化理颠倒过不及少忧贫贱拘老怨岁月急举觴共问天升覽须几级我文如贫女寒烛痴组习百年供蓼苦万事如湔拾今年金川东邂逅车笠揖每见意气生浩然春启蛰明时用多士陋者犹戟执谁非弹冠喜何由向隅泣君才岂山栖未可言絕粒属君皋夔仕贷我乔松吸我知君当歌天风白云立

送严仁安教授二首

萧萧羊裘子百世余清风闻孙颇相似志节甘固穷三年青原教介直谁与同春游望肥马秋梦思鸣蛩貌作卫乐癯诗比鲍谢工离别古所难风帆去如鸿

良医有相道天下无沉痾况以医教人济世当益多中仁外自见根盛宜繁柯万物通一体流畅春风和清时念民瘼岐扁聯禁坡勗哉励羽翼云汉终凌摩

和张庆远游青原

平生嵩恒心今日行兹原东风岂不好褰衣步青天境空忽欲动意却仍贪前白日照八极千崖偃如眠芙蓉远修供铃铎昼不喧佛祖了何语香炉自生烟羣经过名教乃以文字传题诗杂好丑讷者存岁年不知自有此登覽谁最先春桥唤饮酒一醉日可千陰陰风在麓炯炯天映泉同来不同趣隔花亦垂鞭

和诸友登洞岩用工部龙门寺韵三音

芑城隐东峰芙蓉亘西境昔闻阎太守於此谢幻影仙茅一丈高飞瀑六月冷悠悠辽东鹤千载一归省平生慕兹岩未踏岩中境及兹共赋诗自笑如捕影荅臣乡邑废游客姓名冷古人悲湛辈临风还自省志士怀四方孤生念遐境如何幽絕地不着玲嶰影买船江口风展簟岩下冷兹游凉非遥胜趣当暂省

和罗昌逢千叶桃

闰羸首增春朔霁久连望梅残不留玉桃盛忽成障异姿夺衆妍殊萼同一状重绯杂裼裘叠彩迷下上泪明露借光影墮日分漾纷披竞年华剪刻费天匠先生被花恼书罢时亦访亭空昼无人山鸟立幽桁横波绕碧带老树入古像同游无前度得句有孤倡仙源谁与期微风起衣浪

送李学録考满归庐山

吾闻山房书富蓄冠天下其孙善读之声誉播时价伟哉叠泉君千丈白玉浮序庠得君重冠佩领儒雅学端衆所敬交重事难舍木脱鹭屿秋帆归建江夜他日忽相思风高雁横野

和高师周【有序】

师周吉之俊士也着名久矣於今为老成连举於有司不得志丙寅十月用天运苟如此作起语为古句十五韵见寄余感其少年翰墨相与晚节坎 相望尝欲和之次年正月始能援笔而以陶语置末联云

相牛学甯子殖货师计然君平隐卖卜步隲甘灌园古人苟齟齬亦在数者间郭门秋风高老屋修竹边席珍门无聘怀宝意自怜撷菊饮寒涧鼓琴忘岁年故人万山中灯火穷青编草玄发如雪投笔相顾叹世好皆楚腰僮被不见妍梧珉荐清庙满腹空琅玕学畊憾已晚万事甘自捐吾闻九成乐颠倒随陈完至音一以散谁复窥其根卓哉吾心理本具混辟前天运苟如此相期在圣贤

和邓牧谦社日郊行

春风辋川花社日浣溪酒百年少旷怀四海几佳友马蹄破莎泥舆影掠桑亩交深主忘宾句逸心应手流水清绕庐好山秀当牖幽寻既有会剧语不知久抚卷如同游不待接踵肘妙哉蓬莱音三叹得希有

游延兴寺二首【宋季寺基没入鹭洲书院至是始复】

谷芽吐堪束麦穗老未收犊迹横满道潢污断丛沟古砦草木长遗址如圆丘时清幸畊种桑柘交平畴人家修竹间藤花俯溪流蟠石之所碍锵然鸣玉球媿我虽能诗所居无此幽惓然生世心易足始易求过桥不能去小立聊悠悠

丛林翳行径叶气袭客襟稍深得空旷眴然销尘心禅房白日静蔬花绕黄金鸟鸣寂无人庭枝弄微阴高僧为焚香相对兀若瘖殿宇未完旧鼓钟初成音孔释本何意废兴乃相寻信知衆生累等以一念深出门得好风行云散遥岑

雨坐

近夏天气湿飞雨无时来回风卷高叶半林白光开空斋玩造化聊与相徘徊吟诗卒未就晴晖在庭槐

午饮

我饮不必多醉与千石同兀然睡欲醒肌肤生缣红从来天地间一足无俭丰未知尽此生当复可几钟

和罗元翁三首

白日悬高空夜乃息之海伏陰况薄蚀见者为永慨孰知造化理持此并覆载如何崑山炎不肯少相待青天非不高不出环之中羸缩本无迹千载乃可同变容与失笑未有隐所从履霜早辨冰见月先知风如何世间意往往终难穷

清风如高人爽致可以师浮游天地间匪亟亦匪迟齐繄之所招似者或致之岂伊至妙意而

或入控持如何执热人可热不可思

友恭堂【为南安人作】

太初赋生民落落八极中伦属本一体初亦不择从风花偶相聚并美固罕逢方其竭所感自谓金石通孰知若行路笑响猜矛锋独持惘惘心四顾真若穷流言病不友谟盖憾不恭圣贤所不齐而或一日同旭光拜稽肃堂序如春融竞难过元季角胜嗤谟嵩听雨同夜烛持盃坐晨钟谈经来朋徒环侍森儿童世俗吝徐行此意何从容梅花三百里流水浮烟虹作诗寄君敬三叹惭高风

送艾幼玉赴南安儒教

儒官如蔗杪妄意近佳境亦知嗜习累诳俗示隽永堂堂道心翁学者倚袖领摛词屈邹枚讲道来华邴盛世擅场屋金石出欵譬东家升仙子往往尽余鼎空山三十年华发忽垂顶春风八极意独立修竹影一官岂足偿跋涉压崇岭五陵多少年冰雪照清炯杨花鸟语乱走马出三省古来天地间此事从耿耿南中少人事山水清可咏岁晚不负君梅雪三百顷

赠刘斗祥祈雨

古人敬天威吁怛待其定後來方伎多乃更以人胜炎风一月旱闭户窘如病江流断横练樵瓮竭朝暝稻畦絕鸣蛙里閭可无命刘生起驱龙造化若可令孰能使一日春意满丘甸勿云事邂逅期尅乃足敬羣仙居蓬莱佩玉事清静流霞护丹宫狂犬不闻警嗟生独区区岂有尺寸柄三叹惭此心作诗以为赠

戏赠祈雨者

渊龙困弥乖瓮蜴闭欲僵高人轻千金不买一饷凉墨池片鸦湿夜灵悬曙光江河如春流昔者何所藏

追和白乐天三月三十日作

人生天地间行乐苦未毕陪欢与强笑有似名无实新年如乍来四序忽复一池痕乱微雨檐翼语残日青山澹无言风花杂徐疾笑持鬓间丝为问此何物

和周伯恭山长游觉报寺

黄埃涨门衢白日照郛郭长年厌烦嚣鬱若未翔廓平生嗜静心转觉味不薄流光易清晏壮事落盘礴始信山埜姿终当岩石着人情择便适世好更美恶逸居非不高智者笑纏缚富贵谅所欣又若垢未濯故应任所运何者可先度向来诸名山固有一宿觉当其失俗缘自谓如

勿药却怜心未了欲往轮四角此如霜余水久乃自安壑使其涉有意固已为造作乃知豪杰士多悟匪多学恭惟平园翁至理集浑璞创寺偶一时岂以此为托百年贤愚尽奎画落楼阁悠悠东门瓜寂寂华表鹤风流在斯人沦浹心所着夕阳草树空客子散腰脚羊杜遗岷山松绍谩河朔人生几泡梦奚用苦斟酌虚名等卖瓜卖者不自嚼东流澹连云青山去如幕登高亦能赋有酒胡不乐放怀天地间与彼俱调谑清风从何来我帻岸未落诗成岂不佳衆乐襍贾铎孔佛将无同独愧此言约

寄题吉水程州判勤有堂

读书如农功播耨无休时春雨困锄耨薰风走台缁秋?偿所愿黍稷高京坻东家不昏劳饮酒随市儿室空立四壁衆饱已独饥始知贫富权非尽天所为筋骸我所有堕废诚非宜六经具理道诸史垂兴衰修身与治国途轨坦且夷讲切得其要高可圣贤追功名特余事记问非所师但使本根茂华实当满枝退之以利诱不免後世訛英英程别驾龚卓让设施作堂扁勤有灯火喧吾伊颇闻郎君佳过眼无前疑胸蟠五千卷下笔蛟龙驰勗哉树斯文千载以为期

赠萧以能义惠

义财古所难史传希以濶其间垂一二千载事若揭萧君诗礼家贍蓄本凉劣独怀济世心汲汲甚饥渴江桥横长虹輿步无病涉有粟济岁饥有薪救冬雪亲亲与仁民隆杀各有节东家田连阡钟鼓鸣綉闥春游饰燕駉夜宴围赵瑟族姻半颠连肝胆迴楚越况能念闾里濡响誓俱活嗟哉萧君贤财出鹭股割絶甘不待多为惠贵当厄丈夫志及民常欲俟显达岁月忽蹉跎白雪飒秋发谁能持此诗诵与腰金客

五日和邵有初

节谢客稍稀昼永意弥独潇潇花间雨林光弄遥緑缅怀独醒人一往不可复素心凉难得且酌樽中醪

白木槿【重台每开踰十日】

数花出篱援耿耿照夜阑月寒客独起恍若山雨残天风冷然来坐久身欲翰梦酌琼宫浆荐以雕玉盘羣妃霓裳冷夭娇环青鸾世言朝暮落耐此十日看始知洁白姿颇胜施朱丹大钧纵万物尔本羞蕙兰同类偶自别亦复得赏叹勗哉励贞节相期在岁寒

村墅晓起

秋晨雨初歇草木凉萧萧墙桂吐微香架荆扬其条物意正自适而我亦逍遥物不怨闲弃我岂伤寂寥物我乐天运可长亦可消

荷花庄独步【庚午】

少年所寓留今视为故里邻翁不知老笑我老如此徘徊阡亩间感会独在已雨足秋禾肥平
偃如席几鸡豚散原陇菰芋绕池水饥馑稍已忘及此乐生理日暮樵未归炊烟数家起

又【旧与彭士奇罗君逊皆寓此】

昔与二三友周回此田畴中岁风雨散兹游谁与俦望山渐适意得树亦少休峯回西风长吹
我駝毛裘登高遂遐瞩一粟托九州去住定有契欣戚焉足留戏攀西祠花下濯北涧流

八月十四夜听雨

佳节隔一日连陰雨凝秋不知及明夕当可见月不陰阳迭相乘万古理可求明月岂我违美
酒宜预谋

田家咏

田家务生理机车夜纷然少多有程度夜久始安眠鷄鸣复竞起照室松明悬日日不遑息不
饱粥与饘自言多假贷火宅百虑煎大家急索逋往往乘丰年丰年固可喜可喜亦可怜

又

日出山东明荷鋤事耕作日入山西昏持斧斲松柞但取朝夕给不憾筋力弱秋棉吐圃花南
市酒可博相携各有徒稍倦亦暂乐岂必无机心嗜欲良已薄

癸酉元旦

元旦解纈纁气候何过暄墙东有繁梅清晓蜂喧喧高斋门昼辟静坐观遥天瓶英炯如玉相
对俱无言

元旦赋红梅

红梅本迟暮冬暖遂争先乱蕤额黄澹细蘂丹砂圆虽加点染工风致终自然怀哉生意具欲
折还复怜物理且如此吾生寧怨天

石菖蒲

盆池有灵苗石罅忘偃仄微根乱繁丝疎叶散纖碧苔莓封巉岩沙水明的皜所贵含贞姿终
然傲苍色道人勤养护黄悴辄翦剔常与贝叶书珍爱同几格豫樟蟠青冥风雨作霹雳小大

固尔殊赋分焉得易相期乔松交岁晚坚九节

又

始从山中来遂置窻几间稍依勺水润犹托怪石顽
窻沙极浅白坳苔上微斑贞静固可爱长茂良已艰
幸与好修者同此一室闲月寒垂珠露玄津自根还
灯火亲已晚庶用凝颓颜

赠兴国石印欧阳明翁

淳朴既已散大年良亦稀唯闻南阳山食菊多耄耆
又闻商顔老颡颜霜须眉时与蓬莱仙骑鹿扶桑池
元气有鍾会昔闻今见之崇崇鬱孤间文石如印奇
君家擅其秀兄弟皆期颐曾玄罗高堂彩服光陆离
南灯北窻月千丈喧吾伊圣朝重耆德坊表生光辉
我欲往相从共食琼田芝笑问广成子重逢复何期

赋兴国王氏梅窗

天地有清气散作梅花风梅花有奇致妙在窻月中
金茎淡午夜清霜飞太空道人起危坐八面虚
珑横斜落瘦影妙笔由天工玩之了无言意与太极
同我闻三槐家种之在瑶宫千载有佳句何异孤山
翁

八月十日萧孚有邀同萧州判安国诸贤集德元寺凤山继饮熊氏园

应俗妨良游兹行偶能遂初逢梵寺静继得儒宫
邃晚芳被深径寂历含野意游鳞动微澜幽鸟下
荒砌怡然挹萧爽适此念兴废後游谁与期得酒
且复醉

诸贤皆和遂再用韵

夏华既云谢秋实良已遂幽行历故墟一迳入深
邃感旧多婴怀得胜亦会意微风来高林小坐列
苔砌攀览景弥佳衰倦兴先废路逢陇上人正复
可同醉

旦坐对客

夜久听寒雨坐来星满天重雾被原野漫漫白于
毡五更雨复集急洒惊客眠岂意今日霁旭
暎如黄绵相对庭树下满倾药玉船万事且勿虑
苍天工转旋

晓行

星明天宇迴山驿鼓初发行人稍已动露气漫
埜白方塘浸道隅荒荒似寒月日出炊烟横鷄
声隔林樾

和临江饶自然夜坐

庭树秋月高危叶光欲堕孤蛩感凉气唧唧稍近坐邻家弄机杼微灯出窻破寝斋生新苔禅
裯揜关卧

用前韵赞饶所作山水图

高人发秘思妙景自天堕萧萧山水间草树环四坐云归野色静泉落岩光破平生慕清游展
转面壁卧萧孚有诸君见过贻诗复用饶韵二首

闭门无来人秋晚柿叶堕时从林下行还向草间坐车马忽枉顾萧萧踏苔破客去明月上山
禽喧夕卧子云事规矩岁晚高阁堕何如马长卿都骑倾四坐吾生两相忘寂寞茆屋破陶然
盃酒间竹牀饱秋卧

霰雪和彭经历琦初【庚午】

岁饥瓜地荒老病卧玄晏闭门三日雪飞霰相襍乱飘空乍鸣屋穿隙已在案载途积愈高集
水凝不泮山寒消久暄玉润苏亢旱颇疑湘蛟泣珠玑夜纷散又如洛仓破白粲接原岸柔条
压既低高木擎欲断体圆工簸弄地远迷界限我生事嘲吟寒饿不可追坐悯民瘼深谁与覓
医缓救荒既不预应卒自无筭古称兆丰年至此可三叹

时岁将除 用韵和之

别岁夜卧迟怯寒朝起晏黄云低不动白霰下愈乱鸣檐铎若佩积地厚成案遇坚势屡跃得
暖湿先泮严沍阻春生萧条助人旱纷如撞斗破疾若抔沙散朽株发英华深谷变陵岸先生
懒斫路门外人迹断作诗无雕镂白战安可限空山斲黄精微此命难追少年喜映书老大悔
儒缓豪门方饮羔觴急不可筭安知负薪者道旁拊膺叹

和邵有初同饮熊氏小园

客佳不必多地近得频往极知後花时聊复纵心赏树深路欲尽林缺天忽敞坐久飞雨来黑
云涌奇嶂清风襍笑语共作金石响尚疑有余韵隐隐在蓬莽豆觴稍狼藉宾主各酣畅安知
墙外人【谓墙外丛塚也】千载落埃垓生时谅自谋局促戒游荡百营有丑妍一尽无老壮
何为苦不饮劳身入羈鞅

赠青田道人

轩轩青田霍万里在羽翰曾从苏丁去复此来人寰相望三千年戛然鸣空山蓬莱云峩峩夜
永风月寒天街方九轨要尔骖鸾胡为鹄与驾饱食青琅玕嗟尔有仙才欲往谅不难

和张尚德宪郎

君诗如长江浩浩积瀦滙纵之泻千里所过不可界又如百货集光彩照闐闐銛銛干莫锋温
润琚瑀佩变化发令姿富博骇羣睭鬱孤留十日山水各献态振衣千仞颠警欬荅秋籟涉溪
螺斗惊窥谷杞根吠羣峰如故人拄杖静相对尽追坡仙游踏破山浪翠吟工压木客气正失
垣魅知君青云士胜迹犹所爱经济满胸中领覽暂方外不同牛山登流涕感谢代五羊屹霜
台掾檄促今迨悬知衆器陈政复待殷鼎古来成功人所贵志慷慨文奎动遐极爽气破炎葛
九月霜露严整驾俶高迈便同南溟鹏俯谢蜩鷃类

和张子明学录三首

比竹无至情焦桐无余滋和音发清润婉变令人思奇蘄倾衆目矫然出藩篱物理终有合憾
无音与姿白云岂不洁或谓无其芳斗柄岂不高或谓难挹浆高洁自皦皦傷□惊堂堂倚杖
久无言飞云度横塘张君北方学易道究微净长才譬骐驎局蹐果下径作亭依曾城傲睨有
余兴芳草皆会心飞云亦成咏

和三首

滔滔九江流南纪胥润滋禹功之所濬万世可以思观其赴海心谁能与藩篱志士谅不殊卓
哉经济姿微?淡秋色佳植崇时芳采之遗所思寄情如馈浆美人冰雪姿宜置白玉堂清风忽
徐来文漪徧方塘文江抱东山秋水緑逾净崇崇圣人宫飞桥被衢径多士欣所慕游覽足高
兴悠悠在泮饮炯炯浴沂咏临江傳用宾以诗见贄并貽端石用韵为谢

幽幽端溪石来自佳人持相待三千年所得非所期春风琢粹质秋泉涌寒滋文增李杜壮书
助鍾王宜闻昔初取时千夫下岩陲坚锥启石矿利刀斩荆藜镌鏤后土閼百丑得一奇点若
鲁鹄美伏如虞鷄雌宜登白玉堂黄麻照春姿发挥四海治润洽万姓私谟布禹臯懿诰逸周
召规胡为到穷谷一落不可追饥吟腊雪冻病哦春日迟蹇蹇涓滴润不能沾砚涓生从嘉兴
学江汉驱文词鉅册博羣理三读为叹咨研磨不自宝乃以赠所知愧我无所用藏之如镇圭

山矾

丛丛乱玉糝藿藿含金綏山明风日醉香入行人肌塌然薪朴间时至有此奇我欲略下体持
种蓬萊池美人天上来万一充调饥

瑞香

嶄嶄丁香角澹澹水沉味月映赤瑛色日照紫烟气神农不知名但道天下瑞夜寒擷其英綴
作飞霞佩愿佩君子身华滋长不悴

雨晴门外独立

东风瞰我帟啼鸟发我兴出门更无人惟有青山静琤琤石水鸣忽洗人世听它日岂不来邂逅乃复胜

暮坐

悄悄若有怀悠悠竟无适春深墙英落失我庭下石飒然一雨止坐见万瓦湿风急寺钟尽惆怅成暝色

秋夜

閱书意适倦仰见檐月明孤灯秋夜客独听药鼎声废吟聊养病处寂更生情还看手中扇持此感平生

客怀

去住两无定幽独谁为开秋斋朝雨湿饥禽独下来繁柯委悴叶废书振新埃怀安诚可适终当何所裁

开岁三日池上小立

今日天气暖已似三月春终冬雨雪少风起辄生尘道人幽行倦树下一正巾流水见两鬓一笑叹我身日光堕木影满沼黄金鳞白云行其间游儻动瀛沦偶然景与遇亦足适吾真人生会心处何必穷其滨芸芸黄埃中勿语行人

新晴偶步

宿雨衆卉湿簇簇新黄稠蜂声花气暖鸟语林光幽戏拈碧桃片试放清池沟翩翩乱眼急既碍还复流虽云玩光景聊复寛鬱忧不知玄都子会意有此不

山家阻雨得晴出郊

山家半月留坐待雨声住东风入我檐领客村东去晴光着天壤生意欲飞舞野禽拂清涟襍花满幽树回首西冈麦十里緑如雨新年今日佳复足济胜具儿时所经过彷彿犹可覩穿深过乱峰意与仙境遇白云行洞口枯木记归路安知山间人不讶予何故

初见白发

本无大忧患何为早见及人言汝多知我亦怪弱质崑仑日夜运春雨浸云泽本不与相期安能限其色门前曦朝阳远映江柳黑数根偶如此何用更拔摘待渠三千丈更好照庭雪

早行值雨

濒江夜不寐舟客声可怪飕飕篁竹动沙水辄澎湃晨征路泱泱春泥踏行蟹江空雾连山隔手已为海古木夹道边宿雨惊我盖我行亦何为益信劳大块平生青藜杖至此始足赖天地稍向明云来复如黛平田万白顷欲攫不可待奇变固可观跋涉良足慨作诗寄吾友要使心目会何时终南山卧听响窗外

寄鍾祥叔

三岁祇等闲一日正难度向来会心处邂逅谁得语山深百鸟鸣想见吟益苦君才极落落盘会过齐楚寒机变鬢髮誓不轻一顾坐令车马热?褐尊雾组丈夫志经纶寄食等佣雇纷纷适献笑得失岂相补春雨涨空江暮云带平树怅然良晤期且寄余春赋

园亭夜饮

酒酣爱花香三嗅飡欲既春风心骨软狂过发永歆却念坐间人谁共此时意

池亭即景

小亭扫芳昼幽鸟语初暖坐倚阶草柔行避径条短水光与花影历历明不乱疾风忽翻林落红半池满

午坐

今日频送客兀坐心未定午倦睡适来鸟语偏满听昏昏半人世隔屋喧笑竞恼我彼不期閤动正在静清风白昼永庭影乱复正悠悠无与言起步林东迳

援笔

落日池上饮荷花醉于人清风吹人衣玉笙彻秋旻酒酣起絶叫游子不念贫平生阮嗣宗定胜石季伦

呈须溪刘先生二首

仙人三山来袖有五尺琴绿尾龙门植朱丝轩辕音携之曾谒舜三奏凤舞庭风高天路断归见崑仑青起视八极间琅琅成孤鸣绿海凝不动白日回夜明时违地亦失犹使天下倾但憾

无子期彼直乐其名

六合白日尽闭门读仙书骨凡俗亦重三叹空若无朝芝与暮石忧乐病益癯坐闻安期生散药行八区飞霞贯紫帐天风吹流苏青童笑丸丹庭下白玉壶念此千载事咫尺云中居奈何岁月忽欲往终惭愚

赋小松树

何时始移根今日已映坐沐露欲五寸出草先几个林深带宿润潏潏垂白唾欣然千丈意鬱勃不可挫我无定居地此计恐成蹉他年欲待陰日月当已过桑麻要生养文字迫寒饿柳传未可学范书真足课如何抱空踈矧复习痴情嗜饮此山水五岁饱高卧君看重来时风雨夜相和

晓起

晓街千动发秋房独酣寝红日照松端鸟雀鸣相应世味澹不生道心方暂领扰扰尘埃间老我不自省

游崇福寺

我斋不盈丈面壁兀若顽出门天地濶旷如脱牢关青童迎相揖笑报山僧还婆娑三四客竟日长松间中心定何如气象无此闲谁当千载後如我坐兹山

暮雨

层宇晴气浊霭然生浮云夕风入客体暄寒倏以分坐爱墙西木微雨偏可闻松苗润当蒔药草秀已芸还因春务迫愧我道未勤

和萧安国浴罢见寄

烈日晒书牖微风怀舞雩遡溪得盘涡日觉泉窦枯驰晖贯水石交曲如金铺从容虽竟日忽忽若有驱始知羈旅中一快终非娱此山岂有契久住真慵愚年年见华黍颇熟田间夫人生亦底用丈室饭一盂崔嵬七尺影壮矣将奚图东行有问我多病同相如

偶题

客怀无可着日日来看花丈夫不自食同里为天涯风微天无云日落人归家聊题今日心寄尔东门鸦

七夕二首

斜月隐云里明河横楼东鳞鳞万瓦静天高树无风衆星炯不动灵鹊从何通遥知积气上六合方无穷十年欲学道忧乐填我胸胡为彼玉人世念亦未空

牵牛紫鸳衣织女白玉容一水清可涉非时寧敢从穷年弄机杼缝成合欢宫綏挂牛之角枢倚虚之东停车俯八极白草连秋风勿嗔会合少天地以相终

偶行

东阡出南陌天气近佳节日晚春衣翻崇阿微风发飘然起长怀矫首万象列大江日夜流天际生新月

把镜

今年复明年天地终如此山中有畸人颇怨岁月逝梅花盛已落桃李欲相媚愁来把镜看白发早三四

和萧天叙山行

临水偶成趣朋来如相期人家山礪隈往覓浆水迟清樾抱石桥行旅坐支颐交交双鸣禽见客已惊移

暮斋

客去檐雀噪高斋久清立疎雨无行人烟崦夕炊湿前园靡芜衰东邻日夜织同门信不至鸿雁满江泽

别刘文甫少府

崑仑八极间白日去未已堂堂梅溪翁衆器古罍洗向来恨不见既见会乃几平生慕前修屡飭不自起始愧古人学不憚走千里岁暮高馆寒残雪尚可履公归我亦去後会未得拟请参在家禅愿吸西江水

先母讳日痛不可言二诗寄家兄学翁

今朝亦何朝惊骨泪如霰嗟哉十五年每岁少亲奠墙坟长春莽当日本草窆生存未能养临歿不及见如何一抔土展转日如电乾坤有尽期此事不可念前年理旧衣犹是雪寒线生子亦何为循发青欲变写哀寄吾兄行云满郊甸

又

敛形亦为孝择燥何必福因循若有待万死罪莫赎春来凛可痛逸箠过新竹况堪分百念来忽去亦儻吾儿寄他巢未能念姓族君儿慧而病近复闻废读林烟午未起多雨潦入屋回首同气亲参差多可哭幸今得尺地此事决秋菊

彭琦初作影调羲因复戏作

出门违所亲百里变山水东西与南北举头惟见尔尔何无一事相逐若相喜尔从扶桑来又欲催我起长途见尔落映我走如鬼嗟哉尔不死我苦未可已曩者郭门人怨尔不少止奈尔颇痴顽万古终如此

羲荅影

我生天地间与尔皆有役我不与尔谋尔岂愿我息终风十日霾知尔怨已极孟冬夜差永寒烛惨相索尔如生华屋玉面不我识尔如息乐丘与尔永相隔奈何尔不愿尔愿或不得是机偶相遭万古亦戏剧

文江同诸公晚步

意登何须高一覽万象足大江绕孤县草木入滙浚东山走虬龙出没献所伏晚晴天气正新月映江渌徘徊数过舟上下有迟速是时清霜初木落杭稻熟平田见沟塍荒野纵牛牧天时既已丰世运或可复陋邦亦何为巨镇今所独遥闻郢都鹰郡邑所侧目西乡瞰官途亦或理逃屋苟安倘可期未敢责深欲

有行

昔我行高原黍稷青茫茫及兹涉秋雨晚稻亦已黄东峯出晴日西岭陰不常草木凝正色英华欲归藏睠言一岁间奔走何所将惊风盛弓缴鸿鹄高其翔志士念四海时危怀故乡蓬蒿万偪侧乾坤回其纲

感兴二首

窻空见高树新叶一寸碧春色已如此十日曾不出去年出山迟临水见秧刺昨因农圃言偶念丘礪迹岂无躬耕资懒性乃弗力便当归去来家人为炊秬

测测衣尚薄高斋近寒食微雨湿飞薨行云弄晚色墙英困未舒庭绿日无迹芳年递相逢胡乃长为客人生天伦乐富贵不与易念归乃不归此兴为谁役

对月

月明坊马秣夜永楼乐悲叶光如垂露宿鸟屡翻枝柴门步复立万憾集此时饥驱明当别木末疎星移

雨後

微钟生暝色远舍春正急空檐暮雨歇偶然有余滴危坐久无言童子了不识

摇摇田中草

摇摇田中草靡靡何足矜岁久荡春晖丁男未归耕旭日野鹜来飞舞相践凌鹜饱去不念草性随自荣

青青桥边柳

青青桥边柳移植东家门但得岁岁好那能怀本根游子年貌往踟蹰武昌春所思在旧物微木非足存

新晴

春晴吾故人两月一见之先生坐不出犹如雨中痴案铜浸素蘼幽贞淡相持倘得造化心春色正在兹

山墅初冬二首【甲戌】

邻舂五更动机杼响俱发薄霜厉层宇天西辗孤月驿马嘶不已壁蛩鸣乍歇故人期不来山庄多落叶

少日鲜欢趣老境多孤悰山墅寒掩关苍苔生庭中济世久已晚着书懒无工惟应学王生作文称酒功

送于伯尚学录满归分题赋尊经阁

堂堂庐陵学杰阁凌青冥缥帙充屋栋祥光夜驰霆子史岂不多所尊在圣经圣人制作意百世昭日星易以开造化诗以勗观兴礼以垂世范书以底民寧春秋谨笔削乱贼惧斧刑子弟事其长臣庶尊朝廷仁义饱谷粟纲常明渭泾天地列河岱日月行海溟大哉斯阁间万理为一庭巍我在人目严敬生中局于君三年录口吟披不停譬如饮醇酒心醉未肯醒薰风吹归棹明日指剑亭自此讲天禄更照青藜青

夏初城西楼讌集

轻陰翳万屋夕阳在遥山空蒙乱紫翠变化顷刻间凭虚一以眺衆景何斑斑薨栋散高下冈
峦如断环孤檣出宵暖飞鸟时去还客佳饮逾多感此良会艰睠言名利徒谁能同此闲势集
易傲俗有求多俛顔悦已嫉来式违时伤废班百年一丘墟劳生共尘寰愿与王子乔骑凤相
追攀

初夏书怀

永日宾辙稀危坐颇自佳幽禽下书几晚花独当堦简策散不理焚香破孤怀犹嫌市声闻移
牀息南斋萧孚有以左耳陶瓶对客煎茶名快媳妇坐间为赋十六韵

南中土埴坚妙器出陶火控搏雅以静整削平不颇浑沦象瓜团短小类橘颗粤榔实尽剝蜀
芋肤未剥啄如柄揭西耳若柳生左油滋饰外锻灰坳增下裹高斋奉煎烹汤势疾轩簸狭束
蟹眼高薄逼车声播俄顷润渴喉巧妇愧其惰乃知转旋工政要倾酌妥主翁嗜吟诗佳客时
满座呼童汲清深瀹雪浇磊砢急需既能应闲弃无不可东家重函鼎菌蠢腹徒果美人预为
蠶常恐迟及祸何如且小用慎勿谓么麽

赋袁州鍾清卿清露轩二首【善琴】

虞舜既已远仲尼去不还寥寥古桐音流落归空山之子子期後千载手可攀华轩湛清夜露
光在林间一弹月当户鸾鹤号清寒再弹风度水鱼龙奋神奸起咽仙掌液振衣上天关人间
正酣睡从古听者难

零陵有奇器升降関世道圣人方在治潏灏照青昊飞仙千仞端探饮养其宝夜寒抱瑶琴骑
凤弄华顒独立天地间万古以不老

题刘氏芳洲

朝种百畹兰暮种千树芷芊芊绵十里间环之以流水春风弄柔桨秋露湿芒履云来值卷帘月
上见隐几馨香久已忘采佩聊自喜世人服菰艾污秽寧在已悠悠千载心相望惟屈子

燕二山同知请雨中华随应四首

峩峩庐山云骨琢天上雪试之虞舜朝霄汉庆五色文江六月旱千里受其德千里未足多中
有天下泽堂堂中华峯秀出云霭外松花长道气灯叶幻天界崔嵬三仙人厌世不肯浼一笑
从公游为公作丰岁刑鷺竟何为擊蜴乃类戏古人决一狱自可回天意贤哉别驾公展治剧
劳瘁此雨当归谁作亭公自记豆肥悴为萁稻秀焦欲槁沟车呜呜田笠晒杲杲郡公吁请
雨一雨万物好邦民歌公赐此赐等大造

九日偶赋三首

古人爱时序行乐苦未滿心期
諒多废人世良非短
富贵首不回
贫贱笑亦罕
九日固自佳
凄凉滯孤館
我性不藏事
急吐如建瓴
世人务寬厚
叩意如坚城
岂不共谈笑
何以同其情
秋风一盃酒
千載无渊明
人生所涉閱
散漫如天风
去之即陈迹
好恶俱已空
谁能为石交
岁晚心亦同
道旁得遺金
一揖顏色充

贈丹士

大哉方寸春可以毓天地
偶其一念私手足且痿痺
故当先自治无复秦越异
达心世良医未达不肯置
如泉方出竇必遂到海
势神丸构元气鼎火力
千岁謾謾市井中
光尘入游戏岂非壺中公
欲出世间世嗟哉閭閻子
寒热剧攻殪壯儿呻摯
肘老病喘秋肺从君訪
十丹万一施匕剂

印冈道中

小溪隐曲折青山走崔嵬
向来富贵人埋没俱烟埃
坏屋数十家高墙半莓苔
少年所经覽白首心愈哀
土人既消歇郡人争主裁
势力有大小彼此迭往来
博哉宇宙间千古同一哈

送玘如安迎母关中

疾风厉八极之子行奉亲
昔别儿未言儿今华发新
天寒渭波白雨旭秦树春
路花照车幘桑雉飞雊
晨促歌鼓赵瑟酺酒烹猩
唇尽招平生友往候湖之津

八月十四夜陰

阶兰叶犹吐庭桂芳乍歇
夜凉集佳话幸有二三客
杯盘虽草草聊以先令节
矫首浮云间递隐雾微白
不惜今宵陰共看明夜月

和友人端居遣怀

嗜书固成痴爱马亦成癖
塞垣驰风朝山牖映雪夕
黄埃髀尽消细字发变碧
功名諒何补岁月良不适
始知苦心人不特贫贱迫

送吴提举归九江

承平盛同文北学及楚甸
多闻宿至理羸质出高辯
百年兵革余此士可几见
翩翩不我留梅雨飒归扇
山城青嶂高风帆疾鶫箭
寄语匡庐峯未老须一面

哭袁从义

别君未两月传讣始疑妄童来得真报失叹泪自放归城吊君儿内惨刮肝脏君庐乃未定欲哭无所访念昔客君家我弱君始壮山窗古衣冠谈论泻春涨三峯竞奇秀清絕行雁荡座客多英豪车笠填里巷廐马腾骄嘶楼姬咽清唱鼓钟宣朝晡昌运积馈酿夜诗涸鹄砚朝酒发鹅盎君尤嗜迂濶义手折词匠扣扉报警聯急吐如技痒约试古洪州五月舟已榜蹉跎我兴尽君志乃独亢霜台肃缙绅闾閻排桀輶落笔风霆生四座色惊怅文书上省曹吏黠岁月旷复以茂异闻州里许其当才高命苦奇选近身已丧知君岂有待独可念趣尚前年从谨兄千里殒茅瘴賫志不得年追忆有余怆君今复继亡如山剗危嶂死生固有数髮經乃相望福善理则那造物疑可谤知心几何人而况日泉壤君儿既奠居麻雪始垂帟属我病山疇乏劣积衰状束刍付儿辈含凄黯东向青春如昨日白发余辈行悠悠酒垆荒寂寂邻笛亮秋高风动木夜永月窥幌三叹平生魂凄其隔风浪

五言絕

正心斋【以下五咏为戴正传作】

人心应万事最戒与俱往所以古圣贤但教约其放

承志斋

古人请所与于事本为细苟能充此心何往非顺志

自家意

万物有生意欣欣同化钧始知人心仁元与天地春

南江之南

将父水之南故家在其北依依南北情一水安可隔

十竹

高人贵不羣种竹只种十我思伯夷风不妨更孤立

白木槿

洁比何郎白净如宝儿愁秋风竹篱迳日暮道人庵

又

童童绿萼靚炯炯瑶英削天寒門半掩賦命无乃薄

假寐

梅援幽鳥鳴山客睡初起空齋昼無人寒日在書几

有候

山鳥聲百變之子殊未回不如墻西日潄潄向人來

日夕

日夕同騁望行云徧天涯歸來獨坐久疎雨响南齋

題清溪僧所藏枯林四画

兰二首

纈花得雨茁劍叶當風披道人采藥去誰與同幽期昔从楚皋見今藝梵王家涼應面壁禪无復生心花

蒲萄二首

秋藤逸危架势重疑欲委高齋明月上顆顆如懸水枯叶展大蝶低枝屈長虬露寒压成酒无夢到涼州

山居即事四首

井口橘依塹井頭桃覆屋山家秋日晏閉門數修竹村墅薄生理門靜如招提柿叶大如扇满地無人題竹架已藏扇陶瓶時煮茶疎疎十日雨開盡黃葵花靜意便野性新涼足高寢山屋夜雨來倚枕談歲稔

春陰二絕

桃李生寒色連陰未着萼殷勤夜來雨供我聽溪聲短短麥苗远泠泠沟水清北山晴雨里一樹李花明

夜雨独坐

容膝九年壁陪人三斗埃小窗微冷夜掩卷雨频来

山行

墙角袂生波山风吹面酡桃花红欲活爱杀可如何

元日

庭烛悬春粟瓶梅有腊花儿童能拜跪还认客为家

除日

盘蒿留雪味槽酒入春姿斜日梅梢意年年只独知

耳鸣三日不止

本非作劳者无奈聒吾神节奏真天乐何从举似人

新春二首

旧雨来人断新年远梦多朝朝庭下树看尔欲婆娑淑气已着物晴云时弄阴陇梅坡麦外别自有伤心

暮晴

忽见今宵月那无久客情寺钟迟欲尽村火远犹明

春雨晓坐

衆木蔽春塘花落如堕鸟山庄苔满阶久雨来人少

桂隐诗集卷一

桂隐诗集卷二

<集部,别集类,金至元,桂隐文集—桂隐诗集>

钦定四库全书

桂隐诗集卷二 元 刘诜 撰古体【七言】

题曹裕之所藏曾瑞卿神龙卧沙图

老龙胸有天下雨养道潜身卧洲渚脊鳞十丈黄金横髻沙万斛玄珠举意酣太古陰风寒气接洞庭秋浪怒黑如海宫仙人烛灭撒华宴水晶虾须之帘横堕云阶寒不卷明如虬髯帝子战胜朝驰归朝瞰下照曳地鏖甲三百片山焦石沸赤炜万里焚帝下墨勅搜抉江海尔不闻吾闻葛陂之竹投水奔雷泽之梭夜逐风雨腾上天彼非龙身托形似一日乘化窃气高飞蹇嗟尔胡为失其所胸有霖雨禁不吐坐令时人寸墨写尔归囊楮大呼老龙賤天公前驱飞廉後靈霭一为人間作年丰

题彭宜远所藏罗稚川山水楼阁图

平沙苍苍鸟未归烟村四合高复低渔翁两两青蓑衣卖鱼直上长杨堤千峰万峰何崔嵬朽枝瞰水忽倒垂倦驴向桥欲渡疑後有羸仆势若迫却疑诗人独寻诗舍鞍先济何所之飞楼缥缈山之西中有美人长须眉凭阑相对知为谁岂非海上乔与期宫中琪树秋离离彷彿疑有香风吹吾闻蓬莱有此地流水落花隔人世便当剩买青芒鞋小向是间住千岁

芍药歌和罗起初

我昔骑鹤游扬州笑玩奇花大如斗高楼耸出霞锦窠西施夜醉吴宫酒【高楼西施皆言花也】珊瑚万片割晓酥十日名香犹在手仙家女队千红妆碧油帘幙围四廊风暄日醉春似梦梦中嫁与姚家黄小园今日忽一见瘦减不如当日面夜深明月照阑干弱影伶俜似飞燕名花流落亦可怜志士慷慨悲流年欲呼四相不可共独醉鷺黄压春瓮

赠赵中山【中山本旧公子于道有得早游京师为诸名公所敬】

先生昔佩青珊瑚锦袍白马玉雪肤夜游钧天听广乐帝旁分食琼宫酥天风千丈吹绿发紫驾七十黄流苏手斟北斗酌玉女麻姑晓报沧溟枯东方乌啼白日薄姓名尽变骑鲸鱼华池内养九芝露金房独照千年珠肩摩净名孔雀扇足蹶子晋芙蓉车吹笙看月蓊门市从者皆服貂檐褕羣真虚左愿闻道亲写文字为其徒少年经世二十策海水洗尽无留余始知古来忠孝士变幻不与常人俱君不见韩亡流落子房子千秋万岁传编书

东园花

东园花西园柳东园昨夜春风来西园腊雪仍折朽东西虽相邻一妍顾一丑东园郎君十六余千金恣买新丰酒吴姬娇唱燕娥舞团作花球大如斗西园月高寒萧萧枯枝过时不作条志士叩角夜寂寥卧闻郎君吹玉箫猎骑晓出咸阳桥相遇不揖色尚骄可怜贡公弃梁栋弹冠但望王郎用可怜马生晚益穷日夜更望苏郎官禄重岂知人生各自好谁肯轻裘相与共西园柳东园花莫浪喜莫自嗟君不见道旁草二月三月蒸红霞

天高高

天高高去地几万里中隔以魍魉大风之狂豪六月七月旱魃恣虐饕赤日如火销民膏黍稻千井为黄蒿池鱼涸死江沸熬我苦热毒无处逃前年饥死如牛毛空江穷山鬼昼号嗟哉此事可复遭仰天三叹天高高

地隆隆

地隆隆下有海水包络千万重中有升天降雨之卧龙不能呼吸此水为年丰山篁枯立山树红爨妇晓汲十里中锄耰无用挂壁东石光落杖腾长虹郡官擊鼓鞭靈霭官街十丈尘涨空嗟哉地道成天功俯地顿足地隆隆

和邵有初见壽

姜牙卖浆天气肃子幼种豆年不熟秋风拄杖雪满头自分桑麻安杜曲东家公子蓬莱仙锦袍骑凤高联翩谈锋大阿不可挫笔力三峡来无边我如痾瘵行蹢躅君步飞凌嵩华颠铜驼陌上一携手酌我瑶池王母酒相期更待三千年还以蟠桃为君壽

东华山天一道院歌

太极未判陰阳蒙元精蒸气相流通划然天高与地下但见积水渺漭行其中我穷其源艮为宫天地不死此其宗神人得之奋以雄超遥长铗驰大空九州八极命在躬霓旌绛节纷来从福地萧爽弭彊风东华之东天高峯上与元气为冲融流光扬彩奔靈霭道人羽衣双青瞳壽宫玄殿相巍重千石之簾万石钟朝撞暮击无秋冬圣人在上年谷丰道人吹笙骑鹤追乔松

题盘谷图

【庐陵郡幕宾盘所李君字长翁家藏盘谷图非必盘谷也志隐耳为赋长句】

千崖苍苍倒石悬老桧下瞰空濶森白根上有萦络斜下之瀑泉下有缥缈半出之窻轩忽然渔舟散浦溱疑是秦人桃花之仙源丛林尽处长堤绕柳外沙边行客少汀烟漠漠不成雨汀

树踈踈似飞鸟依稀水檻知谁家疑是唐人洗药之温口问君此地何处寻可买不惜捐千金
君言此亦盘谷境我已先从画中隐嗟君才气何堂堂胸藏雷雨未八荒平明走马入黄阁日
晏文书写燕行戢戢奎章九天上白日旌旗下仙仗秋风插翮高颀颀虽有此境何由往丈夫
英气多难攀九环宝怀青山辋川墅龙门滩会买青鞋待君还

夜宿山家

苍山四合如铁色满地藤花白如雪夹涧居人十数家纬车共响更深月艾烟驱蚊窻壁低棘
根通犬门径窄破衣袒跣无忤嫌安识人间絺与葛

又

山中旧游犹可记竹里青帘招我醉我伤身世感慨多野老一杯惟径睡夜深凉月照髮影数
寸星星不成髻东方欲赤乌乱啼还驾笋舆谢幽致

送王士弘学政满代

君如代北秋天之豪鷹疾飈呼霜整翮拔地而凭陵下击乎圻垠万里之絶埜上摩乎崑仑千
仞不可到之穹青君如洞庭龙骧之长舟椎牛击鼓挂帆直指东海而遨游雪波如山鲸吞鼉
喷霆雨急舟人饮酒笑傲百怪如安流炎埃积罽未高举岁旱水落留洲渚坐令衆禽野兔得
自乐短棹高歌疾飞舞丈夫借迳学校间穷年讲道凋朱顔诗章直欲凌鲍谢文笔正要窥扬
班只今官满谒青选走马一日看尽燕然山燕然山卢沟月行人青丝映华发人生有命无穷
達君不见南阳文学黑头磊落云台功关西教授三鱣讲堂兆三公

儿时喜见雪

儿时喜见雪痴待天云黄昼观卷箔憾暝色夜闻揽裘思曙光佳人踏靴映玉靱猎士鞚马骖
白凰千金高楼换美酒楼外三尺酒百觴宝香绣帐春色暖俯视万里成大荒便从淮城取元
济直至北海归苏郎迺来悔狂年已过闭门读书学坚卧蒲团坐几听萧瑟畏寒自补油窻破
欲论往事谁复知但见羣儿似昔时

和东坡四时词

燕子轻寒生院落佳人自卷猩红幕楼头风细堕杨花帘下日长添绣萼缣纹酒晕透琼肌双
陆初赢笑问谁闲綰同心当户立不知花影满春衣

幕波微约回廊永酒阑手枕珊瑚冷槐影横阶午簟凉榴花满地风帘静梅酸未试意先颦倦
拂琵琶拨未匀纨扇半闲冰盃冻翠禽两两下窺人

瓶浸双头莲颗绿昼阑闲却青奴竹微凉半下水晶帘坐看疎萤度高屋夜静楼风时动扃隔墙一叶落虚庭血色鸳罗裁未就月明处处起砧声

烛暗睡轻闻画角玉盆脂水红冰薄深户无风绣幄垂小瓶一片梅花落轳轳隔屋转伊鸦云母香猊晕宿霞报道卷帘寒雾重午妆才试翠钿花

明妃曲

汉宫美人人不识初出宫门天下惜汉宫歌舞人不传琵琶马上行人怜君王含情重凄惻只在殿前留不得人生岂是无知音知音已晚徒伤心天寒衰草沙似雪举头惟见汉宫月十年汉使去无踪梦中长在明光宫国家和亲四海乐不怨君王悲命薄君不见秋风茂陵英雄才万里江都嫁昆莫

汉宫佳丽三千人妾身万里当和亲当时未必恃颜色正坐命薄无黄金黄河朝渡风萧瑟边马羣嘶笳鼓咽路逢汉使不道愁复恐君王尚凄絶妾身夕死何足怜独以君命难为捐单于调弦亲起舞却独上马看青天年年作书寄征雁腸断雁飞难到汉君恩许赎比贱姬不效少卿招不归

前采薇歌

【庚午大饥民多采蕨而食因借伯夷采薇饿死意作采薇歌盖薇亦蕨属而差大山间人食之谓之迷蕨见朱氏诗注】

我不是西山民采薇不粟哀亡殷又不是周戍卒采薇御敌踏霏雪年荒良田三尺尘甑悬铍冷儿号嗔长鑱短锥采薇去东家西家相为羣霜严磴滑山路峭月落鼯啼山鬼啸晓翻石罅得丛根共憾土枯根亦瘦寸根入手如寸金?烹作饼碎劳薪盐空菽尽味惨恶空忆饭甑曾炊银人言食薇无谷气五日十日终亦毙今宵妻孥暂充腹谁料後來死何地我死愿随行雨仙徧倾天瓢作丰年薇根满山人不食天下斗米皆三钱

後采薇歌

春采薇婴儿拳卖与豪门破肥鲜年年得米不费钱冬采薇潜虬根白石荦确斲掘难俯身藁莽如兽蹲山寒雪高衣裂破塹藤束缚筠篮荷瘦妻羸子暮候门地碓夜?松节火沸浆浮浮翻小杓湿雾腾腾升土铍?烹成饵甘如饴一饱聊偿终日饿冬采薇犹可为春采薇今年根尽春苗稀豪门有米无可卖陇麦短短难接饥采薇采薇我闻夷齐尝食之饿死首阳天下悲呜呼吁天高荡荡万物微我死安得苍天知

释枯林铁如意歌

君不是金谷园中石季伦明珠买妾长安春锦丝围障轻一世珊瑚高株碎如尘又不是黄鹤楼边王处仲万骑上流纵驰鞚狂酺千石发浩歌唾壶敲碎天为动君是天台丞相之嫡孙胸中八九吞崑仑少年宝玦落荆棘 拜禅林依世尊手持鍊如意笑傲典午二豪之富贵良工精发生碧花古制蟬螭隐元气木盃不用轻大江蛟鲸辟易冯夷僵蓊门骏马疾秋鹞飞箭穿髀心如忘谈经说史似支遁四座公卿逊高论古来豪杰多窜托槁面布衫尘土混画兰千纸生秋风赋诗万卷老愈工承平智策无所用落魄行徧江湖中嗟哉尔之如意兮不愿为大梁游侠之袖椎寧落为许行耕野之锄犁宝光发匣间里怪珍重深藏莫轻卖君不见干将莫邪困丰城化为两龙飞去延平津利器不试空有神【枯林天台叶西涧丞相之後有才气能诗以画兰名世颇勇侠或不舟渡水盖隐于浮屠者尝游京师走马海子上中飞矢流血满靴不顾殆欧公所称秘演之俦与】

庚午岁七月自城中归吉文故乡南岭谷平庐陵印山凡故旧多招饮者饮後輒援笔赋诗五七言律外得歌行九篇聊书以遣怀云尔

望城冈【杨诚斋入城必从螺冈徘徊望城冈上故有醉杀螺冈门外私酒之句】

杨侯醉饮私酒门今日秋风卷行迹不知更後数十载何人知我曾登陟忆昔老人携我行红顔照路双髻青蹉跎忽亦如此老还望曾城坐衰草衰草秋萧萧官亭路遥遥後有芙蓉亘古之迢嶢前渡三江閱人之石桥百代百代高鸟飘一村一村自渔樵

前醉歌

天青青造就万古事不平月皓皓照尽世间人丑好人言天月俱无心平颇丑好皆由人我言人生无智力明月青天愁所集簞瓢贫士年少死相君蒸乳老无齿贩屠市儿万户侯着经儒生白满头李君晚役将军府文昌碑起韩碑仆启期九十无一儿迂哲多孙披籍知雄狐妓围钗列屋朝雉悲歌夕牧犊楚和抱璞哭山中燕人宝石缙十重百年老树同一干半作牺樽半沟断古来憾事何其多青天明月奈尔何我有一斗酒浇君肝肺之嗟哉青天明月奈尔何

後醉歌

天如轮我行与之周八垠月如璧我坐对之周一室买酒酌月月满卮买酒浇天天饮之长风吹天碧万里纖云飞尽月如水黄金满坞董将军长安夜炬高焚云胡椒八百元相国翠珥宝钗落荆棘征南奇勲泣杜邮属餽愤入洪涛秋禹山血溅麒麟阁机云梦遶华亭鹤破心词臣溺满衣何如读书闭山扉断头博士窘乘障何如得句支藜杖山中老人无机权青天明月俱欣然愁亦无可酌有酒只劝月与天青天明月俱欣然

贵贱吟【庚午大饥天下死者相望秋大熟谷反大贱】

春大饥斗粟不易娉婷姬秋大熟三钱直买一斗粟人间贵贱反掌异贱未可轻贵难恃君不

见土龙百拜还为尘病驹秣豆乘锦裯人间贵贱元无真

冷 吟【庚午六月雨寒连旬闰七月如初冬】

六月雨重裘不离身七月寒北风吹倒人人言三伏当大热天公变化谁料得君不见陰泉升
釜蒸成云兽炉五更炉如冰人间冷热君勿惊

饮南山故居

旛竿东峙彭家寨【五代时彭玕曾立寨於此】鹿角南绕刘家村彭家旗槩落草莽【玕败】
刘家衣冠貽子孙百年风土又一变丛林化壑池成堑山亭杨柳駟马坊官道豫樟北商店
喆人令族困屠沽疇夫互郎高门间故家兄弟日益少惟有老夫长眉须少狂几何忽衰懒欢
乐无多饱忧患天寒木落砧乍急日暮门空客初散余年定有几还乡倚杖秋风看飞雁

饮谷平李氏

粟黄黍短沙连浦白发涉江寻故路伍家渡头篁荻秋柳侯庙前烟火暮昔时冠盖风雨凋舅
家乔木凉萧萧微吟西州泪自堕欲访黄垆谁可招社墟左转增闻室两街坐贾如郢邑杀牛
压酿百货交道逢少年不相揖尚余八十病姻兄罗羞饌客空罍瓶夜深山月窥前庭童稚熟
睡二老醒谈旧未了荒鸡鸣

饮印山田舍【即爌下】

少年曾客金竹峯壮岁移住城之中城中金竹几往来赢得白发成衰翁居人兴亡秋叶换巧
黠四方拙间閤天公颠倒作奇观举世区区事筹算我友秀川罗文学【以通号通斋】白头
胸着天禄阁我友龙湖李隐君【正则号方心二公皆居印山之近】秋风落笔吹行云干将
白虹发原草蚩尤夜堕玄武老谈王着经卿与轲感时屈宋能高歌古今坎 称数子数子之
外应更多山中秋高月如斗醉呼老农同举酒同举酒满瓦船便令余生满百年饮酒之日万
五千

中秋阻雨留山中陈氏庄邀饮

去年中秋客洪州桂花庄头山寺幽少年齷齪事记问有酒有月无倡酌我独不眠多往憾坐
数古人俱不见徐生亭柳秃如帚孙氏江流净横练长河北斗压高城角声吹断塞雁鸣此时
少年亦酣睡满城无人看月明今年中秋住山坞山木早寒作风雨烹羊酺酒亦可乐但惜无
月无佳句忆昔去非当雨夜憾乏知微上天柱便令天柱可一游老翁畏寒何可留

题刘平妻杀虎图

君不见杞梁妻夫死但能哀声悲又不见泰山妇虎食其夫哭当路人生伉俪重百年闺房无力救所天
余肝腸裂千寸高彻遥汉卑重泉何如滨州刘平妻独勇杀虎夺夫曳其踵大儿三岁能取刀
小儿坐席痴不恐沙空月落山谷深妾命何轻夫命重当时视虎如兔狐眼中无虎惟有夫
一朝义声震百郡裴旻李广皆庸奴古来君臣亦如此患难正要忠良扶何为当熊待冯媛
何为狄来使鹤战射猿老将世岂多搏斃车右今不见秋风展图毛发起始信人间有伦纪
呜呼河东女儿扶眼去其夫若见此图当潏

陈推官伯玉母鍾氏八十一岁受封恭人

相君 花饌万羊不如卮酒娱高堂黄金三组车载道不如荣亲受封诰陈公美政多平反有母八袞乘锦轩
公余谈政母色解春风满颊晨加餐天门晓曙光万丈圣人锡类恩波荡凤花鸾纸动高屋鹤发翟褱照华障
官僚车马填巷衢耆老进壽争携壶庭中轰轰椎大鼓诸公能歌公自舞共言遐算古所稀共叹激劝逢清时
致君泽民要两尽此母福泽无穷期斑衣儿啼作欢喜借问何如老莱子奉亲从此位近臣借问何如万石君

天马歌赠炎陵陈所安

【所安名泰甲寅以天马赋领荐下第颇不遇故以此叹之】

房精夜堕滂波中骅骝奋出如飞龙昂头星官逐枉矢振鬣云阙追天风汉家将军三十六道出塞争奇功
当时一跃万马尽蹴踏少海霓旌红韩哀谢輿伯乐去蹶块误落奚官庸十年皁枥食不饱虽有骏步难争雄
春随锦鞞北陵北秋卧衰草东阡东时从驽骀饮沙涧未免泥滓沾风鬣夜寒苜蓿山谷迴长嘶落月天地空
时平文轨明荡荡万里穷山无虎帐交河不用踏层冰裹足山城学驯象吾闻天子之廐十二闲骥驂并收无弃放
金根云?出都门唤取雍容肃仙仗

游中华山和胡履平

我游神山如登仙少壮欲往今暮年放身径上最高顶下视八极何茫然松风怒起作奔浪树蝉絶叫疑哀猿
平田分列万仞下一点彷彿城中烟雷藏洞穴旱行雨灯隐草石宵悬天三仙从来志当代辛苦学仙亦千载
惟应济世念未空古殿高居俨金彩白云不扫花满地玄鹤归来月生海世人慕仙未忘累春谒秋游貌先改
西风铁笛三千秋何处摩挲更相待

题文山衡阳跃马图和须溪韵

将军紫绶驰燕然丞相白发祈山前重瞳悲歌泣虞美伏波眼穿鸢堕水英雄相望千万年西
风荒草迷五原延秋王孙折金鞭女墙明月铜驼门衡山春浓风日好紫纆电转人未老岂知蹶块追海横
海天如雪狂澜倒玉楼十二春衣妍流云却月争取怜落花金谷独一死苍旻不语丹心传刘家的卢空识意
金粟龙媒俱久逝少年相对那得知掩图醉倚南风睡

赠刘士贵入京【能诗琴】

君不见南风五弦发天上壽域化城春荡荡又不见镐京雅南开太平宫中笙簧歌鹿鸣庆云重见二千载虞周音和落昭代明堂旭日照袞袍石渠仙仗雉扇高文王宣父迭奏相和应后夔师旷环佩相周遭沉香昼宴呼李白礼乐昭回发颜色大明早朝列臣甫元气礪硠天地裂君今读书老空山清才雅调谁与班举头但觉州里隘振衣欲往参其间往者蔡家绿绮桐拔自煨烬传商宫往者汲县白华诗一旦高列秘馆中丈夫遇合亦如此请君一跨扶摇风

和吁僧白牛师金山见龙【名如莹号牧所】

白牛牧所不嫌远世界大千随处见前身是龙工画龙亲向云涛玩奇变槎牙满腹生甲髯濡墨未扫神先徧华堂薄射黄金鳞高幃淋漓水晶殿长身真许仙叟骑怒甲已从神禹见旁观辟易不敢撓硯有风云笔生电江南严冬喧雷车惊雹满城飞石转颇疑天官下取图未识人间余几片呜呼僧繇去世谁敢许相望高风千万古

和杨用宏【诚斋族子】

南溪古木临官衢公墩我屋连烟芜百年冠盖散如雨黄金夜飞子孙去春风剪烛城西窗得君如璧不可双我才老愧八义手君貌初酣千日酒东家当垆猩血衣轻寒水郭杨花飞相逢且饮君莫违

公无渡河

公渡河惊风无舟水扬波公欲渡兮将奈何公提壶黄流万里人为鱼一壶不济将焉如彭咸申屠死不朽残生取名亦何有南山射鹿春草肥陇西刈稻为美酒公无渡兮为公壽公欲渡兮可奈何河流不及此恨多

丁都护

丁都护郎骑白马今何处丁都护郎骨今归还是否妾心痛似杞梁妻梦杀夫讐梦无路采石江云阳渡斜阳江上山无数後人不识都护谁时唱此歌渡江去

秧马歌和萧养吾

天门龙驹来貳师朝燕暮越千里姿折旋蚁封乃不可彼固信美非吾宜江南二月秧事急水田千亩肩雁随壁间木马忽湔沸歛若起废逢明时背轻腹滑骑不蹶昂昂首尻高过犁方畦曲亩翠分路意会规矩无差池平生刳豆了不愿独以筋力充人饥骊黄不形牝牡混蹠啮俱泯儿童嬉东家少年轻稼穡千金市骏穷所之看花九州夸疾走世路险远难为期不如田家水土熟与汝老大长相知借汝襁褓覆尘坌锦鞢青络非汝思

木牛歌和萧养吾

吾闻景升养牛千斤肥椎之不了士卒饥王生号牛八百里徒营蹄角将何为此犹虚名乏寔用负任毫末了不支何如武侯象其似独化枯槁为神奇平生忧人不自食饷运常饱千里师刳心俯首竭筋骨气象深稳人谁疑中多抱负外迟钝论功犹胜狂犊驰虽无奋劳効耕种尚以微力裨兴衰自期中道可不废虽有捷径寧能趋惜哉清渭不可渡不得束载四海随我尝读书论成败魏不足控为吴持江陵蹶羽秭归岷郾南衰发秋风知前谋既轻後过重天意蹉跌长如兹浩歌木牛感豪杰空有遗恨供人诗

送庐陵丞孙美任归寓常州

庐陵丞公北文献鸣琴坐堂如子贱家庆相传节孝门政声早入循良传剽繁政似矢发弦破奸不异冰消睨山林百里卧犬鼯桑柘四郊归社燕西偏独僻吏尘空往往苍苔生匣砚八表清风竹满庭三年春雨花成县路人闻名争识面马上疎髯青未变只今考满书最功遮道人情如乍见春留嘉树高憇车秋入归帆轻似雁丈夫功名困下邑风鹏未试同榆鷄北门门边杨柳店迎新送故车蹄徧南来北去共官途谁识胸中五色线燕台黄金百尺高见说诸公交论荐江南山水虽可娱未许种茶老阳羨

题刘子明南园

丹阳何人多竹石客来咏歌人不识平泉百姓游者闲一笑临风嗤有力世间万物如天花寓目犹须藏以室城西老人好事者园亭自为诸贤立酒觞春浦集少长诗帙秋风成甲乙美花皤皤照锦段新衣涓涓明练疋山虚月落琴调动竹深昼静书声出诸郎秀颀压余子君本种名今得实江南夏雨成丰年溪流映日清且涟便拟出城寻胜境为君援笔赋千篇

送张君玉谒天师

张君家住青原峯呵役鬼物驱靈籙嘘气阖辟天门风飞符招雨走怪虹又呼大化归笔锋黑水挥斥皆成龙蜿蜒岁蛰尺璧中霹雳夜怒三湘东晨兴启笥湿雾蒙潜与西里为年丰天宗仙人朝帝宫赤骝布旆青瑶空玉女执乐千芙蓉祥飈飒佩鸣牙冲君骑此龙为後从百拜香案笈民衷使世无虎豹魑魅与射工五风十雨圣贤懿哲常相逢仙人危坐拱手不言功

题白府判仲谦所藏钱舜举岩壑图

我如谢公好名山开卷着我千岩万壑间乱烟遥峯出缥缈怪石翠树相回环忽然山破飞瀑落皎如仙人玉带垂云端喧豗欲撼溪谷动使我毛发森清寒不知其间有何径但见荷担两两相追攀浮屠崔嵬苍壁顶佛屋隐映长松关下通窈窕知何处想见小溪穿石去沙边汲叟犬相随桥上行人驴半渡林空路断孤舟横或坐舟尾或疾撑左岩右滩地苦狭长篙落石如有声我疑桃源从此逝恍若风景非人世欲呼钱郎问其途钱郎已去谁能呼

送刘玉成之杭

钱塘之景天下无我昔未游知画图吴山阑槛神仙壶沙河灯火锦绣衢四城翠翹上灵隱万
家画舫游西湖孤峯梅花白雪庐大堤杨柳黄金株百年风物未尽改游子那得闻其初钱王
觚棱墮秋芜赵家宫殿佛鼓喧朝晡西风吹潮落越峽夜角呼月沉姑苏刘郎妙趣世希有五
色灿烂披珊瑚请君一往覽古昔酌以千斛之酒鷺黄酥写以文考赋鲁城之笔千万字吹以
东坡吊孟德之箫声呜呜归来锦囊?蹇驴与君共簸明月珠

送邵有初之扬州

君不见凌风台下梅如雪何郎踏徧官楼月淮王宅边芍药开杜郎骑凤云间来名区政要才
士赋登高掷笔千霆怒风流调笑落人间坐使江山重千古我友邵子工诗歌三生梦见杜与
何琼花夜醉后土观锦帆晓吊杨家河男儿辞亲事远役勲业飞腾须壮日秋风何处却相思
二十四桥吹玉笛

谢王宜远饷黄雀

野田秋陰稻穗垂山禽来啄日以肥斑斑背点楚鳩色煌煌腹借仓庚衣稍饥作阵带雨下既
饱联翅穿云飞土人携网巧覘伺或布一网无脱遗高明购买贵初出但取悦口寧论贵饌羹
鲜净凝琥珀入酒潏灩明琉璃诗人尤喜体质滑锡以美号柔绵披嗟哉羣百性命易一旦鼎
鑊鱼贯随物惟有关足取害复以贪得忘罟罹头颅万里奉包篚幸免远贡遭明时吾徒纵食
诚有愧扞腹何以酌相知

草虫

晴风丽日天地熙昆虫草木同生机墅花煌煌缀组绣山叶翦翦明琉璃黄蜂天牛各有役白
蝶彩蝶相随飞野蚕卧枝玉一笏新蛭脱蛻冠双綏角蜗吐腥螳臂怒蜻蜓翼翦吴绡素蛛丝
撒网专攫鬻缚蝇似缚白门布画工胸有太极心秋毫点染追天真胡为所画仅九物终以杀
机疑非仁呜呼安得人心皆祥麟阜螽草虫荡荡共适周原春

题罗稚川小景

远洲连冈近洲平高树稀叶低树青长溪浸日流无声中有数叶渔舟横谁家飞轩接水亭沙
边客至扶杖迎江村颇类浣花里人品兼似陶渊明

岩雨行【为安成汝源王氏丙子祷雨仙岩作】

江南六月旱弥盛黍稻冥冥赭如病良田迸火大龟裂野埃驰空羣马并汝山居士哀民穷击
鼓枫林事祈禳树日荒荒旗屡扬山风萧萧角相应阿香夜半起鞭龙夺雨空中争负胜黄流

狂奔奔沟壑涨乳沉酣浸丘甸槁苗发委活欲回秀颍云抽洗初净乡人饮酒交推功瞳老无饥羣播咏岩中至人何年来大旱寔司雷雨柄年深情与居民孚灾患扶持通喘警吾闻太平五日十日一风雨山川不敢私号令呜呼玉京九关荡荡不可名且愿羣仙活民命

彭清源用前韵相属奉和为谢

君诗气?三军盛大将貔貅如去病平沙万里穹庐高骏骑疾驱谁敢并我诗悴若荒陇苗雨断泉枯望祈崇又如凉蛩抱衰草凄咽秋风夜相应白头不遇俱可怜土偶桃人定谁胜君不见杜少陵流落瀼西耕稻甸天寒短褐无春姿大雪漫山没鑱柄君不见陶渊明晚托远公莲社净孤松傲寄难覓醉五柳荒凉空入咏古来文士多苦穷虚名不值一欸警江南微雨澹火云少昊行秋初布令相逢且勿论新诗不如斗酒歌呼乐天命

野人家

野人家瓦少茅半遮墙外横青山墙头出葵花遶屋桐树绕屋麻地碓舂粟如黄芽小奴高髻发爬????平生有额不点鸦月色夜夜照纺车木绵纺尽白雪纱为言主家颇豪奢绣罗作裙歌娇娃州符昨夜急如火马蹄踏月趋官衙

残僧寺

残僧寺白发僧几个野潦浸殿隅青苔生佛座山门窥月竟夜开画壁吹风连岁破粥香久废击木鱼饭少惟应烧土铤经箱蝶泊藤花垂石塔乌啼松子堕为言空门亦里役邻寺终年扰官课寺中零落幸无田若使有田亦奇祸

赠刘尊德善琴工画

刘郎善琴如雍门万感毕赴指下弦和如威凤鸣若木闾阖荡荡开晴天怨如玄猿啸遥夜酸风孤马行穷边刘郎善画如郑?落笔飞雨大化悬豪鹰秋翻代北月饥雁暮下江南烟悲崖哀壑远萧瑟断芦短荻寒芊绵洞庭广楚神忽动秋风六合心高骞九成韶钧梦舜日万骑羽猎思秦川惜哉流落世未识酒酣自赏诗千篇呜呼明时材菽袞袞班集贤安得有力贡之至尊前

放鮎鱼歌戏和刘文远

庄生观鱼超万累云海扶摇特其戏任公钓鱼虽似痴濶河苍梧饱膏膩人间此物亦何为腹满腥涎肉连尾贷生不可成风雷烹食未足恣刀几蝟蛄小器如覆蜴不识江湖甘一滴古来魴鱖出入难独恃形微不藏迹黄埃八月埋轮端南村北村嗟雨乾放渠清冷免蝼蚁慎勿再近珊瑚竿

题铁仲坚宣差所藏罗稚川烟村图

荒村漠漠烟连山谁家野店两树间青帘稍出树梢外秋风败叶寒班班路通白石流水乱长桥缥缈依山涧渔姑得酒归意速携稚过桥如落鴈寒藤老木又一川罾船方罨罾斜悬有鱼有酒复有客风致何必能诗篇乱鸦几点天疑暮欲泊未泊环高树小舟七八散前滩或倚长篙收钓具君不见鸱夷一舸游五湖子陵羊裘钓桐庐安知若人非其徒

山月亭讌饮和梁景行诸公

【庐陵城西有宣溪王氏山月亭云端台杨诚斋尝为作记今属袁本厚加改饰予亦尝记之丙子八月招饮亭上梁景行蒨安国刘高仲诸公赋诗为和】

城中楼台如海市城外江上总清意蹉跎千载不见称主人每与名流避云端山月高一时风流正在诚翁记千峰相让如主宾万景竞招如我尔令威秋风呼城闉海尘夜扬迷此地衣冠沦失爽鸠氏耆老不记开元事乌衣燕去无客来金谷花飞似春寐世间万事难可虞回首岁月如隙驹故人有子气食虎文彩早胜徐卿雏台边草树回秋枯台下庭院开画图香夷斲与文杏并紫鸳飞与翔螭俱君不见杨家移石菱溪隅风致更胜刘家无又不见天津故宅安家郎邵翁小车时翱翔君今台亭得胜地伟事欲与二氏方尊前杰士争颉颃诸老须发照日光【是时斜日满座】作诗要继南溪杨文章共垂百代长

庐陵十景同萧克有孚有诸公作

青原春嶂

渡江十里山水清千峰万仞争娉婷野花织成石家嶂嘉叶合作王母屏钓台有泉出山背忽作玉带相纡萦东风游人不知趣日日车马来倾城

神冈晚桥

两江秋波燕尾岐千嶂春木凤翅齐道人结船布江面行者如蚁东复西市头烟起樵子急林杪磬发山僧归庵中老仙危坐稳付与万古看斜晖

螺峯残雪

城东青山女儿眉天寒变作沧浪髭晴风忽放寸碧出乱白犹在苍松枝瞰光薄射分衆色断纈碎锦春离离道人看山踏泥去日暮拾得金螺归

鹭渚断烟

金牛寺前江水黄大洲横陈江中央人家夕炊起篁竹一段两段青迷茫去帆点点春雨暗孤鸟漠漠秋空长高楼书罢遥指顾仿佛官赋来连檣

石砦飞瀑

年年麦冈野花红家家谒庙江水东危岑巨石擘元气老树白润浮晴虹玉龙飞下数十尺彷彿疑是香炉峯穷源一笑俯八极万壑千嶂号松风

西峯卧松

定光道場凤墅东古树蟠地疑髯龙参天元与风雨会老大偃蹇山之中千年琥珀结精气半夜笙鹤朝仙宫太平明堂方论建扶豎大用须良工

古城秋酿

大江蓼花红满堤堤上人家多竹篱雨厨争炊白雪甌霜瓮满泻黄酥卮城中少年好游冶渡江买醉携蛾眉江东估客贪祭赛第一先酌萧郎祠【地有萧衍祠】

小洲暮渔

螺湖石屋江水平大船小船满东津举罾出鱼辄数十落日光射金鳞鳞枫桥烟起新酒熟共穿小鱼饮西隣大鱼虽肥且勿食明朝卖与城中人

平园衰柳【周益公旧居】

城中书楼天下奇碧玉流水长虹堤堤边柔条一千尺鷺黄袅袅春风垂居民异代起华屋此物已槁不忍移岂无他树好顔色不忘丞相手种时

凤墅斜阳【曾通判废圃】

城西仙园不可当花阑柳榭春风香酒楼彷彿竹西市娼女结束杭州妆百年风流去如雨一笛落日寒荒荒乘除自当返大朴君看灯火明书堂

元夕诸子孙小饮

梅外初升宝月圆柴门春入菜丝盘鼓钟不断山城濶灯火无多野郭寒童子折花偏爱节老人持酒强为欢牙旗铁马羣英事漫赋新诗寄客看

社日偶成

西郭先生嗜酒盃敝裘潦倒积缁埃疎疎社雨梨花老漠漠春陰燕子来灌圃天随余杞菊闭门仲蔚长蒿莱衰年颇觉头风进乌?何因倩客裁

赋杜氏秋晚红梅用友人韵

君不见绿珠吹笛意态闲画楼百尺垂阑干红妆千年不复识今日忽见春风颜又不见景阳丽华唱璧月酡腮半露钿花繁酒酣妙舞未肯散一笑婉婉宫井寒余妍尚可眩一世缘空化尽难为完坐令前身白玉质施朱作艳娇能言颇疑守宫点臂痕不灭又疑如意伤頰血未乾凄风淡月疎竹外幽香着客能返魂同根霜雪魁百卉未有早秀争秋兰煌煌庭院生晓色一树变作扶桑暎我欲呼坡仙叩门共醉诗清温我欲呼东野长安一日走马看向来酒禁今已释莫遣顷刻无罍樽

碧壶歌赠陈生可珍善画

碧壶之山何处是直隔瀛海三万里之惊淙琪花瑶草春暎暖云阶月地秋 珑九节之蒲可作杖千岁之鹿时相逢但见安期子晋吹笙来往骖苍龙亦有子房跨鹤从赤松碧壶子君是仙家第几宗戏翻墨汁写山水一点半点飘落成鱼虫请君试作碧壶之高峯使我指点崑仑方丈东尽以世间万事一问壶中公

玉壶歌又赠陈生可玉亦善画

君不是费长房跳入壶中窥三光手揽八极一粟藏日食天帝玉女之玄浆又不是窦侍御袖贮清冰三百柱挂之万仞迎风之寒露秋风吹上蓬莱颠地下空惊洒琼雨 珑珑琢自太古前混混浩浩随天圆中有素液之万斛元气之千年化为天酒浩荡直与黄河悬左醉虞妃右偃佺戏作山林万化奔羽毛花萼雪落纷清妍玉壶子壶中相去碧壶几万里可怜君家好兄弟妙笔俱夺天机秘安得画我壶之中日夕吹箫饮酒追逐两壶公

赠长沙王自得用之

君不是杜少陵乱离西游复北征又不是孟东野长安走徧看花马一簷两牖称诗人绵裘三斗长涂尘胸藏琮璧世不识笔挟风雨天为噀高门峩峩千石簾熊白 化饌人乳绣衣满座扶风豪金钗列屋邯鄲舞酒阑车马散烛椽君来朗诵诗千篇畸穷不满薄俗笑意气自与常人分古来英杰每如此事成千载称其贤君不见太平贞观二十策当时同是新丰酒家客

赋欧园海棠和罗起初

蜀州海棠锦成畦昌州海棠芳气菲名花自古憾不见东风吹在西家西美人?酒红珠落半笑新晴半含萼玉肤柔薄绦袖寒妆泪轻盈脂脸忤太真娇睡金屋春绿珠夜宴宫蜡新一时羣花尽妾媵娉娉嫋嫋真仙人雨余繁枝深緑净好及佳时入觴咏花容相对易新故人事无情

有衰盛我昔曾同花下欢宝钗插映鸦髮盘只今便能日日为花醉欲挽朱顏应已难

感旧行

【余生九岁为至元十三年丙子避兵山观李氏又三十一年丙午哭内兄其渊又三十一年为後至元二年丙子诸亲相邀复留数日因思三至岁皆逢丙若有数然者】

忆昔丙子宋阼变天兵南来混九县举家避兵窜山岩道逢哨骑落髑箭仓皇奔匿道旁家弓槩穰穰短墙见当时脱命五步间店叟焚香身手颤行投李家日已晡张灯招魂具膳舖老人攢眉论兴废我时虽幼知艰虞又闻土兵在岭外肝脑满地红模糊偷生度日四五载短衫窄袖忘诗书圣朝右文庠序起始复勉学思为儒两家婚姻正稠密冠盖城闉相络绎君家气运如新春我家贫贱如前日却从丙午哭盘渊六月赤炜行青天岁当饥谨路萧瑟殍横野无炊烟陂滩悍激落清浪草树蒙翳号悲蝉天道一周如电扫偶向山中事幽讨兵机定息太平久少壮丘坟童稚老溪流改徙栋宇多短植参天修木槁後生秀者来如云欲陈往事谁可论烹羔击鲜醉宾客东家西家邀款门所嗟淫雨连十日不得登覽徒清樽天留老眼倘不死重来山水与子笑傲观乾坤

忆昔行送李省掾友仁从李龙川平章定寇

忆昔韩退之运筹辨幕擒吴儿蔡城夹道拜丞相归来却作平淮碑忆昔于公异槩头露布从东渭文章功业相久长一语精神照天地凶奸小大虽不同宾主千载同高风舳舻白钺航玉虹劲气欲剗千崆峒丘夷穴踣九兕毙溪湮壑倒羣蛟穷莠稂耨尽嘉谷在锄恶树善心元公城门夜开灯火闇童哇妇织村无哨四郊桑麻与天平弦诵家家施礼教悬知耆老歌盛德鋌斧春风余幼少章江水满牙旗舞勾陈横空搥大鼓杀牛击鲜劳归旅千斛鷺黄浮瓮醕相君黄扉君紫府先生作诗如吉甫

题傅云岩斋

商家良弼去千载天下常患无甘霖不知有云卷海水至今藏在岩之陰金支翠旗贯曙旭铁骑苍虎蒸遥岑晴天白日作五色中有仙子鸣瑶琴凤凰翼旌鹤参驾欲出未出真无心圣时飞龙泽九牧五风十雨年穀熟安得闲云老岩谷

罗定翁家书雷致雨

炎风萧萧吹赤日道路行埃积三尺沙泉起焰江容輶秀稻连云今槁立西家藏蜴蜴漫死东池?龙龙不出天高万里如坚珉狂狴狴谁动色先生世家神仙府丰隆吾兄阿香母谪居下界百习空犹闵颠崖堕辛苦尺书半夜报家庭载雨滔滔赴南亩长臯回青短陇秀如以黄馘饱膏乳谁言至人无私念唯诺终应胜号愬八荒六合等赤子隔辙町畦果奚故呜呼人间一室分恩仇天工如此人何尤

桂隐诗集卷二

桂隐诗集卷三

<集部,别集类,金至元,桂隐文集—桂隐诗集>

钦定四库全书

桂隐诗集卷三元 刘诜 撰古体【七言】

上陇行【以下十二首皆至元丙戌至壬辰作】

江南雨晴千里春桃李漫漫催杀人山人出门看落日一年一年发如漆髮如漆兮奈此何会看晓镜清霜多街头古路雪陂陀千人万人朝暮过燕姬细马笑且歌眞顔勒石高嵯峨翁仲寂寞空山阿谁能酌酒相摩挲

游沙山和萧安国

书窗半月云冥冥今朝有客天亦晴七年怀山始一往宿云卷尽羣峯明峯回水桥带行路数尺便觉分俗情穹崖白石饥虎踞髭髻樵笠玄蚁行轩车既令路人骇杖屨亦有青山迎倦攀尚觉人语远小憩先得亭阴清仙楼下俯心忽动天风吹衣疑化城芙蓉崔嵬去未已青原拔怒来如争伟哉造物裂元气削此苍壁悬亭亭临风揩碑诵未了虚谷汹涌波涛生江山千年如一日是间风雨平复惊【旧为寇区】今人头发照溪水昔人壁间遗姓名岂无樽罍可一笑独怀南礪悲山阴同来豪士亦不少狂絶如白歌如青风流益自愧寒鄙谗调未觉须娉婷闾閻埜花暮眠鹿滕王修竹春闻莺丈夫登临要胜迹向来意气终何益槎牙江头树千尺记我斜阳下危石欲题妙语还自惜恐有仙人怪今日

南楼乘月

人间尘埃能几何夜夜明月九州白独提愁发御秋风汉江染之不成黑江流迎我来滔滔古今销尽黄龙高楼头携酒邀天饮我与殷庾为三豪吴姬肤肉映肪雪笑倩坐客穿舞袍胡牀吹玉龙朱阑悬豪曹已倾四海添我酒更推三山鱸其鰲苻坚石勒竖子耳尺组縻之如猿猱昔人功名何足论惟有风流千载存当时结束不成兴谁爱明月来端门我起舞君莫回姮娥随人不可推君捉我影入我手酌君玻璃三万杯

淮南芍药

西施三十埋五湖飘南国香骨枯隋皇羣姬一朝死迷楼妖气夜如水江南草木千载归广陵芍药天下奇晴风罗幙春色午轻尘微雨姑苏池东家绣鞦西红丝黄冠女儿学涂脂屏风夜色丹砂泣王孙偷醉青蕤湿豹胎猩唇宴王母满城冬冬椎大鼓油车翠幌推不行竹西将军舞虬虎万花夜逐锦云空四相化作神仙去风流老守今种瓜灌畦马廐春日斜城中犍车泥

满路唤卖遗花人不顾

天上谣【戏效李长吉】

瑶京夜宴弁纷星洞庭神乐八荒声
幼龙未起月忽堕扃空路迷失仙
纓转杭东海蓬莱晓遥看太白当
天小海尘相隔青茫茫玉玦海边
委秋草鴈啼霜湿衆娥裙緑毛断
耗三千春桑枝千层拂人马春寒
梦绕高丘下

和刘元翁

庐山江水之西流今年涉我舟复舟
平生岁月向此尽百里何必非并
幽伏波少游两不可玄发如客谁
能留南飞鳬鸥北鸿鴈我亦天地
无几求空山岁晏催客别与子击
筑歌四愁陌头鸡鸣曙光发池上
古木寒萧飕人生百年各有愿养
牛种橘亦得齐封侯

题萧天叙韩干三马图

高堂崔嵬立三马萧侯得之韩干
写犀包晓解尘漠漠霍如飞龙落
庭下开元有道朝华戎吐蕃罗拜
骊山宫蕃儿拳髯带沙砾朔风卷
隳鹞落空玉堂闾阖开崑仑权奇
磊磊万里同当时沙苑七十万申
宁岐薛连坊栈五陵翠华长晦霭
太平受贡只貽患蜀道青骡後骑
疎金粟草木西风初岂知此事千
古无天寒日薄人看图

古桂

庭前古桂何时发数日空阶积黄
雪雨余天上蘂珠明风起人间金
翡翠相看竟日不得去况乃清宵
对明月天公生物随人娱华寂从
来同一色汉宫仙人理秋发觚棱
千尺画阑列夜深仙掌露华凝万
斛清风绕陵阙长生未保富贵虚
风流更落柴门客人生愿欲复何
尽有酒无辞酹佳节

题胡忠简家所藏九歌图

崑仑之水西极来南合万水澹徘
徊山哀浦愁雷雨垂精气冲漠阴
风颺里音巷乐气所使阴阳轳轳
何靡靡放臣哀怨歌不足谁扫生
绡更愁悴平生誓欲穷山水风尘
局蹐不出里飘然萧萧毛发起濯
足潇湘洞庭尾皇车骖驾飘上下
云中渺潋光相射北渚风起吹参
差荪桡桂棹波涛亚九阏云旗扶
桑輶鳞屋击鼓山鬼愁吴戈提首
灵宛转荒庭白日寒萧飕春秋祭
祀岂有极歌舞情竭君来食楚王
寛厚国无禁民俗富乐流为惑曲
终翻见熊绎馁我欲添画湘累泣
君不见凄凉三户魂未归眼断秦
关路萧瑟

题杨补之梅

补之之梅不易作况乃藏自澹翁阁澹翁千载忠补之一世雄元气擘裂乾坤冬开卷洒然见
二公孤山之月罗浮风澹云万古吹不融黑埃黯惨翠羽失小牕混糝重湖东尘心萧萧淡若
水卧看青天露如洗

和友人牡丹借用山谷韵

幽园草青人不行三月晴嫩蜂无声国香销歇余态横风醺玉环酒初透雨困飞燕体逾瘦可
怜流落不登豆洛阳百年【阙】游骢马塍年少今成翁相逢何事依旧红

城中鼓

城中鼓日日送人城外土雕鞍绣组走满街雪旒练帟後无数路人环看争叹嗟叹渠富贵如
朝花明朝路人还复继桐棺败布孤妻髻嘉禾门头春树绿东市高歌西市哭人生得丧空自
多贵贫同尽当如何

万户酒歌

【泰定乙丑真定吴侯来守庐陵议行万户酒申请垂定郡民预喜赋诗相贺】

城中禁酿五十年目断炊秬江东烟官封始运桑落瓮官隶方载稽山船务中税增沽愈贵举
盞可尽官缙千先生嗜饮终无钱指点青旗但流涎今年忽纵万户酿处处争说邦侯贤富家
遶郭买秬田小家盆盎争濯泉开城晓避麴车道筑室夜甃糟丘砖便将相如旧渴吻一吸拟
尽长鲸川老翁童稚喜欲颠秋醉月下春花前丰年五谷贱如土市上游人歌复舞歌复舞邦
侯堂有八袞母共饮蟠桃几千度春风吹醉九九州公但饮醇丞相府

美旷明伯义渡因用友人韵

江南野水村复村行人不渡愁黄昏两舟齐驾江涛喧捷如天马来天门秋沙残阳春细雨南
涉北来谁肯驻嗟尔悠悠渡水人少待同侪莫先去

和萧公立听雨

浣花风高雨如雹杜子庐破无处着飞茆满空悬不落孤吟但愿寒士乐彭城二苏秋雨中
对牀旧约随飘风今年江沙踏晨屨明年禁钥闻春镛贫伤志大功业小贵恨离多欢聚少古人
今人共听雨送尽千年昏与晓痴儿酣睡檐声春惟有诗翁愁独新惜花惜柳复惜稼忧家忧
国还忧身我今多感肺腑裂剪烛西牕头似雪梦云笑电閱多幻苏早作霖真漫说惊雷夜半
翻春湖声撼空山山欲无明朝八极生霁色絶喜流润连瓜区书生习气元相似政坐谈坚并
辨异从今连牀夜雨但美睡不用书囊万卷夸强记

和友人

君才太白高世雄长劒出匣凌崆峒骑鸾鞭风不可穷吹笙醉擘騄之峰我才老涩峡里硇白发千丈侯难封褰帘无复东涂红坐看青蛾充瑶宫雕虫作赋如屠龙世意澹泊师曼容道旁相逢仲与翁何异遗爪泥雪鸿文章渊源端有从百仙効役无敢慵寸莛何由撞巨钟弱羽未可随冲风十千美酒诗肠空酒酣坐见花蒙蒙龙头石鼎炉火中夜聯佳句弥明同睡觉不见惟奴童

和张观光见贻

羣公冠盖趋承明至治四海鸾凤鸣天门闾阖云五色日照明堂韶九成张君才华振夕秀纵靶自可驰勲名豫章隐林困万石当春不及苔之荣吾闻黄河之水崑仑来奔流万里喧霆声从君直上观其澜秋风吹我冠上之琼英

题丘介叔石山

骊峯北拥天禄阁莓苔千仞如横槩汴水春来艮岳山东风万里飞纲帆人间富贵如反掌千古行人一惆悵不如平泉醉踞苍虬龙花间细雨馭裙红不如太湖闲嬉品甲乙宾客淋漓供妙笔富贵集奇生祸媒文章不泯为物灾势销有力即挟去名在好事犹频来不如山中老诗翁叠高叠怪千万峯不贪国爵学顽钝不受客拜忘清雄独持坚白傲一世本不慕名那有势今人後人谁可虞此石终古留兹墟皋亭风日醉如酒坐看巉岩搔白首子孙补天从有才勿袖此石归蓬萊

织锦歌

南州织锦天下奇家家女儿上锦机蓬萊额黄染万斛渭川茜红种千畦凤刀冷淬并江水龙梭细琢炎洲犀春波雨深净如练揆红濯黛随时变高鬟半 玉腕明心逐轮丝千万转晴漪翠浪舞白鲸细柳高花穿紫燕青楼临道起秋千蝴蝶鸳鸯逐少年月中三郎坐听曲海上汉武来求仙穷年玩岁容发改研精极巧造化怜陌头杨花春鸟语东家西家教歌舞燕姬金扞拥四弦百万纏头弃如土人生得意各有命岂无红颜甘自苦君不见郭门十里桑柘村蚕妇朝朝踏风雨

陈所翁子龙岩画龙

所翁画龙妙天下墨水千江醉倾泻天地变色草木寒霆电交作昼为夜阴风萧萧出空庭天落黄金壁间挂前身是龙身不知龙来与语相嬉岁饥乖龙不肯起画龙夜出行雨归不知雨到几千里但见绡素濡淋漓所翁丹成驾龙起雷岩传家有奇趣蜿蜒半幅浩欲动鳞鬣槎牙攫云雾轩窗怒涛声汹歔篴笳夜光亚吞吐嗟哉雷岩今亦仙此龙神妙不再覩谁能久藏系金柅雷公绕柱窥囊褚只今春风急雨日夜多便恐一日飞去骧天河

寄刘济用万户

君如襄阳杜征南轻裘缓带峨两骖岷花江笛边吏闲风流千载成美谈又如荆州庾征西上流重镇雄孤黑旌旗不动万马嘶秋风飒飒纸自题世家桓桓产燕朔山川英气横诗槊啖牛酺酒赤羽旗读书挥尘青油幕去年拥麾戍潮阳貔貅六月飞风霜溪潭鳄去洗瘴雨沧溟息凝清光暮春归帆拂鹭屿满城酒香咽箫鼓客来痛饮百尺楼楼上青山浩无数槐阴画戟列校满榴花猩裙小姬舞丈夫穷达固有命才气腾骧天所赋呜呼向来书生百年文字间一日乘障如狄山

和杨教授喜雨

南风吹野山荒荒低田初涸高田伤挈榰抱瓮忽四起翁稚妇女争穰穰龙车连夜驾海水稳载天上千困粮散为人间六月雨洗濯万物无痼疮稻粱分畦翠乱涌桑柘连陇青远扬颇闻一穗踰百实野老传翫惊何祥郭门轻风万里道已觉饱饭无饥肠宫中化瑟调玉烛史官上贺书非常圣人奎章讲经理百辟冠佩鸣水苍山中之人歌击壤不恨白发如冯唐

丙辰岁晏无营友人有赋十题者戏效其体冰港义鱼

玄冬水落江堤陈晨霜冻石花嶙峋耐寒渔师妙搗刃斲玉下取潜渊鳞大鳞掉尾血贯眼小者惊跃弃不缙絶怜贪利轻性命千载无复奉亲人

雪林猎虎

朔风晓寒天地白将军打围千骑列南山老兽工避人穿崖蔽木踪不灭地穷怒跃戟乱冲十丈瑶峯尽成血却悬駝背归入城不见斓斑见白额

竹外梅梢

谁家修篁千万竿短墙流水朱阑干孤芳托根得春早一枝斜出行路看遥疑青林烟初霁一点两点雪未残小牕月落霜角动谁与伴此空山寒

水边柳影

江南残腊冰雪消人家垂杨如灞桥窥春娇眼寒未动仿佛已学东风腰东家女儿重岁月心逐时物先妖娆此时欲寄未可折直待二月黄金条

侯邸春盘

侯堂进雉箫鼓喧家家颂花过残年玉盆清丝缕杨柳陇西菰蕈江南鲜繁弦脆管促拍手纖

指高髻传四筵少年风物日日好莫同耆老谈开元

山村腊酒

青峯抱田溪遶门茅屋数十连炊烟水春香秫簸白玉槽压新酿鸣红泉黄鸡肥彘更【平声】
【平声】钱岁但取饱醉不作筵城中争学比官饭官酿苦薄空费钱

雪鼎烹茶

六花漫空羔儿传夜酣掬檐茗可煎人夸江南谷帘水我酌天上白玉泉石铛龙头三足稳松
风萧飕起涛烟人生口腹亦随分陶党风味无媿妍

地炉拨芋

道人山房棕为帘凿土燎火防冬严红蒸楮柚森怪兽灰中蹲鸱香可拈黑肤黯淡露玉质温
润可以当刼炎人间宰相君莫问趺坐且荐春醪甜

城角春声

江城穷年柳芽黄家家辛盘鬪称觴城楼夜吹梅花引起视天宇皆飞霜牛衣有人久待旦冷
铄三尺冰花长勿云暖律苦未转中有万斛东风香

江帆雪影

朔风殷空夜飞霰【殷读作引】百万玉龙交晓战茫茫天地如大荒只有行波蒲一片推篷
四望眼光眩倒浸玉扉水中见却疑冯夷宴未终舞女犹持白鸾扇

赠刘橘隐善棋

九州羣仙一黍珠二老一橘当有余况今刘生止一身橘多人少皆空虚千年白日碁几局瀛
洲玉尘今几斛智琼额黄藏机多其间之乐当如何秋风吹雪种人首安能橘中共君友须君
骑龙追老仙借我此橘酿春酒

寒食行

去年寒食城东桥郭田野花春摇摇城中家家出上塚久晴争试紈与绡松边细马拥绣鞵柳
下轻车窥翠翘竹篮买花分载酒酒酣遮路行吹箫高冈累累临广道败塹短篱编棘枣北人
火葬哭望云土人高坟岁翦草老翁怆咽心未平童稚嬉游那有情悬知十日办一出煮蒿不
及行春心男儿百年骛婚宦慵痴未必输精悍黄金堆堂红颊笑阖棺未了如云散夏畦埋骨

绕里间海上田横无麦饭江山满眼樵牧歌
万古行人一长叹我时醉卧山农家兴阑行吟西
日斜郭门排前竞先入却独倚树观归鸦
今年孤村又寒食闲笑清游无一日人生时序良可
惊疏雨闭门落花积

和罗昌逢吾庐亭海棠

闭门春色深深许日暖紫绵生雾雨主人惯看不常来过客暂游那忍去短梢未许隔墙知落
片暗随流水度古砌侵泥新蚓行修竹满林幽鸟语红颜流落未须嗟妙语发挥吾亦主

题庐陵县丞孙美家庆图

藿羹负米待四方绣舆迎归两鬓霜女嬃婵媛怨湘水长陵握手惊泪滂人生骨肉恨离别旦
暮目前愁困厄天伦一笑岂有禁造物相违每难得丞公有母八十余朱幘扶养颊明珠青袍
黄黄洞庭橘画船白白江东鱼堆牀笏绂七子嬉恋膝觴悅嫠姊随舞觴花间高烛曙踏鞠柳
下轻幘飞平反入报慈色动名胜欵门珍饌供孝慈节义各自植一家昌运如春种太初赋命
散万殊丑好悠悠亦异趋风化九州本不择而乃衆美同一区只今见姊如见母便拟彤书增
节妇人间富贵未足多三叹高风千万古

醉歌行和答友人

七十古稀今已半东风把盞虬髯乱新诗稍与岁月多狂态潜随顔貌换洛阳十五载花行佳
人掷果拦街看宝钗醉折偿千金马上吹笙春酒暖妍媸万古命不同忧乐千端天不筭雪消
水长江鱼来邻儿紫楫桃花岸出门闲倚东风歌六龙弭节羲和缓

和友人

大江日夜东流下长忆当年来往社千金鬻赋过班扬斗酒吟诗凌鲍谢祇今嵇绍自不孤如
此双璧眼中无阿兄词源倒溟渤季也学力包具区天风绮语忽照我排冪堂堂结匀妥乃知
大雅尚可作岂直黄初当突过古来得名何必然一语邂逅或可传两鸟相酬鸣不已为君一
笑三千年

和罗昌逢蜡梅

傲寒独择风霜时避洁不作冰雪姿世人不识名以?试用人力当愧之空山耿耿澹正色熟视
虽媚不可嬉雪踈点映忽异态日黄滉漾疑空枝北风缙裘卷半褐玉肤微露红非脂先生世
味等嚼?独爱香气清诗脾铜瓶烛下为细酌唤花唤烛了不知长安少年慕游冶千金买鞭映
空垂东家凤珠骑竹马西家额黄学宫眉何如此花有真意近道不愧禅林梔

再和

梅兄不见今几时黄尘尽浣冰玉姿却疑来从金仙国已觉颜貌俱近之水边林下恍如昨都非都似惊相嬉额黄万斛涂未了頿怒半落宫檐枝缥裙下压绀裙裼绡袖醉枕红肤脂天寒鹅儿冻凝酒日明蜂户光分脾暗香着人欲袭骨妙意未必和靖知小窗静昼胆瓶古长廊微雪珠帘垂一枝几案谁所置便觉春意生睫眉勿嫌吟诗苦不似酒觞更倒黄金瓶

和罗昌逢叙别

南山十里横江涛截流峙以巨石豪【昌逢所居地名豪石】风流文献鬱相望一笑不待鸿蒙遭春游朝縹阆风马海钓夜饱任公鳌堂堂九州白日丽八翼不堕谁非陶天荒路断凤凰去岁岁茆屋秋风高我如吴蚕出已晚意欲作蠶何堪繰君才过人气愈粹内法九醞中山醪长篇一泻纵河辩妙意不语如禅逃坐令阳阿与下里呕哑共杂云中璈丈夫有愿各坎 牵滩百丈谁能篙老谋壮事了不念客中饱食聊游遨岂无躬畊旧泉石岁久绕宅生蓬蒿冥鸿学飞志四海决起已倦鸣求曹长鑱短衣会不远卜邻共种秦人桃

再和

人生断梗随春涛世事九马分秋豪驱驰未必天与力丰悴政信吾所遭东家公子出富贵严城夜市看灯鳌春浓玉鞭堕汉褱天寒翠袖围秦陶车悬湛卢结死客一笑北斗黄金高田翁负郭绕耕种冬稻春雪春丝繰溪鲂登腴玉色菜园斄荐羹鵑黄醪诗书不识肝肺朴处世忘世天刑逃先生穷年弄笔墨饥吟欲学仙家璈搜奇猎险不肯纵九折下辙瞿塘篙荆州登楼薛弹铗但以岁月供游遨主人惜别君可饮抔云岂必贤翔蒿不见种瓜东陵邵不见抱槩丰中曹短歌未了起相语我为土偶君为桃

和罗昌逢

字江五月轻帆涨南风飘飘卷衣浪古人百里肯重寻相逢喜见平生心穷通惯见貌难老谈笑生风人愈好新诗犹欲俎豆予倦游久已如相如梦中占梦更何据乡人说乡念归去春花绕屋菰葦长有酒不愿求西凉

送欧阳云瑞赴上元县尹

秋风吹帆秋日白倾城车马送行客送君宰邑古金陵墨绶绯袍鬓犹黑金陵壮观天下佳青山银涛遶人家城墙夜转晋时月市门晓戴吴宫花楼台万户散晴雨乡井昇平尽歌舞南商北贾朱雀桥童儿咿哑五方语崇台百尺飞清霜人物高夸纲与滂鸛鵂抃空肃南纪鵑?昼伏安敢翔君由省郎再制锦文采从来多善政路人争看六一孙台府达官俱起敬古来县宰名谁留前有子贱後太丘请君整驾追前猷

送杨拱吾应昌府判

昔年金宋通盟处今日春风花满路轻裘走马江南人高髻弹弦河北女水肥鱼美如截肪争压蒲萄留客住风流通守诚斋孙政事文章俱有谱盛年得此未为远回首都门犹尺五茫茫烟草低牛羊中有李陵降泪土请君饱食应昌酥有酒不须酌今古

题刘良用诗塚

刘君埋诗黄土深旷视六合无知音冬雪峩峩塚千尺秋风万壑同哀吟子期邈在九霄上阳冰一去终无人君不见道山藏书高於屋万古何人辨珉玉

壽萧孚有赠以香谱琴律老苏文清溪竹

我昔曾友蓬萊之羣仙天香飄飄袞夢沁骨清无烟仙人譜之示我以秘玄又聞五弦浪浪石室如秋泉祥鸞征鵠離離夜度乎遙天以律寫之人問傳何人高冠吹藜乘云哦古文一史盤礴手持生綃修竹微雪寒娟娟云階月地疑是長生之圃不老之垣迺來三萬八千年當時四物還依然卷贈吹笙騎風之云聞祝渠住世如南山之竹高且堅坐評文章飛霞千仞追躡往駕而孤騫俊猊永日傲兀乎玉堂之細旃致君重華薰風復來解慍乎八埏

湖山歌送攸州武寬則再入京

【寬則自号湖山能诗琴客京久诸名公多赠以言】

洞庭瀾漫萬水會冲山突兀千仞外青天偃蹇浸其尾白日跳丸出其背地維洼坼波濤高元氣淋漓雷雨?其間人物多豪英山為襟裳湖作佩武君講書河西府貔貅動容熊虎拜玉京羣仙迎笑談夢斷依稀廣寒界始知十二宮中玉李奔馬周富貴不系常將軍武君長才有如此秋風彈琴望天閣琅玕五色騎青鸞鳴呼冲山之高何不拔在居庸脊洞庭之大安得上接黑水渾坐令武君官爵高大難比論

贈東湖山長劉叔說之京師

一中至道生極先唐虞三代皆自然九疇之五貫萬事吾身養之玄復玄五云仙才參龍子讀書不作迂曲士手持春風行沂雩夢逐帝珠游赤水華池崑仑日夜旋野人或見光燭天急欲扪之不可得忽然復返千丈淵左參處妃右西母鳳凰翼轅駕白虎凌風汗漫天地間逢人戲與麒麟脯朝馳潮陽看潮來暮援北斗酌酒麻姑台吹笙下招梅子真笑問東湖之水何年開朔南諸子環逢掖坐擁皋比說周易文章欲挾春濤飛夜夢天花生鉅筆乃知仙人變化無不為光塵出入相娛嬉俗緣千仞徑度盡濁世糠粃秋風吹祗今兩袖珊瑚雨要上清都謁明主蓬萊道山五百年前身曾宿瑤花圃君不見張子房摩挲編書開八荒又不見李山人白衣騎馬行帝傍古來豪傑盡如此世人那得訊其狂

送忻都总管第五子归扬州

沙公昔乘太守车金带十围长髯须邦民感恩若父母出入争看填街衢大儿相继分半符春风甘棠何处无十年父兄不可见见君风致犹相如身当世赏让其季直以此意为母娱江南鱼笋江北酥斑衣捧觞绣绕舆自言孝友有至乐金章紫绶非所须为兄雪冤北燕阙为兄收骨南海隅急难怀死志铁石塞风瘴雨埃满肤韩穆爱弟推厚爵潘郎奉母夸闲居退之念兄如念父涛泷万里携嫠孤世言古人不再得古人今人还可徒清时卓行须论荐明当整翮金华殿山中酒香催别帆五月南风浪如箭扬州平生未得面寄语二十四桥须一见

律诗【五言】

送文学山赴召入京二首

礼乐通三极衣冠集九天遂闻嵇绍用益重伯夷贤劝激前朝少寛宏百代传苍生须一出珍重讲经筵徵召来羣望崇高立至难声名先世重出处後人看丘壑多深念輿台给近欢寄语规颂在未敢效旁观

归乡即事

七月适故里一凉宜病翁过云轻弄日飞鸟逆冲风熟面峯峦碧迎人柿枣红向来饥载道不拟见年丰

故里夜坐

故里复秋夕客怀谁与同澹云低近屋凉月缓行空道与身俱拙愁兼病作翁閱人惟老树语梦有鸣蛩

促织和工部韵

促织不自苦秋来偏恼人十年夫戍远万里客辞亲翳翳烛频烬凄凄月向晨此时应入耳堕泪实情真

省西隐原二首

遗魄恋乡里斯文委草莱岂无狐兔穴犹有子孙来白日叶自语秋风客独哀玉华钟鼓动欲下更徘徊四世共丘陇空山几夕听斜阳照行影白首愧先坟野水依田落寒云到岭分任温岂不好无力振云闻【任昉温峤二人子孙皆不振】

八月十三夜听雨

去意久超忽悠悠终滞留石枰中夜雨苜蓿小园秋天地谁相待燕鸿俱自谋百年寒暑易蹇

浅实堪羞

山墅中秋有怀诸子侄二首

百里不能返孤村围碧崖茅庐佳节夜秋雨老人怀多病犹能赋长贫更寡谐中郎诸子侄今日定谁佳他夕岂无月中秋偏作阴缅怀人生事安得皆如心夜久邻机息山寒墙叶吟村醪堪一笑恨汝不同斟

山庄阻雪

三日不出户巷深交马蹄鸟冲危雪下楼挂湿烟低惻惻衣疑薄荒荒眼欲迷故乡翻似客买酒短桥西

和萧孚有二首

萧子乡邦彦论交契谊深未应忘共语政自少相寻久客秋风鬓孤城夜雨心赓酬慙独後衰朽懒清吟经春慙简出门巷草莱深庭树闲能种山苗病独寻谈多妨养气客去得观心静听林间鸟间关似学吟

和张汉英五日席上自寿二首

晓戒篮舆具出门还待晴不慙衰境至长忆故人生佳节吾堪醉青年子有名蒲花明似玉偏欲助诗情应俗疲终日诗书肯兴阑才通今世许交久古人难彩服劬劳报清罇节序欢须知仙道苦九转始成丹

用吕生韵赞余学正祈雨

旧穀呼庚癸羣龙战戊壬风生广文座凉入使君琴济世非无术回天本在心明时须杰士早报佐商霖

正旦雪冻拈笔【庚午大饥】

老去复新年华顛岂更添晴将春意薄霜助雪寒严酒贵欢无具庭花迹可潜尚余诗兴在冻笔不胜拈

用前韵答梁景行

冻沍过常年频闻物价添虽云为岁瑞政复厄冬严安得田园老无多学问潜少陵应解此酒碧得时拈

用前韵答彭琦初

力作不逢年园荒蔓孳添汉廷从策董桐野有耕严衰发禁寒燠春机到跃潜啼饥浑不顾书
籍卖堪拈

和邵有初遣怀四首

郎君东阁贵骥子渥洼生俊誉王文度青年陆士衡江山开宦辙风雨助诗情岂必曾相识相
逢可盖倾从亲古云乐彩服戏青春好学无勤怠论交略贵贫人从召公化客过阿戎频近说
乘龙喜文章定有神每见清谈胜豁然人意开书如秋蚓结才拥蜀江来雪尽春生柳沙晴路
有梅柴门长寂寞相过定无猜经世怀深蕴培风肯小留定知飞食肉早已学为裘我老三
径君驰九九州往还慙简略正复近天游

和邵有初郊行

久冻余趺坐初晴偶意行花浓慙客鬓酒薄胜人情野庙春旗动山城暮角清悠悠百年事倚
伏断云横

送锺子隆夏五归省亲

锺子後來秀今年客郡时学知三日别乐慰四亲思门柳人归早塘蒲酒熟迟诰封应少待志
养政深期

送医官林性善归故乡

林君妙医国才气亦南琛一郡昔无病三年见此心古槐官局冷新药野云深五月禾山雨相
思寄短吟

八月七日莞草晓行

半秋仍憚暑中夜问前途地势平如陷池光澹欲无警凉蛩乱语戒险客相呼奕奕东方白城
逵得疾驱

山观道中

佛岭旧嵯峨余龄却再过行云粘地湿流水近山多岩屋垂萝薜沙田立鸛鷺百年亲旧意相
见欲如何

故里【以下三十首前至元壬辰癸巳间作】

故里留人住新秋起客悲不知横笛处适与此心期夜久风藏树天清月动池平生游射地壮日尚栖迟

正月二日

泥潦无来客题诗受午风功名山色外岁月雨声中拜跪频怀旧悲欢始悟空九州春欲满未许叹途穷重到鹓鹄避兵之所回首二十年感慨系之

重入桃源路青山抱草庐儿童俱已壮兵甲未安居楚叟犹迎客篱门欲碍舆双亲今可恨跋履记从初

九日呈艾幼玉诸公

强笑杂深悲忽忽见菊枝腐儒元费日今岁并无诗山作登楼色天留隔巷思岷中名胜富聊慰此生迟

上元

风雨何堪出今朝已上元巷泥交过屐祠鼓屡鸣村须发催吾少情怀应俗论儿童浑似昔染纸对灯幡

春仲简郭逢春萧拱午诸公二首

稍与书相对青灯旧可怜守牕惊逝日听雨似它年翰墨微生拙山林薄累牵忘年多胜友持此慰拘挛平生数君子交谊似舆桑又作今年聚宁知去日长江花春溃溃山水昼浪浪欲整沙边屐泥途可没缰

城外晚眺

堊色生归思淹留负日长孤城浮水气踈雨弄虹光俯槛青裙女维舟白面郎莫忘沙际树屡见下斜阳

和周叔恭

平生嵇叔夜往往掇皮真政使但三语宁当止半人江云难待雪门柳未知春好事诗成怅犹须一笑亲

和袁鉴翁

病客终何似须髥日日深能诗今见子閱世自怜心湿础生花气晴枝堕鹄陰村村风物好我自爱禅林

谢彭道存

匆匆今雨聚政似未相知岁暮欲何语秋风尚有诗庭炉看雪尽门水试春迟如此悠悠者非君谁与期

寄古渡诸公

为谢诸君子长年意未终本无三日语政自此心同江树藏晴气墙条转好风倚楼观病息无句寄兴公

八月朔暮日有食之

太史崇台密明君德政勤切知似初月只道点微云南国暮稀见中原事不闻春秋三十六麟止竟何云

家兄学翁访胡宣慰过宿寓所

四方复贫贱相视意何如灯火自深夜风尘尚异居东行知有遇久坐正忘予请听高风起应怀落木初

家兄去後一日对雨作

燕楚通伦轨文章老甲兵冯讜思附薛王粲早依荆薄世谁忘势他乡喜见兄遥怜泥雨苦寂寞坐檐楹

舟中

故园春候早有客独行舟朝气着华薄野陰鸣远鹄云分潭际树帆上驿边洲山水正有会冲风不可留

八月十五夜

去岁当佳节空轩但雨声百年能几笑万里幸同晴身世嗟犹昨江山自有情何人传月蚀不寢欲三更

十六夜怀诸兄

相看自非节月是昨宵圆露下江山静天虚象纬连开轩从到处忆弟定三年坐念吴江夜清光满客船

九日郊行

九日登高处心情岁岁同平田初获稻旷埜屡闻鸿风景悲尘世江山閱寓公茱萸朝雨湿愁报緑樽空

对客暮坐

危坐高斋夕东来喜友生空庭疎雨後四壁乱蛩鸣烛至瓶花落秋凉架药轻西头动刀尺澹月上檐楹

客途

天低疑即雨野旷况多岐亦有人孤往安知意不悲空山鸿鴈少薄晚道途疑老仆谈前事村深醉宿时

归乡

荏苒长如故逢人先自慙輿台多速化礼乐竟虚谈野驿孤云去风羶过客酣先人瓜芋地未得理长鑱

春雪

但云阳已盛春雪复沾途修木辉辉眩遥山渐渐无云寒凝不动雀晚间相呼无复望千里惟应寄一壶

寄友

吾友叶居士三年二已疎每来曾不驻今别复何如岁月同为客勲名合着书先朝文献远风雨一欷歔

除夕

疎雨孤灯夜相看又岁除江山犹寓客亲友絶来书新酒初堪酌长愁未暂疎艰难吾敢恨百岁定何如

和范国用隐居

此客亦小隐吾生岁月流巷贫初有辙世变得耕丘楼晚怜荆土湖春梦越舟临渠见云影偶坐各悠悠

与江东郭提举季新

向来梅水上相望路参差久别闻君贵重来长客诗乾坤万事隔故旧十年思古道真如此遗簪尚可期

和家兄巽翁久别听雨二首

夜阑不能寐长听雨声寒万里风尘远三年会聚难每怜伯仁胜自作少游看不用闻邻笛相悲正泪潜去年相望苦风雨独凭栏故我忻无恙慈闱得问安还乡春又半骑马雪初乾何日离人事相持入碧山

久雨害稼

天下陰气盛江南秋雨多粢盛吾敢望君相意如何野旷鹰初鹜江空鴈不过遥闻府中帖昨日已催科

和许中立二首

始识未逾壮重逢四十余狂随春酒尽病与好诗疎有赋堪惩咎无成托遂初阿同频共语时得问何如谐世非无意斯文亦辱收极知痴见笑尚以味相求落日湖陰笛凉风水郭秋何时同问舍高卧未须楼

瘞天

须发忽如此今朝复瘞孙相看知极苦少待亦能言已已成泡灭眊眊但目存老天均赋受夭壽与谁论

元夕

节夕贫相值流年雪共新一灯遗老鬓四海後元春庭树犹淹冻盆花不弃人儿童书蠶卜乐意愧渠真

自和

老境憎寒剧陈人愧岁新梅花如待雪酒盏独知春时序堪搔首篇章漫累人悠悠供一笑浮世孰为真

九日忆萧孚有

故人南浦去近日定何如闻滞邹阳狱谁移北海书江湖寒信早风雨远音疎应对重阳酒何由得寄莫

酬刘以芳见贻二首【其家有花圃扁山中高处】

山露沾琴润山风到鬓寒酌多迷梦觉语久杂悲欢身岂如泥爪须难染石肝不知明月外何处是瑶坛山中似蓬岛高处不胜寒邂逅千年意携持一笑欢庭花明酒盏冈月沁人肝诗垒堪凌斗犹须更筑坛

正月八日会诗人堂和山谷韵

涪翁去不返复此核空空古寺八泉在游人百代同树悬山雨白门揜佛灯红诸老诗应好谁当续旧风

遣仲子尚文归故乡後雨中独坐

扰扰忽幽寂悠悠转暮迟春浓心独苦书快睡先宜幽鸟窥痴客残花耿夕池儿童行未返微雨最先知【故乡南岭相去府城六十里而尚文又多病故去後见雨而赋此】

挽文文溪宣慰

身世从违梦功名毁誉资平生惟客在後死有兄知危涕秋风远华颠岭海期空余千载意不得尽吾诗

挽刘须溪太博二首

蚤日惊吴洛余年畏有闻蹉跎太博策流落大苏文世外风流尽人间论议分岂无千载泪不得公坟海内刘夫子堂堂尚及吾相知能不浅一失恨何如白日今三岛黄河自八区终然四十谏不足尽欷歔

挽邓中斋侍郎二首

海上青油檄城中白发簪百年重得老万事独余心过客门嗤凤遐荒字抵金平生俱莫料造物意何深和音回雅诰伟意落羣公河岱苞流外儿童好恶中书成慙未学琴在与谁同独有任安意深衣哭北风

又代挽二首

雅望惊南北斯文属古今艰危鲁连意老大管宁心落日空庵白秋风病发深太玄当有识流落欲千金问字酒盈座谈玄辙满门病余仍托賸客去独无言世论从妍丑斯文岂怨恩相从无限意泪尽郭西原

挽李凤林二首

笃行成迂濶垂言累隐沦儒林多未传耆旧已无人家学传衣重门生负土新未须生世早相望一沾巾苦学难酬志知名不为官百年供简籍四境想衣冠颯笑从浮世穷通得达观风流今欲尽满眼泪丸澜

挽萧方厓御史二首

絕域衣冠化南方绣斧明艰难心独苦好恶事难平人物增青史风流想素旌悠悠行路哭岂尽计私情岁月无余分功名不计身世方危独行天若忌斯人精鬱山川古魂流楚越春遥怜无尽意未必着坚珉挽文母欧阳夫人二首【文丞相夫人留北子学山学士迎归】

兴废知何与盈虚岂是真关河余白发乡井记前身世自哀书血天犹合劒神人生俱有母千载独如新曾哀穿塚吏又见表泐碑事远儿童老伤多感恨衰緦麻千里合魂魄故乡悲樵子秋风後母伤墓木枝【书血用朱寿昌事言学山求母之切穿塚用田横事言文山死节表泐用欧公事言学山自为圻志】

代挽文母欧阳夫人【诗内凡言犹足谓不足犹须谓不须此后山所谓曹洞禅不犯正位是也】

弃俗冤亲尽还家梦寐平乡邻无故物天地有余生起灭身从幻哀荣世自惊人间闺闼意犹足托碑铭向来蚕织意岂识与兴亡万里心先死三年事已长子孙身外足棺槨里中藏我亦非私恻悠悠独涕滂哭王鼎翁内舍三首【鼎翁安成人名梅边少负经济之略以贾生马周自许不肯轻仕事亲居丧孝过古人盖才德兼备之士暨死士类咸伤悼焉】

敏决唐如晦经纶汉贾生岂无才用世终以孝成名谁复纲常尽何由造化平无穷人物恨洒泪看铭旌过从能几日诀别遂千年语自今朝絕诗应後代传世亡和氏璧友废伯牙弦嗣孝多贤子悠悠信有天少年闻杰誉谓在古人中岂意斯文好相看晚节同论心非苟合研理似相攻月落闻鷄起长疑尚未终

挽胡宗瑞节推三首

高科良易致素志每难行画诺威霆霁平反朽骨生百年身落落万事意平平满眼方痴黠怀公一涕横海内多先友如今可几人高冠余後死一第是前身雅俗形神远穷通表里醇山阳寒笛断宿草欲生春早似何蕃出终成靖节归机心消古貌世道繫褒衣贵贱原无与诗书岂

悟非悠悠兴废事高塚下斜晖

挽潮州教授李以翁二首

白髮居庸塞青衫瘴海涛平生余志在薄宦累才高器业庸流嫉篇章大化劳乡邦人物尽江汉日滔滔举世论邪说公如诋佛韩论当闲暇易学辨死生难旅櫟驰炎海铭旌表冷官向来知己远读状泪丸澜

挽杨节父二首【杨学文字节父官同知】

守道疑齐缓忘官似陆沉气通刑狱命政服鬼神心州郡余才杰丘原一古今悠悠三命鼎落四知金吾里南溪路公今迹又陈关西犹有族江右欲无人人忆羊公美天知考叔纯空余鷄絮意墓草未知春

挽刘肖翁二首

花外青山屋琴书永日风卷舒千载远谈论百夫雄未试长才用谁能雅志同墓铭公论定应传逸民中四海尊经意堂堂不可羣人言君已死我见子能文竹简春风在梅花晚日曛素车慙已後何日酌高坟

挽萧吉翁

人生俱志愿丰嗇岂天存宾客清时酒台池故相园济人高产乘奉母效潘轩不尽诗书福悬知在子孙

挽高季远

嗜学追诸老兴门在一身乡资分粟廩心是济川人陆橐常流美韦经百世珍远山曾约赋愁絶暮云新【季远有远山堂曾许作文】

酬曾允升

着赋何妨少谈经岂必师平生当几见同里早相知奋迅由频挫欢欣出久离苦心须必达犹有托金期

酬岩上人【吉水延兴寺】

风挟岩泉急云分洞雨新寺荒经起灭境静失冤亲堦石藤侵座庭钟鼠拂尘楞严收未彻半落案头巾

和彭自远

出郭俗妨兴题诗雨废春相逢憎易别欲语恨难频江雾低城重檐花入牖新踈慵知不怪我自掇皮真袁从义招赏牡丹不能往用彭韵为谢

趣减仍妨雨诗来始悟春相踈心独在未老会须频美酒留人熟名花似洛新为询江阁意消息定应真

和张提举登永新兴文阁二首

邂逅成千载春风入铸颜功名惊破白文采笑窥斑絕港行沧海南荒识泰山如何贞观治犹恨弃程关丑好元无定公心水鉴虚风霆同气化椿菌自才殊羸马寒花外新诗落木余百年真几见三叹独踌躇

和张提举题安福州书阁

高才成政谱美传起儒林礼乐乾坤重文章日月临一官惊道屈朞月见功深珍重经行地甘棠树树阴

和刘实翁後中秋【庚子】

此地元无约穷年亦倚楼乱云江市白落木鬓毛秋逢节偏惊客资身可废谋天多今夕月有酒未须休府公召方士萧山泉请雨约某日雨不雨以身受责是日果雨

天道远如此居然雨此时伎精疑命达事过觉言危大府资增传扁舟取载诗向来修省意寂寞欲谁知

送刘尚友赴汀州教二首

四海刘宾客儒冠似昔游文章违捷径山水要清流飞雨沾归马倾城望去舟官程元有数早已恨淹留小坡成誉癖叔弼托门生政尔难为後终然早致名客轡须道熟人事入闽清珍重明朝路无因数寄声

送文尚志赴寧州州判二首

盛德宜贤胄荣名起世臣乾坤共少日閎闕信遗民山入名藩秀春随别乘新大江清涨起回首媿知津士患空余志君今复近臣一官开器业二父独君亲茶井行云晓莲亭釀酒春临分无限意望絕马蹄尘

春日江上

山市风欹树花津雨涨泉路分归越客春入下潮船嗜懒终违俗无成数计年残梅如有待耿耿映青天

和友人

楼月窥寒上林霜到晚留斯文须命重白发为人秋世味何妨熟梅花不受愁向来乔木意鬱鬱在溪头

和巩志道宪郎二首

嫉恶思桓典论交慕季心共知天下独信有古人今经济关时用驱驰阅事深朱弦宁小试清庙待成音闻誉乖同语观诗早会心本非前有约便恐後无今壮事青云濶秋风白发深犹须闻?尾千载贵知音

留印冈山中

村旱谿源絶年虚鼠雀饥庭风扉自语山雨客先知穷达堪杯酒暄凉任鬓丝梅花春欲动不尽岁寒期

故里

兄弟各逾老青林祗旧观午烟山驿静社雨水村寒燕子风当户桃花客倚阑莫论千载去且共一杯欢八月十四夜阴更阑月明二客小饮二首【壬申】

秋暑过常岁及兹还早凉无言花外月随意竹间觞故友可谁共佳时良自伤未忧明夕事?复此徜徉城中高列宴我饮不盈觞二子了无语微风来自长旱余云满地酒醒月生廊却忆吾兄老空山夜更凉

代挽文母欧阳夫人

忧乐三生梦哀荣百世心生还仍有子死别本无今风雨余藤绣江山照祝金犹须闻孺慕行道自沾襟

挽王隐士

学可高儒传心宜表逸民百年偕计梦五世未衰身礼乐乖时好阶庭可席珍一门从似昔四境欲无人

挽陈隐士

世事寧須古斯人已媿今孝慈千指族饥溺一乡心路断书声在山空隐德深平生太丘长相望一沾襟

挽聂学正

守道成憎忌谈经得苦辛斯文元有命今世复何人耆旧频凋丧风流絕笑顰明朝春草綠更过大江滨

挽刘天秀贡士

异代贤能士空山礼乐心飞扬知谨厚患难见深沉取忌元违物能言胜遗金哀诗将底用万一是知音

挽高志翔教授

悟早为才役吟工被墨磨生无百年半天忌一官多嗜古心如独同尘意自和人生须底物一石两嵯峨

挽刘子章二首

福泽晚逾盛诗书早自修刚肠空百懦定力胜羣谋客意花前酒书声竹外楼诸孙今满眼九地欲何忧才杰古难见乡邦幸有人相违十年久又作一丘新翦烛山窗雨看云水檻春南阳慙不送宿草一伤神

挽罗见大二首【官録事】

经术追欧夏科名并愈詹入官身似隐涉世德多潜时竟难行道天如不福谦三丧今始葬老泪不胜沾忆昔过从日清言早悟玄柳家从有子王令竟无年亲友生前合身棺火後全何时携絮酒出郭酌荒阡【见大少日过从趣尚与俗异及登第谦约如昔薄俗便谓其不自振举吾尝谓使衣冠士得如见大百数相视成风天下贪傲习当少戢然竟不得年以死家祸随之不知造物意竟何如也故为之怅惜】

挽毛齐芳二首

少壮元难挽天人苦异驰艺高文遽葬科复鬓先衰乡曲空前辈功名又一时吾犹尊往行人但信穹碑少尝轻笔墨晚欲老田园世改声名在山深齿德尊教经元自信閱世与谁论有未知风致惟应视子孙

挽文逊志学士二首

声名天下士人物玉堂风坐失杜羔孝真成嵇绍忠壽无人世半论有後來公今古元如此江流日日东世情贫自陋交道贵方知人共迎天使公仍似昔时相收犹有意此别遂无期何必南阳送全胜百里悲

挽解昭子内舍二首

异代胶庠老空山礼乐身世犹尊善赋吾自敬全人县改遗民尽科兴进士新悠悠相送者未解一沾巾识公无弱冠读志亦华颠道寄人耆俊年催輩後先濶疎心独在今昔泪潜然梦记东门路惟应树拂天

挽刘子昭二首

科目心如少山林道自尊百年千变阅四世一经存老佛资玄悟交游记格言风流何处识彷彿在诸孙灾疾偏成慧功名并作年山深耆旧化德熟子孙贤巨笔频追诔孤坟定说玄古来賈志士相望一潜然

挽曾德裕学士二首

家出南公旧才超北学先少年金匱史壮节玉堂仙起仆真成梦风流自可传向来终大用端不待长年丈夫不伊傳当复附扬班学猎千年上名成一日间无谁歌种豆政自赋囚山短短如堪恨英英可复还

哭萧安国州判二首

二十声名起秋鷹纵远空雄文西汉意和气大程风一念无憎忌平生肯异同悠悠真宰远好恶若为公早日分隣烛中年隔宦邮青衫南徼雨白发洞庭秋风谊真堪哭交游取次休短修同一梦华寂亦何尤

十五夜无月三首

久待中秋月还成今夕阴感时一杯酒悼往百年心凉鴈去无影候虫偏作音姮娥应耐老谁与汝同斟今夕中秋月亲朋各一天羣英洪浦酒二老浙江船【萧芳洲刘申斋考试江浙】宇宙同有役山林独信缘五羊诗尚在搔首更凄然【彭冲所去年中秋留宦广州寄诗时已死】

去岁中秋月初归自故乡老妻旋具饌稚子屡传觴阅事多晴晦吟诗隔在亡麻帷哭声断灯影耿空堂

中秋和甥孙李玄时敏

明月不可待好怀谁与倾
衰年惟酒盏独夜更蛩声
风雨孤灯语亲朋四海情
得诗还自遣何用计亏成

和罗士奇游洞岩见示二首

桃花不可见春殿白云齐
世外流泉好人间去路迷
神仙游汗漫过客爱山溪
欲往今衰老谁能此暂栖
昔往兴遄尽今游期未齐
天连华盖起山抱白云迷
树老时来鹤星低半在溪
故人题笔在遗墨似鸦栖

又和游龙寂寺二首

境近不能往山神岂见哈
不知千载远定有几人来
古树含元气晴溪转晚雷
老龙今已寂谁复与争隈
良游亦邂逅缓轡语相哈
寺悟三生熟山从七祖来
敲诗闻愈岛入社有宗雷
何日横塘路相从钓水隈

元日试笔示儿孙【己未】

酒盏频留臆钟声忽报晨
天开元日霁雪度两年
春学贵资身早心当与岁
新科名虽外物未许逊他人

元日和尚文韵【己未】

酒为消愁进诗因理病疎
倘能家少累未问福何如
腊雨催庭树春风入案书
卷舒寧有道未免学籛籥

送曾学万入京

郡东有乔木诗礼接云来
昔荷丈人厚今观此子才
南风三楚濶春日五门开
郭隗间阎子黄金为筑台

赠刘生季恭

之子恩江秀翩翩笔有神
颇能研六籍蚤欲屈干人
夜雨虫灯暗秋风鸛翮新
科名直余事吾道要知津

故里晓坐用立敬韵

晓起复危坐萧萧闻马嘶归云山色静宿雨竹枝低客意空山笛秋声隔屋鸡
广南方盗贼疲
卒困山谿

八月十四夜与侄厚对月

有酒不嫌薄空庭慰寂寥幸同看好月寧用计明宵驿柳知秋早阶蛩语夜遥
仲容差更胜乔木未应凋中秋夜杨伯允坐间以一年明月今宵多分韵得年字

还往家相近栖迟意自怜赏心宜美酒抚节忆流年薄暮秋初肃明宵月更圆【时十六夜方望】
兴阑横笛起共步小溪边

十六夜饮道立侄孙小斋二首【斋旧为楼每看云望雪於此】

忆昔看云处如今待月时歌残林影转语剧酒盃迟堂构诸孙在桑榆二老衰悠悠时序意谁
与共心期月轮明似水病眼看生毛【南谚云月子生毛雨落成槽】佳节留乡好衰年待酒
豪星河三极动风露九天高不尽诗书意依依望尔曹

归城道中

轧轧舆穿陇迢迢路向城村烟茅屋午篱蝶棘花晴偶见迫田务坐慙疎礼耕遐瞻多内悼一
树白云生

六言

清明和欧阳山立二首【己丑】

江南二月三月野水一村两村花落人家寒食燕归山馆黄昏

细雨海棠成子余寒江燕初归立马桥西沽酒行人未试春衣

鳌溪山行和彭琦初二首

照袂晴江浅浅迎风青鬓疎疎看山拄杖欲倦得句画沙共书

岩上石仙流雨滩头春壑生雷回首鹿门总角须髯如戟重来

春日偶赋二首

官路落花马过人家高树莺啼故里故人何处夕阳长在楼西

杨柳轻寒水驿楸花小雨官桥回首人间往事孤灯挑尽春宵

和龙麟洲题黄次翁黄鹤楼图

孙曹百战何在大江千载狂澜谁倚楼头呼鹤秋风落日危阑

桂隐诗集卷三

桂隐诗集卷四

<集部,别集类,金至元,桂隐文集—桂隐诗集>

钦定四库全书

桂隐诗集卷四 元 刘诜 撰律诗【七言】

和彭赞府琦初新岁陪拜黄堂之什二首

九州八极共年华未觉天颜万里賒雉扇排春堦立笋猊烟泛晓烛生花侯藩势重嘶千骑仙乐声高进九霞悬想故人袍带冷颇输高卧属侬家

金竹峯前共岁华新诗同赋酒同賒君如老柳春先緑我似寒梅腊未花晴日市眉行却月暖风客脸上流霞小桃忽露墙东萼春色宁遗陋巷家

和友人牡丹

红紫争推一翦新世间顔色直须真晓风低拥霞窠重晴日浓熏雾气春富贵自应高一世风流原不属陈人从今宴赏多宾客来往门前枥马驯

寿仲兄诚翁【八月十日】

故园兄弟昔成云大耐如君七十春明月欲圆犹五日白头相聚偶三人课书要寿传家脉止酒能安不病身寄语诸孙须用世不妨岩谷老遗民

和彭琦初见寿【丙寅】

陋巷秋风处士家回思千劫等炊沙少年曾似三眠柳老去羞看一日花白发夜深灯馆字蒲团日晏地垆茶故人賸作飞腾祝试聴渔阳一掺挝

和曹正中见寿

卜筮从谁问历家命途难合笑抟沙陈人我似三年艾冲气君如二月花奋迅终题司马柱清贫且共玉川茶明年须买东风马行遍长安不用挝

和张汉英见寿

吾里文章小晏家才情欲学贾长沙妙书鸿戏秋江水佳句风行晓苑花富贵未来歌扣角畸

穷相对赋煎茶芳年京国蜚腾近预想春车堕马挝

旦日试笔二首

炉烟烛影共徘徊手试春风第一盃万里星辰环极共五更鼓角挟春来凌寒柳意如先动
閱岁梅花不受催坐久不知天向曙出门爆竹发惊雷

老来节意重徘徊小桼犹横隔岁盃得句定知春早觉开门喜报客频来江山万古晴陰老花柳千林雨露催郡国升平人自乐城头画鼓响轻雷

春日酬友人

閱世情怀杂喜悲未须此意语羣儿故人每见逾相忆白发无情不肯迟杨柳未高春尚弱海棠欲动雨先知晴江浮舫儵鱼美乘兴相过会有时

和刘道渊

小巷柴门剥啄声斋炉相对得诗盟春寒未了花开落山雨频来窗晦明我自一经成皓首君方万里起修名人间变化知何据危坐东风看马程

和彭庭发

卷帘危坐似枯株微雨羣峯半有无山墓鸟啼寒食近人家花落暮烟孤病辞美酒空佳节老忆东风识故吾为问隣春余几许嫩黄一寸长园蔬

再用前韵酬周景叔

晴催红緑满高株赏胜闲情未肯无燕子楼台人影瘦海棠池馆月痕孤酒阑已悟春为客意乐何须土是吾夜久茶餅号渴蚓冰壶偏忆瓮头蔬

和王如隐游刘氏小园有感

曾向园亭醉吐茵重游满眼已无春江山惯閱人今古花柳何知主富贫梅雨飒窗朝梦熟蒲风到酒暮寒新向来谈笑俱成幻世事真成肘屈伸

和友人宴王氏士敬新居

论字吟诗似晋唐两窗南北诵声长楼台燕子踈踈雨院落桃花短短墙罗扇迎风人入画朱帘望月夜生香诗情老退难描写獭髓谁能学补妆

谒杨诚斋祠墓

溪水南来合两津小蓬洲渚尚横陈祠门遗像凝尘网墓道骧兵卧石麟园墅乱畦耕落日子
孙残屋杂编民乡邦名节嗟何及每过长途泪满巾【所居江中立亭号小蓬莱】

和萧孚有闲居即事【庚子】

二月客愁如蝟蝟市头酒薄无奈何桃花浪起春风濶燕子寒生社雨多畏见饿夫蒙败袂断
无游女试轻罗传闻进士御唐殿尚要力田回汉科

南隣杨二居士邀饮二首【庚午】

故人南麓杨居士薄暮邀客分清罇百年隣里发俱白异代衣冠我独存【坐间惟吾冠巾】
鸟断空山孤树悄马嘶小驿一灯昏先朝文体浮云变二仲能来可细论

故园不见经年久花竹手栽能半成雪後山林经浩劫歉余耆稚贺重生谈经扬子今谁似能
赋相如滂有名後世有人寻遗迹祇应指点麓山横【故居吉文南岭麓角山下】

送刘巨川赴惠州海丰巡检【太博之孙】

须溪孙子好才名百丈龙山绕屋春文学尽交天下士弓刀更治岭南民盾头墨湿长亭雪扇
外旗麾列嶂尘若见罗浮花烂漫可能远寄一枝新

和萧孚有霰雪

磊磊天河万玉泓朔风吹散不成球羣仙整驾鸣珂动六合为盘放汞流少妇凝妆疑可饰饥
人梦饱误消愁若教天巧如人力应费滕神几刻鏤

庚午上元雨陪学翁兄饮

元夕相看白发兄灯花应笑两无成村醪薄薄客三五疎雨潇潇漏几更老境情怀多旧感荒
年市井少欢声兴来欲听祈宾唤门巷成泥懒复行

再和上元韵答彭琦初

平生相视只殷兄文字江河落笔成时序百年罇酒在风霜万里鬓毛更交游依约青灯梦豪
杰消磨画角声见说教坊歌尽变无谁能记落梅行

节後数夕再和

少日灯窗共弟兄鼎丹九转待仙成文穷敢信辞章好身老偏惊节序更旷楚星河浮夜气高
城钟鼓入春声若为胜日能无事共对梅花酒几行

闲居即事【庚午】

小窗拄颊看云过不断东风吹鬓皤松古何知春至早花浓偏值雨来多已安薄相食无肉更
觉衰颜酒不酤无力能为移粟政有愁自赋采薇歌

和萧孚有新年二首

贺岁千门怀刺漫吟诗一室砚池乾灯期五日如此雨花信新年第一寒里巷浮沉逢酒饮江
湖瓠落出门难故人赖有萧公子肯共过从散恨端

闭门十日雨漫漫诗思焦枯酒盏乾杜若水生江舫集海棠风起郡斋寒千年竞转青春易百
药重回白髮难知子颇忧天下事可能参错立朝端

彭琦初用坡翁纸帐韵惠建昌纸衾次韵二首为谢

雪绵揉碎密萦连清卧梅花性更便茸煖何须蛮客帐座寒但少广文氊窗升红日那知晓梦
压白云疑近天但恐少陵茅屋漏雨宵沾破不成眠

盱溪水暖楮藤连练作云衾与老便补幅全胜羊续布裹身疑是邓侯氊温欺臬絮娱霜夜洁
与梅花共雪天要识故人投赠意可贪一暖但高眠

和彭琦初元日盱江见寄

木德行春史告迎高花细柳动江城丽谯鼓角中天晓黄道星辰万里明短褐空怀风雪敝老
筇惯閱岁年更灌园且饱皇天赐肯事钱神唤作兄

交道平生雷与陈相看岁晚掇皮真江湖宦客孤舟夜城郭诗翁白发春雪塞得晴翔去鴈冰
池犹冻困潜鳞须教授老相还往倘有清尊便不贫

琦初追和余去年上元韵再和为谢

梅老今为万卉兄皇天又办四时成年华不染须千戟春气先归鼓五更世与豪英来不尽物
随造化运无声人生得失非真是倘共花时载酒行

中秋和萧孚有二首

早云卷尽昨宵陰
节物偏共酒盞深
病骨怯风难久坐
衰年见月易伤心
金螺水落千峰笛
白鹭城高万户砧
颇忆五羊台上客
频从驿使寄新吟

万里青天无寸陰
酒阑秋气入衣深
百年晴晦中秋月
四海悲欢此夜心
佳节有情惟藉酒
孤踪多感更闻砧
文章政要追周雅
底用欷歔学越吟

中秋和学翁兄

七十老兄生理浮
未寒先试木棉裘
管弦四海华筵月
钟鼓半山僧寺秋
【其年学耐偶寓僧舍】
醉里一樽歌浩浩
老经百事叹休休
故人相弃谁来往
惟有殷勤白发留

南山故居偶成

南山盘鬱走虬龙
乔木先庐在眼中
明月渐高生夜气
骄阳未了见秋风
塔篁愈净如庄土
墙柳先衰效秃翁
漫有河东诸赋在
肯将颠眊拟扬雄

赠陈县丞子达夫游广西

西昌邑丞世伟人
凤雏超超殊不羣
壮志终乘三汲浪
高怀且看九嶷云
炎荒山水能来客
盛世贤良际右文
见说故人知己在
岂无大阃荐方闻
【汉书方闻之士】

中秋月暗和萧孚有二首

郭门望月碧云凉
云里吐吞和璧光
永夜江山含道气
空庭风露带天香
有愁惟恨壶觞浅
不寝偏闻鼓角长
顾我孤生余短发
请君一笑解离肠

捣药姮娥古羿嫔
深藏厌逐老天勤
孤城凉角自吹夜
万里长风不破云
帘影萧萧残烛烬
秋声渺渺过鸿羣
少年呼月狂怀尽
细酌无劳酒十分

春游和徐録判

録事参军姓字芳
爱民晓出马蹄忙
千门春色归桃李
四海人才待栋梁
兰省清风催玉佩
蓬莱白日饮天浆
裁诗欲效琼瑶报
自愧全无时世妆

和萧孚有午节舟中

槌鼓踏歌江水阳
参差人影树堤长
百年佳节孤舟雨
两岸青山过客觞
泽畔犹怀渔父问
坐中幸少次公狂
悬知北巷今宵月
翻忆南风十日凉

登滕王阁

来往南州老一经登临转觉鬓星星
戍兵昼守滕王阁驿马秋嘶孺子亭
舸舰北连章水白楼台西映蓼洲青
鹄袍多士谁能赋谩笑王郎笔意轻

古洪舟中

旧怀经济今头白犹与羣儿共往回
岂有文章拘敝法无谁岩穴访奇才
秋风白浪粘天去落日高帆逐鴈来
永媿东湖徐孺子柁楼三酹菊花盃

登金竹峯

一峯岿起何奇哉太古削成苍壁堆
四野云开墟井见半天钟动鬼神来
山前戴景全消歇洞口朱陈自往回
谁画先生心似铁秋风千丈立崔嵬

饮崔仁卿宅【崔世为军官仁卿登第】

烛出马嘶人正欢满堂急管与清弹
红袞偏劝少年醉白发先惊暮色寒
海内科名销武伎坐中谐笑忌儒冠
古来富贵须行乐却学唐人强自宽

送吉水叶教授归金华

宗庙巍煌百废修诸生济济异常流
故家文献见此老盛世弦歌遍下州
字水春澜明讲席金华凉月弄归舟
方今天禄须才士浩荡风云万里秋

和李长翁知事宜黄卷雪亭【亭久属他人至是复归】

李氏园亭汝水滨百年乔木复回春
云涛不改当时白栋宇何知两姓新
鹤语已随丁柱化燕归犹向谢堂驯
明年赤壁江头笛吹起天风万里身

萧氏母称寿宴客和萧芳洲二首

春苑曾逢一角麟晚为隣巷灌园人
百年频醉瑶池酒四座谁怜白发宾
地纵胜游宜入画天留闲日足娱亲
蓬蒿满户无来辙时过东家洗渴尘

风流四海一平林【其祖安抚号平林】
乔木参天系客心燕子池塘诗句好
蒲花帘幕酒盃深仙人宴罢生明月
公子归来长绿阴为报闲居须续赋
不妨徐起作商霖

晓起用麟孙韵

七月今年凉气高墙东古木夜萧萧孤城残月角声动野屋秋风鷄乱号万事惟余双短鬓百龄须用几绋袍故人莫荐扬雄赋衰老难胜执戟劳

壬申中秋无月和国通侄【通仕至理问出为花园王氏後】

数客相看坐小庭老来逢节倍关情江城残角雨千树野郭秋风夜再更万里新凉今岁早百年佳月几番明大兄诗句今犹在无复相携赋夜晴【学耐兄旧有夜晴诗】

甲戌和萧孚有见寿二首

少日曾期诸子先如今潦倒且樽前鬓丝夜雨穷东野城屋秋风老玉川自度新词传玉笛莫将旧事问铜仙文章星斗真何用但把长鑱了暮年

玉颊修眉入绘图自骑紫凤衣霞裾佳时烧笋洋州画长日临流逸少书岁月浮沉羈羽翮风云变化看鯢鱼君家累世堆牀笏未可逢人赋遂初

和涂率修见寿

袞袞高冠盛玉堂牛衣谁复念王章百年风雨青灯在万里乾坤白发长我懒惟应栖畏垒君才终许奏明光郭门东转三泉美来往还能共酒觞

和胡履平见寿

閱世千霆复百霜空余短发白成黄君如硎刃千牛解我似车轮四角方城郭故人今雨散衣冠乔木有书香亦知人爵非真乐政欠成都八百桑

和杨贯道见寿

学易未成先退藏鹤鳧非短亦非长文章底用追韩孟富贵元应属禹光已老不求方染髻平生惟有句成囊星辰剑履危朝露甘老秋风一草堂

和张伯温见寿二首

忆昔青灯书满牀如今八尺见身长故山共听绵峯雨客馆同倾鹭渚觞豪杰自应超世美文章早已带天香高门佳气今如昨要继陈家起盛唐【其居唐陈长史故居】

萧萧短发不重新老去何由复竞辰百世光阴消铁砚半山风雨语铜人病余久看花成雾醉里犹惊笔有神浮世功名无念我相期早致日边身

和萧公着见壽

少年佳卉发春芒老大真如冻木僵天阙晓寒遗太白鲁城夜烬见灵光嗟余学采云根药知子应攀月窟香学问无穷功业远好骑驂駟驟周行

和王元帅赴广东过快阁寄文同予

家世词林旧子期旌旗镇远路透迟金城老将三军略铜柱功臣絕域碑帐下风清环万卷盾头墨湿落千诗梅花荔子多高致寄与中州故旧知

送萧公着随父入京

乡帅萧公百代名子孙奕叶更多英山河胜览先苏辙政事长书待贾生宝砚纵横催殿对锦帆唱和记江行悬知祖帐南归日细马青鞵出帝城

送瑞州欧阳公源之京师【复圭之侄】

龙飞万国庆清平衢室犹悬进善旌天下文章多贾谊山中儒宿起温生相君位重开翹馆令族才高待大明好似故家题虎榜马头春色满都城

故乡夜坐有感二首【癸酉】

诸兄弃逝有乔木病妻死别今空帷凄凉听雨夜如此老大还乡心转悲风气百年无旧俗江山满目记儿时孤灯明灭可谁语援笔怅然还赋诗

南山之麓旧诗翁短褐萧萧不御冬壮节痴慵消白日暮龄忧患谢欢惊文章无用空千牍气力逾衰托一筇喜听五门新放榜九州才俊马如龙【是年九月初放春榜】

中秋陰雨

疾风掠雁不成行常岁中秋无此凉万里陰云围野郭中宵落叶响回廊苍茫天地容吾老寂寞山林识夜长犹似姮娥未忘世天衢隐遁发孤光

寄壽永平主簿萧克有

老吕相期二百年清风共济洞庭船万山原是丹砂国百里争看白凤仙海内衣冠怀旧德人生诗酒是清缘平反有政须频报絕胜斑衣舞膝边

和友人游永古堂二首

流水小桥园路迂虚堂午憩息徐徐山空转觉禅机寂地胜不知人意舒静倚修篁闻鸟语闲
寻败叶认虫书辋川金谷余荒址三两园翁自结庐

胜日偶寻山寺幽老僧石鼎沸茶馥市穷路转得此地人语声轻在小楼君似渊明来白社我
如苏子说黄州雪乾沙静春晴好出郭何妨更小留

海棠和友人

娇态偏宜夜烛看绛肤欲映晓帘寒雨酣虞帐千珠泪日转仙炉万粒丹华屋幽深来客异名
花寂寞闭门残请君浮世轻千变何惜佳时寄一欢

和萧孚有闲居即事

天气初宜小扇轻故人不至巷泥深水村鹭去千畦雨山郭花开四月陰愁里有谁同细酌老
来并欲废清吟若为共息尘劳意行遍青原处处岑

和罗起初观校场翦柳

治世衣冠立九天将军语勇尚欣然元戎拥帐孤罍兀万衆围风一骑先三箭鶑鸣军尽贺两
行柳断目无全鼓收人散成弓远惟有牛羊纵满阡

游新淦塔寺

未信明时一士寒却从六合得兹山鼓钟不了行人老天地无言古佛闲地迴树林环晦霭雨
多田涧互潺湲不知今日无登览曾有何人此往还

荷花庄小留

城西郭门白发人印峯旧隐归重寻故人尽化青山雨古月长悬老树林野庙鼓钟春社过村
家灯火暮寒深平生谬有相如赋老大何堪卖一金

和友人病起自壽二首

药椀常行鼠迹尘花枝闲结胆瓶春病余不放吟诗乐别久重如识面新鸚鵡茶香分供客荼
蘼酒熟足娱亲与君共语如铜狄长作比隣还往人

池水春浓转蕙光蒲萄新发过檐长许家丹熟千年壽韦史诗成百世芳刺绣帘栊莺语倦读
书院落絮飞忙舫轩珍重孤琴在早晚还须奏舜廊

壽友人母

闲居能赋似潘郎夏枕生风碧玉凉天饷麻姑千岁脯春留瑶母九霞觞绣帘桃实丹云熟粉院蒲花白日长须信高堂衣五彩絶胜万里带双黄

辛亥上元雨和学翁兄

街鼓冬冬满暮城年年风物自依辰欲穿花市霜生鬓待得灯期雨妬人嗟我已应成散栎念兄政复坐方轮烛花故作垂垂粟尚喜先生句法新【翁时贅长塘曾氏於郡城为密迕故每上元与翁会更多於诸兄而赓和亦多】

三月三日和丁教授陪拜黄堂三首

绦纱千炬促僊班两庑峩峩峙竹颁天上黄云严鹤驾人间红日拥鳌山九州竞进千秋监万里如瞻咫尺顔与宴簪花沾下土应无後至立县间

文武衣冠蔼衆贤五更朝马集鑣聯乾坤昌运重三日海岳懽心亿万年官柳傲风明翠辇帘花醉日丽华筵吾皇祝网多仁泽行乐无谁更击鲜

闾阖东风瑞霭晴霞觞欲醉内官迎龙輿驾晓开三殿雉扇班春肃九卿露重碧桃低太液日高黄鹄下昆明书生无限封人祝遥想天墀颂太平

友人杨居所往金陵省忠襄公墓学士虞公送以诗壮鬱沉痛使人流涕因用韵为别次篇远哀雍公以虞诗序及此故也

边陲侵軼寻常事但恨朝臣少寇莱汴水殿荒秋鸟下金陵城落暮潮来忠臣遗庙长存祀异代诗孙肯一哀理櫂又为江海去不妨览古更迟回

窥渡骄兵凌采石抚军使者出蓬莱东南国势一朝定吴蜀江流万古来诸葛八图司马走临淮孤塚杜陵哀只今贵胄知天道奎壁光芒与汉迴

寄旌德宰刘粹衷

吾宗令宰才名好别後相忘已二年海内旧推晁氏策江东今诵鲁恭贤清台日月资衡监紫笔烟云发翰篇早晚考功催上最买船拟待字江边

简晏提举

胸中至宝等隋和鞭凤曾闻第一歌天地百年乔木在山川万里宦途多诗成夜月扬州笛赋

罢秋风赤壁波读彻大编无一语低头东野愧如何

辛亥清明日陪彭琦初黄用实八人同登螺山瑞华用仲子尚文韵二首

小礪回碕响石钟意行忽忆去年重楼光纳胜空千境山势增高得万松经案香销风动麈禅房花落昼无蜂嘉禾桥外经行路惟有青山似昔浓

故人新句妙何陰一笑相看得会心胜日从来成邂逅老怀正复托浮沉山含万古春晴薄水挟孤城雾气深随意酒家聊复醉暮归未用典腰金

再用韵酬同游诸公二首

听尽城钟听寺钟暖风扶醉觉衣重粥鱼饷午催僧饭酒榼行春酌墓松羈客得晴辞枥马归人分路各房蜂簪花泥饮田间老我自不如渠兴浓

万古乘除阳复陰四郊歌哭一伤心天留世外羣仙隐地俯城中万屋沉人影夕阳山郭迴野花寒食墓亭深古人饮酒元非达要胜崎岖利橐金

又酬同游韵

墓里何人是可儿生前当复喜吟诗百年风物归双鬓樽酒江山偶一时觅寺凭高人慷慨簪花扶路影委蛇儿童能赋何堪喜正觉吾生已有涯

送郭可玉肇庆教授

万里东风送驿帆大堤杨柳照袍蓝已观泰岱行天下要识梅花过岭南才气自堪供盛世文章元不是清谈明堂礼乐须公等学掾遥知不待三

送袁从逊赴萍乡州税使

春深山路乱花开宾从徐驱候骑来要地车航通四境盛时关市亦高才簿书未用妨山水气貌终当重省台李郑旧游知近否杖藜携酒试徘徊

和萧可则

平生君我掇皮真间里相望白髮新共似顔郎终未遇谁疑郭解定非贪盛衰正可亡何饮还往寧妨见在身今世翹材须杰士会看代对笔生春

送苏学士

翰墨元如万选钱云霄横鹜正青年宫花未试郎君马
门雪相看坐客瓊已觉功名须命分定知学校要才贤
风鹏变化终难料眼看青青九万天

送彭宜宾赴潭州学録

盛年才气自无双振铎长沙佐泮黉人物古来推楚产
文章天下说欧乡湘江春水云山近岳麓秋风草树苍
豪杰功名须异路定超天马到长杨

丁巳上元前一夕留饮萧氏斋中和友人韵二首

香篆萦帘九曲盘清樽对客语更阑不妨小雨留人住
未觉东风到酒寒绛烛绕廊春意闹玉笙连巷市声欢
文园元有吟诗渴更爱茶香透舌端

楼外青山势折盘春愁正在最高阑落梅门巷行人少
细雨山城薄暮寒醉里闻歌偏易感老来抚节强为欢
戲拈诗句偿今夕尚觉春风满笔端

饮罢偶赋

雨中箫鼓满山城节序偏供感慨增贪听清歌行美酒
不辞白发看华灯粉登夏果明羣璧菜挟春风响碎冰
却忆去年山水夜笼纱醉踏雪棱层

枕上再赋

十二胸中策太平敢从明世叹无成人方走马穿花市
我亦着书赋铁檠午夜春寒偏到客百年节意独关情
天机流转谁能识明日千林看发生

元日和尚文韵

炉瓶得火自喧喧守岁何妨更不眠爆竹四传知欲旦
屠苏首饮记它年破愁未许疎椰榼助煖还思买艾瓊
天运先从梅柳见向人偏自作清妍

送黄新之教古端

声名畴昔重南州又看儒冠理驿舟要识海波穷壮观
直寻石砚亦清游桃榔叶暗诗筇瘦蕉叶花浓讲席秋
帅府祇今须杰士知君谈笑幕青油

题安成李氏秀野亭

人生役志是虚名富贵谁言胜隐沦数世衣冠前辈意
百年亭榭太平人美花修竹随时胜流

水青山绕屋春今世恨无摩诘画不妨诗笔发清新

游新淦兴善寺三首

不待前期偶出门酒壶诗担散郊原树连山势高藏屋路挟溪流曲抱村老遇清游偏易感醉思往事了无言此生定合重来否细踏沙头屐齿痕

欲雨不成云往还笋舆稳载度禅关青天四匝高峯外白水交流乱亩间经论已随仙客去佛烟长共老僧闲竟忘栢子西来意惟有溪声送出山

禾陇高低千万区野花荞麦半萧疎山深木石含元气地峻云烟接太虚殿牖旧尘扃古佛山门遗扁认尚书兹游似亦为天妬归路萧萧雨满车

张自翁有诗赞兴善之游用韵为谢二首

终日居山不见山却须高处共凭阑便寻惠远觅方外安得孟君来坐间秋闰风微乌帽稳山深雨足白云闲平生玉筍劳清梦为报先生一破慳

独乐名园屋上山竹深缥缈见朱阑山林岁月羲皇上诗酒风流晋宋间列宿高蟠胸次濶奔霆不放笔端闲一时唱和堪成卷自笑才情老更慳

再和曾学士

平生正自赋囚山尚有清游兴未阑胜日酒樽思向下西风世路笑黄间江山閱历羣贤尽传注消磨百岁闲嗟我与公当几见溪桥来往未须慳

和曾学士见贻二首【求作刊乐府题辞集名秋山笛谱中多情话】

囊有相如卖赋金笛中一曲可沾襟武夷夜裂千峯石黄鹤秋吹万古心天上知音梅柳动山中怀旧岁年深清平进调须君等不向明时叹陆沉

风水霓裳妙可听断云过鴈笔纵横扬州杜牧楼中梦淮海秦郎天下声骆马柳枝余感慨沉香芍药待才名从今伐梓供新谱流播梨园与妓营

和娄行所雪二首

眼看大地尽虚空元气沉沉万籁风仙鹤晓归千载柱玉龙夜战九霄宫人方羔帐歌初缓我亦渔蓑句未工破蔡骑驴俱有命烛花闲翦小窗中

盛年霞佩簸明珠坐愧前鱼不泣鱼岁晏多愁仍作客老来厌事未忘书君宜翰墨收功早我亦田园作计疎莫忘溪头来往路笥山微雨水舒舒

上元次学翁兄

春似高人唤不来轻寒钟鼓自相催年华未了供灯市节意聊堪托酒盃菜甲半存冰地裂桃花预约雨时开故园风物今何似惟有初心不受埃

赠萧克有赴兴国税务

小驻青云九万程涂商里贩乐寛平古来关市多贤哲盛世舟车少算征雨涨玉虹滩石减春深金鲫郡池清看山携酒吾曹事定有新诗许共评

赠胡履平偕克有之兴国

主宾二美古称难笑语轻舟十八滩幕有仁言官政善士从知己旅怀寛文章不肯时科试山水元须胜士看想见鬱孤吟赏旧渚烟汀树满毫端

和友人游洞岩追用须溪韵二首

岩里桃花千岁开岩扉无复老仙推万山挟洞人间断一瀑如川天上来古殿碑横苔入字忠臣像老月窥台平生欧尹神清兴为约秋风更往回

云峯彷彿画图真石户深藏万古身山水何知天下事神仙本亦世间人日高坛树三门午雨涨源花满洞春济胜寻幽平日意天风吹动华阳巾

再和游洞岩友人韵

白日行云护碧峦使君应在最高坛江山有景待人胜富贵成仙自古难夜月飞笙王母下灵风啼鹤石门寒眼前佳致不常到更愧嵩恒万里寛

和奔元凯

五年轻寒到紵衣小?坐数晚花曦清时有道微生拙白发无情壮事违万古成亏余物论百年晴雨看天机知君已是蜚腾暮欲访君平问少微

和王观善赋弟观光一览新楼之作

一室高明眼界平东头正可着难兄青山流水当书案过鸟行云落砚泓盛世无人忧会敛高

才自古托耘耕蟹肥酒熟君当醉不用哦诗费度营

谒安成魏君坛留宿其下

一溪抱峡玉潺湲奇草幽花满古坛千岫月明丹石去万松风转斗垣寒白云可踏天垂屋老鹤不归人倚阑定有吹笙王母下露凄梦冷欲生翰

絅村道中

少日修涂几往回犹持华发走尘埃江波滚滚晚风急山气茫茫白雨来十里陂田寒麦短数家野屋小桃开天机物理谁能诘且醉春醪浅浅盃

发洪州

童稚相催忽白头西风满袖古洪州重阳天气村村雨残柳人家处处楼樵牧忘机鸿北去古今无迹水东流卸帆旋买枫林酒饱睡归舟十日秋

九日和鞠景中二首

秋风门巷马萧萧佳节相看愧寂寥岁月蹉跎供客老心胸垒块倩谁浇九州子美犹能健千载渊明不可招短发隣翁簪菊满逢人犹记说前朝

少年共饮赋苹萧老去欢惊日寂寥海内渐惊前辈尽风流更觉後生浇纪时尚有篇章在应俗还从里巷招坐想清时文物盛茱萸分赋满中朝

重游青原回途过清都台和坡韵

门外江流万里东青山曾识老仙翁百年客髯东风里两岸人家落日中蜡屐平生须几到桃花前度有谁同文章随意成千古草树荒荒老屋空

上元留宜春罗氏一本庵

帘外行人曲曲回雨余趺坐听溪雷语音未觉乡风异山水何知此客来塔鸟飞飞行小桁盆花的的照深盃儿童不负今宵好旋作红灯挂落梅

游青原山

百叠青松夹路苔白坡隐隐转晴雷雾消万瓦行空动钟静三门照日开石似祖师无语苔山如处士待人来古今湛辈消磨尽小倚危阑首独回

和刘实翁

出门握手振尘裾妙语犹能破叹吁陌上晴花吹婀娜墙东风管度喁于百年有酒春如许一笑无渠我亦孤山郭青青何处尽种松未可待全芜

寒食和友人

二月微暄试白团得晴一笑未应难故人不至花频落好句初成酒半酣郭外渔樵无世念墓门翁仲看人欢夜归坐听潇潇雨自剪西堂寸烛残

江上清明和友人

北郭山花开赤?东津榆荚作青钱大江万里云连野元气千春树接天豪杰尽随流水去文章未许俗人怜感时惜别俱常事莫放清愁到酒边

喜李伯英至自燕

犖路天寒雪没靴朝鸡夜杂扣牛歌五年相望高堂健万里归来一笑多献赋未应惭大礼封侯终待取长罗缁尘败线皆春色门柳新年已扫蛾

偶成

世事难谐似热沙朱颜不驻转年华浮生又听山中雨胜日长看客里花远树行人峯入画春泥小巷燕谋家故人不隔东风外日暮吟诗寄过鸦

暇日至吾庐亭

小池浅浅落红堆犹有荼蘼可酒杯种树十年堪共待扣门一笑胜频来楸枰坐久沾危露纨扇晴嬉堕脆梅为报诗人笺注苦暖风天棘蔽堦苔

渡江

白沙青草接平皋水郭津亭系钓舠晚市千家红蜃动秋波万顷翠鳞高江山如昨少年去天地无情客子劳一笑同舟屠贩子俯船亦似惜霜毛

和友人小饮鹭洲

草树长洲起夕陰谈经人远去鸿沈陌花几见遗民老城鹤能言千载今明月大江秋入笛凉风万竹客横琴却思少日经行处沙港扬舠五尺深

和友人游青原

忆与诸贤共解骖重来扣策感羊昙渊明未了溪边笑次律寧知树下函胜地祇今供过客禅机正复入清谈古今邂逅俱成佛试向庐陵米价参

送文尚志赴寧州判

天上清风起凤毛貳州草草试英豪乡人未老旗旄惯世故无穷閤閤高綠鬢朱衣生爽气红妆画舸下轻涛政余闲品新茶味想见吟诗压楚骚

燕

穿径回檐掠沼波语言扰扰竟如何形骸已外机心少天地为家客路多五月帘帟毛羽足百年巷陌子孙过废兴正尔渠何与一笑诗人费苦哦

和刘尚友题夏深道南斋【深道昶之父】

曲阑横槛秀无尘短卷修琴澹可亲草意欲供新得句桃花犹记旧来人江山有待天寧借客主俱佳笔有神更爱屏梅丈人行要论高品不论真

九日同萧焕有兄弟萧安国陈诚伯彭天玉华明胡履平涂率修兄弟泛舟观桥吉塘饮酒桥庵顺流而下登西台寺城冈山复饮山亭观先朝所赐庙神刘诰封及砚泛月而归和焕有韵

斜日千峯生纈斑凭高饮酒未知还百年寒暑朱顏变万古兴亡白鸟闲野叟岂知酬令节【是日耕夫极多】高人从昔爱名山回舟月色寒如水共指城楼杳霭间

老来诗兴尚能豪九日登临不惮劳山挟鹭江千里去人行鹭岭九霄高萧萧掠帽风无力炯炯摇波月有毫更欲纵谈归意迫高城处处发蒲牢

和涂率修

出郭意行何所归史家园里得新诗野香一迳客稀到秋兴满山僧不知老爱故人鸿得侣愁欺短发叶辞枝他年尚有经行约莫忘西门见月时

和友人吉塘桥

曾唤春舟不肯回祇今两岸纵徘徊人随飞鸟空中过仙跨长鲸海上来驱石势疑秦迹幻济川事继禹功开偶然题柱寧慚老笑倚危阑试一盃

又和登神冈山

俯看人间渐渐遥羣峯在眼不须招大江平楚几千折老庙空山五十朝野旷云鸿风谡谡天
虚秋树晚调调诘绉赐硯传看久不惜归舟月共宵

又和涂率修黄泥上塚

扶醉行歌日未残游人风致路人看山城天气菊花早郭墓秋风麦饭寒得句何妨催落帽杖
藜岂必逊凭鞍身名盃酒俱从分邂逅相携胜素欢

赠何善积【抚州何时字了翁宋名士其侄大虚复知名善积大虚子】

大虚相闻不相识今见其书真国琛豪杰不多留竹帛文章自古半山林故人狗监谁称赋贾
客鸡林定卖金传业佳儿今喜见五弦应可得嵇心

寄题龙兴万允善竹友堂

万君隐居湖水湾楼前数竹胜满山九州佳士谁可语尽日此君相对闲樽俎风凉琴不断亭
台月冷风初还神交千载徐苏近俗驾无劳此欸关

十四夜月【乙亥】

村家薄醪可醉歌瓦卮不用金叵罗世味真如今夕好月明何待十分多风来古树疑微雨云
散长空湛碧波须信谪仙贪痛饮犹胜子美苦长哦

十五夜月晕

西隣邀饮夜初深四座能歌有几人淡月外环清浪晕?云乱布白龙鳞闲情常恐良辰过老境
偏怀故里亲雨足墙东丹桂好清芬乱蘼一枝新

故居南山感兴

凉风薄日满天地团作人间一片愁衰柳马嘶山驿晚冷菰鴈落野田秋吕安潦倒黄公酒杜
子萧条白帝州欲说旧家无老杖藜默数昔经游

乙亥留故乡自壽

七十古稀今已迫回头一一记儿时三生我岂後商隐【旧常梦与李商隐语谓余乃其後身
】四海今无半子期盞斝有情聊畅适文章无用祇娛嬉旁人莫比耆英辈但好商山学采芝

贈曾伯璋岁晚归重侍下

城陌鷄鸣夜又晨归途才遇柳条新科名兴废浑闲事学业修明见古人大雪千山文旆起东风三世彩衣春诗邮来往应非远要见窗灯笔有神【伯璋从余学有奇材邃识掇科可必而遭逢科废犹大肆力於学业岁晚归省重庆时值大雪因赋此以别之】

送刘高仲考试武昌兼柬龙仁夫

又闻隣省起髯刘还共波龙学海游天下斯文宗白鹭庐陵遗老尚黄州孤黑谁擅三千字双鸟高鸣五百秋後夜月明南北共定知吹笛庾公楼

旧尝梦崔嵬若仙境者楼观肃然香气袭人得二句云天悬桂树三千界人在梅花万斛间竟莫省何故偶闲坐忆此因漫以梦中所见足成之【己丑】

珠帘坐卷烛花残殿上昭仪拥翠鬟红日牙旗明晓仗青烟雉扇立仙班天悬桂树三千界人在梅花万斛间始信蓬莱司下土坐繙前史烛忠奸

春日故乡意行和杨伯允二首

快士游从不在多清言雅韵过云和行春岂为花三朵买酒恨无钱两娑丘水迹陈乔木尽儿童学废古书讹临溪未可轻相别藉草何因更共歌

鹿山山下水流多小扇轻衫令节和隔屋高花风婀娜半桥野树日婆娑驿池水减蒲芽短山礧泥乾鸟篆讹乡里往还吾独老喜听隣屋晚弦歌

和高方大初度日登中华二首

仙仗临风立翠华殿门诗客帽檐斜霓幢曙景来三驾麟脯天香赐九霞半夜川岩灯作市千年日月鹤还家宴阑闾阖闻恩语海屋新筹与壽加

到祠七十二云扉倚视齐州一粟微万树挟风涛汹涌千峯倚汉石嶽碣银河垂屋天如近瑶斗当坛夜有辉欲与浮丘谈旧事琼楼高处未能归

送龚如逸赴南康学正

秋风千里送飞帆又献儒冠俎豆间美教古来无鹿洞清游天下少庐山弄雏彩服三年别骑马青衫一日还渤海家声元有旧云衢努力更追攀

和许山立见壽

两袖秋风酒一中浩歌无复问穷通极知白发形如木漫忆青年气搏丛随意文章逃俗谤可人谈笑有君同平生最是鍾情处明月娟娟水馆东

和彭叔和见壽

何必致身卿与陪折腰受辱始归来岁年不禁衰容改天地犹容笑口开君似坡仙分铁杖我如洛老托春盃郭门西转青塘路却欠闲田种芋魁

叔和再用前见壽韵贻诗再和二首

里巷周旋得屡陪过门兼辱好诗来清如庐瀑千寻落壮压衡云万里开佳气长浮茅屋雨清风犹在菊花盃錢铿岁月应分授簸弄明珠到斗魁

庭下莱衣曾共陪城西谢墅许频来秋风白发千茎短暮雨黄花一丈开雁背云寒谁寄字蟹螯霜晚预持盃小春天气无多日却报庭梅早试魁

九日萧孚有约诸贤登高遂访青龙寺午至桂溪桥饮于小庵晚登庵後山藉草松下浩歌痛饮举酒酹野坟又呼樵童为山歌行者属目赋诗二首

朝寻古寺石啮屨暮上崇丘风掠冠狂饮眼看红日尽高歌声入碧云寒乱峯犹作太古色野墓不知游客欢何必龙山为故事赋诗留与後人看

九日同登西郭墅古人落帽我巍冠孤城雁过秋台回半岭樵归暮笛寒岁旱黄花难早折年衰美酒强为欢山歌雅曲相和发惊倒行人注目看

又和同游二首

引盃常在衆人先盃里青青见远天白发偏惊人少壮黄花不管世?妍长云老雁如行客落木空山又去年欲唤八仙同醉饮酒中聊复托逃禅

随意登临处处过何须泰华与岷峨九州佳节吾生老千载清樽少者多晚日杖头能一醉秋风枣下不堪歌凤山此日荒凉路曾见黄花拥翠蛾

彭叔和和余九日诗次韵

共醉黄垆无吕安重阳谁与正纱冠百年风雨鸣蛩晚万里江山老雁寒陶令凄凉无菊对杜陵潦倒奉人欢城西赖有彭居士来往真能耐久看

罗履贞同游石洞

彷彿逃秦第几源寒花流水绕溪田石门千尺关元气野屋一村开洞天高塚鹤归忘岁月深山老树识神仙与君共酌廉泉酒小住人间五百年【是日履贞初度】

丁巳人日袁本清邀诸公郊行次刘尚友韵

古来人日自难晴乘兴招邀一笑真山寺徘徊频避雨路车徐疾各行春连峯下瞰千家屋絶阁还空一世人花事从今当渐盛不妨来往更相亲

次日再用韵

已雨犹留一日晴东风邂逅谒羣真【是日出城西北多入仙宫佛寺】江山又见新年客城郭曾经百代春能读残碑犹我辈纵谈旧事有何人夜归未觉沙堤湿炉火窗书更独亲

寄题翠屏晚对斋

幽居缥缈出修林读易焚香坐夕陰归鸟不知元化役青山俱是古人心鰲峯云散天如画玉峡风来树亦琴用世驱驰成底事始知一静抵千金

送曾韞晖赴京任檀州学正

芳年儒正紫貂裘北出都门亦壮游五季山川分汉界太平学校过檀州禁杨拂檠黄金色泮水通城碧玉流寄语向来勒碑客笔锥倘可到封侯

壬子八月十四夜对月

万里轻陰晚忽收天公有意作风流今年对月又为客明日无云始是秋多病情怀成老态早凉天气似中州少陵儿女痴何似共景悬知不共愁

十五夜再和二首

银河垂屋夜氛收卧看长星一点流万古尘劳余好景四时风致是中秋天悬海外三千界月满人间几百州殷庾升沉俱不见即时有酒未须愁

林下盃盘夜未收尊前何必尽名流人生快意元轻日客里中年最感秋酒满恨无歌赤壁月明闲听说扬州故人只隔行云外剩着新诗寄四愁

送赵光远道州寧远税使

故家乔木鬱衣冠小试司征第几班鹏翼未抟千仞外马蹄初踏万山间门当远峯花连屋县

接清溪水遶关诗课书程应不减东风早送锦衣还

忆夙二首

举世堂堂福祿人衰門岬咎獨何深學違素志元安命老哭才孫最損心暑載漁舟翁挽柩夜
歸僧屋鬼同林庭前桧竹陰陰在陳迹如今豈可尋

清姿方頰兩眉揚從我東西近我長諸子誰能高意氣十年却悔學文章眼前言笑疑生死篋
里詩書半在亡坐愧太丘真有德賢孫迎客立成行

送宋趙儀赴貴德知州

秋風千騎擁旌麾畫角高吹出塞詩綠水山川唐國界朱轡人物漢官儀信知懷土非男子更
覺專城貴壯時三葉郎官人白首向來顏驥有誰知

次韻蕭上舍仁叟賦杭州舊游

帝城鐘鼓雨初晴御柳春烟繞禁青萬落湖山天遠近百年歌舞夢酣醒別離共嘆秋雙鬢興
廢惟余月一庭寄語遺編須愛重清時要聽伏生經

和學翁兄【以下多前至元戊子己丑間作】

晴閣題詩初振袂暮山听雨更懷家功名有分可通袖變化難期本算沙無地早栽他日樹有
愁偏見客中花衆緣起滅從來妄欲掃塵埃看法華

和孚有

山雪半消如白衣樓高病眼眩離離微鐘雨濕依林麓飢鳥天寒下水涯潦倒醒狂那敢醉蹉
跎晚合政如痴十年聚散今成又長憶江頭共立時

和刘咸吉

飢鳥翩翩欲下池天寒籬落雪消遲一年又向清談盡此士能令終日思江水送人驚草草山
云催句助奇奇春深故里桃花路准擬掀髯讀寄詩

新年簡彭琦初

今日新年春意動梅花一片隔溪飛樽前風物年年改兵後衣冠處處稀樂意百年能几遇故
園何日與君歸昨朝扰扰成何事惟有塵埃滿素衣

题萧将军庙次欧阳山立韵【萧将军庙在吉文山中碑无名字但载其提兵五万逐寇一日俱死】

将军汗漫化人城犹得游人小队行海上田横从有土山中邹湛竟无名东风亡国何曾战上日空江几度晴杜 粉陰耆老在陌头过马讶昇平

次友人花朝韵

此日晴暄自不多窗明递隐有云过山深听雨人犹卧病里逢春意若何四海交游无古道百年风雨得狂歌东林草木多生意飞杏青青过薜萝

中秋留故居兄弟对月分韵得多字

棘院功名风雨过柴门兄弟月偏多分诗莫作中年语对酒何妨壮士歌老桂欲花先扑袂长空无籁淡横波却思高馆吹箫罢卧听萧萧雨打荷

丙子岁除夜坐过半

长街钟鼓未闻声驱耗谁家发小钲世故千端人鬓改天轮万里岁功成烛花似报明年喜酒味聊供晚节情七十古稀欣尚健戲拈彩笔觉春生

新元【丁丑】

间巷重逢後至元却思丁丑乱离前藏家雪案三千卷閱世霜髯七十年枯槁恨无元亮酒衰慵不着子云玄窗梅剩作新年意颇觉三生有宿缘

春雪

开岁雨陰连十日雪寒兼与旧春同乾坤半落穷荒外楼阁横陈淡月中瑟瑟松篁山屋夜疎疎鼓角郭门风梅花惯与清寒敌却喜羣英未放红

雨中出郭访友

骤解冬绵复用绵江城二月社寒天野桃漠漠一村雨山屋冥冥半坞烟燕子未归风满面马蹄不度水生川惜无浊酒供清兴但把新诗荅暮年

次韵龙文璟送萧公着省亲池州二首

杨柳津头送客行杨花满路荡春情江南览胜重湖大男子从亲万里轻锦舫浮春宜丽日彩

衣趋郡及清明严君问讯烦多道要借光尘保至清

螺川日夜向东行不放思亲顷刻情珍饌远移榆谿美锦帆顺逐柳花轻山围吴楚青春濶天
泛江湖白日明好向芳年供世用直陪鸳鹭立西清

清明和李亦愚

煮茶闭户看残编风味凄凉似玉川春到名花偏久雨人逢佳节恨衰年棠梨野馆轻寒燕杨
柳人家薄暮烟新水夜来生郭外麦畦桑陇不论钱

送周仪道往池州谒萧经历

三月江南湖水平周郎理棹旧知津古来多附青云士秋浦今看白玉人燕子拂波江驿晓杨
花扑面桄桯春老亲不管离忧苦準拟秋风荐鄂新

和彭天玉雨中牡丹

待得名花值雨寒横斜粧泪洗铅丹霓裳仙子泉初浴碧袖宫花睡不乾絶色从来伤命薄好
春不肯借人看钝才难续酥煎赋三叹君诗似镢干

次韵龙文璟宜远楼共饮

草树连洲互短长倚阑搔首感行藏万家楼阁浮元气千载城池阅夕阳坐上笑谈形独槁向
来歌舞梦犹香【宜远楼旧为欧阳巽权燕饮歌舞之所】公墩我屋俱堪醉寓意何妨学列
庄

壽萧熙绩

药鼎丹炉不试烟绳牀麈尾似行仙山林犹见贞元士天地重开绛甲年竹简满堂供老读芷
花千斛着高眠旁人却怯酡顔故不是稽山棹酒船

壽萧熙明

高树清流四敞轩棋声永昼不惊蝉八千戏玩春秋海五十何知富贵年羽扇风流天下士药
壶潇洒地行仙壽觴不用人间酿夜泛荷花露满船

壽袁恭甫

先生无酒自顔酡笑掷人间玉叵罗金谷楼台随地胜铜人岁月入诗多邻翁重见三千履【

时迁芑城胡尚书旧府】春色分藏十二窝为问东瀛消息好青衫催染楚江荷

庚午春大霰戏作

海风吹雨旋成竖簌簌琤琤乱耳边一夜白云俱在地九州洪水复滔天已知世上无此洁谁在空中作许团若借齐奴供买妾不妨列屋贮婵娟

上巳晴和刘志霖路教

春色蒸人晕肉红小盃初许共东风过时不赏花薄命久雨得晴天有功歌舞岂知蚕市过升平应在麦畦中咏雩童子今俱壮不怪须髯蚤似翁

寄友

省吾堂後黄梅落大雪樽前倚紫丝近会匆匆愁更长暮山莽莽笛孤吹扬州他夜帆归好崇福看花马到迟露下空庭谈话絕偶然入兴一题诗

挽周耐轩總管

梦里诸公历历存夕阳怀抱与谁论江河春色流天地城郭居民有子孙过马时来廷尉宅敝裘欲老故侯园桐乡遗爱依然在风佩应归月下魂

挽赵学圣【程雪楼铭子昂书】

曾从羣彦识堂堂今作哀歌寄白杨异代风流存宝玦暮年出处重铜章褒衣犹起乡人敬白发闲看世故长柳墨韩碑真不朽槐阴事业属诸郎

挽洪菊潭

乔木江南可几人君如杞梓秀儒林一乡自重文翁化匹士能行后稷心道轨异同人百代经畬殖落意千金只今耆旧凋零尽白发秋风泪满襟

挽刘子清

人才从古混泥涂世论安能定智愚一语全城青史少千金散衆俗间无管萧无位虚长算縈灌成功本匹夫见说诔文余四十宝珠定慰墓中枯

挽饶玉甫

盛朝有志展才贤晚岁逃名托妙玄方外成功偏及物古来策士每成仙【尝赴都陈言】书
台花好春随屨诗屋云空夜语泉未信经纶虚一世不妨铭些寄千年

挽瑞州伍兴甫總管二首

豫樟连抱起微苗雨露涵濡托圣朝冶铁丙君雄郡国【以鼓铸兴】吹笙秦史立云霄松滋
学子千年廩洪浦行人万古桥能救民饥希富范恨无仙道继松乔

湖海成名范蠡船鬼神受役尉迟钱门开钟鼎三千客身阅云泥六十年智士经纶无槁项盛
时意气即飞仙柳枝骆马应犹在松柏春风綠遶阡

赏梅和刘景行韵

浅浅韶光淡淡梅新年笑口偶然开佳时风物宜诗句老境情怀托酒盃天地回春如有约明
时用世愧无才伏生九十知犹健倘有求书使者来【景行年九十】

龙文璟和余韵次谢并简汉英

二妙能诗旧有声笑人笔退似闻钲黄金苏子游偏远白首扬雄宅未成共信他年终用世相
逢一笑岂无情梅花池上先春发穀穀微风賸面生

七言絕

题京兆图後二首

谷拥穀函水注丰铜人草树几秋风山河万古原如昨历代成功自异同

连云宫阙照南山遗址荒荒白鸟还百代英雄何处去空遗尺纸在人间

题明皇并箫

青鸟西来太液池霓裳舞影落瑶墀并吹玉管同心调惟有姮娥月里知

题张敞画眉

京兆春风到柳枝翠帘缥缈远山奇梁鸿亦有齐眉乐不要人间黛綠施

游新淦兴善寺和彭自强三首

山风阁雨帽檐斜墟落秋阴菊未花豆叶鸣蛩行客迹
流水琮琤响涧矶棕花芋叶与阶齐木鱼昼静山僧出
独遶修廊看旧题
红叶山门半掩秋寺童不悟客清游楞严满案无人诵
庭下黄花一叶留
宿荷花庄

晚宿山庄待雨晴夜深云弄月痕明茅庐四面溪田遶
半是蛙声半水声
乙巳上元日晚入城

鞦韆蹴踏乱水笋舆宝马出纵横城中三市红灯动
江外千峯白雪晴
题萧孚有为罗履贞所作兰竹图二首

劒叶绀花万石间无谁可共此幽寒湘累纫尽秋风佩
未必曾来月下看【卷中有月】

岩笋横斜出穉龙林梢偃蹇受清风岁寒石友聊堪共
未许山王着此中【卷中有石】

题画江涛

人心不是巫瞿峡下笔奔腾起怒湍别有一初真止水
无谁肯画与人看

题李鹤田穆陵大事记後【宋自穆陵升遐元气尽矣时
攢宫属官李珣纪其本末颇详桥山剑舄历历如见异代
览之亦为凄然李吉水人号鹤田先生此本今在庐陵罗祖禹家其子中行以示余余因用鹤田先生陵下元夕韵以志感慨云】

陵寝巍巍十二阑西兴吹角浙江寒老臣无限遗弓泪
写与人间异代看

萧氏文会堂罗汉栢二首

秋风满眼古人稀虚馆重游老愈衰惟有亭前双栢树
昔年曾见往来时
叶修如柳色弥正干坚似桧身难长莫嫌生世春风少
岁晚相期傲雪霜

题刘侯所藏十八学士锡燕图

天策诸贤佐大功一堂密勿古人风当时上下同心处
只在从容锡燕中

癸卯元旦晴继复雪亦不废出谷日复晴归乡途宿上元观灯野庙随所赋得十絶

钟鼓笼铜报晓晴残灯曙色近帘明老来最忆儿时乐拜罢新年处处行

烛痕点点堕红银香影明窗缀曲藤春帖自题还坐久梅花瓶水渐生冰

市门处处系冰花灯影蛾云动绦纱走马城中三日雪不知春已入谁家

朱门日日泊高车陋巷冰枝积寸芽春色不随人意薄夜来潜到小瓶花

汾山人日马蹄忙悬胜轻寒剪剪黄闲笑梅花无媚骨至今不洗壽阳妆【庐陵城中人日士女多游汾仰寺】

杖履新年第一行江山残雪画初成春风岁岁藏何处又与人间作晓晴

聯袖吟诗不计程暮投村店屡占晴霜浓睡熟无人唤误待城头画角声【是日自城归遇学翁兄同宿于途】

雪後乔松旋作青村家沽釀白如银山中未见新年历闲剪桃梢试立春

綠麦黄栀染茧丝纸旗戏鼓祭丛祠少年风物今仍在别有伤心人未知

驿门北女卖蛾儿水屋红灯出树枝邻笛孤吹春未动一帘微雨似秋时

惜春

西郭桃花蜀锦机东池杨柳越娥眉少时不惜春光好老大逢春意始悲

江行春望

万里春晴万里风轻寒漠漠晚推篷江边篴竹冯夷庙一树桃花尽意红

赠李福元卖书作墨二首

经筵午茗坐白虎词館夜烛分隄麋人间书墨非无用澣統天寒我自知

秋风落落拈书卖白发悠悠被墨磨莫向朱门痴坐久小帘歌罢扫浓蛾

题松石图

受命大夫曾流节误恩三品亦蒙讥何如山谷闲松石阅尽兴亡与是非
题浓淡竹

远看如淡近看浓双立亭亭傲晚风俗眼未应轻拣择此君清致本来同
邻有废屋久闭金沙一枝忽穿屋山而出衆为惊顾然亦竟无一赏者
古屋幽花闭不知忽穿碧瓦怒横枝辛勤自致高堂外却得行人立顷时
炯炯花红立断烟终无把酒为渠怜东风阑槛金铃护未必真能絶世妍
元日

晓街泥浅马蹄过元日虽阴气已和处处桃花如二月东风应比去年多
五日

中年怀抱渐无惊节序蹉跎半客中案上离骚今不读一窗清梦卧南风
乙巳五月过泸江

抱田曲水走修蛇溪势如鸣万叠车山雨挟凉闲客扇渚云分暝失人家
城归途中春暮野阴风物苍然

津桥半断水如雷屋角古坟青草堆三月荒村春最惨万山微雨棘花开
新淦道中二首

道中老人旧相识怪我重来鬓似戟江桥流水今种田手记垂杨添十尺
沙坊江上海棠开红锦漫漫围古台死後有花不能看生前还解看花来
庚午春夏闲居即事五首

闲居山郭闭柴门过雨?花弄晚晴万叠松筠春遶屋日长敲枕听莺声
老托园林困雪霜橘株病悴蕙枯黄荼蘼独擅春风力无数新花出短墙

桃花梨花争满园金沙玉棠蜂鸟喧少年看花夜载酒老子看花春闭门

雨前种苒一两畦雨後柔脆堪作糜荒年不识琼酥味日晏三咽甘如飴

门掩薰风小小斋紫薇几尺正当阶谁言省掖偏宜种偶落山林亦自佳

谒萧定基墓二首

【至元甲申余客九冈暇日从萧瑞叔诸友过湓塘谒侍御史萧定基墓读王荆公所为神道碑至顺辛未八月六日重过其下则碑字多为樵牧所伤圯剥不完俯仰四十八年感慨系之】

故舍江边短麦畦少年履屐几徘徊当时良友今安在满眼秋风我独来【故舍所葬地名】

赤岭亏剜白水奔江涛高处复为田古人不见文章在皓首看碑意惘然

戏赠吴存道炼丹

十二春楼燕子风主人锤乳借颜红何如買取吴家乐长与姮娥住月中

乙巳岁晏连雪和学翁兄三首

半月山家雪满门苳畦菜圃净无痕呼童高斲梅花冻日贮煎茶水一樽

天寒絶粒闭柴门曙色满窗疑月痕起掬大荒浇渴吻恍然气象似洼樽

庭雀啾喧下竹门冰花万叠弄新痕岁除一雪奇如此但恨无诗无酒樽

题牧童骑牛图

山中无古亦无今牛背敲眠老树阴若使读书如李密岂无机事到渠心

题僧枯林兰

短筠峭石共清妍笔里幽香九畹传梦到高僧檀卜国觉来身在画图边

题春江烟雨图

春树苍苍白鸟飞小洲茅屋远依微一川烟雨无人渡坐看渔舟晚独归

题钱舜举画马用尚文韵二首【马与牧者背驰】

东风骛骀满帝里颠倒奚官独如此临冲未可轻一鸣伯乐死矣世无耳

刍菽区区困骑奇回头不受羴羴施画图尚有飞腾势未信当年买骨痴

题寒汀小雪二首

几树萧萧疎密雪一汀澹澹有无烟江空雁落寒如此只欠吟诗孟浩然

天寒老桧湿模糊沙上渔蓑一个无倘有羈人归未得定应误认白头乌【有数乌白头借用燕丹事】

横石渡候舟有感

沙边一树谁家李岁岁逢渠白作堆满眼青山衣袂湿又随春雨过江来

初秋和友人韵二首

高斋风竹夜幽幽病客无憀早觉秋华发半簪灯一点着书执笔笑何休

楼上窗扉面面开青山未接大江隈迴风一飒飞花住万丈晴空白雨来

再和

已将壮事换清幽坐见高槐六日秋佳客不来吾亦睡清风吹竹息休休

漠漠秋阴未肯开淡云疎雨满山隈与君共熟江头路要待他年梦里来

午慵

春步时倾花下酒午慵却放案间书倚窗贪听溪流急篁竹翻翻雨入裾

倚楼

留滞孤城又晚秋怀来真倚仲宣楼青山东下连瓜圃坐看耕人晚未休

客夜秋风

清梦初回心似水红尘未了鬓生丝高风卷地千林语莫忘南山听雨时

春晴二首

春暮无人到草莱荼蘼如雪过墙来翛然闲忆人间事野鸟窥檐梦自回

西园梨雪远如天白水鸣田乱不分野客逢春无一事独寻幽草坐看云

城归途中

疾风山际两三骑残雪回头无数鸦一路水泥行犊迹隔溪篁竹护人家

陪艾幼玉郭逢春诸公郊行二首

家家墙短花自好日日春深人不知行过小桥还酌酒坐看流水却成诗

向日一出花未开今晨红减白皑皑九州八极春色好年年村落看春回

晴嬉

晴嬉逐队未应稀芳草谁家骖褭肥人散酒醒成独感倚阑看尽白云飞

题秋日江村图

黄叶秋风趁蹇驴平洲远岭雁相呼野舟尽日闲无用只与人间作画图

赠墨客罗德辉三首

老李烟煤後代尊一生流落价难论向来贵贱真堪笑车载街头漆寺门

汉馆隄麋千载重魏台螺石四方崇世间真伪谁能辨贵在当时出殿中

老屋秋风络纬啼寒胶万杵捣霜迟只今天下无真墨重见潘郎世未知

题罗宗仲所藏水墨古树图四首

枝如腾龙攫云外根若伏虎蟠石间苍茫欲与元气合万牛不动安如山

大株枝断削如铁小树叶茂浓如云人间霜雪来未已贞脆当从晚节分

古梢络藤雾雨注长根窞石虬龙奔山边新树虽好在俯视仅可同儿孙
太阴泱漭万古雪元气淋漓千尺丝岂无仙人食琥珀吹笙夜踞苍龙枝
对花偶成

芍药花前闲日坐海棠枝下醉时眠自今岁岁穷心赏已负花开四十年
题宫中所扫除弃余【宫中每日所扫粪必待宫官点视而後弃】

承平宫禁无他事检点犹能到弃余天下岂无当念虑君王用意定何如
题李陵宴苏武图二首

居延山下马成羣伎乐声高夜入云初志消磨如卫律殷勤致酒教苏君
属国难酬白发郎延平谁与吊沙塲陇西使者如云出却要迎归右校王
开岁六日游仁能寺

郭外樱桃已亚枝寺门独立几多时诗人堂下春寒浅时有居民借络丝
重涉泸江二首

立沙稍稍行人聚踏水悠悠去鸟双回首十年来往路只添华发照寒江
渚篱渔网悬秋日山寺人家起夕烟欲共故人评好句微风吹袖水痕圆
赠曾维新工篆章

风吹铁笔雪珊珊篆法推寻古意还老去姓名谁记忆若为鐫刻得人间
题罗稚川小景

小树敲风老树枯前汀暮靄半模糊骑驴人指高楼去不识渠家可宿无
渊明临流图【一童携琴一张酒一壶】

三尺枯桐一斗壘秋风曳杖偶徘徊不知当日临流意四海何人与共来

苏武持节图

朔雪漫沙几白羝严风吹冻满毡衣少卿驼马弥山谷何似中郎一节归

题枯林兰【僧号枯林】

绀花幽幽隐道韵剑叶披披吹晓寒城西四月好天气时过高僧有画兰

和赵子昂寄冯海粟二首【长沙易中卿得此卷揭曼硕有和易复索余和】

古今翰墨散如尘昼夜荒荒走两轮莫说锺王今不见湖州学士白杨新

老粟清名雪作宫揭家健笔骥追风闲思海内文章士敲枕蕉花细雨中

玉笥山中有白鹤花顶翅宛然类鹤王兰友作诗送至用韵二首

缟衣玄爪立前除天上人间剪纸糊除却青青三四叶月明满地却全无

千载苏仙上帝乡空余琪草似人长夜凉环佩不知处梦觉满山风露香

邻家旧有牡丹久移植荒圃诗以讯之二首

十二阑干照日妍此花篱落故依然主人不待姚黄看寒食东风又一年

野蔬采采蔽敲叶恶蔓离离蚀朽根草木升沉春不管人间可独有长门

和萧克有主簿沅州竹枝歌七首

人生结交莫如月人生行路莫嫌热热当三伏易变秋月能万里长随客

沅人健饭无盘蔬沅土多热无鸡苏官船自有龙凤茗试写松风斑鹧鸪

沅阳江石生波涛南风吹起十丈高劝君上滩牢把柁须要一篙胜一篙

一州一州木有枝一江一江水可炊北人奈事不怕险南人多情易思归

十月天寒买团蒲五月天热水可沽穷通随时不可强当贵有命何悲无

山州多江水如烟篙师不耕船如田江流避石还易去船行着篙还易牵

黠胥取利如斧樵苛法销骨如膏烧官规难减寘布税县政莫急蛮人徭

赣州廖氏云锦亭四首【义取坡公扫却天孙云锦段之句】

老仙妙语落人寰千载江山未许闲亭下荷花三万顷疑公犹在往还间

小院疎帘四面垂卧看千载叶间龟天孙为织秋江景付与年年作好诗

华亭翠瓦水边家珍簟焚香浅试茶梦与齐奴同富贵小舟夜宿最深花

万柄萧萧浸玉虹夜深银汉在楼东世间风月无人识长在罗纨绮縠中

题墨梅二首

岁晚江南霜雪天一枝玉立小窗檐古来皎洁人多少受命风埃未可嫌

红紫相推独作魁风姿如雪照人开如何爱近含章额误染眉间昨夜煤

寒食

鸟语东林万竹修轻阴漠漠意如秋高斋寒食梨花落敲卧书牀看水流

上巳独坐三首

萧然门巷野人家山鸟行阶啄草芽上巳焚香看易罢自冲微雨整幽花

春城车马似长安预恐名花一日残邻屋玉笙吹彻夜闲庭危坐牡丹寒

春晚无惊放酒卮药炉沸似雨来时柴门昼闭庭花落时有山僧问近诗

秧老歌五首【效王边体江南农夫插秧上下田长歌相应和其词似竹枝而浅直】

三月四月江南村村插秧无朝昏红妆少妇荷饭出白头老人驱犊奔

五更负秧栽南田黄昏刈麦渡东船我家麦田硬如石他家秧田青如烟

昨日田秧乱如毛今朝南风摇翠涛瓮头浊酒莫厌尽厌酒尽时秧又高

春寒风雨来满川牛蓑走遍东西阡郎君骑马莫问渡江头自有官渡船

前年东家得早禾去年西家粳稻多我家今年定何似努力耕作无奈何

哭萧孚有七首

【孚有方厓御史之季子少甚颖异从余游其为诗短篇高古幽淡迫逼韦王长篇丰赡逸宕别有风致皆欲与古人争衡至元三年丁丑七月一日病死士友伤之以其有才而未着其可憾如逢原敦夫九月九日余既送殡城东归途赋以寄慨感云尔】

去年九日共登高絶岭长歌意颇豪今日送君谁共哭一间殡屋大江皋

画图摩诘神情远诗律苏州意句清身後生前千古恨荒荒白日下高城

水檻蒲萄裊裊垂方牀卧病语移时如何一日才疎隔永别终无见面期

敦夫短命世同悲伯道无儿天不知白首慈亲髻髻妾一船微雨哭麻帷

文会堂中碧树柯评诗赌酒客频过如今深鎖秋风满想见阶苔日日多

翰墨周旋二十春莫年卜宅遂为隣永新门外双松树无复相携踏月人

螺湖桥外草如烟螺子山前水接天应有故人来下马愁云深处是新阡

诗余

满庭芳【次韵赋萍】

碧唾成花翠玑浮雾水边裙影知谁半沟未合脂水过生肥小扇迎风试拂翩翩去还复差池凭阑处怕伊贪见了却忘归 桥西青不住乳鸳行破一瞬沦漪看疎如有恨密似相依元是情根种得更千古欲尽何时重相约章台春腻还上最长枝

西江月

偏是一春憔悴被人闲赋阳台扇遮微雨傍墙回花信余寒柳外
绣果未成双荔打鸦摘尽新梅暗占蝴蝶却飞来睡起斜阳犹在

忆秦娥【初见桃花】

春愁浅窥人忽见桃花脸轻寒初透小窗犹掩
东风裙湿湘波颭相逢处处如人面刘郎老去怕伊重见

谒金门

春睡倦自拣花枝行遍昨日新红今日变细按将袖染翠扇迎风扑面双燕飞来还转帘外杨花帘里燕相

逢如未见

青玉案【和友人壽席上】

春来十日春多少扶路金钗试灯早旋剪壽幡飞蝶小东家垂柳西家明月风物年年好种桃三千今余九谁道桃花笑人老万事浮云如过鸟浣溪佳句柴桑新酒天地何时了

桂隐诗集卷四

桂隐诗集跋

桂隐诗集跋

先生平生诗文流落过半少年所作多经诸老评泊以为高逼古人今皆不复序於前者谓其不待序也观者必自能识之文见陆续刊行今先梓其诗十四卷至正元年春仲日进士门人罗如簏宗仲谨识